

# ତୃଣାକ୍ଷର

ଶ୍ରୀବିଭୂତିଭୂଷଣ ବନ୍ଦ୍ୟୋପାଧ୍ୟାୟ

ମିତ୍ରାଳୟ

୧୦, ଶାମାଚରଣ ଦେ ସ୍ଟ୍ରିଟ୍, କଲିକାତା

—হুই টাকা চারি আনা—

এই লেখকের—

অনুবর্তন

অভিযাত্রিক

পথের পাঁচালী

অপরাজিত

দৃষ্টি প্রদীপ

আরণ্যক

মেঘমল্লার

মোরী ফুল

জন্ম ও মৃত্যু

যাত্রাবদল

কিন্নর দল

আদর্শ হিন্দু হোটেল

বেণীগির ফুলবাড়ী

বিপিনের সংসার

হুই বাড়ী

কেদার রাজা

স্মৃতির রেখা

মরণের ডঙ্কা বাজে

চাঁদের পাহাড়

বিচিত্র জগৎ

হীরা-মানিক জলে







উৎসর্গ  
সুহৃদ্বর  
শ্রীযুক্ত সজনীকান্ত দাসের  
করকমলে

বিভিন্ন অবস্থায় ও বিভিন্ন পারিপার্শ্বিক পরিবর্তনে মনের মধ্যে যে অনুভূতি জাগে, আমার এই দৈনন্দিন লিপিতে তাহাই প্রতিবিম্বিত হইয়াছে মাত্র। কখনো অন্ধকারে, কখনো জ্যোৎস্নাস্নাত রজনীতে, কখনো স্নুখে, কখনও দুঃখে, গহন পর্বতারণ্যে বা জনকোলাহলমুখর নগরীতে, বিভিন্ন মানুষের সংস্পর্শে বা শাস্ত নিঃসঙ্গতার মধ্যে মন যেখানে নিজেকে লইয়াই ব্যস্ত ছিল— এই সব রচনার সৃষ্টি সেখানে। পুস্তকে বা পত্রিকায় ছাপার অক্ষরে প্রকাশের জন্ম এগুলি লিখিত হয় নাই। সেজন্য বহুস্থলে এই রচনাগুলির মধ্যে এমন জিনিস দেখা দিয়াছে যাহা নিতান্তই ব্যক্তিগত। লিপিকৌশলের ইচ্ছাও ইহাদের মূলে ছিল না—হয়তো দ্রুত ধাবমান রেলের গাড়ীতে, কিংবা পথচারী পথিকের স্বল্প অবসরে, পথিপার্শ্বের কোনো বৃক্ষতলে বা শিলাসনে যে সব রচনার উদ্ভব—লেখকমনের কারিকুরি প্রকাশের অবকাশ সেখানে কোথায়? যে অবস্থায় যেটি ছিল, অপরিবর্তিত ভাবেই সেগুলি ছাপা হইয়াছে। আমার জীবনে ব্যক্তিগত অনুভূতির অতীত ইতিহাসের দিক হইতে ইহার মূল্য আমার নিজের কাছে যথেষ্ট বেশি। বহু হারানো দিনের মনের ভাব ও বিশ্বত অনুভূতিরাজি আবার স্পষ্ট হইয়া ওঠে। যে সব অবস্থার মধ্যে আর কখনো পড়িব না, ক্ষণকালের জন্ম তাহার মধ্যে আবার ডুবিয়া যাই এগুলি পড়িতে পড়িতে,—ব্যক্তিগত সুখদুঃখকে বাণীমূর্ত্তি দেওয়ার ইহাই একটি বড় সার্থকতা বলিয়া মনে করি। আমার জীবনের ও জগতের বর্হিদেবে খাঁহারা অবস্থিত— তাঁহারা এগুলি হইতে কি রস পাইবেন আমি জানি না, তবে একথা অনস্বীকার্য যে কৌতুক বা কৌতূহলের মধ্য দিয়া একটি নৈর্ব্যক্তিক আনন্দের অনুভূতি জীবনের সকল দর্শকের পক্ষেই স্বাভাবিক—কারণ ইহার মূলে রহিয়াছে মানবমনের মূলগত ঐক্য।

শ্রীবিভূতিভূষণ বন্দ্যোপাধ্যায়

এই গ্রন্থের রচনাকাল ১৯ জুন, ১৯২৯ হইতে জানুয়ারী, ১৯৩৫ পর্যন্ত

এক মাস পরে আজ আবার কলকাতায় ফিরেছি। এই এক মাস দেশে কাটিয়েছি অনেক কাল পরে। মা মারা যাওয়ার পরে আর এত দীর্ঘদিন একসঙ্গে দেশে কখনো থাকিনি। এই এক মাস আমার জীবনের এক অপূর্ণ আনন্দের অধ্যায়। Dean Inge যাকে ঠিক Joy of Life বলেছেন, তা আমি এই গত মাসটীতে প্রাণে প্রাণে অনুভব করেছি। সেরকম নিভৃত, শান্ত, শ্রামল মাঠ ও কালো জল নদীতীর না হোলে মনের আধ্যাত্মিক পুষ্টিকেমন করে হবে? শহরের কর্মকোলাহলে ও লোকের ভিড়ে তার সন্ধান কোথায় মিলবে? তাই যখন জটাখালির ভাঙ্গা কাঠের পুলটাতে দুধারের মজা গাওঁ ও বাঁওড় এবং মাথার উপর অনন্ত নীলিমা, নীচে ঘনসবুজ গাছপালা, ধানক্ষেত, বিল, গ্রামসীমার বাঁশবন, মাটির পথের ধারে পুষ্প-ভারনত বাবুলা গাছের সারি, দূরের বটের ডালে বৌ-কথা-ক' পাখীর ডাক—এসবের মধ্যে প্রতি বৈকালে গিয়ে বসতাম, তখন মনে হোত আর শহরে ফিরে যাবার আবশ্যক নেই। জীবনের সার্থকতা অর্থ উপার্জনে নয়, খ্যাতি প্রতিপত্তিতে নয়, লোকের মুখের সাধুবাদে নয়, ভোগে নয়—সে সার্থকতা শুধু আছে জীবনকে গভীর ভাবে উপলব্ধি করার ভেতরে, বিশ্বের রহস্যকে বুঝতে চেষ্টা করবার আনন্দের মধ্যে, এই সব শান্ত সন্ধ্যায় বসে এই অসীম সৌন্দর্যকে উপভোগ করায়। সেকথা বুঝেছিলাম সেদিন তাই সন্ধ্যার কিছু আগে জীবনের এই অনন্ত গতি-পথের কথা ভাবতে ভাবতে অপূর্ণ জীবনের আনন্দে আত্মহারা হয়ে পড়েছিলাম। সন্ধ্যার অন্ধকার গ্রাহ না করেই কুঠীর মাঠের অন্ধকার-ঘন, নিৰ্জন ও শ্বাপদসঙ্কুল পথটা দিয়ে একা বাড়ী ফিরলাম। আর নদীর ধারে বসে অপূর্ণ আকাশের রং লক্ষ্য করে তার পরদিনও ঠিক সেই মনের ভাব আবার অনুভব করেছিলাম।

এরকম এক একটা সময় আসে যখন বিদ্যুৎচমকে অনেকখানি ঝড়ের রাস্তা একেবারে দেখতে পাওয়ার মত সারা জীবনের উদ্দেশ্য ও রতা যেন এক মুহূর্তে জানতে পারা যায়, বুঝতে পারা যায়। শুধু সৌন্দর্য্যই এই বিদ্যুৎ,—আলোর কাজ করে মানসিক জীবনে। কিন্তু এই

সৌন্দর্য্য বড় আপেক্ষিক বস্তু। একে সকলে চিন্তে পারে না, ধরতে পারে না। কানকে, চোখকে, মনকে তৈরী করতে হয়, সঙ্গীতের কানের মত সৌন্দর্য্যের জ্ঞান বলে একটা জিনিসের অস্তিত্ব আছে। শিমূলগাছের মাথাটার উপরকার আকাশটার দিকে চেয়ে দেখে নিয়ে বামে নতিডাঙ্গার দিকে চোখ ফিরিয়ে নিতেই রক্তমেঘস্তূপ যেন যুগান্তের পর্ত শিখরের মত আকাশের নীল স্বপ্নপটে—তার ওপারে যেন জীবন পারের বেলাভূমি আনন্দ আবছায়ার মত সন্ধ্যার ধূসর অঙ্ককার একটু একটু চোখে পড়ে।

রোজ আমাদের বাড়ীর পাশের বাঁশতলার পথটা দিয়ে যেতে যেতে বাল্যের শত ঘটনা, কল্পনার আশা, দুঃখস্বখের স্মৃতি মনে জেগে উঠত—এই সব বনের প্রতি গাছপালায়, পথের প্রতি ধূলিকণায় যে পঁচিশ বৎসর আগের এক গ্রাম্য বালকের সহস্র স্মৃতিদুঃখ জড়ানো আছে, কেউ তা জানবে না। আর এক শত বৎসর পরে তার ইতিহাস কোথায় লেখা থাকবে? কোথায় লেখা থাকবে এক মুগ্ধমতি আট বৎসরের বালক জীবনে প্রথম গ্রামের উত্তরমাঠে তার জেঠামশায়ের সঙ্গে বেড়িয়ে এসে কি আনন্দ পেয়েছিল? কোথায় লেখা থাকবে তার মায়ের-হাতে-ভাজা তালের পিঠে খাওয়ার সে আনন্দের কাহিনী? সেদিন সন্ধ্যার সময় আমাদের ঘাটে স্নান কর্তে নেমে নতুন-ওঠা চতুর্থীর টাঁদের দিকে চোখ রেখে ভাবতে ভাবতে এইসব কথা বেশী করে মনে জাগছিল। গোপাল নগরের বারোয়ারীর যাত্রা দেখতে গিয়ে তাই সে ছেলেটার কথা মনে পড়লো যে আজ পঁচিশ বছর আগে কৃষ্ণঘোষের তামাকের দোকানের বারান্দাতে বসে তার বাবার সঙ্গে যাত্রা দেখতে দেখতে দময়ন্তীর দুঃখে ফুঁপিয়ে ফুঁপিয়ে কাঁদতো।

সেসব কথা যাক। অদ্ভুত এই জীবন, অপূর্ব এই সৃষ্টির আনন্দ। নিৰ্জনে বসে ভেবে দেখো, মানুষ হয়ে উঠবে।

অনেককাল পরে গরীবপুরে নিমন্ত্রণ খেতে গিয়ে মিনু ও তার বোন রাণীর সঙ্গে দেখা হোল। আজ প্রায় ষোল বছর আগে ওদের বাসাতে বাড়ীর ছেলের মত থাকতুম। তখন আমিও বালক, ওরা নিতান্ত শিশু। সেই মিনুকে যেন আর চিন্তে পারা যায় না। এতবড় হয়ে উঠেচে, এত দেখতে সুন্দর হয়েছে। রাণীও তাই। কতক্ষণ তারা আমাকে কাছে বসিয়ে পুরানো দিনের গল্প কর্তে লাগলো আপনার বোনদের মত, ছাড়তে আর কিছুতে চায় না। শেষকালে রাণী তার শশুর বাড়ীর ঠিকানা

দিয়ে কল্কাতায় গেলেই যেন সে ঠিকানায় গিয়ে তার সঙ্গে দেখা করি, এ অহুরোধ বার বার করলে।

এবার আরও সকলের চেয়ে ভাল লেগেচে যেদিন রামপদর সঙ্গে বেড়াতে বেড়াতে মোল্লাহাটি ছাড়িয়ে পাঁচপোতায় বাঁওড়ের মুখে গিয়েছিলুম। এক তালীবনশ্যাম গ্রামরাজি। কি আকাশের নীল রং, ইছামতীর কি কালো জল। নৌকাতে আসবার সময় জ্যোৎস্নারাজে নিৰ্জ্জন কাশবনের ও জলের ধারের বগ্গেবুড়ো গাছের ও মাথার উপরকার নক্ষত্রবিরল আকাশের কি অসীম সম্ভাব্যতার ইঙ্গিত।

এই আনন্দের দিনের ইতিহাস পাছে ভুলে যাই, তাই লিখে রেখে দিলুম। অনেককাল পরে খাতাখানা খুলে দেখতে দেখতে এইসব আনন্দের কাহিনী মনে পড়বে তাই।

একটা কথা আজকাল নিৰ্জ্জনে বসে ভাবলেই বড় মনে পড়ে। এই পৃথিবীর একটা spiritual nature আছে, আমরা এর গাছপালা, ফুলফল আলোছায়া, আকাশ বাতাসের মধ্যে জন্মগ্রহণ করেছি বলে, শৈশব থেকে এদের সঙ্গে ঘনিষ্ঠ পরিচয়ের বন্ধনে আবদ্ধ বলে, এর প্রকৃত রূপটা ধরা আমাদের পক্ষে বড় কঠিন হয়ে পড়ে। এই অপূৰ্ব সৃষ্টি যে আমাদের দর্শন ও শ্রবণ-গ্রাহ্য বস্তু-সমূহ দ্বারা গঠিত হয়েও আমাদের সম্পূর্ণ অজ্ঞাত ও ঘোর রহস্যময়, এর প্রতি অণু যে অসীম সম্ভাব্যতায় ভরা, মানুষের বুদ্ধি ও কল্পনার অতীত এক জটিলতায় আচ্ছন্ন, তা হঠাৎ ধরা পড়ে না। হঠাৎ বোঝা যায় না, কিন্তু কতকগুলি প্রাথমিক জ্ঞানকে ভিত্তি করে অগ্রসর হোলে আপনা আপনি গভীর চিন্তার মুখে ধরা দেয়। এক্ষেত্রে একটা ভুল গোড়া থেকে অনেকে করেন। সেটা এই যে পূর্কের জ্ঞান মনের মধ্যে এসে পৌঁছলে অনেকে জ্ঞানের চোখে পৃথিবীর দিকে চেয়ে বলেন জগৎ মিথ্যা ও মায়াময়।

বেদান্তের পারিভাষিক 'মায়া' ছাড়াও আর একটা লৌকিক বিশ্বাসের 'মায়া' আছে, যেটাকে ইংরাজিতে Illusion বলে অহুবাদ করা চলবে। বেদান্তের মায়া Illusion নয়, সে একটা দার্শনিক পরিভাষা মাত্র, তার অর্থ স্বতন্ত্র। কিন্তু যারা লৌকিক অর্থে 'মায়া' শব্দটা গ্রহণ করেন ও অর্থগত তত্ত্বটা মনে মনে বিশ্বাস করে হুট করে ওঠেন, তাঁরা ভুলে যান

মানুষও তো এই অসীম রহস্যভরা সৃষ্টির অন্তর্গত। তাঁর নিজেই মধ্যে যে আরও অনেক বেশী সম্ভাব্যতা, অনেক বেশী আধ্যাত্মিকতা, অনেক বেশী জটিলতা, আরও বেশী রহস্য। নিজেকে দীন বলে ‘মায়ী’ কর্তৃক প্রতারণিত দুর্বল জীব মনে করার মধ্যে যে কোনো সত্য নেই, এটা সাহস করে এঁরা মেনে নিতে পারেন না।

নীরোদদের বাড়ী কাল সন্ধ্যার সময় বসে একটা প্রবন্ধ পড়ছিলুম একখানা ইংরাজী পত্রিকাতে। এই কথাই শুধু মনে হোল আমরা জীবনে একটা এমন জিনিস পেয়েছি, যা আমাদের এক মুহূর্তে সাংসারিক শাস্তিহ্রদের ওপরে এক শাস্ত আনন্দ জীবনের স্তরে উঠিয়ে দিতে পারে—অনন্তমুখী চিন্তার ধারা প্রবাহিত করে দেয়, এক মুহূর্তে সংসারের রং বদলে দেবার ক্ষমতা রাখে। যখনই জগতের প্রকৃত রূপটির যে অংশটুকু আমরা চোখে দেখতে দেখতে যাই তা সমগ্রতার দিক থেকে আমরা দেখতে পাই, পরিপূর্ণ ভাবে জীবনকে আনন্দ করবার চেষ্টা করি—ভূতত্ত্ব, প্রাণীতত্ত্ব, আকাশ, নীহারিকা, নক্ষত্র, অমরত্ব, শিল্প, সৌন্দর্য্য, পদার্থতত্ত্ব, ফুলফল, গাছপালা, অপরাহ্ন, জ্যোৎস্না, ছোট ছেলেমেয়ে, প্রেম—তখনই বুঝি এই বিশ্বের সকল সৃষ্ট পদার্থের সঙ্গে একত্ব অনুভব করা ও চারিধারে আত্মাকে প্রসারিত করে দেওয়াই জীবনের বড় আনন্দ। ‘আনন্দ’ উপনিষদের পারিভাষিক শব্দ, লঘু অর্থে সংসার চলে এসেচে কিন্তু আনন্দ কথার প্রকৃত অর্থ উচ্চ জীবনানন্দ। “আনন্দাঙ্কেব খলু ইমানি সর্ব্বানি ভূতানি জায়ন্তে” এখানে আনন্দের কোনো বর্তমান প্রচলিত সাধারণ অর্থ নেই।

আজ খুব বেড়ানো হোল। প্রথমে গেলুম বকুর ওখানে। তার মোটরে সে প্রবাসী আফিসে আমায় নামিয়ে দিয়ে গেল। সেখান থেকে গেলুম সায়েন্স কলেজে। অনেকক্ষণ অপেক্ষা করবার পর ডাঃ রায় এলেন। তিনি সিগ্গিকেটের মিটিংএ গিয়েছিলেন। তাঁর সঙ্গে খানিকটা কথাবার্তার পর দুজনে বেরিয়ে পড়া গেল, একেবারে সোজা সারকুলার রোড দিয়ে মোটর হাঁকিয়ে প্রিন্সিপ্ ঘাট। বেশ আকাশের রংটা, ক’দিন বৃষ্টির জ্বালায় অতিষ্ঠ করে তুলেছিল, আজ আকাশ পরিষ্কার হয়েছে, গন্ধার ওপারে রামকৃষ্ণপুরে ময়দাকলগুলোর ওপরকার আকাশটা তুঁতে রংএর, পশ্চিম আকাশে কিন্তু

অন্তর্স্বর্ষের রং ফোটেনি—কেন তা জানি না। ডাঃ রায়ের সঙ্গে বর্তমান কালের তরুণ সাহিত্য সম্বন্ধে বহুক্ষণ আলোচনা হোল—তাঁর মত ভারী পাকা ও যুক্তিপূর্ণ। সকালে সকালে ফিরলাম, তিনি আবার বৌবাজারের দোকানটা থেকে খাবার কিনলেন। আমায় বল্লেন, মাঝে মাঝে দেখা করবার জন্তে।

জীবনে যদি কাউকে শ্রদ্ধা করি, তবে সে এই ডাঃ পি. সি. রায়কে। সত্যিকার মহাপুরুষ। বহু সৌভাগ্যে তবে দর্শনলাভ ঘটে, একথা আমি মনে প্রাণে বিশ্বাস করি। অধিকক্ষণ কথাবার্তা কইবার পরে মনে হয় যে সত্যিই কিছু নিয়ে ফিরুচি।

আজ প্রবাসীতে গিয়ে\* বইটার প্রথম ফর্ম্যাটা ছাপা হয়েছে দেখে এলুম। সে হিসাবে আমার সাহিত্য-জীবনের আজ একটা স্মরণীয় দিন। ওটা ওদের ওখানে কাল শনিবারে পড়া হবে। ডাঃ কালিদাস নাগ ও সুনীতিবাবু কাল থাকবেন বলেচেন।

সেখান থেকে গেলুম দক্ষিণাবাবুর গৃহ-প্রবেশের নিমন্ত্রণে কালিঘাটে। সুরেশানন্দের ছোট একবছরের খোকাটা কি সুন্দর হয়েছে! ওকে কোলে নিয়ে চাঁদ দেখালুম—ভারী তৃপ্তি হোল তাতে। এরা সব কোথা থেকে আসে? কোন্ মহান আর্টিষ্টের সৃষ্টি এরা? অনন্ত আকাশে কালপুরুষের জ্যোতির্শ্ময় অনল জ্বলতে দেখেচি, পূর্ব দিকপালের আগুন অক্ষরে সঙ্কেত দেখেচি, কিন্তু সে রুদ্র বিরাটতার পিছনে এই সব সুকুমার শিল্প কোথায় লুকানো থাকে? কি হাসি দেখলুম ওর মুখে! কি তুলতুলে গাল! ...

একটা উপমা মনে আস্চে। আমাদের দেশের বারোয়ারীর আসরে কে যেন রবিবাবুর মুক্তধারা থেকে 'নমো যন্ত্র, নমো যন্ত্র, নমো যন্ত্র' ওই গানটা আবৃত্তি করচেন। ওর ধ্বনির সঙ্গে ভাবের অপূর্ব যোগ, ওর মধ্যে যে অদ্ভুত ক্ষমতা ও চাতুর্য্য প্রমাণ পেয়েচে, তা কে বুঝ্চে? কিন্তু হয়তো এক কোণে এক নিরীহ ব্রাহ্মণপণ্ডিত বসে আছেন—আসর-ভরা দোকানদার দলের মধ্যে তিনিই একমাত্র নীরব রসগ্রাহী, কবির ক্ষমতা বুঝ্চেন তিনি। চোখ তাঁর জলে ভাস্চে, বুক হলে উঠ্চে।

বিশ্ব-সৃষ্টির এই অসীম চাতুর্য্য, এই বিরাট শিল্প-কৌশল, এই ইন্দ্রিয়াতীত সৌন্দর্য্য—ক'জন বুঝ্বে? দোকানদার দলের মত হাততালি দিচ্ছে হয়তো

সবাই। কিন্তু কে মন দিয়েচে ওদিকে—কে ভাব্চে এই অপূর্ব, অবাচ্য, অভাবনীয়, অদ্ভুত সৃষ্টির কথা!...মানুষের অভিধানে যাকে বর্ণনা করার শব্দ নেই।

এক আধজন এখানে ওখানে। Sir Oliver Lodge, Flammarin, Jeans, রবীন্দ্রনাথ, Swinurn এদের নাম করা যায়। রামকৃষ্ণের কথায় “এদের ফাৎনাতে ঠোকরাচ্ছে”।

আনন্দ! আনন্দ!

“আনন্দান্ধেব খলু ইমানি সর্বাণি ভূতানি জায়ন্তে”

কাল প্রবাসীতে ‘পথের পাঁচালী’র কয়েকটা অধ্যায় পড়া হোল। ডাঃ কালিদাস নাগ ও সুনীতিবাবু উপস্থিত ছিলেন, আরও অনেকে ছিলেন। সকলেই ভারী উপভোগ করলেন, এইটাই আমার পক্ষে আনন্দের বিষয়। এ বইখানার আর্ট অনেকেই ঠিক বুঝতে না পেরে ভুল করেন, দেখে ভারী আনন্দ হোল সজনীবাবু কাল কিন্তু ঠিক আর্টের ধারাটা আমার বুঝে ফেলেচে।

আর্টকে বুদ্ধির চেয়ে হৃদয় দিয়ে বুঝতে চেষ্টা করলে বোঝা যায় বেশী।

এবার বাড়ী গিয়ে গত শনিবারে অনেকদিন পরে কি আনন্দই পেলুম। মটর লতা, কাঠবেড়ালী, নাটাফুল—বর্ষাসরস লতাপাতার ভরা স্নগন্ধ। কাল প্রবাসী থেকে গিরীনবাবুর বাড়ী, সেখান থেকে বিন্ সাহেবের কাছে অনেকদিন পরে। বেশ দিনটা কাটলো। বিভূতির সঙ্গেও দেখা।

আজ সকালে উঠে অনেকদিন পরে ইসমাইলপুরের সেই কীর্তনের গানটা মনে পড়ল “...যাত্ রহি” শেষ দুটো কথা ছাড়া আর আমার কিছু মনে নাই, অথচ, গানের ভাবটা আমি জানি। ভারী আনন্দ হোল আজ মনে। শুধুই মনে হচ্ছিল জীবনটাকে আমরা ঠিক চোখে অনেক সময় দেখতে শিখিনে বলেই যত গোল বাধে। জীবন আত্মার একটা বিচিত্র, অপূর্ব অভিজ্ঞতা। এর আনন্দ শুধু এর অমুভূতিতে। সেই অমুভূতি যতই বিচিত্র হবে, জীবন সেখানে ততই সম্পূর্ণ, ততই সার্থক।

সেইদিক থেকে দেখলে দুঃখ জীবনের বড় সম্পদ, দৈন্য বড় সম্পদ, শোক, দারিদ্র্য, ব্যর্থতা বড় সম্পদ, মহৎ সম্পদ। যে জীবন শুধু ধনে মানে সার্থকতায়,



সাফল্যে, স্মৃতি সম্পদে ভরা, শুধুই যেখানে না চাইতে পাওয়া, শুধুই চারিধারে প্রাচুর্যের, বিলাসের মেলা—যে জীবনে অশ্রুকে জানে না, অপমানকে জানে না, আশাহত ব্যর্থতাকে জানে না, যে জীবনে শেষরাত্তরের জ্যোৎস্নায় বহুদিন-হারা মেয়ের মুখ ভাব্‌বার সৌভাগ্য নেই, শিশুপুত্র দুধ খেতে চাইলে পিটুলি গোলা খাইয়ে প্রবঞ্চনা কর্তে হয়নি, সে জীবন মরুভূমি। সে স্মৃতিসম্পদ ধনসম্পদ ভরা ভয়ানক জীবনকে আমরা যেন ভয় কর্তে শিখি।

এক এক সময় মনটা এমন একটা স্তরে নেমে আসে যখন জীবনের আসল দিকটা বড় চোখে পড়ে যায়, আজ অনেকদিন পরে একটা সেই ধরণের শুভদিন। কলকাতার শহরে এ দিন আসে না।

আজ একটা স্মরণীয় দিন, এই হিসাবে যে আমার বইখানার আজ শেষ ফর্ম্যাট ছাপা হোল। আজ মাসখানেক ধরে বইখানা নিয়ে যে অক্লান্ত পরিশ্রম করেছি, কত ভাবনা, কত রাত-জাগা, সংশোধনের ও পরিবর্তনের ও প্রফ দেখার যে ব্যগ্র আগ্রহ, সবারই আজ পরিসমাপ্তি। এইমাত্র প্রবাসী আপিসে বসে শেষ প্যারাটার প্রফ দেখে দিয়ে এলুম। ঠিক দুমাস লাগলো ছাপতে।

ঘনবর্ষার দিনটা আজ। আকাশ মেঘাচ্ছন্ন। দূরে চেয়ে কত কথা মনে পড়ে। কিন্তু সে সব কথা এখানে আর তুলবো না।

শুধুই মনে হয় সেই ভাগলপুরে নিমগাছের দিকের ঘরটাতে বসে বনাত-মোড়া সেই টেবিলটাতে সেই সব লেখা—সেই কার্তিক, সাবোর ষ্টেশনে গাছের তলায় শীতকালে পাতা জ্বালিয়ে আগুন-পোহানো, গঙ্গার ধারের বাড়ীটার ছাদে কত স্তব্ধ, অন্ধকার রজনীর চিন্তাশ্রম, সেই কাশবনে ঘোড়া ছুটিয়ে যেতে যেতে সে সব ছবি—সবারই আজ পরিসমাপ্তি ঘটল।

উঃ, গত ছ' মাস কি খাটুনিটাই গিয়েচে! জীবনে কখনও বোধহয় আমি এ-রকম পরিশ্রম করিনি—কখনও না। ভোর ছ'টা থেকে এক কলমে এক টেবিলে বেলা পাঁচটা পর্যন্ত কাটিয়েছি, মাথা ঘুরে উঠেচে তখন একটু ট্রামে হয়তো বেড়াতে বেরিয়েছি, ইডেন গার্ডেনে কেয়াঝোপে বসে ও একদিন বোটানিক্যাল গার্ডেনে লালফুল ফোটা ঝিলটার ধরে বসে কত সংশোধনের ভাবনাই ভেবেছি। তার ওপর কাল গিয়েচে সকলের চেয়ে খাটুনি। সকাল ছ'টা থেকে সন্ধ্যা ছ'টা পর্যন্ত বইএর শেষ ফর্মার প্রফ ও কাটাকুটি, শেষে রাত্রে পাথুরেঘাটার বাড়ীতে নিমন্ত্রণ রক্ষা করতে যাওয়া ও তদারক করে

লোক খাইয়ে বেড়ানো। কাল রাত্রে ভাল ঘুম হয়নি, গা হাত পা যেন কামড়াচ্ছে।

যাক। বই বেরুবে বুধবারে। ভগবান বলতে পারবেন না যে ফাঁকি দিয়েছি, তা যে দিইনি, তিনি অন্ততঃ সেটা জানেন। লোকের ভাল লাগবে কিনা জানিনা, আমার কাজ আমি করেছি। (ওপরের সব কথাগুলো লিখলুম আমার পুরোনো কলমটা দিয়ে,—যেটা দিয়ে বইখানার শুরু হতে লেখা। শেষদিকটাতে পার্কার ফাউন্টেন পেন কিনে নতুনের মোহে একে অনাদর করেছিলুম, ওর অভিমান আজ আর থাকতে দিলুম না)।

আজ বই বেরুল। এতদিনের সমস্ত পরিশ্রম আজ তাদের সাফল্যকে লাভ করেছে দেখে আমি আনন্দিত। প্রবাসী আপিসে বসে এই কথাই কেবল মনে উঠছিল যে আজ মহালয়া, পিতৃতর্পণের দিনটা, কিন্তু আমি তিলতুলসী তর্পণে বিশ্বাসবান নই—বাবা রেখে গিয়েছিলেন তাঁর অসম্পূর্ণ কাজ শেষ করাবার জন্তে, তাই যদি কর্তে পারি, তার চেয়ে সত্যতর কোনো তর্পণের খবর আমার জানা নেই।

আজ এই নিরঞ্জন, নীরব রাত্রিতে বহুদূরবর্তী আমার সেই পোড়ো ভিটার দিকে চেয়ে এই কথা মনে হোল যে তার প্রতি সন্ধ্যা, প্রতি বৈকাল, প্রতি জ্যোৎস্না-মাখা রাত্রি, তার ফুল, ফল, আলো, ছায়া, বন, নদী—বিশ বৎসর পূর্বের সে অতীত জীবনের কত হাসি কান্না বাথা বেদনা, কত অপূর্ণ জীবনোল্লাসের স্মৃতি আমার মনকে বিচিত্র সৌন্দর্যের রঙে রাঙিয়ে দিয়েছিল। আমার সমস্ত সাহিত্য সৃষ্টির প্রচেষ্টার মূলে তাদেরই প্রেরণা, তাদেরই স্বর।

আজ বিশ বৎসরের দূরজীবনের পার হ'তে আমি আমার সে পাখী-ডাকা, তেলাকুচা-ফুল-ফোটা, ছায়াভরা মাটির ভিটাকে অভিনন্দন করে এই কথাটা শুধু জানাতে চাই—

ভুলি নি। ভুলি নি। যেখানেই থাকি ভুলিনি...তোমারই কথা লিখে রেখে যাবো—সুদীর্ঘ অনাগত দিনের বিভিন্ন ও বিচিত্র স্বরসংযোগের মধ্যে তোমার মেঠো একতারার উদার, অনাহত ঝঙ্কারটুকু যেন অক্ষুণ্ণ থাকে।

আরও অভিনন্দন পাঠাই সেই সব লোকদের—যাদের বেদনার রঙে আমার বই রঙীন হয়েছে—কত স্থানে, কত অবস্থার মধ্যে তাদের সঙ্গে

পরিচয়। কেউ বেঁচে আছে, কেউ বা হুঁত তা আজ নেই—এদের সকলের দুঃখ, সকলের ব্যর্থতা, বেদনা আমাকে প্রেরণা দিয়েচে—কারুর সঙ্গে দেখা দিনে, কারুর সঙ্গে রাত্রে,—মাঠে বা নদীর ধারে, স্মৃথে কিংবা দুঃখে। এরা আজ কোথায় আছে জানিনে। কোথায় পাবো ঝালকাটির সেই ভিখারীকে, কোথায় পাবো আজ হিরুকাকাকে, কোথায় পাবো কামিনী বুড়ীকে—কিন্তু এই নিস্তর রাত্রির অন্ধকার-ভরা শান্তির মধ্য দিয়ে আমি সকলকেই আমার অভিনন্দন পাঠিয়ে দিচ্ছি।

যারা হয়তো আমার ছাপা-বই দেখলে খুঁসি হোত তারাও অনেকে আজ বেঁচে নেই—তাতে দুঃখিত নই, কারণ গতিকে বন্ধ করার মূলে কোনো সার্থকতা নেই তা জানি—তাদের গমনপথ মঙ্গলময় হোক, তাদের কথাও আমার মন থেকে মুছে যায়নি আজ রাত্রে।

আজই সকালে দেশ থেকে এলুম। কাল বৈকালে গিয়েছিলুম বারাকপুরে। সইমার বড় অস্থখ। ষষ্ঠীর হাট বাজার, জেনি গোপাল নগর থেকে নিয়ে এল ঘি, ময়দা। নগেন খুড়ো সপরিবারে ওখানেই।

কি সুন্দর বৈকাল দেখলুম! সে আনন্দের কথা আর জানাতে পারি নে—ঝোপে ঝোপে নীল অপরাজিতা, সুগন্ধ নাট। কাঁটার ফুল, লেজ ঝোলা হলুদডানা পাখীটা—অস্তসূর্যের রান্ধা আভা, নীল আকাশ, মুক্তির আনন্দ, কল্পনা, খুঁশি।

আজ এখন স্মৃটকেশ গোছাচ্ছি। এই মাত্র আমি ও উপেন বাবু টিকিট করে এলুম, আজ রাত্রেই ট্রেনে যাবো দেওঘর। কাল আবার সপ্তমী। ওখান থেকে হাজারিবাগ যাবার ইচ্ছে আছে দেখি কি হয়।

সেই “রাতের ঘুম ফেলু মুছে” গানটা মনে পড়ে। সেই অশ্বিনী বাবুর বোর্ডিং-এ, ১৯১৮ সালে। আজ শ্যামাচরণদাদাদের “মাধবী কঙ্কণ” বই খানা এনেচি। সেই কতকাল আগেকার সৌন্দর্য্য, সেই পূজোর পর বাবার সঙ্গে ম্যালেরিয়া নিয়ে প্রথম বাড়ী যাওয়া,—সেই দিদিমা।

সে সব অপূর্ব স্বপ্ন-ভরা দিনগুলি! জীবনটা যে কি অদ্ভুত, অপূর্ব— তা যারা না ভেবে দেখে তারা কি করে বুঝবে!.. কি করে তারা বুঝবে কি মহৎ দান এটা ভগবানের।

সকালে আমরা মোটরে করে বার হলুম—আমি, উপেন বাবু, অমর বাবু, করুণাবাবু। ঝরণার কি স্মিষ্ট জল।...একটু একটু বৃষ্টি হোল। কিন্তু পথের ছধারে কি অপূর্ব গাছপালা, লতাপাতা, শালচারা, ঝরণা, বাঁশ-বন—ছধারের ঘন জঙ্গলে জংলা মেয়েরা কাঠ কাটুচে—কি সুন্দর মেঘের ছায়া—ত্রিকুটের দু এক স্থান থেকে নীচের দৃশ্য বড় মনোরম। একস্থানে বাঁশের ছায়ায় বসে ডায়েরী রাখলুম। বড় সুন্দর দৃশ্য!

অর্ধেকটা উঠে বড় পরিশ্রম হোল বলে—সকলে উপরে উঠতে চাইলেন না। “অয়ি কুহকিনী লীলে—কে তোমারে আবরিল।” দিব্য শালবনের ছায়ায় বসে—ডায়েরী রাখলুম। আবার মনে পড়ে—বাড়ীর কথা।

আজ বিজয়া দশমী। আকাশও বেশ পরিষ্কার। সকালের দিকে আমরা সকলে মোটরে বার হয়ে প্রথমে গেলুম পূর্ণবাবুর বাড়ী। সেখানে আজ ওবেলা কীর্তন হবে, পূর্ণবাবু আসবার নিমন্ত্রণ করলেন। সেখান থেকে বিমানবাবুর বাড়ী। আমি ও করুণাবাবু মোটরে বসে রইলুম—অমর বাবু ও উপেনবাবু নেমে গেলেন। সেখান থেকে করুণাবাবু ফকিরবাবুর ওখানে যাওয়া গেল। একটু দূরে মাটির মধ্যে তপোবনের পাহাড়টা চোখে পড়ল। কালকার বালানন্দ স্বামীর আশ্রমটাও পাশেই পড়লো দেখলুম। আজ কিন্তু সেখানে লোকের ভিড় ছিল না—কতকগুলি এদেশী স্ত্রীলোক রঙ্গিন কাপড় পরে দাঁড়িয়েছিল দেখলুম। সেখান থেকে করুণাবাবুর বাড়ী হয়ে এক ব্যারিষ্টারের বাড়ীতে অমরবাবুর কি কাজ ছিল তা সেরে যাওয়া গেল দুর্গামণ্ডপে ঠাকুর দেখতে। দুর্গাপ্রতিমা ভারী সুন্দর করেছে—অমন সুন্দর প্রতিমার মুখ অনেকদিন দেখি নাই। তারপরে বাঙ্গালীদের পূজামণ্ডপে এসে খানিকক্ষণ থাকতেই তারা খেতে বসে। কিন্তু আমি তখনও স্নান করি নাই। কাজেই আমার হোল না।

বৈকালে নন্দন পাহাড় বেড়াতে গেলুম। এত সুন্দর স্থান আমি খুব বেশী দেখি নাই, একথা নিঃসন্দেহে বলা যাবে। পাহাড়ের উপর গাছপালা বেশী নাই, বন্য আতাগাছই বেশী। কিন্তু পিছনে ধূসর ত্রিকুট পাহাড়ের দৃশ্য ও সম্মুখে অন্তরাগ-রক্ত আকাশের তলে ডিগ্‌রিয়া পাহাড়ের শাস্ত মূর্তি বাস্তবিকই মনে এক অদ্ভুত ভাব আনে। দূরে দূরে শাল মহুয়া বন, শুধু উঁচু নীচু ভূমি ও বড় বড় পাথর এখানে ওখানে পড়ে আছে।

অনেকে পাহাড়ের ওপর বেড়াতে এসেছেন। এত সুন্দর হাওয়া।—একথা মনে হোল বাল্যকালে মডেল ভগিনী বইয়ে এই নন্দন পাহাড়ের হাওয়ার কথা পড়েছিলুম—চারিধারে বনতুলসীর জঙ্গলের মধ্যে বসে ডিগ্রিয়া পাহাড়ের আড়ালে অন্তমান সূর্যের দিকে চোখ রেখে কত কথাই মনে আসছিল। উপেনবাবু ও দ্বিজেনবাবুর অবিশ্রান্ত বকুনির দিকে আমার লক্ষ্য ছিল না।

হঠাৎ মনে হোল আজ আমাদের প্রাণেও বিজয়া দশমী। সারা বাংলাতে আজ এসময়টীতে কত নদীতে কত বাচ্ খেলার উৎসব, কত হাসিমুখ। আমাদের গ্রামের বাঁওড়ের ধারেও এতক্ষণ বিজয়ার আড়ং চলচে—এতক্ষণ রাঙ্গা ময়রা তেলে ভাজা জিলেপি বিক্রী করচে—সবাই নতুন কাপড় পরে সেজে এসে বাঁওড়ের ধারে দাঁড়িয়ে আছে ঠাকুর দেখবার জন্তে। ছেলেবেলার মত বাঁওড়ে বাচ্ হচ্ছে। মনে পড়ে অত্যন্ত শৈশবের সেই শালুক ফুল তোলা, তারপরে বড় হয়ে এক দিনের সেই বন্ধুর কাছে চার পয়সা ও মুড়কির কাহিনিটা।

ফিরে আসতে আসতে মনে হোল এতক্ষণ আমাদের দেশে পথে পথে, নদীর ধারে প্রিয় পাড়াগাঁয়ের সুপরিচিত ভাঁট-শেওড়ার বনে অপরাহ্নের ছায়া ঘনিয়ে এসেচে, সেই কটুতিক্ত অপূর্ব সুস্রাণ উঠচে—সেই পাখীর ডাক—এখানকার মত দূরপ্রসারী উচ্চাঙ্গ পাথুরে জমি ও শাল মছয়া পলাশের বন সেখানে নেই, এরকম পাহাড়ে নেই স্বীকার করি কিন্তু সে সব অপূর্ব মধুর আরামই বা এখানে কোথায়? মনে পড়ে বহুকাল পূর্বে এই সময়েই শৈশবের সে “মাধবী কঙ্কন” ও “জীবন প্রভাত”—সেই পাকাটীর আঁটি ও দিয়ে-পুকুর। বইখানা সেদিন শ্রামাচরণ দাদার কাছে চেয়ে নিয়ে এলুম। সেসব দিনের অপূর্ব মধুর স্মৃতি—সারাজীবন অদৃশ্য ধূপবাসের মত ঘিরেই রইল। এই নিয়েই তো জীবন—এই চিন্তাতে, এই স্মৃতিতে, এই যোগে। এই মনন ও ধ্যান ভিন্ন উচ্চ জীবনানন্দ লাভ করবার কোনো উপায় নেই। এ আমার জীবনের পরীক্ষিত সত্য।

নন্দন পাহাড় থেকে ফিরে এসে দেখলুম অমর বাবুর বাংলাতে ৬ বিজয়ার সন্মিলনী বসেচে। গোল চাতালটাতে জ্যোৎস্নার আলোতে চেয়ার পেতে বিমান বাবু, রবি বাবু, অমর বাবু, কল্পনা বাবু সবাই বসে আছেন। বিজয়ার আলিঙ্গন ও কুশলাদির আদান প্রদানের পূর্বে চা ও খাবার খাওয়া হোল।

একটু পরে ফকির বাবু এলেন। অনেকক্ষণ ধরে সাহিত্যিক আলোচনা চলল। আমি বিমান বাবুর জামাতা রবি বাবু অনেকক্ষণ ধরে টলষ্টয় ও রুশীয় সাহিত্যিকদের সম্বন্ধে আলোচনা করলুম। রবি বাবু আমার ‘পথের পাঁচালী’র প্রশংসা করছিলেন। বললেন, অনেকে বলেছেন, ‘পথের পাঁচালী’ শেষ হোলে বিচিত্রা ছেড়ে দেবো। মধ্যে আমি ও করুণা বাবু ঘরের মধ্যে এসে বসে সিগারেট খেলুম ও ফকির বাবুর বিরুদ্ধে আমাদের ঝাল ঝাড়তে শুরু করলুম। তারপরে এক পশলা বৃষ্টি হোয়ে সেটা একটু কমে গেল—বিমান বাবু ও রবি বাবু চলে গেলেন—আমরাও পূর্ণ বাবুর বাড়ীতে কীর্তন শুনতে গেলুম। দক্ষিণা ঘোষ বলে একজন ভদ্রলোক সেখানে বৈষ্ণব ভক্তিশাস্ত্র সম্বন্ধে অনেক কথা বলছিলেন—আমার বেশ লাগলো। খুব জ্যোৎস্নার মধ্যে দিয়ে জ্বোরে মোটর হাঁকিয়ে অনেক রাত্রে বাংলাতে ফেরা গেল। বেশ লাগছিল।

কাল সকালে সম্ভবতঃ গিরিডি হয়ে ঐ পথে মোটর বাসে হাজারীবাগ ও সেখান থেকে রাঁচী হ’য়ে কলকাতায় ফিরবো। দেখি কি হয়। আকাশ পরিষ্কার না থাকলে কোথাও যাবো না।

অমর বাবুর দৌহিত্র-অমিতের কথাগুলি ভারী মিষ্টি। তিন বৎসরের শিশু। বেশ লাগে ওকে।

এইমাত্র সন্ধ্যা ছটার দিল্লী এক্সপ্রেসে দেওঘর থেকে ফিরে এলুম। সারা দিনটা কাটল বেশ। বড় রোদ ছিল। করুণা বাবু সারা পথ কেবল গানের বই বার করেন আর আমাকে এটা ওটা গাইতে বলেন—করুণা বাবু সম্পূর্ণ বেস্তরে গাইতে থাকেন। মধুপুরে আমার নেমে উশ্রী জলপ্রপাত দেখতে যাবার কথা ছিল, কিন্তু উপেন বাবু নামলেন না বলে আমিও আর নামলুম না। তাতে আমার মন খারাপ ছিল, সেটা দূর করে দেওয়ার জন্তে আমার মুখের সামনে একটা সিগারেট ধরলেন।

তারপরে আবার চললো তাঁর সেই বেস্তরে গজল গাওয়া। শিশিরকুমার ঘোষের বড় ছেলেও আমাদের সঙ্গে যাচ্ছিলেন—বেশ লোক। ছগলী ত্রিভ থেকে সবাই বুঁকে পড়ে দেখতে লাগলো—আমার মনে হোল সেই এক ফাস্তন দিনে চুঁচুঁড়ায় সখের থিয়েটার ও গোলাপ ফুলের কথা। সেই দুপুরের ঝাম্ ঝাম্ রোদে ফাস্তনের অলস অবশ হাওয়ায় এই ষ্টেশনের সে প্ল্যাটফর্মে পায়চারীর কথা কি কখনো ভুলবো !

মধ্যে আবার খুব বৃষ্টি এল। কল্কাতায় কিন্তু বৃষ্টি একটু একটু মাত্র।  
উপেন বাবু বলেন আমার অনুচরগণ হেরে গিয়েচে।

এইমাত্র মেসের বারান্দাতে নির্জনে জ্যোৎস্নার আলোতে বসে আছি।  
বেশ লাগচে। মন মুক্ত, কারণ সম্মুখে প্রচুর অবসর।

এরই মধ্যে দেওঘর যেন দূর হয়ে পড়েচে। আজই সকালে উঠে যে  
সূর্যোদয়ের পূর্বে আমি দেওঘরের পথে পথে বেড়িয়ে বেড়িয়েছি, তা কি স্বপ্ন?  
আজই তো ভোরে পশ্চিম আকাশে ধূসর ডিগ্‌রিয়া পাহাড়ের রহস্য-ভরা মূর্তি  
ও ত্রিকূটের পিছনের আকাশের অরুণচ্ছটারক্ত সৌন্দর্য্য দেখেছি, তা যেন  
মনের সঙ্গে ঠিক খাপ খাচ্ছে না।

করণাবাবুকে বড় ভাল লাগলো। কি শান্ত, সরল হাস্যপ্রিয়, সরস  
স্বভাবের যুবক! ...গান গলায় নেই তবু অনবরত গান গাইতে গাইতে জোরে  
টেঁচাতে টেঁচাতে এলেন—সকলে মুচকি হাস্চে—গোপনে চোখ ইসারা করচে  
পরস্পরে, তাঁর দৃকপাতও নেই। তিনি তা বুঝতেও পারচেন না। আপন  
মনে গান গেয়েই চলেচেন আর আমাকে ডেকে ডেকে বল্চেন—আসুন  
বিভূতি বাবু এইটে ধরা যাক আসুন—আমার স্বরও তাঁর গলার বেসুরাতে  
খারাপ হয়ে যাচ্ছে। তাঁর দৃকপাতও নেই, স্বর বেসুর সম্বন্ধে জ্ঞানও নেই।  
শিশুর মত সরল ভদ্রলোক।

‘Men such as these are the salt of the Earth.’

পরশু থেকে কি বিশ্রী বাদলা যে চল্চে! কাল গেল কোজাগরী পূর্ণিমার  
লক্ষ্মীপূজার দিনটা—কিন্তু সারাদিন কি ভয়ানক বর্ষা আর নিরানন্দের মধ্যে  
দিয়েই কাটলো! আজও সকাল থেকে শুরু হয়েছে—কাল সারারাতের মধ্যে  
তো এক দণ্ড বিরাম ছিল না বৃষ্টির। কার্তিক মাসে এরকম বাদলা জীবনে  
এই প্রথম দেখলাম। এসব সময়ের সঙ্গে তো বাদলার association মনে  
নেই—তাই অদ্ভুত মনে হয়। অন্ধকার হয়ে এসেছে—টেবিলে বসে কিছু  
দেখতে পাচ্ছি নে, মনে হচ্ছে আলো জ্বালতে হবে। কাল যখন গিরিজা বাবুর  
সঙ্গে বসে গল্প করছিলুম তখন কেবল ঘণ্টাখানেকের জন্তে একটু ধরেছিল।  
রেক্সন যাওয়ার কথা উমেশ বাবু যা লিখে রেখে গিয়েছেন, তা এ বৃষ্টিতে  
কি করে হয়? আকাশ পরিষ্কার না থাকলে কোথাও গিয়েও সুখ নেই।

কাল রাত্রে গিয়েছিলুম শিমুলতলা। সেখান থেকে আজ সকালের ট্রেনে বার হ'য়ে এখানে এসে সন্ধ্যায় পৌছানো গেল। ঠিক সন্ধ্যায় গঙ্গার পুলটী পার হবার সময় এই শান্ত হেমন্ত সন্ধ্যার সঙ্গে কত কথা জড়ানো আছে, যেন মনে পড়ে। সেই হুগলী ঘোলঘাট স্টেশন, সেই কেওটা, সেই হালিসহর, সেই হুগলী—বহুদূরের বাড়ীর সে শান্ত অপরাহ্ন। যেখানে পথের ধারে শামাচরণ দাদারা কাঠ কাটিয়েছে, শৈশবের মত সেই কাঠের গুঁড়োগুলো এখনও পথের ধারে যেন রয়েছে—এসব ভাবলে এক অপূর্ব, বিচিত্র আনন্দে মন পরিপূর্ণ হয়। জীবনের সেই মধুর প্রভাত দিনগুলোর কথা মনে হয়। কাল দিদিমা গল্প করছিল কবে নাকি সেই জাহ্নবী স্নানে কেওটা গিয়েছিলেন বাবা। সকালে মুখ ধুচ্ছিলেন আমি পেছনে দাঁড়িয়ে ছিলাম। বুড়ী ঠিক মনে করে রেখেছে। সেই দিনটী থেকে জীবন আরম্ভ হয় না?...

এসেই ওদের বাড়ী গেলুম জগদ্ধাত্রী পূজার নিমন্ত্রণে। বিভূতি, ঘণ্টা খুব খেলা করলে। সেখান থেকে এই ফিরুচি।

ভারী ঘটনাবহুল দিনটি। ভোরে উঠে প্রথমে গেলুম হেঁটে ইডেন্ গার্ডেনে। শিশিরসিক্ত ঘাসের ধারে ধারে বেড়াতে বেড়াতে খালের জলের রক্ত-মৃগালগুলি দেখছিলাম। দুটা রাঙা ফক্ পরা ফিরিঙ্গি-বালিকা ফুল তুলে বেড়াচ্ছিল। কেয়াবোপে খানিকটা বসে বসে “আলোক-সারথি”র ছক্ কাটলাম। পরে দুখানা বায়োস্কোপের টিকিট কিনে বাড়ী ফিরবার পথে রমাপ্রসন্নের ওখান হয়ে এলাম।

বৈকালে প্রথম গেলুম প্রবাসী আফিসে। কেদার বাবু মোটরে চুক্চেন, গেটের কাছে নমস্কার বিনিময় হোল। সজনীর ঘরে গিয়ে দেখি ডাঃ স্মীল দে বসে আছেন। একটু পরে নীহার বাবুও এলেন। খুব খানিক গল্প গুজবের পর তিনজনে গেলুম সজনীর বাড়ী। উষাদেবী চলে গিয়েছেন। আমার বই খানি গিয়েচেন নিয়ে।

সেখানে “বাঁশি বাজে মূলো বনে” গানটা শুন্লুম না বটে, একটা জোনপুরী টোড়ী রেকর্ডে শুন্লাম। চা পানের পরে ডাঃ দে বাড়ী চলে গেলেন আমরা তিনজনে গেলুম বায়োস্কোপে। পথে বার বার চেয়ে দেখ্ছিলাম—আজ পূর্ণিমা, মাণিকতলা স্পারের পিছনে থেকে পূর্ণচন্দ্র উঠেচ। বহুদূরের আমাদের বাড়ীটাতে নারিকেল গাছটার পিছন থেকে চাঁদটা ওই রকম



উঠচে হয়ত। সেই সময়টা সেই, “আমার অপূর্ব ভ্রমণ” “রাজপুত জীবন সন্ধ্যা”—সেকি অপূর্ব শৈশবের আনন্দ উৎসাহ,—কি অপূর্ব বিচিত্র জীবনটা তাই শুধু ভাবি।

Sunrise filmটা মন্দ নয়। হিন্দুস্থান রেস্টোরাঁয় খেতে গিয়ে গিরিজা বাবুর সঙ্গে দেখা, নমস্কার বিনিময় ও আলাপ হোল। —বাবু B. P. C. C. থেকে retruned হয়েচেন শুলুম, মনটা একটু দমে গেল। বায়স্কোপ দেখে ফেরবার পথে দৌনেশ দাসের সঙ্গে দেখা। প্রবাসী officeএ মানিকবাবু জানালে কেদারবাবু মঙ্গলবারে লেখা চান। আবার প্রবাসীতে যাবার আগে বিচিত্রা অফিসে উপেনবাবু ডেকে পাঠিয়েছিলেন, তিনিও খুব শীঘ্র লেখা চান। Sub Editorএর declarationটা শীঘ্র দিতে হবে তিনি জানালেন।

তারপর বায়োস্কোপ থেকে গেলুম বিভূতিদের বাড়ী। নিমন্ত্রণ ছিল। সেখানে দেখি বৈঠকখানাতে বায়োস্কোপ হচ্ছে। বিভূতি বসতে বসে। তারপর দেবেন ও হীরুদের সঙ্গে খেতে বসা গেল। অনেক দিন পরে আজ আবার সেই রাসপূর্ণিমা।

বেরিয়ে অনেকদিন আগের মত একখানা রিক্শা করে জ্যোৎস্নায় ও ছাতিম ফুলের গন্ধের মধ্য দিয়ে বাসায় ফিরলুম। সেই ১৯২৩ সাল ও এই। এই ছয় বৎসরে কত পরিবর্তন।

কে জানত উপরে ডায়েরীটা লিখবার সময় যে এই দিনটাতেই রাসপূর্ণিমার বায়োস্কোপের আসরেই ওদের বাড়ীর সিন্ধেশ্বরবাবুর সঙ্গে আমার শেষ দেখা!

বাসায় এসে বারান্দায় রেলিং ধরে জ্যোৎস্না-ভরা আকাশটার দিকে চেয়ে চেয়ে মনে হচ্ছিল—যেন এক গ্রহদেব এই অনন্ত জ্যোৎস্নার মধ্যে দিয়ে ছ ছ উড়ে চলেচেন ওপরে—ওপরে—সজোরে—সবেগে—পায়ের নীচে পুরাতন পরিচিত পৃথিবীটা রইল পড়ে—।

বহুদূর আকাশে যেখানে পরমাণু তৈরী হচ্ছে, উল্কারা ছুট্চে, ছায়াপথ ছড়িয়ে আছে, নক্ষত্র ছুট্চে—সেখানে।

বন্ধুর জ্বর হয়েছে—আজ দাদাকে পত্র দিয়েচি। দাদা যেতে বলেচেন, তা কি করে হয়! সেদিন বন্ধুর অত্যাচারের কথা কত শুলুম। তার স্ত্রী, বোন ও শ্বশুরীঠাকরুন বসেন। শুনে দুঃখ হয়, কিন্তু উপায় কি!

জ্যোৎস্নারাত্রে আমাদের বাড়ীটা বহুদূরে কেমন দাঁড়িয়ে আছে, কাঠ কাটা

হয়েচে, আমাদের বাড়ীর সামনে ছেলেবেলাকার মত পথের ওপর তার দাগ রয়েছে। শ্যামাচরণ দাদাদের কাঠ।

সে এক জীবন!

কি বিচিত্র, কি অদ্ভুত, কি অপূর্ব এই জীবন ধারা। একে ভোগ কর্তে হবে।

এই অপূর্ব জ্যোৎস্নায় ইসমাইলপুরের জগ্বে মন উদাস হয়ে যায়। যেন তার বিশাল চরভূমি, কালো জঙ্গল, নিৰ্জন বালিয়াড়ি—আমায় ডাক দিচ্ছে। •

কাল স্কুলে ছটায় ম্যানেজিং কমিটির মিটিং, এদিকে আবার তিনটার সময় ডাঃ দেব ওখানে চা পানের নিমন্ত্রণ।

আজ ছুপুরে মনে পড়ছিল বোডিং-এ থাকতে Travellers return বইটা কি অপূর্ব emotion নিয়েই পড়তুম। বাল্যের সে সব অপূর্ব emotion মনে পড়লেই মনে হয় কি অপূর্ব, এক বিচিত্র এ জীবন-ধারা। সেদিনের সঙ্কায় নন্দরাম সেনের গলিতে যাওয়া, সেই চাউলের গুদাম—সেই শুভঙ্করী পাঠশালার সামনে আমার সহপাঠীর বাড়ী মনে পড়ে।

কি সুন্দর!

এসবের জগ্বে কাকে ধন্যবাদ দেবো?—কষ্টে দেবায় হবিষা বিধেম?

আজ মনের মধ্যে যে তীব্র creative আনন্দ অল্পভব করলুম, কল্কাতায় এসে পর্যন্ত একবছরের মধ্যে তা হয় নি কোনো দিন।

আজ সন্ধ্যাবেলা হঠাৎ কি হোল আমার, অকারণে আনন্দে মনের পাত্র উপ্ছে পড়্ছে, একে যেন ধরে রাখা যাচ্ছে না।

মন যেন কি বলে বুঝতে পারি নে। কত কথা মনে হোল।...সারা জীবনের আনন্দ ও সৌন্দর্য্য আজ আমার মনে ভিড় করেছে...স্মরণীয় দিন, অতি স্মরণীয় দিন, এরকম কিন্তু খুব বেশী দিন আসে না।...

ইন্সটিটিউটে সেই মহিলা-পর্যটকের কথা পড়্ছিলুম—তুম্বারবর্ষী শীতের রাত্রে উত্তরমেরু প্রদেশের বরফ-জমা নদী ও অন্ধকার অরণ্যভূমির মধ্যে তিনি তাঁবু ফেলে রাত্রে বিশ্রাম করতেন, দূরে মেরুপ্রদেশীয় Northern Lights জলে, একা তিনি তাঁবুতে—“amidst a waste of frozen river and dark forest”—। সেখানকার নৈশ নীরবতা...নিৰ্জনতা...গভীর শান্তি, মাথার উপর হলুদ রংএর চাঁদ, অবাস্তব, অল্প গ্রহের জ্যোতিষ্কের মত দেখায়...নৈশ আকাশে অগণ্য নক্ষত্র...আশে পাশে শুভ্রতুম্বারাবৃত পাইন অরণ্যের আড়ালে লোলুপ নেকড়ের দল—আর ভাবতে পারা যায় না, মনকে বড় মুগ্ধ, অভিভূত করে।

সন্ধ্যাবেলা এসে চেয়ারটাতে বসে চুপ করে ভাবতে ভাবতে মনে পড়ল এই সব শীতের রাত্রে ছেলেবেলায় আমাদের বাড়ীর পেছনের ঘন বনে শিয়াল ডাকতো গভীর রাত্রে...সেই বিপদের ভয়, অজানার মোহ, গ্রাম জীবনের সৌন্দর্য্য...অদ্ভুত, অপূর্ব...।

আরও মনে পড়লো ইস্মাইলপুরের জ্যোৎস্না রাত্রির সে অপার্থিব, weird beauty...সেই এক পূর্ণিমা-রাত্রির শুভ্র জ্যোৎস্নার চেউয়ের নীচে আকন্দ গাছ...স্বপ্নে যেন দেখি...

সেই কুমারদের বাড়ী ঢাক ঘোরাচ্ছে দাস্ত...পঞ্চাননতলায় কালীপূজো...

ভগবান, কি অসীম বিচিত্রতা দিয়ে এই জীবন, আমার শুধু নয়, সকলের জীবন গড়ে তুলেচো—তা কে ছাখে? কে বোঝে?

ধনুবাদ অগণিত ধনুবাদ...হে সৌন্দর্য্যস্রষ্টা মহাশিল্পী, তোমাকে অন্তরের প্রেম কি বলে জানাবো, ভাষা খুঁজে পাই না...

এতো শুধু পৃথিবীর স্মৃতিস্তম্ভের কথা লিখি—তবুও তো আজ নাস্ত্রিক শৃঙ্খলের কথা ভাবিনি, অগ্র অগ্র জগতের কথা তুলিনি। অগ্র গ্রহ উপগ্রহের কথা ওঠাইনি...

দূর দূরান্তরের কথা তুলিনি...

নতুন বৎসরের প্রথম দিনটাতে এবার মোটরে করে শ্রীনগর গেলুম। চালুকী থেকে খুকীকে তুলে নিলুম, পরে গোপালনগরের বাজারে বন্ধুর ড্রাইভার গৌরকে হরিবোলা ঠিক করে দিলে। ড্রাইভারটা প্রথমটাতে মেঠো পথে যেতে চায় না। অবশেষে অনেক করে রাজী করানো গেল। সিম্‌লাতে গিয়ে কালাকে ডাকতে পাঠানো গেল, সে নাকি ভাত রাঁধে। একটা ছোট মেয়ে জল নিয়ে এল বাল্‌তীতে করে। খাবার খেয়ে নিয়ে আমরা আবার হলুম রওনা। শ্রীনগরের বনের মাথায় মটর ফুলের মত একরকম ফুল অজস্র ফুটে আছে, এত চমৎকার লাগছিল! আস্‌বার সময় ডাইনে পশ্চিম আকাশে সূর্য্য অস্ত যাচ্ছিল—আকাশের কি চমৎকার রংটা যে!

রাত আটটার সময় পৌঁছে গেলুম কল্‌কাতা, ঠিক চারটার সময় সিম্‌লে থেকে ছেড়ে। এ যেন কেমন অদ্ভুত লাগে। Sense of space মাহুষের ক্রমেই কেমন পরিবর্তিত হয়ে যাচ্ছে।... এক শত বৎসর পূর্বে যা কিনা পাকা তিন দিনের পথ, গরু গাড়ীতে চার দিনের পথ ছিল! কে জানে

আমাদের পৌত্র বা প্রপৌত্রদের Sense of space আরও কত পরিবর্তিত হবে!—

আজ অনেকক্ষণ কার্জন পার্কে একা একা বেড়ালুম। পশ্চিম আকাশে সূর্যটা অস্ত যাচ্ছিল,—আমার শুধু মনে যুগ, যুগের কল্পনা জাগে। ঐ নক্ষত্রটা যে ওইখানে উঠেচে, ওতেও কত অপূর্ণ জীবননীলা...। মৃত্যু, বিরহ এসব যদি জীবনে না থাকতো তবে জীবনটা একঘেয়ে, বৈচিত্র্যহীন হয়ে পড়তো—হারাবার শঙ্কা না থাকলে প্রেম, স্নেহও হয়তো গভীর ও মধুর হতে পেত না। তাই যেন মনে হয় কোন্ স্ননিপুণ শিল্প-শ্রষ্টা এর এমন সুন্দর ব্যবস্থা করেচেন যেন অতি তুচ্ছ, দরিদ্র লোকেরও জীবনের এ গভীর অহুভূতির দিকটা বাদ না যায়। এ জীবনের অবদানকে খুব কম লোকেই বুঝে—কেউ এ সম্বন্ধে চিন্তা করে না—সকলেই দৈনন্দিন আহার চিন্তায় ব্যস্ত। কে ভাবে জন্ম নিয়ে, মৃত্যু নিয়ে, আকাশ, ঈশ্বর, প্রেম, অহুভূতি—এসব নিয়ে—কার মাথাব্যথা পড়েচে ?

মুটু ও নায়েব ও সন্তোষবাবুর সঙ্গে বেড়াতে গেলুম।—Lief Eriesson was space-hungry. So am I.

জানি না কেন আজ ক’দিন থেকে মনটা কেবলই মুক্তির জগু ছটফট কর্চে। কি ভাবের মুক্তি? আমাকে কি কেউ শিকলে বেঁধে রেখেচে?—তা নয়। কিন্তু কলকাতার এই নিতান্ত মিন্‌মিনে, একঘেয়ে, ঘরোয়া জীবন-যাত্রা, আজ পনোর বৎসর ধরে যে জীবনের সঙ্গে আমি সুপরিচিত,—সেই বহুবারদৃষ্ট, গতানুগতিক, একরঙা ছবির মত বৈচিত্র্যহীন জীবন-যাত্রা আর আমার ভাল লাগে না।

আজ দুপুর বেলা স্কুলের অবসর ঘণ্টায় চুপি চুপি এসে বাইরের ছাদটাতে বসেছিলুম। আকাশ ঘন নীল, কোথাও এতটুকু মেঘ নেই কোনোদিকে—কেবল একটা চিল বহুদূরে একটা কৃষ্ণ-বিন্দুর মত আকাশের গা বেয়ে উড়ে ষাচ্ছে—সেদিকে চোখ রেখে ভাবতে ভাবতে আমার মন কোথায় যে উড়ে গেল কি অপূর্ণ প্রসারিত করে দেওয়ার আকাঙ্ক্ষা যে মনে জাগল—সে সব কথা কি লিখে বলা যায়? মনের সে উচ্চ আনন্দের বর্ণনা দেওয়ার উপযুক্ত ভাষা এখনও তৈরী হয় নি। কিন্তু কেন সে আনন্দটা এল, তাও বুঝতে পারি—সেটা এল শুধু জগতের বড় বড় মরু, বিশাল অরণ্যভূমি, দিক্‌দিশাহীন সমুদ্র, মাঠ ও বনবোপ, মুক্ত প্রকৃতির অপূর্ণ মুক্ত রূপের কল্পনায়।

বুঝতে পারি এরই জন্তে মনটা হাঁপাচ্ছে। প্রকাণ্ড কোনো মাঠের ধারে বন, বনের প্রান্তে একটা বাংলা—কিংবা জঙ্গলে ঘেরা অত্রের খনি, বালু-মিশ্রিত পাথুরে মাটির গায়ে অভ্রকণা চিক্ চিক্ করচে, নয় তো উচ্চাবচ্চ পাহাড়ে জমি, যে দিকে চোখ যায় শুধুই বন—এই রকম স্থানেই যেতে চাই—থাকতে চাই। এতটুকু স্থান চায় না মন। চায় আরও অনেক বড় জায়গা—অনেকখানি বড়—অচেনা, অজানা, রক্ষ, কর্কশ ভূমিত্রী হোলেও তাই চাইবো, এ একঘেয়ে পোষ-মানা সৌখীনতার চেয়ে।

সন্ধ্যাবেলা যে ছবিটা দেখতে গেলুম গ্লোবে, সেটাও আমার আজকার মনের ভাবের সঙ্গে এমন চমৎকার খাপ খেয়ে গেল,—Lief the Viking, গ্রীনল্যাণ্ড ছেড়ে আরও দূরে, অচেনা দেশ খুঁজে বার কর্তে অজানা পশ্চিম মহাসমুদ্রের বুকে পাড়ি জমিয়ে চলে গেল—নিস্তরক রাত্রে জ্যোৎস্না-ঝরা আকাশ-তলায় সত-ফোটা মশুমী ফুলগুলোর দিকে চোখ রেখে এইমাত্র গোলদীঘির ধারে বসে সেই কথাই আমি ভাব্ছিলুম। ..

ভাব্তে ভাব্তে মনে হোল আমি যেন এই জগতের কেউ নই—আমি যেন বহুদূর কোন্ নাক্ষত্রিক শূন্য পারের অজানা জগত থেকে কয়েক দণ্ডের কোতুহলী অতিথির মত পৃথিবীর বুকে এসেছি—ও মশুমী ফুল আমি চিনেও চিনি না, প্রতিবেশী মাহুষদের দেখেও যেন দেখিনি, এ গ্রহের বৈচিত্র্যের সবটাই নিয়েছি কিন্তু এর একঘেয়েমিটা আমার মনে বসতে পারেনি এখনও। তার কারণ আমার গতি—স্বর্গীয় গতির পবিত্রতা।

মনে হোল এই মাত্র যেন ইচ্ছামত পৃথিবীটা ছেড়ে উড়ে আলোকের পাখায় চলে যাবো ওই বহুদূর ব্যোমের গভীর বুকে, যেখানে চিররাত্রির অন্ধকারের মধ্যে একটা নির্জ্জন সাখীহীন নক্ষত্র মিট মিট করে জ্বল্চে—ওর চারি পাশে হয় তো আমাদের মত কোন্ এক জগতে অপরূপের বিবর্তনের প্রাণী বাস করে—আমি সেখানে গিয়ে খানিকটা কাটিয়ে আবার হয় তো চলে যাবো কোন্ সূদূর নীহারিকা পার হয়ে আরও কোন্ দূরতর জগতের শ্রামকুঞ্জ বীথিতে! .

এই সময়ে যুত্বার অপূর্ক রহস্য যা সাধারণ চক্ষুর অন্তরাল থেকে গোপন আছে—তার কথা ভেবে মন আবার অবাক হয়ে গেল—সারা দেহ মন কেবল অবশ হয়ে গেল।...

কোন্ বিরাট শিল্প-শ্রষ্টার পুণ্য অবদান এ জীবন?...কি অতলম্পর্শ,

মহিমময় রহস্য !...রোমাঞ্চ হয় । মন উদাস হয়ে যায়—যখন বাসায় ফিরলুম, তখন যেন কেমন একটা ঘোর ঘোর ভাব ।...

জীবনকে যে চিন্তে পেরেছে—এ জগতে তার ঐশ্বর্যের তুলনা নেই— তার কল্পনার পঙ্খতা ও ভাব-দৈন্ত্য দৈনন্দিন ভোগবিলাসের উর্দ্ধে তাকে উঠতে প্রাণপণে বাধাদান করচে, সে শাস্ত-ভিখারীর দৈন্ত্য কে দূর করবে ?...

আজ অনেক কাল পরে—প্রায় বারো বৎসর পরে—শিশির বাবুর চন্দ্রগুপ্তের অভিনয় দেখে এইমাত্র ফির্চি । সেই ছাত্রজীবনে ইউনিভার্সিটি ইন্সটিটিউটে দেখবার পরে এই আজ দেখা । অভিনয় খুব ভালই হোল কিন্তু আমি কি জানি কেন মনের মধ্যে প্রথম যৌবনের সে অপূর্ণ উন্মাদনা, নবীন, টাটকা, তাজা মনের সে গাঢ় আনন্দানুভূতিটুকু পেলাম না । দেখে দেখে যেন মনের সে নবীনতাটুকু হারিয়ে ফেলেছি ।

আজকাল অল্পদিক দিয়ে মনের মধ্যে সব সময়ই একটা অপূর্ণ উৎসাহ পাই—একটা অল্প ধরণের উদ্দীপনা । সেটা এত বেশী যে তা নিয়ে ভাবতেও পারি না—ভাবলে মন অত্যন্ত চঞ্চল হয়ে ওঠে ।

মনে হয় এই যে কল্কাতার একঘেয়েমি যাকে বল্চি—এও চলে যাবে । সে যাত্রার বাঁশি যেন বেজেচে মনে হচ্ছে । বহুদূরে যাত্রা । সমুদ্রের পারে—প্রশান্ত মহাসাগরের পারে ।

নানা দার্শনিক চিন্তা মনে আস্চে, কিন্তু রাত হয়েছে অনেক—আর কিছু লিখবো না ।

ক'দিন বেশ কাট্চে । অনেক দিন পরে কদিনের মধ্যে ভোম্বলবাবু, ননী, নাহু, প্রসাদ—এরা সব এসেছিল । সেদিন অনেকদিন পরে রাজপুরে চললুম । খুকীর সঙ্গে দেখা হোল, ভারী আদর করলে । তারপর একদিন গড়িয়ায় জলের ধারের মাঠে, আমি ও ভোম্বল বেড়াতেও গেলুম । কত কি গল্প আবার পুরোনো দিনের মতই হোল । একদিন আমি অবশ্য একা গিয়েছিলুম, —পূর্ণিমার দিন ।

আজ বসে বসে সেই দিনগুলোর কথা ভাব্ছিলুম । যাত্রাদলের ছেলে ফনি বাড়ীতে খেতে এল—বাবা বর্ধমান থেকে এলেন—তারও অনেক আগে

যখন বকুলতলায় প্রথম বারোয়ারীর বেহালা বাজানো শুনে অবাক হয়ে গিয়েছিলুম—সব টাটকা—তাজা, আনকোরা আনন্দ এখনও কিন্তু ঘেন ভাবলে কিছু কিছুর পাই। যে দিন সেই প্রথম বেহালা বেজেছিল, যে দিনটা বাবার গাঙ্গে নৈহাটী হয়ে সিঙ্গাড়ার আলু খেয়ে কেওটা থেকে বাড়ী আর্ছিলুম—যেদিন চড়ক তৈরী কর্লাম—ঠাকুরমাদের বেলতলায় আমি নিজে ; ঠাকুরমাদের পোড়ো ঘরে পাঠশালা-করা, কড়ি খেলায় আমোদ, পূবমুখো যাওয়া, মরগাঙে মাছ ধর্তে যাওয়া—শনিবারে ছুটিতে বাড়ী আসার আনন্দ—কত লিখবো। কে জীবনের এ সব মহনীয় অবদান পরম্পরার কথা লিখতে পারে ? আর মনে হয় আমি ছাড়া এসবের আসল মানে আর কেই বা বুঝবে ? তা তো সম্ভব নয়—অন্য সকলের কাছে এগুলো নিতান্ত মামুলী কথা বলে মনে হবে। এদের পিছনে যে অদৃশ্য রসভাণ্ডার লুকানো আছে আমি ছাড়া আর কে তা জানবে ?...

অনেকদিন পরে দেশে এসে বেশ আনন্দে দিন কাট্চে। রোজ সকালে উঠে ইছামতীর ধারের মাঠটাতে বেড়াতে যাই, ঝাড় ঝাড় সোঁদালী ফুল ফুটে থাকে, এত পাখী ডাকে !... চোখ গেল, বো-কথা-ক', কোকিল কত কি !... বেড়িয়ে এসে ওপাড়ার ঘাটে স্নান কর্তে নামি। ওপারের চরের শিমুল গাছটার মাথায় তরুণ সূর্য্য ওঠে, দুপারে কত শ্রামল গাছপালা। সোঁদালী ফুলের ঝাড় মাঝে মাঝে ছলতে দেখলেই আমার মনে কেমন অপূর্ক আনন্দ ভরে ওঠে !...প্রভাতে পাখীরা যে কত সুরে ডাকে, জলের মধ্যে মাছের ঝাঁক খেলা করে।—জীবনের প্রাচুর্যে, সরসতায়, সৃষ্টির মহিমায় অভিভূত হয়ে যাই। কতদূরের সব জীবনধারার কথা, জগতের কথা মনে হয়—আবার স্নান কর্তে কর্তে চেয়ে দেখি নদীর ধারে গোছা গোছা ঘাস হেলাগোছা ভাবে জলের মধ্যে মাথা দোলাচ্ছে, একটা হয়তো খেজুর গাছ গাজিতলার বাঁকে অল্প সব গাছপালায় থেকে মাথা উঠিয়ে দাঁড়িয়ে আছে।

অপূর্ক, সুন্দর, হে স্রষ্টা, হে মহিমময়, নমস্কার, নমস্কার। অল্প সব জগৎও যে দেখতে ইচ্ছে যায়, দেখিও।

রোজ বৈকালে কালবৈশাখীর ঝড় ওঠে, মেঘ হয়, রোজ, রোজ। ঠিক তিনটা বেলা বাজতে না বাজতে মেঘ উঠবে, ঝড়ও উঠবে। আর সমস্ত আম বাগানের তলাগুলো ধাবমান, কোঁতুকপর, চীৎকাররত বালক-বালিকাতে

ভরে যায়—সলতে-খালী তলা, তেঁতুলতলা, শ্রামাচরণ দৌলদের বাগানটা, নেকো, পটুলে, বাঁশতলী—সমস্ত বাগানে যাতায়াতের ধুম পড়ে নিয়েচে—।

সেদিন ঘনমেঘের ছায়ায় জেলে পাড়ার সবাই—স্ত্রী-পুরুষ-বৃদ্ধ-বালকরা ধামা হাতে আম কুড়ুচ্ছে দেখে আমার চোখে জল এল। জীবনে ওই এদের কত আনন্দের, কত সার্থকতার জিনিস!...একটা ছেলে বল্চে—ভাই—ওই দোম্কাটায় মুই যদি না আস্তাম, তবে এত আম পেতাম না!...

কাল সাতবেড়ে মেয়ে দেখতে যাবো।...সারা গ্রামটাতে বিলগাছের ফুলের কি ঘন স্নগন্ধ!...অশ্বখ তলায়, যেখানে সেখানে এত বেলের গাছও আমাদের এখানে আছে!

কাল সাতবেড়ে গ্রামে গিয়ে একটু বেড়িয়ে এলাম। শশী বাঁড়ুযো মহাশয়ের বাড়ী খুব আহার হোল। গ্রামখানিতে সবই চাষা লোকের বাস, ভদ্রলোকের বাস তত নেই, তবে সকলেরই অবস্থা সচ্ছল। মাটির-ঘর গুলো সেকলে ধরণের, কোনো নতুন আলো এখনও ঢোকে না বলে সেখানের অকৃত্রিম আবহাওয়াটা এখনও আছে। ফণি কাকা ও আমি দুজনে দক্ষিণ মাঠের দায়েমের পুকুরের ধার দিয়ে বেশ ছায়ায় ছায়ায় বৈকালের দিকে চলে এলাম। নফর কামারের কলাবাগানে কামারবুড়ী কি ফলমূল ও কাঁকুড় নিয়ে আস্চে দেখলাম। হরিপদ দাদার স্ত্রী বাগানে আম পাড়াছেন। আজকাল রোজ বৈকালেই মেঘ ও ঝড়বৃষ্টি হওয়ার দরুণ কুঠীর মাঠে একদিনও বেড়াতে যাওয়া হয় না—রোজই কালবৈশাখী লেগে আছে। সুন্দর বৈকাল একদিনও পেলাম না। তিনটা বাজ্তে না বাজ্তেই রোজ জল আর ঝড়।

আজও সকালে নদীতে স্নান করে এলুম। কি সুন্দর যে মনে হয় সকালে স্নানটা করা, স্নিগ্ধ নদীজল, পাখীর কলকাকলী, মাছের খেলা, নতশীর্ষ গাছপালা, নবোদিত সূর্যাদেব।

আজ বেড়াতে গেলুম বৈকালে কাঁচিকাটার পুলটাতে। সকালে অনেকক্ষণ চেয়ার পেতে ওদের বেলতলাটায় বসেছিলুম, সেখানে কেবল আড্ডাই হোল। বেলা যখন বেশ পড়ে এসেচে তখন গেলাম ঠাকুরমাদের বেলতলাটায়, ফিরুচি একজন লোক হটেমারীর কুঠী খুঁজ্চে, আমাদের বাড়ীর পাঁচীলের কাছে। তারপর নিজে গেলাম বেলেডাকার পুলটায়। একখানা যেন ছবি,



যখন প্রথম অশ্বখতলার পথটা থেকে ওপারের দৃশ্যটা দেখলাম—এ রকম অপূর্ব গ্রাম্যদৃশ্য কচিৎ চোখে পড়ে। বেলডাঙ্গা গ্রামের বাঁশবনের সারি নদীর হাওয়ায় মাথা দোলাচ্ছে, কৃষক বধূরা জল নিতে নাম্চে বাঁওড়ের ঘাটে। দুপারে সবুজ আউশের ক্ষেত, মজুরেরা ঠোঙ্গা মাথায় ক্ষেতে ক্ষেতে ছাঁটার কাজ করুচে, ছোট ডোঙ্গা চেপে কেউবা মাছ ধর্তে বেরিয়েচে—যেন ওস্তাদ শিল্পীর আঁকা এক অপূর্ব ভূমিত্রীর ছবি।

একটা বুদ্ধ ব্রাহ্মণ মাথায় মোট নিয়ে পাঁচপোতা থেকে ফিরুচে—গোঁসাই বাড়ীর কাছে বাসা করেছে বললে—নাম বঙ্কুবিহারী চট্টোপাধ্যায়। দেখে ভারী কষ্ট হোল—এক ভাগ্যহীন, অসহায় মানুষ। বল্লে, শীতলা ঠাকুর নিয়ে গ্রামে গ্রামে বেড়াই—যে যা দেয়, তাতেই চলে। বাড়ীতে এক ছোট ছেলে আছে ও দুটি মেয়ে।

বসে বসে অনেকক্ষণ হাওয়া খেলুম, সঙ্গে সঙ্গে কত দেশের জীবনধারার কথা, বিশেষ করে যারা দুঃখ পেয়েচে তাদের কথাগুলো বড় বেশী মনে হোল। ভারতের মা দিন রাত দুঃখ কর্চেন, তাঁর দুঃখ শুনে সত্যি মনে কষ্ট হয়। কষ্ট হয় এই ভেবে জগতের এত আনন্দ-ধারার এক কণাও এরা পাচ্ছে না—হয়তো শুধু দেখবার চোখ নেই বলেই।

ফিরবার পথটা আজ এত ভাল লাগল, ওরকম কোনো দিন লাগে না—ডাঁশা খেজুর ও নোনা ডালে ডালে ছলুচে—এত পাখীর গানও এদেশে আছে!...কুঠীর মাঠটা যে কি সুন্দর দেখতে হয়েছে—ইতস্ততঃ প্রবন্ধমান গাছপালা, বনঝোপের সৌন্দর্য্যে বিশেষ করে যেখানে সেখানে, যেদিকে চোখ যায়—ফুলে-ভরা সোঁদালী দোলায়িত। আকাশের রংটা হয়েছে অদ্ভুত—অপূর্ব নির্জ্জনতা শুধু পাখীদের কল-কাকলীতে ভগ্ন হচ্ছে—কেউ কোনো দিকে নেই—ধূসর আকাশতলে গভীর শান্ত ও ছায়ার মধ্যে কেবল আমি ও মুক্ত, উদার প্রকৃতি।

কি অপূর্ব আনন্দেই মন ভরে যায়, কত কথাই মনে ওঠে, সাধ্য কি কল্কাতায় থাকলে এ সব কথা মনে উঠতে পারে!...

তারপর ওপাড়ার ঘাটটীতে স্নিগ্ধ জলে স্নান করতে নেমে মুগ্ধ হয়ে গেলাম। শ্যামল, ধূসর বৃক্ষশ্রেণী, স্নিগ্ধ সন্ধ্যা, স্বচ্ছ নদীজল—মাথার ওপরে সন্ধ্যার প্রথম নক্ষত্রটী উঠেচে, সেদিকে চেয়ে কত শত নক্ষত্রমণ্ডলী, বিভিন্নমুখী নক্ষত্রশ্রেণী, অগ্ন অগ্ন নীহারিকাদের জগতের কথা মনে হোল। বৃহৎ এণ্ড্রোমিডা

নীহারিকাদের জগৎ। এই সামান্য, ক্ষুদ্র গ্রহটাতে যদি অস্তিত্বের এত বৈচিত্র্য, এত সরসতা, এত সৌন্দর্য্য—তবে না জানি সে সব বিশ্বে কি অপরূপ আনন্দস্রোত !...

সব দুঃখের একটা স্বপ্নাষ্ট অর্থ হয়। জীবনের একটা মহান, বিরাট অর্থ, একটা স্বপ্নাষ্ট রূপ মনের চোখে ফুটে ওঠে। নিৰ্জ্জন স্থান ভিন্ন, পরিপার্শ্বিকের পরিবর্তন ভিন্ন,—এ আনন্দ কি সম্ভব ?...

সন্ধ্যার পরে আমি, সইমা, ন'দি অনেকক্ষণ গল্পগুজব করা গেল। আজকার রাতটা কালকার মত গরম নয়, শেষ রাত্রে মেঘ করার দরুণ বেশ ঠাণ্ডা। সারারাত লঠন ধরে ধরে লোকেরা ও ছেলের দল আমাদের বাড়ীর পিছনের ঘন জঙ্গলের ওপারের বাগানগুলোতে আম কুড়িয়েচে, সারা রাতটা।

কি সুন্দর বৈকালটা কাল কাটলো যে! কুঠার মাঠে অনেকক্ষণ বসে পরে নদীজলে সন্ধ্যার কিছু পূর্বে স্নান কর্তে নামা গেল। এত অপূর্ব ভাব এল মনে, ঠাণ্ডা নদীজল, ছিপি-শেওলার পাতার ধারে দাঁড়িয়ে, ছায়াচ্ছন্ন সন্ধ্যায় আকাশ ও শ্যামল গাছগুলার দিকে চোখ রেখে শুধু এদের পিছনে যে বিরাট অবর্ণনীয় শক্তি জাগ্রত আছে, তার কথাই বার বার মনে আসছিল। স্বচ্ছ জলের ভেতরে মাছের দল খেলা করচে—একটা ছোট মাছ তিড়িং করে লাফিয়ে শেওলার দামের গায়ে পড়ল। নদী জলের আর্দ্র, সুগন্ধ উঠচে—ওপারে মাধবপুরের পটোলের ক্ষেতে তখনও চাষারা নিড়েন দিচ্ছে—বাদাম গাছের মাথায় একটা নক্ষত্র উঠেচে। সারাদিনের গুমটের পর শরীর কি স্নিগ্ধই হোল ! ..

শেষ রাত্রে বেজায় গুমট গরমে আইটাই করচি এমন সময় হঠাৎ ভীষণ ঝড় বৃষ্টি এল। ন'দি, জেলি, বুড়ী-পিসিমা, জেলে পাড়ার ছেলেরা অমনি আম কুড়তে ছুটলো। ঘন অন্ধকারের মধ্যে লঠন জেলে সব ছুটল চাটুঘো বাগানের দিকে। জেলির মা চৈচিয়ে পিছু ডাকাতে জেলি আবার এল ফিরে।

সকালটার সিঁদুরে মেঘে অপরূপ শোভা হয়েছিল। পরশু বৈকালটাতে এই রকমই সিঁদুর-মেঘ করেছিল—আমি সেটা উপভোগ কর্তে পারিনি, গোপালনগরের হাটে গিয়েছিলাম।

আজ প্রায় বাইশ বছর পরে ভাণ্ডারকোলায় নিমন্ত্রণ খেতে গিয়েছিলুম। কিন্তু কাল সন্ধ্যার কিছু পূর্বে বেলেডাঙার মাঠে যে অদ্ভুত মনের রূপ ও প্রকৃতির রূপ দেখেছিলাম, অমন কখনো দেখিনি। কাঁচিকাটার স্কুল থেকে ফিরবার পথে মাঠের মধ্যে দাঁড়িয়ে বুড়োর পত্রটা পকেট থেকে পড়্চি—প্রমীলা মারা গিয়েচে লিখ্চে। সামনে অপূর্ক রংএর আকাশটা ঘন হীরাকসের সমুদ্রের মত গাঢ় ময়ূরকণ্ঠী রংএর পিছনে বর্ণ-সমুদ্র, কোথাও জনমানব নেই—গাছে গাছে পাখীর ডাক, দূরে গ্রামসীমায় পাপিয়া সুর উঠিয়েচে,—জীবনের অপূর্কতা কি চমৎকার ভাবেই সন্ধ্যার ছায়াচ্ছন্ন আকাশটার দিকে চেয়ে মনে হোল !...

কাল বৈকালের দিকে বেলেডাঙার বট-অশ্বথের পথটা বেয়ে বেড়াবো বলে, কুঠীর মাঠের পথটা দিয়ে চললুম সেদিকে—মাঠে পড়েই অবাক হয়ে পশ্চিম আকাশে চেয়ে রইলুম—মুগ্ধ, আত্মহারা হয়ে গেলুম। সারা বেলেডাঙার বনশ্রেণীর ওপর ঘন কালো কাল বৈশাখীর বোড়ো মেঘ জমেচে—অনেকটা আকাশ জুড়ে অর্ধচন্দ্রাকার মেঘচ্ছটা—আর তার ছায়ায় চারি ধারের বাঁশবন, ঘন সবুজ শিমূল ও বটগাছগুলা, নীচের আউশের ক্ষেত, বাঁওড়—সবটা জড়িয়ে সে এক অপরূপ মূর্তি ধরেচে। বিশেষ করে ছবি দেখতে হয়েচে মারাত্মক রকমের সুন্দর এক শিমূল ডালের—তার সোজা মগ্‌ডালটা মেঘের ছায়ায় ও উড়নশীল ঘন কালো-মেঘে ঢালা আকাশের পটভূমিতে কোন্ দেবশিল্পীর আঁকা মহনীয় ছবির মত অপূর্ক। সেইটি দেখে চোখ আর আমার ফেরে না—কেমন যেন পা আটকে গেল মাটির সঙ্গে, অবশ হয়ে গেলুম, মুগ্ধ হয়ে গেলুম, দিশাহারা হয়ে পড়লুম—ওঃ !—সে দৃশ্যটার অদ্ভুত সৌন্দর্যের কথা মনে এলে এখনও সারা গা কেমন করে ওঠে।

তারপরই সঁা সঁা রবে ওপারের দিক থেকে বিরাট ঝড় উঠলো—দৌড়, দৌড়, দৌড়,—হাঁপাতে হাঁপাতে যখন গুরোমনী আমতলাটায় পৌঁছিয়েচি—আমাদের গ্রামের কোলে—তখন বৃষ্টি পড়তে শুরু করেছে—জেলি আর প্রিয় জেলের ছেলে আম কুড়ুচ্ছে—একটা দরিদ্র যুবককে আগ্রহ সহকারে আম কুড়ুতে দেখে চোখে জল এল। কি দিয়েচে জীবন এদের ? অথচ এরা মহৎ, এদের দারিদ্র্যে এরা মহৎ হয়েচে। অতিরিক্ত ভোগে ও সাচ্ছল্যে জীবনের সরল ও বন্ধুর পথটাকে হারায় নি।

স্নান সেরে এসে বকুলতলার ছায়ায় বসে ওপরের কথাগুলো লিখলাম। মাথার ওপর কেমন পাখীরা ডাকচে—ফিঙে, দোয়েল, চোখ-গেল—আর একটা কি পাখী—পিড়িং পিড়িং করে ডাকছে, কত কি অশুট কল-কাকলী—কি ভালই লাগে এদের বুলি!...

আজ বৈকালে হাট থেকে এসে কুঠীর মাঠে গিয়ে অনেকক্ষণ বসলাম। শিমূল গাছের এত অপরূপ শোভা তা ত' জানতাম না। ঝোপের মাথায় মাথায় কি নতুন কচি লতা সাপের মত খাড়া হয়ে আছে। মন পরিপূর্ণ হয়ে গেল সৌন্দর্যের ভারে—চারিধারে চেয়ে—এই প্রকৃতির সঙ্গে, পাখীর গানের সঙ্গে মানুষের স্মৃতি দুঃখের যোগ আছে বলেই এত ভাল লাগে। গ্রামের প্রান্তের সন্ধ্যাছায়াচ্ছন্ন-বেণুবনশীর্ষের দিকে চেয়ে মনে হোল ওদের সঙ্গে কত দিনের কত স্মৃতি যে জড়িত—সেই বর্ষার রাতে দিদির কথা, মায়ের কত দুঃখ, আতুরী ডাইনীর ব্যর্থতা, পিসিমা, ইন্দির ঠাকুরগের,—কত সমুদ্রে যাওয়ার স্মৃতি—সেই পিটুলিগোলা-পানকারী দরিদ্র বালকের, পল্লীবালা জোয়ানের, কতকাল আগের সে সব ইংরাজ বালক বালিকার, গাং চিল পাখীর ডিম সংগ্রহ কর্তে গিয়ে যারা বিপন্ন হয়েছিল—Cape Wanএর ওদিকে গিয়ে যারা আর ফেরেনি—কত কি, কত কি।

নদীজলও আজ লাগল অদ্ভুত—শান্ত সন্ধ্যা—কেউ নেই ঘাটে, ওপারের গাছপালায় ধূসর সন্ধ্যা নেমেচে—একটা নক্ষত্র উঠেচে মাথার ওপর—কোন অনন্ত দেশের বাণীর মত এই শত দৈন্তসংকীর্ণতাময় সংসারের উর্দ্ধে জল্ জল্ করে জলচে।

এখানকার বৈকালগুলো কি অপূর্ণ! এত জায়গায় তো বেড়িয়েছি, ইসমাইলপুর, ভাগলপুর, আজমাবাদ—কিন্তু এখানকার মত বৈকাল আমি কোথায়ও দেখেছি বলে মনে হয় না—বিশেষ করে বৈশাখ ও জ্যৈষ্ঠ মাসের মেঘহীন বৈকালগুলি—যেদিন সূর্য অস্ত যাবার পথে মেঘাবৃত না হয়, শেষ রাঙা আলোকটুকু পর্যন্ত বড় গাছের মগ্‌ডালে হাল্কা সিঁহরের পৌঁচের মত দেখা যায়—সেদিনের বৈকাল। গাছের ও বাঁশবনের ঘন ছায়ায় চাপা-আলো, ডাঁসা খেজুর ও বিলুপ্তের অপূর্ণ স্মরণ মাথানো, নানা ধরণের পাখী-ডাকা, মিষ্ট সে বৈকালগুলিতে এমন সব অদ্ভুত ভাব মনে এনে দেয়, হু একটা পাখী ধাপে ধাপে স্মরণ উঠিয়ে কোথায় নিয়ে তোলে—কি উদাস, করুণ হয়ে ওঠে

তখন চারিদিকের ছবিটা, বিশেষ করে আমি যখন আমাদের ভিটে ও ঠাকুর-মাদের বেলতলাটায় গিয়ে খানিকক্ষণ বসেছিলাম, তখন—তার আর কোনো বর্ণনা দেওয়া যায় না। আজ জ্যৈষ্ঠ মাসের শেষ, কিন্তু এখনও বিষপুষ্পের গন্ধ সর্বত্র, পাখীর ডাকের তো কথাই নেই—সোঁদালিফুল এখনও আছে, তবে পূর্বাপেক্ষা যেন কিছু কম। আমাদের বাগানে এখনও আম আছে, আজ সকালে নদী থেকে আসবার পথে লক্ষ্য করে দেখলাম, এখনও লোক তলায় তলায় আম কুড়ুচ্ছে।

এ সৌন্দর্য্য ছেড়ে কোথাও নড়তে ইচ্ছে করে না। তা ছাড়া ভেবে দেখলাম যত স্থানে বেড়িয়েছি, আনন্দ বেশী গাঢ় ও উদাসভাবে আমি পাচ্ছি শুধু এখানে—কোনো Comic thoughts আটকায় না, বরং স্ফুর্তিপ্রাপ্ত হয়—খুব ভাল কোরে ফোটে। তবে এই অপূর্ব সৌন্দর্য্যের মধ্যে দিনরাত ডুবে থাকা যায় বলেই এখানে কোনো শ্রমজনক কাজ করা সম্ভব হয় না দেখলুম। বিকেল হোতে না হোতে কেবল মন আন্‌চান্‌ করে—রাত্রিতে কাজে মন বসে না—এ যেন Land of Lotos-eaters কোনো শ্রমসাধ্য কাজ এখানে সম্ভবপর নয়, সেই জন্তই কলকাতা ফিরতে চাচ্ছি দু'একদিনের মধ্যে। আজকাল দিনগুলো একেবারে মেঘমুক্ত, রাত্রি জ্যোৎস্নায় ভরা, সকলি স্নিগ্ধ, পাখীর ডাকে ভরপুর, আর বৈকাল তো ওইরকম স্বর্গীয়, অপরূপ, এ পৃথিবীর নয় যেন—তবে আর লিখি কখন ?

মনে মনে তুলনা করে দেখলুম এধরণের বৈকাল সত্যিই কোথাও দেখিনি—এই তো পাশেই চালুকী, ওখানে এরকম বৈকাল হয় না। এত পাখী সেখানে নেই, এধরণের এত বেলগাছ নেই, সোঁদালি ফুল নেই, বনজঙ্গল বড় বেশী, কাজেই অন্ধকার—এমন চাপা আলোটা হয় না—এ একটা অপূর্ব সৃষ্টি, এতদিন তত লক্ষ্য করিনি, কাল লক্ষ্য করে দেখে মনে হোল সত্যিই তো এ জিনিস আর কোথাও দেখিনি তো! দেখবোও না—কেবলমাত্র সেখানে দেখা যাবে যেখানকার অবস্থাগুলি এর পক্ষে অল্পকূল। ইসমাইলপুর, আজমাবাদ লাগে না এর কাছে—সে অল্প ধরণের—প্রাচুর্য্য, বৈচিত্র্য, ও কারুকার্য্য কম—বিপুলতা বেশী, প্রখরতা বেশী।

ভাগলপুর তো লাগেই না। কতকগুলো বিশেষ ধরণের পাখী, বিশেষ ধরণের বন-বিহ্বাস, বিশেষ ধরণের গাছপালা থাকতে এ অঞ্চলেই মাত্র ঠিক এই ধরণের বৈকাল সম্ভব হয়েছে। সোঁদালি ফুল তার মধ্যে একটা বড়

সম্পদ, মাঠে, বনে ওর বাড়ি যখন ফুটে থাকে তখন বনের চেহারা একেবারে বদলে যায়—বনদেবীর সাজির একটা অযত্নচয়িত বনফুলের গুচ্ছের মত নিঃসঙ্গ মনে হয়—এই নিঃসঙ্গ সৌন্দর্য্য ওকে যে শ্রী ও মহিমা দান করেছে—তা আর কোনো ফুলে দেখলাম না।

এই সুন্দর দেশে বাস করেও যারা মানসিক কষ্ট পাচ্ছে, আমার সহীমার মত—তাদের সে কষ্ট সম্ভব হচ্ছে শুধু অজ্ঞানতা ও কুসংস্কারের জন্ত। মনের সাহস এদেশটা হারাতে বসেচে—কল্পনার উদারতা নেই, স্বদৃঢ় বিস্তীর্ণতা নেই—দৃষ্টি সেকলে ও একপেশে, তার ওপর মনের মধ্যে জ্বলনি জ্ঞানের বাতি। এত করে সহীমাকে বোঝাই, সে শিক্ষা সহীমা নেয় না, নিতে পারবেও না—কতকগুলো মিথ্যা সংস্কার ও কাশীরাম দাস এবং কৃতিবাস ওঝার প্রচলিত কতকগুলো False Philosophy এদেশের অশিক্ষিতা মেয়েদের মনের সর্বনাশ করেছে। জীবনের সহজ দর্শন এদের নেই, বুড়োবয়েসেও ভালো করে এখনও চোখ ফোটেনি—কি করা যায় এদের জন্তে, সর্বদাই সে কথা ভাবি। শিক্ষা দ্বারা মানুষ নিজেকে নিজে পায়, এইটাই জীবনের বড় লাভ। ভগবানকে পাবার আগে নিজেকে লাভ করা যে আবশ্যিক তা এরা ভুলে গিয়ে শুধু ভগবান, ভগবান্ বলে নাকে কাঁদতে থাকে নিতান্ত দুর্বল, জড়মতির মত। “নায়মাত্মা বলহীনেন লভ্য” এ কথা এরা শোনেও নি কোনোদিন।

সারা পল্লী অঞ্চলগুলো এমন হয়ে আছে, এদের দুঃখ দূর কর্তে গেলে তো জঙ্গল কাটালে হবে না, মশা তাড়ালেও হবে না ( সেটা যে অনাবশ্যিক, তা আমি বল্চি না ) মাসিক কিছু অর্থ সাহায্যের বন্দোবস্ত কল্পেও হবে না—এর জন্তে চাই জ্ঞানের আলো—উদার, বিপুল, দীপ্ত জ্ঞানের সার্চ লাইট।

আজ অনেকক্ষণ দাসী পিসিমার সঙ্গে গল্প কর্ছুম। সেকালের অনেক কথা হোল। ওই সবই আমার জানবার বড় ইচ্ছে। ঠাকুমাদের চণ্ডীমণ্ডপের ভিটাতে দুর্গোৎসব হোত, বড় উঠোন ছিল—আন্নাপিসি ছুবেলা গোবর দিতেন, খুব লোকজন খেত—নারিকেল গাছের পাশে ওই যে স্ফুঁড়ি গলিটা ওইটা ছিল খিড়্‌কীর দোর—মেটে পাঁচল ছিল ওদিকটা। গোলক চাটুঘ্যে ছিলেন বাবার মামাতো ভাই—পিসিমার মা ছিলেন ব্রজ চাটুঘ্যের পিসি। রাখালী পিসিমা ছিলেন চন্দ্র চাটুঘ্যের মেয়ে। প্রসঙ্গতঃ বলা যাক্ যে আজই রাখালী পিসিমার মারা যাওয়ার সংবাদ পাওয়া গেল। যাবো যাবো করে

আর ঘটে উঠল না। পিসিমার শশুরবাড়ী ছিল চৌবেড়ে। নিবারণ রাখালী পিসিমার ভাই, ভারী সুন্দর দেখতে ছিল—কালেরাতে মারা যায় আঠারো বছর বয়সে। সেইমাদের বাড়ীতে আসার ওই পথটাতে প্রকাণ্ড এক বকুল গাছ নাকি ছিল—তার তলায় অনেক লোক বসতো। হরি ঠাকুরদাদা মাকে খেতে দিতেন না, মায়ের সঙ্গে ভিন্ন ছিলেন, তাঁর দেওর গৌসাই বাড়ী ঠাকুর পূজা করে দু' পাঁচ টাকা যা জমাতো, তাই দিয়ে দরিদ্র বৃদ্ধাকে ধান কিনে দিয়ে যেতো।

বৈকালে নলে জেলের নৌকাতে বেড়াতে গেলুম মোল্লাহাটীর দিকে। ছ'টার সময় আমাদের ঘাট থেকে নৌকাখানা ছাড়া হোল। নদীর দুধারে অপরূপ শোভা, কোথাও বাবলা গাছ ফুলের ভারে নত হয়ে নদীর ধারে ঝুঁকে আছে, দুধারে ঘাস-ভরা নির্জন মাঠ, ঝোপে ঝাড়ে ফুল ফুটে আছে, গাণ্ড শালিকের দল কিচ্ কিচ্ করচে, বাঁ ধারে ক্রমাগত জলের ধারে ধারে নলবন, ওকড়া ও বন্তেবুড়োর গাছ—মাঝে মাঝে চাষীদের পটোল ক্ষেত, বেলেভাঙার ঘোষেরা যে নতুন ক্ষেতটাতে পটোল করেচে, তাতে টোকা মাথায় উত্তুরের মজুরেরা নিড়েন দিচ্ছে, ওদিকে কুম্ভোর ক্ষেত—ঢালু সবুজ ঘাসের জমি জলের কিনারা ছুঁয়ে আছে, গরু চরছে, বাঁকের মোড়ে দূরে খাব্রাপোতা গ্রামের বাঁশবন, সুরহৎ lyre পক্ষীর পুচ্ছদেশের মত নতুন বাঁশের আগা—একটু একটু রোদ মাথা। নদীজলের ঠাণ্ডা ঠাণ্ডা গন্ধ বেরুচ্ছে, মাথার ওপরকার আকাশ ঘন নীল, কিন্তু পশ্চিমদিগন্তে গ্রাম সীমায় শিমূল, কদম গাছের মাথায় মাথায় অপরূপ মেঘস্তূপ, মেঘের পর্বত—মেঘের গিরিবন্তের ফাঁকটা দিয়ে অন্তর্স্বর্ঘ্যের ওপারের দেশের খানিকটা যেন দেখা যায়।

খানিকটা গিয়ে একধারের পাড় খুব উঁচু, বন্য নিমগাছের সারি, পাড়ের ধারে গাণ্ড শালিখের গর্ত, নীল মাছরাঙা পাখী শেওলার ধারে ধারে মাছ খুঁজতে খুঁজতে একবার ওঠে, একবার বসে—খেজুরগাছ, গাবভেরেণ্ডা, বৈঁচি, ফুলে ভর্তি সাঁই বাবলা, আকন্দের ঝোপ, জলের ধারের নলবন, কাশ, ঝাড়া, নোনা, গুলঞ্চলতা-দোলানো শিমূল গাছ, শালিখ পাখী, খেঁকশিয়ালী, বাঁশঝাড়, উইটিবি, বনমুলার ঝাড়, বকের দল, উঁচু ডালে চিলের বাসা, উলুঘাস, টোকা-পানার দাম। সামনেই কাঁচিকাটার খেয়াঘাট, দুখানা ছোট চালা ঘর,

জনকতক লোক পারের অপেক্ষায় বসে—ডানধারের আকাশটায় অপূর্ব হীরাকসের রং ধরেচে—গাঢ়, নীল।

আবার ছু'পাড় নির্জন, এক এক স্থানে নৌকা তীরের অত্যন্ত নিকট দিয়ে যাচ্ছে যে কেলে কোঁড়ায় ফুলের গন্ধ পাওয়া যায়। বেলা আরও পড়ে এল, চারিদিকে শোভা অপরূপ, লিখে তা প্রকাশ করা যাবে না, ডাইনে ঘন সবুজ ঘাসের মাঠ, বামে আবার উঁচু পাড়, আবার বাবুলা গাছ, শিমুল গাছ, ষাঁড়া গাছ, পাখীর দল শেষ-বেলায় ঝোপে ঝোপে কলরব করচে—দূরে গ্রামের মাথায় মেঘস্তুপটা পেছনে পড়েচে—এক এক স্থানে নদী জল ঘোর কালো, নিখর কলার পাখীর মত পড়ে আছে—দেখাচ্ছে যেন গহন, গভীর, অতলম্পর্শ। ঝাঁকটা ঘুরেই অনেকখানি আকাশ এক সঙ্গে দেখা যাচ্ছে, পশ্চিম আকাশের কোলে যেন আগুন লেগেচে, অনেকখানি দূর পর্য্যন্ত মেঘে, আকাশে, গাছের মাথায় মাথায় যেন সে আগুনের আভা, খাব্রাপোতার ঘাটের পাশে কোন্ দরিদ্র কৃষক বধু জলের ধারের কাঁচড়াদাম শাক কোঁচড় ভরে তুলুচে আর মাঝে মাঝে সলজ্জভাবে আমাদের নৌকার দিকে চাইচে।

আরও খানিক দূর গেলাম, আবার সেই নির্জনতা, কোথাও লোক নেই, জন নেই, ঘর বাড়ী নেই, শুধু মাথার ওপর সন্ধ্যার ধূসর ছায়াচ্ছন্ন আকাশ আর নীচে সেই মাঠ ও গাছপালা ছুধারে। বুড়ো ছকু মাঝি ছেলে সঙ্গে নিয়ে দুখানা ডিঙি দোয়াড়ি বোঝাই দিয়ে চূর্ণী নদীতে মাছ ধর্তে যাচ্ছে, তিন দিনে সেখানে নাকি পৌঁছবে বলে। একদিকে ঘন সবুজ কাঁচা কষাড়ের বন, নীচু পাড়, জলের খানিকটা পর্য্যন্ত দাম-ঘাসে বোঝাই, কলমী শাক অজ্ঞপ্র, আর কলমীর দামে জলপিপি ও পানকৌড়ী বসে আছে। মাথার ওপরকার আকাশটা বেয়ে সবাইপুরের মাঠটার দিক থেকে খুব বড় এক ঝাঁক শামুকুট পাখী বাসায় ফিরুচে, বোধ হয় জটেমারির বিল থেকে ফিরুলো, পাঁচপোতার বাঁওড়ে যাবে। সেইখানটাতে আবার নলে মাঝি কাস্তে হাতে—ঘাস কাটতে নামুলো—কি অপরূপ শোভা, সামনে খাব্রাপোতার ঘাটটা—একটা শিমুল গাছের পিছনের আকাশে পাটুকিলে রংএর মেঘদ্বীপ, চারি ধারে এক অপূর্ব শ্রামলতা, কি শ্রী, কি শান্তি, কি স্নিগ্ধতা, কি অপূর্ব আনন্দেই মন ভরিয়ে তোলে—নলে কাস্তে হাতে ঘাস কাটচে—কাঁচা কষাড়ের মিষ্ট, সরস, জোলো গন্ধ বার হচ্ছে, আমি শুধু হেলান দিয়ে বসে দূরের আকাশটা ও গাছপালার দিকে চেয়ে আছি।



জীবনটাকে উপভোগ কর্তে জানতে হয়, মাত্র আট আনা খরচ হোল,—তাই কি? তার বদলে আজ বৈকালে যে অপূর্ব সম্পদ পেলাম, তার দাম দেয় কে? আমাদের গ্রামের কেউ আস্তো পয়সা খরচ করে খামোকা নৌকা বেড়াতে? কেউ গ্রাহ করে এই অপরূপ বনশোভা, এই অন্তদিগন্তের ইন্দ্রজাল, এই পাখীর দল, এই মোহিনী সন্ধ্যা?...কেউ না। এই যে সৌন্দর্যে দিশাহারা হয়ে পড়্‌চি, মুগ্ধ, বিস্মিত, রোমাঞ্চিত হয়ে উঠ্‌চি—এই সৌন্দর্যের মধ্যে ডুবে থেকেও এরা কেউ চোখ খুলে চায়?...আমি এসব করি বলে হয়তো আমাকে পাগল ভাবে।

যে জাতির মধ্যে সৌন্দর্য্য-বোধ দিন দিন এত কমে যাচ্ছে, সে জাতির ভবিষ্যৎ সম্বন্ধে খুব সন্দেহ হয়। শহর বাজারের কথা বাদ দিলাম, এই সব পাড়াগাঁয়ে যেখানে আসল জাতিটা বাস করে, সেখানকার এই কুশ্রী জীবন-যাত্রার প্রণালী, দৃষ্টির এই সংকীর্ণতা, এই শিল্পবোধের অভাব মনকে বড় পীড়া দেয়।

এবার জ্যোৎস্না উঠলো—আজ শুক্লা একাদশী, নলবন বাতাসে ছল্‌চে, জ্যোৎস্না পড়ে ছুপাশের নদীজল চিক্‌ চিক্‌ করচে। ঘাসের আঁটা বেঁধে নিয়ে নলে মাঝি নৌকা ছেড়ে দিল।

এত পাখী, গাছপালা, নীল আকাশ, এই অপূর্ব সৌন্দর্য্য এ সব যেন আমারই জন্ম সৃষ্ট হয়েছে। এদেশেই তো এসব ছিল এতদিন, কেউ তো দেখেনি, কেউ তো ভোগ করেনি—কতকাল পরে আমি এদের বুঝলাম, এদের থেকে গভীর আনন্দ পেলাম, এদের রসধারা পান করে তৃপ্ত হলাম—এই জ্যোৎস্না, এই আকাশ, এই অপূর্ব ইচ্ছামতী নদী আমারই জন্ম তৈরী হয়েছে!

অনেক দিন পরে আমাদের ঘাটে ছুপরে স্নান কর্তে গিয়েছিলুম। স্নান সেরে এই রৌদ্রদীপ্ত নদী, দূরের ঘুঘু-ডাকা বনানী, উষ্ণমণ্ডলের এই অপূর্ব বন-সম্পদ, স্বচ্ছ জলের মধ্যে সম্ভরণশীল মৎসরাজি, নিশ্চেষ্ট নীল আকাশ—আমার শিরায় শিরায় কেমন একপ্রকার মাদকতার সৃষ্টি করল।

একটা ছেলের ছবি মনে এল—সে এমনি Tropics-এর শ্যামল সৌন্দর্য্য, রোপ্যকরোজ্জ্বলা পৃথ্বী, নীল দিকচক্রবালের উদার প্রখরতার মধ্যে এই জলধারা পান করে, দিনরাত গায়ক পাখীদের কাকলী শুনে শৈশবে মানুষ হয়েছিল—

গ্রামের কত দুঃখ দারিদ্র্য, কত বেদনা, কত আনন্দ, কত আশা, কত ব্যর্থতার মধ্যে দিয়ে। সে মানুষ হয়ে উঠে এদের গান গেয়ে গেল—এই গাছপালা, লতা, পাখী, ফুলফল, সূর্য—এদের,—এরাই তাকে কবি করেছিল।

বৈকালে হাট থেকে এসে বইখানা নিয়ে নিজের ভিটেতে গিয়ে খানিকটা পড়ে এলুম—তারপর গেলুম জটাখালির পুলটাতে। বিবুঝিরে বাতাসে শরীর জুড়িয়ে গেল। তারপর এক বড় অদ্ভুত অভিজ্ঞতা হোল, এমন এক অপূর্ব আনন্দে মন ভরে উঠল, সারা গা এমন শিউরে উঠল—সে পুলকের, সে উল্লাসের তুলনা হয় না—গত কয়েক মাসের কেন, সারা বৎসরের মধ্যে ও রকম আনন্দ পাইনি।

আজ চলে যাবো তাই বিদায় নিলুম—বিদায় জ্যাঠামশায়ের পোড়ো ভিটে, বিদায় আমার গ্রাম, বিদায় ইছামতী, আবার তোমাদের সঙ্গে কবে দেখা হবে জানি না, আর দেখা হবে কিনা তাও জানি না, কিন্তু তোমার ফলে জলে পুষ্ট হয়েছি, তোমার অপরূপ সৌন্দর্য্য এমন স্বপ্ন অঙ্কন মাথিয়ে দিয়েছিল দশ বৎসরের বালকের চোখে, তোমার গাছপালার ছায়াতলে, তোমার পাখীর কল-কাকলীতে জীবন-নাট্যের অঙ্ক শুরু, বিদায়, বিদায়—যেখানে থাকি তোমাদের কথা কি কখনো ভুলবো?...

মনে হয় যুগে যুগে এই জন্মমৃত্যুচক্র কোনো এক বড় দেব-শিল্পীর হাতে আবর্তিত হচ্ছে, হয়তো দু'হাজার বছর আগে জন্মেছিলাম ঈজিপ্টে, যেখানে নলখাগড়ার বনে, শ্রামল নীল নদের রৌদ্রদীপ্ত তটে কোন্ দরিদ্র ঘরের মা, বোন, বাপ, ভাই, বন্ধুবান্ধবদের দলে এক অপূর্ব শৈশব কেটেচে তারপর এতকাল পরে আবার ষাটটী বছরের জন্মে এসেছি এখানে—আবার অগ্র মা, অগ্র বাপ, অগ্র ভাই বোন, অগ্র বন্ধুজন। পাঁচ হাজার বছর পরে আবার কোথায় চলে যাবো কে জানে? এই Cycle of Birth and Death যিনি নিয়ন্ত্রিত করছেন আমি তাঁকে কল্পনা করে নিয়েছি—তিনি এক বড় শিল্পী—এই সকল জন্মের সূখ দুঃখ, আশা আকাঙ্ক্ষা হয়তো কোনো দূর জীবনের উন্নততর, বৃহত্তর, বিস্তৃততর অবস্থায় সব মনে পড়বে—সে এক মহনীয়, বিপুল, অতি করুণ অভিজ্ঞতা।

কে জানে যে আবার পৃথিবীতেই জন্মাবো, ওই যে নক্ষত্রটা বটগাছের সারির মাথায় সবে উঠেচে—ওর চারি পাশে একটা অদৃশ্য গ্রহ হয়তো

ঘুরচে, তার জগতে যেতে পারি—বহু বছরের Globular cluster-দের জগতে যেতে পারি—কে বলবে এ সব শুধুই কল্পনা-বিলাস? এ যে হয়না তা কে জানে? হয়তো নিছক কল্পনা নয় এ সব—বৃহত্তর জীবন-চক্র যুগে যুগে কোন্ অদৃশ্য দেবতার হাতে এ ভাবেই আবর্তিত হচ্ছে।

শত শত জন্মমৃত্যুর মধ্য দিয়ে ষাঁর চলাচলের পথ—জয় হটুক সে দেবতার, তাঁর গতির তেজে সন্মুখের ও পশ্চাতের অমুক্তির অন্ধকার জ্যোতির্ময় হটুক, নিত্যসৃষ্টি জায়মান হটুক তাঁর প্রাণ-চক্রের নিত্য আবর্তনশীল বিশাল পরিধিতে।

গুন্ গুন্ করে বানিয়ে বানিয়ে গাইলুম, আপনিই মুখে এসে গেল :—

‘গভীর আনন্দরূপে দিলে দেখা এ জীবনে

হে অজানা অনন্ত’—

নিজেকে দিয়ে বুঝেছি তুমি কত বড় শিল্পী, নিজের দৃষ্টি দিয়ে বুঝেছি তুমি কত বড় দ্রষ্টা, নিজের সৃষ্টিকে দিয়ে বুঝেছি তুমি কত বড় স্রষ্টা।

হঠাৎ সারা দেহ এক অপূর্ব আনন্দে ভরে উঠল—ওপারে মাধবপুরের বটগাছের সারি, বেলেডাঙার গ্রামের বেণুবনশীর্ষ সান্ধ্য বাতাসে ছুঁচে—আউশ ধানের ক্ষেতের আইল-পথ বেয়ে কৃষক-বধু মাটির কলসী নিয়ে জল ভরতে আসচে, বাইনদ্দি মোড়লের বাড়ীর মাথায় শুক্রতারা উঠেচে—মনে হোল আমি দীন নয়, দুঃখী নয়, ক্ষুদ্র নয়, মোহগ্রস্ত জড় মানব নয়, আমি জন্ম জন্মান্তরের পথিক—আত্মা। দূর থেকে কোন্ স্বদূরে নিত্য নূতন পথহীন পথে আমার গতি—এই বিশাল বিশ্ব, এই বিপুল নীল আকাশ, অগণ্য জ্যোতির্লোক, এই সহস্র সহস্র শতাব্দী—আমার পায়ে চলার পথ, নিঃসীম শূণ্য বেয়ে সে গতি আমার ও সারা মানবের যুগে যুগে বাধাহীন হোক।

মনে হোল আর এক আজন্ম পথিক-দেবতার কথা, তাঁর কথা আমার এক খাতায় লিখেছি। আমার সে কল্পনা সত্য কি মিথ্যা সে বিচারের কোনো প্রয়োজন নেই, আমার দৃষ্টিতে আমি তা দেখেছি, আমার কাছে সেটা মহা-সত্য—revelation, চিন্তা ও কল্পনার আলোকে যা দেখা যায়—তাকে আমি মিথ্যা বলে ভাবতে পারি না।

বিদায়, বিদায়—আর কখনো অজয়ের সঙ্গে দেখা হোল না, গুরুজীর সঙ্গে দেখা হোল না, কথক ঠাকুরের সঙ্গে দেখা হোল না, দেবব্রতের সঙ্গে

দেখা হোল না—অনেক দিন পরে অজয়ের সেই শৈশবে-শোনা গানটা যেন কোথায় বসে গাছে মনে পড়ে।

‘চরণ বৈ মধু বিন্দতি’ চলা-দ্বারাই অমৃত লাভ হয়, অতএব চলো।

দেশ থেকে এসে আজ একেবারেই ভাল লাগ্চে না। বৈকালগুলির জন্তে মন কেমন করচে, কুঠীর মাঠের জন্তে, খুকীর জন্তে, ইছামতীর জন্তে, ফণি কাকার জন্তে—সকলের জন্তেই মন কেমন হয়েছে। ছেলেবেলায় দেশ থেকে বোর্ডিং-এ ফিরলে এমনটা হোত, অনেক কাল পরে মানস ইতিহাসে তার পুনরাবৃত্তি দেখা গেল।

কাল কল্কাতাটা যেন নতুন নতুন লাগ্ছিল—যেন এ কোন্ শহর—এর busy ও কর্মবাস্ত চেহারাতে আমিই কেমন অবাক হয়ে গেলাম, আনন্দ-বাজার পত্রিকার ওই গলিটি, কলেজ স্ট্রীট, ওয়েলিংটন স্ট্রীট সব তাতেই লোকে একটা কিছু করচে, ব্যস্ত—ক্ষিপ্ত, ছুটছে, বাস থেকে নাম্চে—দেশের মানুষদের সে মৃতের মত জড়তা, অলস ও কর্মকুণ্ঠতার পরে এ সব যেন নতুন লাগ্লে।

দিনটা কাটল বেশ ভালোই। সকালে উঠে সজ্জীর সঙ্গে গেলুম কাঁচরাপাড়া, সেখান থেকে বড়-জাগুলো হয়ে মরিচা। এত ঘন জঙ্গল যে কলকাতার এত কাছে থাকতে পারে, না দেখলে বিশ্বাস করবার প্রবৃত্তি হয় না। সেখানে গিয়ে ঔষধ সংগ্রহ করে কাঁচরাপাড়ায় এলাম। বাস রিজার্ভ করে যাওয়া হয়েছিল। সেখান থেকে আসা গেল কাঁচরাপাড়া মাঠের মধ্য দিয়ে মোহিত মজুমদারের কাছে। মোহিত বাবু শোনা গেল শা’গঞ্জ গিয়েছেন, কাঁচরাপাড়া বাজারে একটা দোকানে কিছু খেয়ে নিয়ে বাসে করে এলুম হালিসহর খেয়াঘাটে। এই ঘাটে অনেকদিন আগে দিদিমা থাকতে একবার সর্বপ্রথম কেওটা এসেছিলুম, হালিসহরে থাকতে।

মোহিত বাবুর ওখানে খাওয়া দাওয়া হোল, অনেকক্ষণ সাহিত্য সম্বন্ধে বিশেষ করে বর্তমান তরুণ-সাহিত্য সম্বন্ধে কথাবার্তা হোল। ভদ্রলোক প্রকৃত কবি, সাহিত্যই দেখ্‌লুম গুঁর প্রাণ, কবিতা পড়তে বসে যখন ছেলেমেয়ের তাঁর কোল থেকে টানাটানি করে রসগোল্লা খেতে লাগ্লে—তখন সে বিদ্যুৎ হোল!

বেরিয়ে আমি আর মোহিত বাবু কেওটায় প্রসন্ন গুরুমশায়ের পাঠশালায়

খুঁজতে খুঁজতে গেলুম। সে জায়গাটা এখন একটা পোড়ো ভিটে ও  
জঙ্গল—কোণের সে জামরুল গাছটা এখনও আছে। সন্ধ্যার অন্ধকারে  
জামরুল গাছটা চেনা যাচ্ছিল না—মোহিত বাবু কাছে গিয়ে বল্লেন—হ্যাঁ এটা  
জামরুল গাছই বটে। জামরুল পেকে আছে।

তারপর রাখাল চক্রবর্তীর স্ত্রীর সঙ্গে দেখা করলুম। পুলিন, তাঁর ছেলে।  
ছেলেবেলায় আমরা এক সঙ্গে বিপিন মাষ্টারের পাঠশালায় পড়েছি—এখন ও  
হটুপা লম্বা, কালো গৌপদাড়িওয়ালা মাহুষ। ওর সঙ্গে কথা বল্লুম প্রায় ত্রিশ  
বছর পরে। শেষ কবে ওর সঙ্গে কথা বলেছিলাম কে জানে?...

রাখাল চক্রবর্তীর বাড়ীর ভিতরের রোয়াক দিয়ে ওদের রান্নাঘরের  
রোয়াকে বসে মাসীমার সঙ্গে কথা বল্লুম। শেষ কবে কথা বলেছিলাম,  
কবে ওদের রোয়াকে পা দিয়েছিলাম, হয়তো তখন আমরা কেওটাতে ছিলাম  
—তারপর হয়তো শীতলের মায়ের গল্পবলা, কি আতুরীর কাছে ধামা কুলো  
বেচার ঘটনাটা—যা আমার কেওটা সম্পর্কে মনে আছে, ঘটেছিল। তারপরে  
এক বিরাট আনন্দ, আলাপ, রহস্য, উল্লাস, হুঃখ, হর্ষ, শোক, আলোক-  
পূর্ণ—বিরাট জীবন কেটেছে—পটুপটি তলার মেলায়, বকুলতলার দিনগুলোতে,  
পূব-মুখো যাওয়ায়, ইছামতীর ধারের সে অপূর্ব শৈশবের আনন্দ-ময় দিনগুলি—  
সেই কতদিন স্কুল থেকে সপ্তাহ পরে ফিরে এসে মায়ের হাতে চৈত্র মাসের  
দিনে বেলের পানা খাওয়া তারপর স্কুল কলেজ, বাইরের জীবনে যা কিছু  
ঘটেচে সবই ওর পরে। কালকার দিনটাতে আবার এতকাল পরে পা  
দিলাম রাখাল চক্রবর্তীর বাড়ীর ভিতরকার রোয়াকে বা পুলিনের সঙ্গে  
কথা কইলাম।

জীবনের অপূর্বত্ব এই সব মুহূর্তে কি অদ্ভুত, অপরূপ ভাবেই ধরা  
পড়ে যায়।

ককুণা মামার বাবা যোগীন্বাবু জানালা খুলে কথা কইলেন। তিনি  
আমাকে খুব চেনেন দেখলাম।

বাত আটটার বাসে হুগলীঘাট এলাম। খুব পরিষ্কার আকাশ, খুব  
নক্ষত্র উঠেচে। রাত এগারোটায় কলকাতা ফেরা গেল।

সেই সকাল ছ'টায় বেরিয়ে কোথায় বড় জাগুলে, মরিচা, দুধারের ঘন  
জঙ্গল, কাঁচরাপাড়া বাজার, বাঁশের পুল, হালিসহরের খেয়া ঘাট, কেওটা,  
হুগলী ঘাট, নৈহাটী—সব বেড়িয়ে ঘুরে আবার কলকাতা ফিরলাম সাড়ে

এগারোটা রাত্রে। মোটর বাস ছিল বলেই একদিনে এত ঘোরাঘুরি, এমন সব অপূর্ণ অভিজ্ঞতা সম্ভব হোল।

রাখাল চক্রবর্তীর বাড়ীর পৈঠায় বসে মোহিতবাবু 'পথের পাঁচালী' সম্বন্ধে অনেক কথা বললেন। কেওটায় সেই অশথ্ গাছটার কাছে রাত আটটার সময় দাঁড়িয়ে ভবিষ্যত সাহিত্য মণ্ডলী গঠনের ও শনিবারের চিঠি অন্ত্যভাবে বার করার জন্তু খানিকটা পরামর্শ করা হোল। কাজে কতদূর হয় বলা যায় না।

কাল মোহিতবাবু কলকাতায় এসেচেন, সজনীবাবু লিখে পাঠালেন। বৈকালে গেলাম প্রবাসী অফিসে। সেখান থেকে বার হয়ে সকলে মিলে প্রথমে যাওয়া গেল ডাঃ সুনীল দে'র বাড়ী। সেখানে ঢাকার বর্তমান হাঙ্গামা ও ইউনিভার্সিটির গোলযোগ সম্বন্ধে অনেক কথাবার্তা হোল। সজনীবাবুর ব্যক্তিগত কথাও অনেক উঠল—অনেকক্ষণ বসে সেখানে হাসি-গল্প হোল, বেশ উপভোগ করা গেল—ডাঃ দে আমার ঠিকানা চাইলে বিপদে পড়লুম—এ বাসাটা যদি বদলাই তবে, বদলে কেলে এ ঠিকানাটা দিয়েই বা লাভ কি ?

সেখান থেকে বার হয়ে সবাই গেলাম কবি যতীন বাগ্‌চীর বাড়ী, মনোহর-পুকুর রোড তো প্রথমে খুঁজেই বার করা দায়। ট্যাক্সি ছেড়ে দিয়ে বালিগঞ্জ এ্যাভিনিউ বেয়ে আমরা রাত ন'টার সময় একবার এদিক একবার ওদিক—সে মহামুঞ্চিল। অনেক কষ্টে রাত দশটার সময় বাড়ী বেরুল, যতীনবাবু আমাদের দেপে খুব খুশি হলেন। মোহিতবাবু আমার সঙ্গে পরিচয় করিয়ে দিলেন, বল্লেন অল্পদিনের মধ্যেই ইনি যশস্বী হয়ে উঠেচেন একখানা বই লিখে, luck আছে বলতে হবে। আমি মনে মনে খুব খুশি হয়ে উঠলাম, মুখে যাই বলি। তারপর জল-টল খাওয়ার পরে সেখান থেকে অনেক রাত্রে বাসায় ফেরা গেল।

আজও আবার তাই। প্রথমে কেদার বাবুর সঙ্গে এশিয়াটিকদের অকর্মণ্যতা নিয়ে খানিক তর্ক বিতর্ক হোল। উনি বল্লেন কেন, জঙ্গিস্ খাঁ কি বড় সাম্রাজ্য প্রতিষ্ঠা করেন নি? আমি বল্লুম—সেটা one man show মাত্র, কোনো স্থায়ী সাম্রাজ্য প্রতিষ্ঠা তিনি করেছিলেন কি? প্রবাসী অফিস থেকে আমরা গেলুম অমল হোমের বাড়ী, সেখানে অনেকক্ষণ গল্পগুজব ও

কবিতা আবৃত্তি হোল, অমল হোমের স্ত্রী বললেন একটা মহিলা আপনার সঙ্গে দেখা কর্তে চান, আপনার 'অপরাজিত' পড়ে—আমি তাঁকে ডাকি,— কালোর ঘরেই আছেন।

মেয়রের নির্বাচন সম্পর্কে অনেকগুলো নতুন কথা শুনলাম অমল হোমের মুখে—যতীন সেনগুপ্ত এবার মেয়র না হোলে অনেকে দুঃখিত হবে বটে, কিন্তু ——মেয়র হোলে লোকে তার চেয়েও দুঃখিত হবে। বাইরে চেয়ে দেখলাম আকাশে মেঘ করেছে—অনেকটা দূরের আকাশও দেখা যায়— দূরের কথা, দেশের কথা মনে করিয়ে দেয়। এঁরা বেশ শিক্ষিতা মেয়ে, ধরন-ধারন এত মাজ্জিত ও মবুর যে এঁদের সঙ্গে গ্রামের মেয়েদের—সইমা কি বুড়ী পিসিমা এদের তুলনা করে হতাশ হতে হয়। ঘরের ধারে একটা ভাঙ্গা কড়া এক জায়গায় বসানো ছিল, বেরুবার সময় পায়ে এমন লাগ্‌ল!...

সেখান থেকে এলাম সুরেশ বাবুর বাড়ী। সেখানে হেম বাগ্‌চী ও সুবল বসে আছে। সুরেশ বাবুর স্ত্রী চা-এর উতোগ কর্তে আমরা নিবৃত্ত করলাম— কেননা এইমাত্র অমল হোমের বাড়ী থেকে আমরা চা, পাপর ভাঙ্গা, বাদাম ভাঙ্গা ও রসগোল্লা খেয়ে আস্‌চি। ফরাসী কবি বোদলেয়ার সম্বন্ধে খানিকটা কথাবার্তা হোল, মোহিত বাবু একটা লেখা পড়লেন—তারপর আমরা সবাই এলাম চলে। মোহিত বাবুর আবৃত্তি কি সুন্দর!

কি সুন্দর সন্ধ্যাটা কাটল।

আজ সকালে ধূজ্জটি বাবু এসেছিলেন। তাঁর সঙ্গে ও সুরেশ চক্রবর্তীর সঙ্গে গল্পগুজ্বের পর আসাম মেলে রাণাঘাট এলাম ও সেখান থেকে সাড়ে তিনটার ট্রেনে দেশে এলাম। হাজারির মোটরটা দাঁড়িয়েছিল, সহজেই বাজার পর্যন্ত আসা গেল।

এসেই কাপড় চোপড় ছেড়ে গামছা নিয়ে নদীতে গা ধোবার জন্তু গেলাম। ভারী সুন্দর বৈকাল, আকাশের রং এমন সুন্দর শুধু বর্ষাকালেই হয়। গাছপালার রং কি সবুজ—রৌদ্রের রংটা কেমন একটা অদ্ভুত ধরণের, কুঠীর মাঠে গেলাম—সেই শিমুল গাছটার গায়ে কি সুন্দর রৌদ্রই পড়েচে—চারি ধারে আকাশের রংএ বড় মুগ্ধ কর্লে।

আমাদের ভিটার পাশে যে গাছটা আছে, তার গায়ে খানিকটা হল্‌দে রং-এর রোদ লেগে দেখতে হয়েছে অদ্ভুত।

মাঠের চারিদিকে সবুজ গাছপালা, আউশ ধানের সবুজ ক্ষেত, স্থনীল আকাশ, এখনও বো-কথা-ক ডাকচে—খুব ডাকচে। সোঁদালী ফুল এখনও কিছু কিছু আছে।

কাল বৈকালে প্রথম গেলাম স্ববল বাবুদের বাড়ী বাগবাজারে, সেখানে খানিকক্ষণ গল্পগুজবের পরে বিভূতিদের ওখানে গেলাম। বাগবাজার ট্রামে আসবার সময়ে মনে ভাবছিলাম সাতাশ বছর আগে এই বর্ষাকালে, তবে বোধ হয় এর আরও কিছু পরে—এই জায়গাটা দিয়ে ট্রামে করে যেতুম বাবার সঙ্গে। তখন আমি নিতান্ত বালক, আর আজ কেবলই মনে হচ্ছে এই সময়ের পরে কলকাতা ছেড়ে দেশে গিয়ে সে কি অপূর্ণ জীবন-যাত্রা। কি বৈচিত্র্য! সে শুধু অনুভূতিতে ভরা—নানা ধরনের বিচিত্র বাল্য অনুভূতি।... আসল জীবনটাই তো হোল এই অনুভূতি নিয়ে, পুলক নিয়ে, উচ্ছ্বাস নিয়ে। আজও সেই গ্রাম আছে, নদী আছে, কিন্তু সে অপূর্ণ অনুভূতি আর নেই।

বিভূতিদের বাড়ী থেকে যখন আসি তখনও কেমন একটা শূণ্যতার ভাব, যেন এদের বাড়ীর সকলেই আছে—অথচ কি যেন নেই। সবাই কাছে এল, বসলে, গল্পগুজব করলে—কিন্তু কোথায় সেই ভাদ্রমাসের বৈঠকখানা ঘরের দিনগুলো, সেই মক্কা-মদিনা যাত্রী তাকিয়া-বালিশ, সে আনন্দের ঢেউ? Where is that child?...সিধুবাবুও নেই—কেমন একটা ফাঁকা ফাঁকা।

পথে একটা মারামারি হচ্ছিল, পিকেটিং-কারী এক বালককে নাকি পুলিশে খুব মেরেচে, তাই নিয়ে। বাসে করে বায়োস্কোপ দেখতে গেলাম ও সেখান থেকে অনেক রাত্রে এলাম ফিরে।

আজ রবিবাসরের অধিবেশনে নিমন্ত্রিত হয়ে গিয়েছিলাম, সেখানে রাজশেখর বাবুর সঙ্গে আলাপ হোল, ‘অপরাজিত’ তাঁর খুব ভাল লেগেচে বলছিলেন।

আজ ক’দিন থেকে মনে কেমন একটা অপূর্ণ ধরনের আনন্দ পাচ্ছি তা বলবার নয়, লিখে প্রকাশ করবার নয়—সে শুধু বুঝতে পারি—বোঝাতে পারি নে।

এইমাত্র জ্যোৎস্নাপ্লাবিত বারান্দাটাতে একা বসে মেঘের ফাঁকে ফাঁকে আকাশের দু-একটা নক্ষত্রদের দিকে চেয়ে এই অপূর্ণ ভাবটাই মনে আসছিল..



আনন্দে মানুষকে এত উচ্চে ও ঠাঠাতে পারে। অমৃত বলে মনে হচ্ছিল নিজেকে, সত্য বলে মনে হচ্ছিল, বিরাট ও শাস্ত বলে মনে হচ্ছিল... এক উন্মাদনাময়ী প্রাণশক্তির অভিব্যক্তি!... মুগ্ধ হয়ে গেলাম...

দু একটা চরণ গান তৈরী করে গুন্ গুন্ করে গাইলাম :—

মনে আমার রঙ ধরেচে আবার স্নেহের আসা-যাওয়া,—

আজ ক'দিন থেকেই এরকমটা হচ্ছে।

দিনগুলো যে ভয়ানক নিরানন্দ হয়ে উঠেচে একথার কোনো ভুল নেই। এ শুধু হয়েছে সকাল থেকে রাত দশটা পর্যন্ত ভয়ানক খাটুনির জন্মে। অনবরত পরের খাটুনি, নিজের জন্ম এতটুকু ভাববার অবকাশ নেই, অবসর নেই, সকাল দশটা থেকে আরম্ভ করে রাত দশটা পর্যন্ত বারো ঘণ্টা। মনের অবকাশ মানুষের জীবনের যে কত দরকারী জিনিষ তা এই কর্মব্যস্ত, যন্ত্রযুগের অত্যন্ত কর্মঠ, হিসাবী ও সময়জ্ঞানসম্পন্ন মানুষেরা কিছু বুঝবে কি? এতে মানুষকে টাকা রোজগার করায়, ভাল খাওয়ায়, ভাল পরায়, ভাল গাড়ী ঘোড়া চড়ায়— অর্থাৎ ব্যক্তিত্বকে আরও জাগিয়ে নাচিয়ে তোলে—শক্ত করে বাঁচিয়ে রাখে, বেশ সূচুভাবে ও রুতীর সুনামে বাঁচিয়ে রাখে—কিন্তু ভারবাহী চোখে-ঠুলি বলদের থেকে কোনো পার্থক্যের গণ্ডী টেনে দেয় না—জীবনকে মরুভূমি করে রেখে দেয়,—টাকার গাছের আবাদ। প্রকৃতির শ্রামল বন্য সম্ভার, নীল আকাশ, পাখীর কুজন, নদীর কল মর্মর, অস্ত-দিগন্তের সাক্ষ্যমায়া—এ সব থেকে বহুদূরে, এক জনহীন, জলহীন বৃক্ষলতাহীন মরু। এদের দেশ ভ্রমণেও যেতে দেখেচি ফার্স্ট ক্লাস কামরায় চেপে, দশদিনের ভ্রমণে দুই হাজার টাকা ব্যয় করে, মোটরে করে যাবতীয় স্থান এক নিঃশ্বাসে বেড়িয়ে, বিলাতী হোটেল খানা খেয়ে, ছইস্কি টেনে—সেও ঐ ভেড়ার দলের ভেড়ার মত বেড়ানো।

আজ বসে বসে শুধু মনে হচ্ছিল অনেকদিন আগে বাল্যের নবীন মধুর বর্ষায় বৈকালগুলি—কি ছায়া পড়তো, কি পত্রপুষ্পের সুগন্ধ বেরুতো—কি পাখীর গান হোত—জীবনের সম্পদ হোল সে সব—এক মুহূর্তে জীবনকে বাড়িয়ে তোলে, বৃদ্ধিশীল করে—আত্মার পুষ্টি ওখানে। ধ্যান অর্থাৎ contemplation চাই, আনন্দের অবকাশ চাই—তবে হোলো আত্মার পুষ্টি—টাকা রোজগারের ব্যস্ততায় দিনরাত কাটিয়ে দেওয়ায় নয়।

মানুষের জীবনে প্রকৃতি একটি মহাসম্পদ, এর সঙ্গে অসহযোগ করলে

জীবনটায় প্রসারতা কমে যায়, রোমান্স কমে যায়, common place হয়ে পড়ে নিতান্ত ।

আমি নিজেই বুঝতে পারি, এই ভাদ্র মাসের ঠিক এই সময়কার ১৯২৭ সালের ডায়েরীগুলো যদি পড়া যায় তবেই দুই জীবনে আকাশ পাতাল তফাৎটা ভালো করে বোঝা যাবে ।

১৯২৫ সালে এই সময়ে বিভূতিকে পড়াতুম মনে আছে, সে এখন কত বড় হয়ে গিয়েছে—এখন আবার অল্প ছেলেদের পড়াই ঠিক এই সময়টীতে, সে কথা হোলো আজ । এদের এখানে প্যাক বাক্সের গন্ধ, ছেলেগুলোও দুটু ।

জীবনের নানা অভিজ্ঞতার কথা ভাবছিলাম—একদিন উপেন বাবুকে বলেছিলাম বাল্যের অমুক দিনটা থেকে যদি জীবন আবার আরম্ভ হোত…… ? আজও তাই ভাবি—জীবনের experience আমাদের খুব বেশি না,—সমৃদ্ধ খুব, একথা বোলতে পারি না অল্প অনেকের জীবনের তুলনায় । সামান্য একটু ভাগলপুর যাওয়া, সামান্য এক আবেষ্টনী, নতুন ধরনের জীবনের স্পর্শ, বড়লোকের বাড়ী—এই সব । কিন্তু এতেই আনন্দ এত বেশী দিয়েছে, যে এ থেকে এই কথাটাই বার বার মনে হয় যে নিদ্দিষ্ট পরিমাণের আনন্দ প্রত্যেকের মনেই ভগবান্ দিয়েছেন, যে কোন জিনিসকে উপলক্ষ করে হোক সেটা ব্যয়িত হবেই হবে ।

অনন্ত জীবনে আরও কত অভিজ্ঞতা হবে, সেই কথাই ভাবি । আরও কত উন্নত ধরনের জীবনযাত্রা, কত অপূর্ব আনন্দের বার্তা !

এ রবিবার দিনটাও একটা ট্রামের সারাদিনের টিকিট বন্ধুর ছেলে তরুকে দিয়ে কিনিয়ে আনালুম শিয়ালদহ থেকে । এদিন বেরোলুম সকাল সাড়ে ছ'টার সময়ে । প্রথমে উপেন বাবুর বাসা । সেখান থেকে গেলাম ভবানীপুর সোমনাথ বাবুর বাড়ীতে । খানিকটা গল্পগুজব করার পরে গেলাম প্রমথ চৌধুরীর বাড়ী বালিগঞ্জে । তিনি আমার বইখানা পড়ে খুব খুশী হয়ে আমার সহিত পরিচিত হবার ঔৎসুক্য জানিয়েছিলেন, এই কথা সোমনাথ বাবু আমাকে লেখেন—তাই এ যাওয়া । তিনি নাকি বলেছেন—In Europe, he could have been a celebrity কিন্তু এখানে কে খাতির করবে ?… তারপর আমার বইখানা সম্বন্ধে প্রমথ বাবু নানা কথা বললেন—দেখলাম

বইখানি খুব ভাল করে পড়েচেন। ছুর্গার সিন্দুর কোঁটা চুরি ও সেটা কলসী থেকে বেরনোর উল্লেখটা বার বার কল্লেন।

সোমনাথ বাবু আমাকে এসে পার্ক সার্কাসে ট্রামে উঠিয়ে দিয়ে চলে গেলেন—বল্লেন, আপনার সঙ্গে আলাপ হয়ে একটা ভারী লাভ হল বলে মনে করছি।

ওখান থেকে এসে গেলাম রেবতী বাবুদের মেসে—খানিকটা গল্পগুজব করার পরে গেলাম নন্দরাম সেনের গলি ও বাগবাজারে। তারপর হরি ঘোষের ষ্ট্রীটে কালোদের বাসাতে। দুপুর তখন দুটো, বাইরের ঘরে বুড়ো ছিল, মিছুও এখানে আছে দেখলাম—মিছু কাছে এসে বসলো, অনেক গল্পগুজব কল্লেন। কালোর ছেলে এনে দেখালে। ঠিক যেন মায়ের পেটের বোনের মত সরল ব্যবহার কল্লেন। ভারী আনন্দ হোলো দেখে। ওরা সবাই এল—সরবৎ করে আনলে মিছু—ভারী ভাল লাগলো।

ওখান থেকে তিনটের সময় বেরিয়ে দক্ষিণা বাবুর বাড়ী, সেখানে অনেকক্ষণ গল্পগুজবের পর জলযোগ হোল। চা-পানের পর সেখান থেকে বার হয়ে নিকটেই মহিম হালদার ষ্ট্রীটে রবি-বাসরের অধিবেশনে যোগ দিলাম—সেখানে বেলা পাঁচটা থেকে রাত নটা। অনেক রাত্রে ট্রামে বাসায় ফিরলাম।

আজকাল সেই মধুর দিনগুলি হারিয়ে গেছে—বহুদিন দেশে যাইনি—আজও বিকেলে স্কুলবাড়ীর ছাদ থেকে বহুদূরের দিকে চেয়ে কতকাল আগের কথা মনে হচ্ছিল—মনে হচ্ছিল অনেককাল আগের সেই মাকাল ফল, পটুপটি গাছের সময়টা এই—কত নতুন লতাপাতা গজিয়েচে—ভাদ্র দুপুরের খররৌদ্রে জানালার ধারে বসে সে সব মধুর জীবন যাত্রার দিনগুলি—কত সুখদুঃখ ভরা শৈশবের সে জগতটা।...কোথায় কতদূরে যে চলে গিয়েচে! আজকাল সময় পাই না, স্কুলের পরই পর পর দুটো ছেলে পড়ানো—একটুখানি ভাববার সময় পাইনে—দেখবার সময় পাইনে, তবু যতটুকু সময় পাই ছুর্ভিক্ষের ক্ষুধায় ইঁ করে যেন আকাশটার দিকে চেয়ে। একটুখানি অপরাহ্নকে স্কুলের তেতলার ছাদটা থেকে দেখি—আবার সেই জীবন-সন্ধ্যা ও মাধবী-কঙ্কনের দিনগুলি আগতপ্রায়। এখন দেশে পাটের আটি কাচবে, খুব পাকাঠা পড়ে থাকবে। সেই জেলেকা, রংমহাল শিস্মহাল, শিবাজীর দিনগুলি আরম্ভ হবে। এই যে অভাব, না দেখতে পাওয়া,—আমার মনে হয় এই ভালো। এতে মনের তেজ খুব বাড়ে, দৃষ্টির intensity আরও বেশি হয় এটা বেশ বুঝি।

একটা কথা এই মাত্র ভাবছিলাম রামায়ণ মহাভারতের যুগের পূর্বে ভারতের বালকেরা, বৃদ্ধেরা কি ভাবতো—তখন জীবনের ভাব-সম্পদ ছিল দীন—সীতার অশ্রুজল তখন ছিল লোকের অজ্ঞাত, ভীষ্মের সত্যনিষ্ঠা, শ্রীকৃষ্ণের লীলা, এ সব তো জানতো না। বৃদ্ধের কথা বাদ দিলাম, অশোক, চৈতন্য, মোগল বাদশাহগণ, এই সমস্ত Tragic possibility ভবিষ্যতের গর্ভে ছিল লীন—তবে তখনকার লোকে কি ভাবতো, কবিদের, ভাবুকের, গায়কের চিত্রকরের উপজীব্য ছিল কী ?

আর পাঁচশত বছরের সম্ভাব্যতার কথা মনে উঠে। আরও কত Tragedyর বিষয়, ভাবুকতার ইতিহাস ধীরে ধীরে গড়ে উঠবে এর মধ্যে। সেটা এখনই গড়ে উঠে, কিন্তু আমরা তার সমস্তটা এক সঙ্গে দেখতে পাচ্চিনে। এই ইংরাজ চলে যাবে একদিন—এই সব স্বাধীনতা সংগ্রাম, এই গান্ধী, নেহরু চিন্তরঞ্জন এই নারী-জাগরণ, কাথির এই অশ্রুতীর্থ—ইতিহাসে এসব কথা নব নব ভাবের জন্মদাত্রী হবে। এ সব ঘটনা জাতির মনের মহাফেজখানায় অক্ষয় আসনের প্রতিষ্ঠা করবে।

কাল সারা দিনটা বড় ব্যস্ততার মধ্য দিয়ে কাটলো—প্রবাসী অফিসে একটা কাজ ছিল। ঠিক বেলা বারোটোর সময় সেখান থেকে বার হয়ে গেলাম প্রেসিডেন্সী কলেজে রবীন্দ্র পরিষদে! নীহার বাবু বল্লেন পথের পাঁচালীকে আমি তরুণ সাহিত্যের মধ্যে উচ্চ আসন দিই। প্রমথ বাবু আবার বইখানির কথা অনেক ছাত্রদের বলছিলেন। প্রতুল গুপ্ত বলে ছেলেটি বঙ্গ সাহিত্যের বিজয়ী সেনাপতি বলে অভ্যর্থনা করলেন। সোমনাথ বাবু বল্লেন, আপনি বর্তমান আধুনিকতম সাহিত্যের বড় ঔপন্যাসিক—আপনাকেও কিছু বলতে হবে। খুব আনন্দে কাটল।

ওখান থেকে বার হয়ে যাবার কথা ছিল সাহিত্য সেবক সমিতির অধিবেশনে কিন্তু তা আর যাওয়া সম্ভব হোল না। প্রমথ বাবুর সঙ্গে গল্প কর্তেই বেজে গেল ন'টা। অতুল গুপ্ত উপস্থিত ছিলেন—তিনি আমার বইখানার খুব প্রশংসা করলেন। তিনি আমার শিক্ষক ছিলেন ল' কলেজে। তাঁকে বল্লুম সে কথা।

আজ একবার দুপুরে কাজে গিয়েছিলাম অক্ষয় বাবুদের বাড়ীতে। শীতল

একখানা হাতের লেখা মাসিক পত্র বার করচে, তাতে লেখা দিতে বল্চে ।  
কাল সে আসবে বেলা তিনটের সময় ।

সেখান থেকে পার্ক সার্কাসের ট্রামে ফিরছিলুম—বৈকাল ছ'টা । পূবদিকের  
আকাশ অন্ধকার হয়ে আসচে । শিয়ালদহের কাছটায় ট্রামটা এলেই  
আজকাল পূব দিকে চাই । অন্নিদিনও চাই—এমন হয় না—আজ যে কী অপূর্ব  
মনে হোল ।...মাকাল ফল, পিসিমা, পুরাণো বঙ্গবাসী, ছুপুরের রোদ্দ, মাকাল  
গাছ, ঘুঘু পাখী, বাঁশবন—কত কথা যে এক মুহূর্তে মনে এল । আমি এরকম  
আনন্দ একদিন মাত্র পেয়েছিলাম,—সেদিনটা স্কুলের ছাদ থেকে বহুদূরের  
আকাশটার দিকে চেয়েছিলাম এই সন্ধ্যা ছ'টার সময়ে ।

তার পরে স্মৃতি লেনের কাছে নেমে গেলাম রাজকৃষ্ণদের বাড়ী যাব বলে ।

আমি শুধু প্রার্থনা করি আমাকে আগে নিয়ে চল হে ভগবান, যাতে সর্বদা  
মন গতিশীল থাকে । কিসে মন বন্ধিত হয়, আনন্দ বন্ধিত হয়, তার সন্ধান  
তোমার জানা আছে, আমাদের নেই—তা ছাড়া আমার শিল্পী মন কি করে  
আরও পরিপুষ্ট হবে তার সন্ধান তুমিই জানো ।

তোমার যে দিকে ইচ্ছা সে দিকেই নিয়ে যেও ।

অবশেষে ঘুরিয়া যাওয়াই ঠিক করে কালকার বন্ধে মেলে বার হয়ে পড়া  
গেল । দিনটা খুব ছিল ভাল—বৈকালের দিকে ট্রেনটা ছাড়ল—বর্ষাশেষে  
বাংলার এ অংশটায় শামল-শ্রী দেখে বুঝতে পারলাম বাংলা বাংলা  
করি বটে, কিন্তু দেশের সমগ্র পরিপূর্ণতাকে কখনো উপভোগ করিনি—কী  
অপূর্ব অস্ত আকাশের রঙিন মেঘস্তুপ, কী অপরূপ সন্ধ্যার শ্যামছায়া ।...  
কোলাঘাটের যে এমন রূপ, তা এর আগে কে ভেবেছিল ?—পিছন থেকে চেয়ে  
চেয়ে দেখলাম, দেশের ভিটা সেদিন দেখে এসেছি, তারই কথা মনে হোল—  
সেই ঝাঁকুরে গাছগুলো সন্ধ্যার ছায়ায় বাল্যের আনন্দ-ভরা এক অপরাহ্নের  
ছায়াপাতে মধুর হয়ে উঠেচে এতক্ষণ—এই তো পূজার সময়, বাবা এতদিন  
বাড়ী এসেছেন, আমাদের পূজার কাপড় কেনা হয়ে গিয়েচে এতদিন—  
কোজাগরী পূর্ণিমার রাত্রির উৎসবের সে সব আনন্দ—কি জানি কেন  
এই সব সময়েই তা বেশী করে মনে আসে ।

সব সময় এই দেশের ভিটার ছবিটাই মনে উৎসাহ, আনন্দ ও প্রেরণা  
দেয়—এ অতি অভূত ইতিহাস ।

বিলাসপুরে নেমে বাড় বৃষ্টি। এখন একটু রৌদ্র উঠেচে—গাড়ীর মধ্যে বসে বসে লিখ্‌চি—কিন্তু মেঘের ঘোর এখনও কাটেনি।

পরশু বৈকালটী সজনীবাবু, স্ববলবাবু ও গোপালবাবুর সঙ্গে বেশ কেটেচে। প্রথমে রেষ্টুরেন্টে কিছু খেয়ে মোটরে করে গেলাম লেকে—সেখান থেকে আউট্রাম ঘাট—সেখানে চা-পানের পর বাসা। ডাঃ সুশীল দে'র ওখানেও ঘণ্টা তিন চার গল্প করে ভারী আনন্দ হোল।

কারগী রোডে পৌছে দেখলাম কিছুই আসেনি, অতি বর্ষণের ফলে বগা হওয়াতে রাস্তা ভেঙে গিয়েচে—গন্তব্য স্থানে পৌছতে দুই তিন দিন লাগবে—আরও একটা সাহেব আমারই মত বিপন্ন হয়ে পড়েচেন—স্বতরাং প্রত্যাবর্তনই যুক্তিযুক্ত মনে হোল। একজন বাঙ্গালী ওভারসিয়ার ছিলেন, তাঁর নাম সত্যরঞ্জন ভট্টাচার্য্য—তিনি সঙ্গে করে তাঁর বাসায় নিয়ে গেলেন—বেশ লোক।—ঝিঞ্জে ও টেঁড়স ভাজা, ডাল ও ভাত।

ওধারকার রাঙা মাটির দেওয়াল, বেশ দেখতে। মনে হোল ওরকম বাড়ীতে আমি তো একেবারেই টিকতে পারবো না। সঙ্গে করে দেখালেন, পাশেই জমি কিনেচেন—সেখানে তরকারীর বাগান। একটা গালায় কারখানায় নিয়ে গেলেন—গালা চোলাই হচ্ছে—একটা অপ্রীতিকর গন্ধ। সেখান থেকে এসে খাওয়া দাওয়ার পরে সামনের পাহাড়টাতে ওঠা গেল। ওপারে আর একটা পাহাড়—মধ্যে ঘন শাল পলাশের বন—মহিষের গলায় একটানা ঘণ্টার ধ্বনি শোনা যাচ্ছে। ওখানকার একজন খুষ্টান ডাক্তার জ্ঞানপান্নার বিবাহ গেল সেদিন, বিবাহ উপলক্ষে অনেকগুলি সাহেব মেম ও বাঙ্গালী খুষ্টান মেয়ে এসেছিলেন—এই ট্রেনে যাচ্ছেন।

বিলাসপুরে গাড়ী পেয়ে গেলাম ঠিক মত—ভিড় খুব বেশী ছিল না। বিলাসপুরের ও রায়গড়ের মধ্যকার আরণ্য ভূভাগের দৃশ্য অতি অপূর্ণ—কিন্তু দুঃখের বিষয় সঙ্ঘ্যার অঙ্ককার চারিদিকে নাম্বার পরেই অধিকতর অপরূপ এমন আর এক বনভূমির ভিতর দিয়ে ট্রেন যেতে লাগল, যার তুলনায় পূর্বে যতগুলো দেখেছি সব ছোট হয়ে গেল, তুচ্ছ হয়ে গেল—সেটা হচ্ছে রায়গড় ও ঝারসাগুদার মধ্যে—সে অপরূপ আরণ্যভূমির বর্ণনা চলে না। দিবাশেষের ঘন ছায়ায় অনতিস্পষ্ট সে দৃশ্যের মত গভীর অন্ধ কোনো দৃশ্য জীবনে দেখিনি কখনও—চক্রনাথের পাহাড়ও নয়। কি প্রকাণ্ড পাহাড়টাই বরাবর সঙ্গে সঙ্গে একেবারে চক্রধরপুর পর্যন্ত এল!... মাঝে মাঝে সাদা মেঘগুলো পাহাড়ের

গায়ে লেগে আসে, যেন কুমারেরা পণ পুড়ুচ্ছে—নীল মেঘের মত পাহাড়টার শোভাই বা কি! লোকে ভেবে দেখে না, মনের সতর্কতা কম, তাই সেদিন সেই লোকটা বলে মশাই এ অঞ্চলে সবই Barren...কোথায় barren? তারা কি চক্রধরপুরের পরের এই গম্ভীর-দৃশ্য বনানী দেখেনি?...

আমি মনে মনে বুঝে নিলাম পিছনের ওই নীল পাহাড়টা, মেঘরাজি যার কোলে সন্ধ্যাবেলাতে ছুঁছুঁ ছেলের মত ঘুমিয়ে পড়েছে—ওটা আর রেলের পিছনের মাঠগুলো নিয়ে একটা প্রকাণ্ড ত্রিভুজ তৈরী হয়েছে—দেড়শত দুইশত বর্গ মাইল পরিমানের এই ত্রিভুজটায় সবটাই বসতিবিরল, স্থানে স্থানে একেবারে জনহীন অরণ্য, পিছনে বরাবর ওই পাহাড়টা। এই অরণ্যভূমির ও শৈলমালার মধ্য দিয়ে রেল পথটা চলে গিয়েছে। সহসা একটা পাহাড়ের মেঘে ও কুয়াসায় ঢাকা শিখরদেশের কি অদৃষ্টপূর্ব শোভা!...গাড়ীর সবাই বলে—ঢাখো, ঢাখো—আমার তো হৃদয় বিস্ফারিত হোল, চারি ধারের এই অপূর্ব বনভূমির শোভা দেখে অঙ্ককারে পর্বত-সামুদ্রিত অরণ্যের মধ্যে কোথা থেকে সন্ধ্যা ফোটা শেফালি ফুলের স্ববাস পেলাম—ট্রেনটাও Rock cuttingটা ভেদ করে ঝড়ের বেগে ছুটেছে—চারিধারে রহস্যবৃত্ত অঙ্ককারে ঢাকা সেই শৈলপ্রস্থ ও অরণ্যভূভাগ—জীবনে এধরণের দৃশ্য কটাই বা দেখেছি!...রাত আটটায় এসে বসে মেল ঝারসাগুদাতে দাঁড়াল। এখানে চা ও খাবার খেয়ে নিলাম। সেদিনকার মত উদার-হৃদয় সহচর তো আজ সঙ্গে নেই যে খাবার খাওয়াবেন।

ঝারসাগুদা থেকে সম্বলপুরে এক লাইন গিয়েছে। রাত্রে ট্রেনে বেশ ঘুম হোল, সকালে এসে কল্কাতায় উঠলুম—ছপুরটা ঘুম হোল খুব।

আজ বিজয়া দশমী। কোথায় যাব ভাব্‌চি—বিভূতিদের ওখানেই যাওয়া যাবে এখন।

আজ সারাদিনটা হৈ হৈ করে কাটল। সকালে উঠেই সজনী বাবুদের বাড়ী—সেখানে খানিকক্ষণ গল্পগুজবের পর সকলে মিলে হিতেন বাবুদের বেলগেছিয়ার বাগান-বাড়ীতে যাওয়া গেল। সেখানে হোল পিক্-নিক্—মাংস সিদ্ধ হতে বাজ্‌ল তিনটে। Living age কাগজখানাতে মেটারলিক্-এর নতুন বই 'Life of the Ants' সম্বন্ধে একটা ভারী উপাদেয় প্রবন্ধ পড়্‌ছিলাম—সামনের পাইকপাড়া রাজাদের বাগানটীতে—আরামের স্মিথ্

ছায়া বর্ষাশেষের সরস, সবুজ গাছপালার উপর নেমে আস্চে, ওধারের তালগাছগুলো মেঘশূণ্য নীলাকাশের পটভূমিতে ওস্তাদ পটুয়ার হাতে আঁকা ল্যাণ্ডস্কেপের ছবির মত মনোহর হয়ে উঠেচে—কিন্তু আমি এই বৈকালটাকে আমার মনের সঙ্গে কি জানি আজ মোটেই খাপ খাওয়াতে পারছিনে— আমার মনের সুস্বদ্ব, সুনির্দিষ্ট অপরাহ্নের মালায় আজকার বেলেগেছিয়া বাগানের ও সুন্দর অপরাহ্নটী বিস্তৃত শত অপরাহ্ন-মুক্তাবলীর পাশে কেন যে স্থান দিতে পারলাম না, তা জানি না। সেখান থেকে বেরিয়ে গেলাম শাখারিটোলায় রাধাকান্তদের বাড়ী, তারপর দক্ষিণা বাবুদের বাড়ী ভবানীপুরে। দক্ষিণাবাবু বাড়ী নেই, জ্যোৎস্না আদর-অভ্যর্থনা কর্লে, কাছে বসে খাওয়ালে—রাত এগারোটার পরে এলেন দক্ষিণাবাবু। গল্পে গুজবে হোল রাত আড়াইটা—আজ আবার চন্দ্রগ্রহণ, কিন্তু মেঘের জন্তে কিছু দেখা গেল না—সারারাতের মধ্যে চোখের পাতা বুজানো গেল না মশায় ও গরমে— অনেক রাত্রে দেখি একটু একটু বৃষ্টি পড়্চে।

এবার কালী পূজাতে দেশে গিয়ে সত্যই বড় আনন্দ পেলাম—এত সুন্দর গন্ধ বন-ঝোপ থেকে ওঠে হেমন্তের প্রথমে, এবার খুঁজে খুঁজে দেখলাম গন্ধটা প্রধানতঃ ওঠে বনমরিচার ফোটা ফুল থেকে ও কেনেকোঁড়ার ফুল থেকে। এবার আনন্দটা সত্যই অপূর্ব ধরণের হোল—যা অনেকদিন কলকাতায় থেকে অনুভব করিনি। নৌকার ওপর বসে বসে যেন জীবনটা আর একটা dimensionএ বেড়ে উঠ্লে—ঘন লতাপাতার সুগন্ধে অতীত বহু জীবনের কথা মনে পড়ে—খুকী দ্বিতীয়ার দিন আমার সঙ্গে আবার গেল বারাকপুরে—সেদিন আবার ভ্রাতৃদ্বিতীয়া। জাহ্নবী আমাকে ফোটা দিলে—খুকী দিলে খেলাকে। পরে আমরা দুজনে পাকা রাস্তার ওপরে বেড়াবো বলে বেরুলাম—কিন্তু যাওয়া হয়ে গেল একেবারে বারাকপুরে—গাছপালা, প্রকৃতির সঙ্গে একটা ঘনিষ্ঠ যোগ স্থাপন করে যে জীবন—তাই হয় সুখের, পরিপূর্ণ আনন্দের। এ আমি ভাল করে বুঝ্লাম সেদিন।

কয়দিন এখানে এসেও বেশ আনন্দেই কাট্লে—উষাদেবী এখানে এসেচেন ঢাকা থেকে, তাঁর ওখানে মধ্যে একদিন চাএর নিমন্ত্রণে গিয়ে অনেকক্ষণ আলাপ কর্লাম—বেশ মেয়েটা—বেশ শিক্ষা আছে, সাহিত্য বিষয়ে সমঝদারও খুব সুন্দর। সুনীতি বাবুর বাটীতে একদিন আমি ও সজনী বাবু গিয়ে—



অনেকগুলা গ্রীক ও শক মুদ্রা, অনেক ছবি, আবুরাজ্যের প্রাচীর গায়ে উৎকীর্ণ কতকগুলো মূর্তির ফটো—এই সব দেখে এলাম—প্রবাসী আফিসে আড্ডা বা চল্চে ক’দিন, তাও খুব।

কাল জগদ্ধাত্রী পূজা—আমাদের চারদিন ছুটি আছে, রাত্রে গেলাম বিভূতিদের বাড়ী, অল্প অল্প বছরের দিনগুলির কথা মনে পড়ে—আজ কোথাও কিছু নেই—রাত নটার সময় অক্ষয় বাবু ছোট বৈঠকখানায় রেডিও শুনছেন—অল্প বছর যে সময় আগন্তুক ও নিমন্ত্রিতের ভিড়ে সিঁড়ি দিয়া ওঠা সম্ভব হ’ত না, কোথায় সে উৎসব গেল বাড়ীর—যেন দীন হীন, মলিন সব ঘরগুলো, সিঁড়িটা, দালানটা। আমাকে অবশ্য খাওয়ার বিশেষ অমুরোধ করা ছিল—অক্ষয় বাবু ও খগেন বাবু বাইরে নিমন্ত্রণে গেল মেজ খোকাবাবুর বাড়ী। অনেক রাত্রে আমি, শীতল, বিভূতি একসঙ্গে বসে নিরামিষ ভোজ খেলাম। রাত বারোটাত্তে বাসায় ফিরলাম। শুয়েচি—চারিধার নিস্তব্ধ, নির্জ্জন। চাঁদটা পশ্চিম আকাশে নিম্প্রভ হয়ে ঢলে পড়েচে—নক্ষত্রগুলো পরিষ্কার ও উজ্জ্বল হয়েছে, ‘অপরাজিতের’ অপূর্ণ বয়সজীবনের গোড়াটা লিখ্চি—তাই বসে বসে ভেবে এই বিচিত্র জীবনধারার কথা মনে হোল—ভারী আনন্দ পেলাম।

আজ জগদ্ধাত্রী পূজার সকালবেলাটা, মনে পড়ে অনেক বছর আগে এই ঘরেই বসে বসে হার্ডির ছোট গল্প পড়তুম এইখানে। আজও সেই ঘরটা তেমনি নিস্তব্ধ, নিশ্চল। কিন্তু পরিবর্তনও কি কম হয়েছে! তখনকার বিভূতি কত বড় হয়ে গিয়েচে—তখনকার সবাই কে কোথায় চলে গিয়েচে।

আগামী রবিবারে সুনীতিবাবু, অশোকবাবু, আমি ও সজনীবাবু, চারজনে মোটরে ‘পথের পাঁচালী’র দেশ দেখতে যাওয়ার কথা আছে বৈকালের দিকে। দেখি কি হয়।

এইমাত্র মহেন্দ্রচন্দ্র রায় তাঁর নব প্রকাশিত ‘কিসলয়’ বইখানা পাঠিয়েছেন, দেখলাম। খুব ভাল লাগল বইটা।

আজকার দিনটা বেশ ভাল কাটল। সকালের দিকে খুব মেঘ ছিল, কিন্তু দুপুরের পরে খুব রৌদ্র উঠল—তখন বেরিয়ে পড়া গেল—প্রবাসী আফিসে গিয়ে দেখি অশোকবাবু ও সজনী দাস বসে। চা পানের পরই

সজনীবাবু গিয়ে গাড়ী করে সুনীতি বাবুকে উঠিয়ে নিয়ে এল—পরে আমরা রওনা হলাম আমাদের গ্রামে। সজনীবাবু, অশোকবাবু, সুনীতিবাবু আর আমি। যশোর রোডে এসে ব্যাটারির তারটা হঠাৎ জলে উঠে একটা অগ্নিকাণ্ড হোত কিন্তু সুনীতিবাবুর কুঁজোর জল দিয়ে সেটাকে থামানো গেল।

তারপরই খুব জোরে মোটর ছুটল—পথে মাঝে মাঝে রোদ, মাঝে মাঝে ছায়া—রোদই বেশি, আজ রবিবার, সাহেবেরা কলকাতা থেকে বেড়াতে বেরিয়ে এক এক গাছতলায় মোটর রেখে ছায়ায় শুয়ে আছে।

তারপর পৌঁছে গেলাম জোড়া-বটতলায়। ওখানেই মোটরখানা বৈল, কারণ দিনকয়েক আগে আমাদের গ্রামের দিকে খুব বৃষ্টি হয়েছিল, পথে এখনও একটু একটু কাদা। নেমে কাঁচাপথাটা বেয়ে বরাবর চল্লুম, সুনীতিবাবু কাঁচা কোসো কুল ও সৈঁয়াকুল খেতে খেতে চল্লেন, অশোকবাবু ছড়ি কাটবার কথা বলতেই সজনীবাবু চটি ফেলে ছুটল গাড়ীতে ছুরী আনতে। গ্রামে ঢুকবার আগে এ ফুলের ও ফুলের নাম সবে বলে দিলাম—কাঁঠালতলায় হেলা শুঁড়িতে গিয়ে সবাই বসল। তারপরে সইনার বাড়ী গিয়ে কিছু মুড়ির ব্যবস্থা করে একটা আসন পেতে সবাইকে বসালাম। সেখানে খাওয়া ও গল্পগুজবের পরে আমাদের পোড়ো ভিটেটা দেখে রান্নাঘরের পোতা দিয়ে সবাই নেমে ঘন ছায়ায় ছায়ায় এলাম সলুতেখালি আমগাছের তলায়—সেই ময়না-কাঁটা গাছ থেকে ছড়ি কেটে নিলে অশোকবাবু ও সজনীবাবু—পরে তেঁতুলতলীর তলার বনের মধ্যে দেখা গেল একটা খুব বড় ও ভাল ময়না-কাঁটা গাছ—সেখান থেকে আর একটা ছড়ি কাটা হোল। তারপর প্রায় বেলা গেল দেখে আমি খুব তাড়াতাড়ি করলাম—ওদের বন থেকে টেনে বার করে নিয়ে গেলুম কুঠীটায়। ছেলেবেলায় গ্রামের জামাইদের ডেকে নিয়ে কুঠী দেখাতুম। তারপর সে কাজটা অনেকদিন বন্ধ ছিল—বহুকাল বন্ধ ছিল। শেষে কাকে নিয়ে গিয়েছিলাম, তা তো মনে হয় না—বহুকাল পরে বালোর সে কুঠী দেখানো পুনরাবৃত্তিটা কল্পুম। তখন কুঠীটা আমার কাছে খুব গর্ব ও বিশ্বয়ের বস্তু ছিল—তাই যে কেউ নতুন লোক আসতো, তাকেই নিয়ে ছুটতাম কুঠী দেখাতে। আজ বহুদিন পরে সজনীবাবু, সুনীতিবাবু ও অশোক বাবুকে নিয়ে গেলাম সেখানে। কুঠীতে কিছু নেই। আজকাল এত জঙ্গল হয়ে পড়েচে যে আমি নিজেই প্রথমটা ঠিক কর্তে পাল্লুম না কুঠীটা কোন্ জায়গায়।

তারপর মাঠ দিয়ে খানিকটা ছুটতে ছুটতে গেলাম। রাস্তার পরে কাঁচিকাটার পুলে—এই কার্তিকমাসেও একটা গাছে একবার সোঁদালি ফুল দেখে বিস্মিত হলাম। সেইখানে ঝোপটী কি অঙ্ককারই হয়েছে! সুনীতি বাবু চেয়ে চেয়ে দেখলেন—সবাইকে ডেকে দেখালেন—আমার বেশ মনে হচ্ছিল আমার পরিচিত সলুতেখালি তলায় যেখানে আমিই আজকাল কম যাই—সেখানে—আমাদের ভিটেতে—সম্পূর্ণ কলকাতার মাহুষ সুনীতিবাবু, অশোকবাবু, এ যেন কেমন অদ্ভুত লাগছিল। আমাদের কুঠীর মাঠে, আমাদের সইমার বাড়ীর রোয়াকে!

সন্ধ্যা হোলে তেঁতুলতলার পথটা দিয়ে সবাই মিলে আবার ফিরলাম—ময়না-কাঁটার ডালগুলো ওখান থেকে আবার নিলাম উঠিয়ে—সইমার বাড়ী এসে দেখি হরেন এসে বসে আছে। সইমার সঙ্গে সুনীতিবাবুর খানিকক্ষণ কথাবার্তা হোল—পরে আমরা বার হয়ে গিরীশ-দার বাড়ী এসে চা খেলাম—তখনই ওদের রান্নাঘরের পৈঠাতে জ্যোৎস্না উঠে গিয়েচে।

তারপরে গাজিতলার পথ দিয়ে হেঁটে মোটর ধরলুম—গোপালনগরের হার্ট-ফের্তা লোক বসে আছে মোটর দেখবার জন্মে। খানকতক স্মাণ্ড্‌ইচ্ ও ডালমুট কিছু খেয়ে নেওয়া গেল—কুঁজোর জল খেয়েটেয়ে গাড়ী ষ্টার্ট দেওয়া হোল।

বন্ধুর বাসায় এসে দেখি তরু বেচারীর চৌদ্দ পনর দিন জ্বর—বিছানায় শুয়ে আছে, বন্ধু ফোড়ায় শয্যাগত—বন্ধুর বৌ এসেচে, কিন্তু সে বেচারীর দুর্দশার সীমা নেই। সেখানে কিছু চা ও খাবার খাওয়ার পরে আমরা সুন্দর জ্যোৎস্না-ভরা রাত্রে মাঠের ভিতর দিয়ে রাস্তায় সজোরে গাড়ী চালিয়ে রাত্রি সাড়ে ন'টাতে কলকাতার বাসায় এসে পৌঁছলাম। তখনও বাসায় খাওয়া আরম্ভ হয় নি—ঠাকুর তখনও রুটী গড়্‌চে। আমি এসে টেবিল পেতে লিখতে বসে গেলাম, আর ভাবছিলাম এই খানিক আগে যখন সন্ধ্যার অঙ্ককার ঘন হোল তখন ছিলুম আমাদের বাড়ীর পিছনকার গাব তলার পথে—এরই মধ্যে কলকাতার বাসায় ফিরে এত সকাল-রাত্রে বারান্দার আলো জ্বলে বসে লিখ্‌চি, এ কেমন হোল?...

যদি মোটর না থাকতো তবে কখন পৌঁছতাম?...সন্ধ্যার পরে বেরিয়ে সন্ধ্যার গাড়ী ধরে, বা বনগ্রাম থেকে ট্রেন ধরে, রাত্রি বারোটাতো কলকাতা পৌঁছতাম।

আমি সত্যই আজ একটা আনন্দ পেলুম। একটা অদ্ভুত—ও সুন্দর ধরণের আনন্দ পেলুম। গুঁরা গিয়েছিলেন ‘পথের পাঁচালী’র দেশ দেখতে—আমি আমার পরিচিত ও প্রিয় স্থানগুলিতে কল্কাতার এই প্রিয় বন্ধুদের নিয়ে বেড়িয়ে আজ সত্যই একটা নতুন ধরণের আনন্দ পেলুম—যা আর কখনো কোনো trip-এ পাই নি।

ইচ্ছা আছে বৈশাখ মাসের দিকে একবার এদিকে এসে, গুঁদের নিয়ে ইচ্ছামতীতে নৌকা ভ্রমণ ও কোনো একটা বনের ধারে বনভোজন করা হবে—স্বনীতিবাবুও সে প্রস্তাব কল্লের্ন—সবাই তাতে রাজী।

কাল দুপুরে সিদ্ধেশ্বর বাবুর ঠাকুর-বাড়ীতে ছিল নিমন্ত্রণ, সেখানে সকলের সঙ্গে গল্পগুজবে বেলা হোল তিনটা, সেখান থেকে গেলুম ‘গৈরিক পতাকা’ দেখতে মনমোহনে।

এ গেল কালকার কথা—কিন্তু আজ এমন অপূর্ব আনন্দ পেয়েছি বৈকালের দিকে যে, মনে হচ্ছে জীবনে ক—ত দিন এ রকম অদ্ভুত ধরণের বিবাদের ও উত্তেজনার আনন্দ হয়নি আমার।

কিসে থেকে তা এল? অতি সামান্য কারণ থেকে। ক্লাসে—দেবব্রত নাকি ছোট একটা খড়ি নিয়ে পকেটে রেখেছে, ক্লাসের মনিটার তার হাত মুচড়ে সেটা নিয়েচে কেড়ে। দেবব্রত এসে আমার চেয়ারের পাশে দাঁড়িয়ে কেঁদে ফেলে—বল্লে, দেখুন স্মার—ওরা এত বড় বড় খড়ি নিয়ে যায় বাড়ীতে—আর আমি এইটুকু নিলাম—আমার হাত মুচড়ে ও কেড়ে নিলে?... হাতে এমন লেগেচে!

ছোট ছেলের এ কান্না মনে বাজল। তখনি অবিশ্বি মনিটারকে বকে খড়িটুকু দেবব্রতকে ফেরৎ দেওয়ালাম, কিন্তু হুঃখটা আমার মনে রয়েই গেল।

সে কি অনস্বভূত হুঃখ ও বেদনা বোধ!...দুপুরের রোদে ছাদে বেড়াতে বেড়াতে মনে হোল ভগবান আমাকে এক অপূর্ব ভাব-জীবনের উত্থান-পতনের মধ্যে দিয়ে নিয়ে যেতে চান বুঝি—তিনিই হাত ধরে আমাকে নিয়ে চলেছেন কোথায়,—তাঁর কোন্ উদ্দেশ্য সাধনের জন্ত, তিনিই জানেন—অনন্ত জীবনের কতটুকু আমাদের সাস্ত-দৃষ্টির নাগালে ধরা দেয়? মনে হোল বহুকাল আগে শৈশবে হরি ঠাকুরদাদা সন্ধ্যাবেলা আমাদের বাড়ীর দরজা থেকে চাল চেয়ে না পেয়ে মলিন মুখে ফিরে গিয়েচেন—সেই দিনটাতেই

আমার এই ভাব-জীবনের বোধহয় আরম্ভ । তারও আগে মনে আছে—মা যেদিন অতি শৈশবে ছোলা ও মুড়ি খেতে দিয়ে দিদিমার কাছে তিরস্কৃত হয়েছিলেন—তাঁর গুরু এসেছিল, তিনি যে আমাদের জগ্রে গুরুর পাতের মাছের ঝোল ও রুটী তুলে রেখে দিয়েছিলেন, মা তার খবর না জেনেই আমায় দিয়েছিলেন মুড়ি ও ছোলা ভাজা ।—সেই ঘটনা থেকে মায়ের উপর এক অদ্ভুত স্নেহ ও বেদনা-বোধ—তার পরে জাহ্নবীর আমজরানো, পিসিমার শত দুঃখ, কামিনী-পিসির কষ্ট, সেই যাত্রার দলের গান শেষ হওয়ার দিনগুলো—কত কি—কত কি ; তার পরে বিভূতির কত কষ্ট । আজ আবার দেবব্রতের কষ্ট—আমার সমগ্র ভাব-জীবনের সমষ্টি এই সব দুঃখ ও বেদনা, অবশ্য হয় তো অনেক দুঃখ বাস্তব, অনেকটা কাল্পনিক—কিন্তু আমার মনে তাদের জগ্ন বেদনামুভূতি আদৌ কাল্পনিক নয়—তাদের সার্থকতা সেইখানেই ।

যাক । তারপর স্থলে এক অদ্ভুত ব্যাপার হোল । সন্ধ্যা হয়ে গেল, আমি ছাদে নীরব সন্ধ্যা আকাশের তলে প্রতিদিনের মত পায়চারী কর্তে লাগলাম—মনে এক অতীন্দ্রিয় আনন্দবোধ, সে আনন্দের তুলনা হয় না—ভেবে দেখলাম এই আনন্দেই জীবনের সার্থকতা । কিসে থেকে তা আসে, সে কথা বিচারে কোনো সার্থকতা নেই আদৌ,—আনন্দ যে এসেচে, সেইটাই বড় কথা ও পরম সত্য । অনেক দিন পরে এ লেখা পড়ে আমারই মনের নিরানন্দ ও ভাবশূণ্য মুহূর্ত্তে আমার মনে হতে পারে যে, এ দিনের আনন্দ একেবারেই অবাস্তব ও মনকে চোখ-ঠারা গোছের হয় তো—নিরানন্দের দিনে এ কথা মনে হওয়া সম্পূর্ণ স্বাভাবিক বটে, কিন্তু এই খাতায় কালীর আঁচড়ে তা জানিয়ে দিতে চাই যে তা নয়, তা নয় । এ আনন্দ অপূর্ব অনমুভূত, অতীন্দ্রিয়, মহনীয় !...এ ধরণের গভীর বেদনামিশ্রিত ভাবোপলব্ধি জীবনে খুব কম করেচি । করেচি হয় তো সে দিন মালিপাড়ায় মাজু খাতুনের উপর পুলিশের অত্যাচার করার কথাটা খবরের কাগজে পড়বার দিনটা—তারপর অনেক দিন হয়নি ।

সন্ধ্যার নিস্তরু ও ধূসর আকাশের বহুদূর প্রান্তের আমাদের ভিটাটার কথা মনে হোল একবার—বেশ দেখতে পেলাম সেখানে ঘন ছায়া পড়ে এসেচে—বনে সুগন্ধ উঠ্চে হেমস্তের দিনে—সেই ভিটা থেকে একদিন পথে, ঘাটে, বৈকালের ছায়ায়, ছপুয়ের রোদে যে আনন্দ-জীবনের শুরু, আমি এই

ভেবে মুগ্ধ হই, তা এখনও অটুট, অক্ষুন্ন রয়েছে—আরও পরিপূর্ণভাবে দেশে বিদেশে তার গতি নিত্য নবতর পথে ।

আকাশের দিকে চাইলাম—মাথার উপর ধূসর আকাশে একটি নক্ষত্র মিট মিট করচে । সঙ্গে সঙ্গে কালকার থিয়েটারে শোনা গানটা গাইলাম, ‘জনতার মাঝে জনগন পতি, বক্ষের মাঝে দৃপ্ত মন’ । দেবব্রতের মত ক্ষুদ্র ও সূদর্শন এক দেবশিশুর ছবি মনে উঠল, ঐ ছবি বিশ্বের অজানা,—অচেনা পারিপার্শ্বিক অবস্থার মধ্যে সে বালক তার অপূর্ব শৈশব যাপন করচে আনন্দে, সহস্র কলরবে, দায়িত্বহীন কৌতুকের উচ্ছ্বাসে । তারপরে তার জীবনের সে সব বহুবর্ষব্যাপী বিরাট কৰ্ম্মযজ্ঞ, সে গভীর বেদনাপূর্ণ ট্রাজেডি—কত যুগব্যাপী দুঃখ স্নেহের শুরু—পৃথিবীর মানুষেরা যা কোনো দিন ধারণাই কর্তে পারে না । উঃ সে কি অদ্ভুত অল্পভূতিই হোল যখন এ ছবি আমার মনে উঠল ।

আজ বুঝলাম এই অল্পভূতিই আসল জীবন । আমি নিরানন্দ দিনগুলিতে দেখেছি মন কিছুতেই আনন্দ পেতে চায় না—টেনে টুনে কত করে, কত নক্ষত্র জগৎ, এ, ও নানা ব্যাপারের মধ্যে দিয়ে জোর করে আনন্দ আন্তে হয়, তা যাও বা একটু আধটুকু আনে—তাতেই তখন মনে হয়, না জানি কত বড় অল্পভূতিই বুঝি বা হোল । কিন্তু আসল ও সত্যিকার আনন্দের মুহূর্ত্তে বোঝা যায় সে অল্পভূতি ছিল অগভীর, মেকি, টেনে-বুনে-আনা । আসল আনন্দকে জোর করে, মনকে বুঝিয়ে, তর্ক করে আন্তে হয় না তা আজ বুঝেছি—সে সহজ—অর্থাৎ spontaneous.

আর ও অল্পভূতি যার জীবনে না হয়েছে—অর্থের মানের, যশের প্রাচুর্য্যে তার দীনতা ঘোচাতে পারে না ।

‘অপরাজিত’ উপন্যাসের বন-ভ্রমণ লিখ্টি আজ ।

কাল স্কুল কমিটির মিটিং-এ ওরা স্বেবোধবাবুকে নোটিস্ দিলে—আমি আগে জানলে হোতে দিতাম না—আমায় আগে ওরা জানায়ও-নি,—যদিও সাহেবের কোনো দোষ ছিল না, সাহেব আমাকে জানাবার কথা বলেছিল স্নরেশ বাবুকে । শেষকালে চেষ্টা করেও কিছু করা গেল না—বেচারীকে যেতেই হোল । এই বেকার-সমস্যার দিনে একজন Young manএর চাকুরী এভাবে নেওয়া বড় খারাপ কাজ, মনে বড় কষ্ট হোল—স্বেবোধবাবু মুখটা চূণ করে বসলো কাল রাত্রে, কি করি আমার তো আর কোনো হাতই নেই !

আশ্চর্যের বিষয় আজ পয়লা অগ্রহায়ণ, কিন্তু এত গরম যে সকালে কার্তিক পূজার ছুটির দিনটা বলে রমাপ্রসন্নর ওখানে বেড়াতে গেলাম। সেখানে স্বপ্নে বাবুর আশ্রয় ভ্রমণের গল্প শুনে ফিরে এসে, বেলা আটার সময় এত গরম বোধ কর্তে লাগলাম যে তাড়াতাড়ি নাইতে গেলাম—এবং মনে খুব আনন্দ হোল, আরাম পেলুম—বালুতির পর বালুতি ঠাণ্ডা জল মাথায় দিতে লাগলাম—এত গরম!

এ সময়ে এত গরম আর কখনো কলকাতায় দেখেছি বলে তো মনে হয় না।

অনেক দিন লিখিনি—বাজে জিনিষ না লেখাই ভালো, অন্ততঃ এ খাতায়। আজ দুপুরটাতে কুম্ভধন বাবুর সঙ্গে বেরিয়েছিলাম, কবিশেখর কালিদাস রায় ও দক্ষিণাবাবুর বাড়ী—সেখান থেকে এসে বারান্দাতে বসে ছিলাম, হঠাৎ মনে হোল একবার নিউ মার্কেটে গিয়ে Wide World Magazine দেখে আসি।

শাঁখারীটোলায় ভীমেদের বাড়ীতে গেলাম, ওরা আজ নতুন খাতা কর্তে বেরিয়েচে। মোড়ের মাথায় টাটি একটা মুদীর দোকানে দাঁড়িয়ে হাল খাতা করচে—তাকে ডেকে আদর করে ভারী আনন্দ পেলাম—তারপর নিউ মার্কেট ঘুরে এই মাত্র ফিরে আস্চি। বেজায় গরম পড়েচে আজ কলকাতায়।

জীবনের সৌন্দর্যের কথাই শুধু আজ ক’দিন ধরে ভাব্চি। কি জানি কেন শুধুই মনে পড়্চে ছেলেবেলায় যে টক্ এঁচড়ের চচ্চড়ী ও টক্ কলায়ের ডাল দিয়ে ভাত খেতুম রান্নাঘরের দাওয়ায় বসে—সেই কথা। সেই মুচুকুন্দ টাপার গন্ধের কথা। জীবনটার কথা ভাব্লেই আনন্দে মুগ্ধ হতে হয়। এত বিচিত্র অল্পভূতি, এত পরিবর্তন, এত রস, এত যাওয়া-আসা—ভেবে অবাক হয়ে যাই।

সঙ্গে সঙ্গে এই মাত্র ক্যাম্বেল স্কুলটার সামনে যেতে যেতে মনে হোল, মানুষ অনন্তের সন্তান—একথা মিথ্যা নয়, কে বলে মিথ্যা!...সমগ্র নক্ষত্র জগতের জীবন—জরাহীন, মৃত্যুহীন, অপরায়ে জীবন-ধারা তার নিজস্ব। সকল নক্ষত্রের পাশের দেশে—ওই যে নক্ষত্রটা আমার বারান্দার ওপর মিটি মিটি জ্বল্চে—ওদের চারি পাশে আমাদের মত গ্রহরাজি আছে হয় তো—তাতেও জীব আছে, অণু বিবর্তনের প্রাণী হোলেও তাদেরও সুখ দুঃখ, শিল্প, অল্পভূতি, মৃত্যু, প্রেম সবই আছে—দূরের নীহারিকা, Globular Cluster-দের

জগৎ, সে সব তো আলাদা বিশ্ব, তাতে তো অপূর্ব অজ্ঞাত সব জীবন-ধারা—  
আমার জীবনও তো, কত দূর পথ চেয়ে কত অনন্ত সৌন্দর্য্যসুস্তের মধ্যে দিয়ে  
কাটবে তা কে জানে?...

এই বড় জীবনটা আমার...

মানুষের মনে এই জ্ঞানটা শুধু পৌঁছে দিতে হবে যে, সে ছোট নয়, সে বড়,  
সে অনন্ত। যদি যুগে যুগে আসি যাই তা হোলেও ত ওরকম কত কাল-  
বৈশাখী, কত মুচুকুন্দ চাঁপার গন্ধ, কত টক্ কলায়ের ডাল আগার হবে।

কিন্তু প্রকৃতির নিরাবরণ মুক্ত রূপের স্পর্শে এই অল্পভূতি খোলে। স্থপ্ত  
আত্মা জাগ্রত হয় চৈত্র ছপূরের অলস নিম ফুলের গন্ধে, জ্যোৎস্না-ভরা মাঠে,  
আকন্দ ফুলের বনে, পাখীর বেলা-যাওয়া উদাস গানে, মাঠের দূর পারে  
সূর্য্যাস্তের ছবিতে, ঝরা পাতার রাশির সোঁদা সোঁদা শুকনা শুকনা সুবাসে।  
প্রকৃতি তাই আমার বড় বিশল্যকরণী—মৃত, মূচ্ছিত চেতনাকে জাগ্রত কর্তে  
অত বড় ঐশ্বর্য আর নাই।

আইন্ ষ্টাইন্ বলেচেন বিস্মিত হবার ক্ষমতা একটা বড় ক্ষমতা। যে  
কোনো কিছু দেখে বিস্মিত হয় না, মুগ্ধ হয় না, সে মৃত সে বেঁচে নেই।  
আমাদের দেশের কেউ এ কথা বুঝবেন কি?

এই জগ্গেই অল্প বয়সে আমাদের দেশে জীবনের ব্যবসায় দেউলে হয়ে  
পড়ে—নতুন বিশ্বয়, নতুন অল্পভূতি হয় না, নবতর জীবনের পথ চিরগুপ্ত রয়ে  
যায় তাদের কাছে—মানুষ দমে যায় জানি—কিছুকাল তার মনে সব শক্তি  
হয় তো ক্ষীণতর হতে পারে মানি—কিন্তু জীবন্ত যে মানুষ, সে আবার জেগে  
উঠবে, সে আবার নবতর বংশীধ্বনি শুনবে—নব জীবনের সন্ধান পাবে।  
অপরাজিত প্রাণ-ধারার কোন্ অদৃশ্য উৎসমুখ তার আবার খুলে যাবে, বিজর  
ও বিমৃত্যু-আনন্দ তার চিরশ্রামল মনে আবার আসন পাতবে। বিহার  
অঞ্চলে দেগেচি শীতের শেষে বনে আগুন দেয়, সব ঘাস একেবারে পুড়িয়ে  
ফেলে—কি জগ্গে? যাই জৈষ্ঠের রৌদ্র পড়বে—ওই দগ্ধ ঝোপ-ঝাপের  
গোড়া থেকে আবার নবীন, শ্রামল, স্কুমার তৃণরাজি উচ্ছ্বসিত প্রাণ-প্রাচুর্য্যে  
বেড়ে উঠতে থাকবে—হু হু করে বাড়ে, পনেরো দিনের মধ্যে সারা ঝালো  
গোটা ঘাসের বন ঘন শ্রামলী ধরে—এই তো জীবন, এই তো অমরতা।

তাই ভাবি মাস, বছর ধরে মানুষের বয়স ঠিক করা কত ভুল। ১৩৩৮  
সাল পড়ে গেল আজ, আমার বয়স এক বৎসর বেড়ে গেল বটে হিসাব মত—



কিন্তু আমি কি দশ বৎসর কিম্বা পনেরো বছর আগেকার সেই বালক নেই  
অল্পবিস্তর ?...

সেদিন গেছলাম রাজপুরে অনেক কাল পরে। মিস্তুর সঙ্গে দেখা হোল।  
আবার পুরোনো পুকুরের পথটা ধরে হাঁটলাম—বাঁশগুলো নীচু হয়ে পড়ে  
আছে—চড়কের সন্ন্যাসীর দল বাড়ী বাড়ী বেড়িয়ে বেড়াচ্ছে। দুটোর ট্রেণে  
ফিরে এসে সাড়ে পাঁচটায় স্কুলের মিটিং কল্লুম। রসিদকে আজ  
তাড়ানো হোল।

পথে কোন্ জায়গায় ফুটন্ত মালতীলতার ফুলের গন্ধ, জারমলীন  
আপিসের কাছে—গোয়াড়ী-কৃষ্ণনগরের স্মৃতিটা হঠাৎ মনে পড়ল।

সে দিন বন্ধু বল্ছিল—বাকি-করিমালি। পরিচিত নাম, বাবার মুখে  
ছেলেবেলায় শুনেছিলাম কবে—ভুলে গেছলাম, যুগান্ত পরে যেন কথাটা আবার  
শুনলাম বলে মনে হোল।

অনেকদিন পরে আজ রবিবারটি বেশ কাটলো। শীত্ৰই গরমের ছুটা  
হবে, কাল রাত্রে বাইরের বারান্দায় বৃষ্টি পড়াতে বিছানা টানাটানি করে  
ভাল ঘুম হয় নি, উঠতে একটু বেলা হয়ে গেল। হাতমুখ ধুয়ে কলেজ  
স্কোয়ারের দোকানটাতে খাবার খেতে গেলুম—ওরা বেশ হালুয়া করে।  
তারপর গোলদীঘির মধ্যে বসে কামাতে লাগলুম একটা নাপিতের কাছে।  
ওদিকে অনেকগুলি গাছ, একটা গাছে সোঁদালি ফুল ফুটেচে—এমন একটা  
অপরূপ আনন্দ ও উত্তেজনা এল মনে ফুটন্ত ফুলেভরা গাছটা দেখে—মনে  
হোল আর বেশী দেরি নেই, এক সপ্তাহ পরে ঐ রকম ফুলেভরা বন-মাঠে  
গিয়ে ‘অপরাজিত’-র শেষ অধ্যায়টা লিখবো—সত্যি জীবনে দেখেছি  
ভবিষ্যতের ভাবনায় সবসময়ই এত আনন্দ পাই! ফিরে এসে অনেকক্ষণ  
বই লিখলুম। ছপরে একটু ঘুমবার চেষ্টা করা গেল—ঘুম আদৌ হোল  
না। বেলা আড়াইটার সময় দরজায় শব্দ শুনে খুলে দেখি নীরদবাবু।  
তাঁর গাড়ী নীচেই দাঁড়িয়েছিল—দুজনে উঠে একেবারে দম্‌দমায় স্থশীলবাবুর  
বাগানে। সত্যি, ওদের সাহচর্য এত সুন্দর লাগে আমার—সত্যিকার প্রাণবন্ত  
সজীব মন ওদের। সেখানে বাইরের মাঠে চেয়ার পেতে বসে নানা বিষয়ের  
আলোচনা হোল—চা-পান সমাপন হোল। শান্তিনিকেতন থেকে অমিয়  
চক্রবর্তী ‘পথের পাঁচালী’ সম্বন্ধে লিখেচেন, ‘বই পড়ে গ্রামখানি দেখতে ইচ্ছা

হয়'—আর লিখেচেন, 'শিল্পীর সৃষ্ট গ্রামখানি শাস্তকালের, জানিনা ভৌগোলিক গ্রামখানা কি রকম দেখবো।'

ছ'টার সময় নীরদবাবুর গাড়ী করে ফিরলুম—কারণ রবিবাসর ছিল প্রেমোৎপলবাবুর বাড়ীতে। আজ খুব মেঘ করেছে, দম্‌দমা থেকে আস্তে মেঘাঙ্ককার পূব-আকাশের দিকে চেয়ে আমার পুরাণো ভিটা ও বাঁশবনের কথা, মায়ের কড়াখানার কথা ভাব্‌ছিলুম—কি অদ্ভুত প্রেরণাই দিয়েচে এরা জীবনে—সত্যি!...নীরদবাবুও গাড়ীতে বসেন, কড়াখানার দৃশ্য তাঁকে সেদিন একটা অদ্ভুত উত্তেজনা ও অনুভূতি এনে দিয়েছিল মনে—গত রবিবারে সেদিন যখন ওঁরা ওখানে গিয়েছিলেন। তারপর এলুম রবিবাসরে, ওখানে তখন প্রবন্ধ পাঠ শেষ হয়ে গিয়েচে—তরমুজের আইস্-ক্রিম ও খাবার খুব খাওয়া গেল। অতুল বাবুর কাছে একটা Spiritual Circleএর ঠিকানা নিলুম। নীরদ আমার সঙ্গে কথা বলতে বলতে আমহাষ্ট' স্ট্রীটের মোড় পর্য্যন্ত এল— অশোকবাবু ও সজনীবাবুদের সম্বন্ধে নানা কথা। সূখাংশুবাবুর সঙ্গে দেখা হোল, তিনি যাচ্ছেন স্বেবোধবাবুর পিতৃ-শ্রাদ্ধের নিমন্ত্রণে। বাড়ী চলে এলুম।

আজ ভাব্‌চি, গ্রাম সম্বন্ধে একটা সত্যিকার ভালবাসা ও টান ছিল শৈশব থেকে আমার মনে। কি চোখেই দেখেছিলুম বারাকপুরটাকে—যখন প্রথম মামার বাড়ী থেকে অনেককাল পরে দেশে ফিরি, পিসিমা ওইদিকের বাঁশবাগান দিয়ে আসেন। কাল তাই যখন শাঁখারীটোলার দখল-করা বাড়ীটার সাম্নে পুরোণো জমিদারী কাগজের মধ্যে ১৩১০ সালের একখানা পুরাণো চিঠি কুড়িয়ে পেলাম, তখনি মনে হোল,—আচ্ছা এম্নি দিনে দশ বৎসরের ক্ষুদ্র বালাক আমি কি করছিলাম! মনে একটা thrill হল, একটু নেশামত যেন!...কোনো সত্যিকার জিনিস মিথ্যে হয় না—সেই বেচু চাটুঘোর স্ট্রীটের মধ্যে দিয়া আজ ছুপুরে নীরদবাবুর গাড়ী করে গেলাম, যে বেচু চাটুঘোর স্ট্রীটের বাড়ীতে একদিন কত কষ্টে কালষাপন করেচি! ওখানেই কষ্ট পেয়েচি, ওখানেই ভগবান স্খ দিলেন। সত্যিকার অনুভূতি অমর, তা বৃথা যায় না—আমার শৈশব-মনের সে জীবন্ত, প্রাণবান্ ভালবাসা,—গ্রামের প্রতিটি বাঁশের-খোলা ও গাবগাছটাকে অতি নিকট আপনার জন বলে ভাব্‌বার অনুভূতি ছিল সত্যিকার জিনিস—তাই আজ বহু সমঝ্‌দার মনে, সে অনুভূতিটুকু সঞ্চার কর্তে কৃতকার্য হয়েচি। সাহিত্য-সৃষ্টি মেকী জিনিস নয়, তার পিছনে যখন সত্যিকার প্রেরণা না থাকে, একটা বড় অনুভূতি বা দৃষ্টি বা ভালবাসা না

থাকে—সেটা কখনোই বড় সাহিত্য হয়ে উঠতে পারে না—খুব কলাকৌশল হয়তো দেখানো চলতে পারে, খুব cleverness এর পায়তারা ভাঁজা যেতে পারে হয়তো, কিন্তু তা সত্যিকার বড় জিনিস হয়ে উঠতে পারে না কোনো কালেও।

চারিধারে মেঘাকার আকাশের কি শোভাটা আজ রাত্রে।...ঠাণ্ডা হাওয়া দিচ্ছে—আমার বহু বাল্যদিনের অনুভূতি মনে আসচে—I am relieving my childhood days—কোন দিনটার কথা মনে আসচে আজ?...যেদিন বাবার সঙ্গে তম্বরেজ ও আমি দক্ষিণ মাঠের চাটুঘোদের জমি মাপতে যাই, প্রথম দক্ষিণ মাঠ দেখলাম—কত কুশবন, খোলা মাঠ, আকন্দ গাছ, সেই একদিন আর যেদিন আতরালি কালীদের গরুর লেজ কেটে দিয়েছিল, চণ্ডীমণ্ডপে তার বিচার হোল—এই দুটি দিন।

আজ দুপুরে হরিনাভি স্কুলের ছাত্ররা এসেছিল। একখানা বই দিলাম নিয়ে গেল।

এইমাত্র ভয়ানক দু'ঘণ্টাব্যাপী ঝড় বৃষ্টি হয়ে গেল—এ বছরে এই প্রথম বৃষ্টি—সামনের রাস্তায় এক হাঁটু জল জমেচে—একটা পাগল কি চীৎকার করে বলতে বলতে যাচ্ছে।

এখনও একটু একটু বৃষ্টি হচ্ছে—আর জোর বিদ্যুৎ চম্কাচ্ছে—মোটরগুলো জল ভেঙে যাচ্ছে—কি শব্দটা! রবিবাসরে যে বেলফুলের মালাটা দিয়েচে—তার সুন্দর গন্ধ বেরুচ্ছে। রাত এগারটা।

আজ রাত্রে ঘুমুতে ইচ্ছে হচ্ছে না—একটা উত্তেজনা, একটা অপূর্ব অনুভূতির আনন্দ। অনেকদিন পরে মনে পড়ে একটা কথা। বাবা আড়ংঘাটা থেকে ঘোর জ্বরে অভিভূত হয়ে বাড়ী ফিরে দাওয়ায় উঠেই প্রথম কথা বলেছিলেন—খোকা কৈ, খোকা—? অথচ তিনি জানতেন আমি বোডিং-এ আছি। সেই অস্থখ থেকে আর তিনি ওঠেন নি। জীবনের সেই প্রথম শোক। সে কি অপূর্ব অনুভূতির দিনগুলো—তার কি তুলনা আছে? হাজার বছর বাঁচলেও কি সে সব দিনের কথা ভুলবো কখনও!...

এই দীর্ঘ ষোল বছরের মধ্যে মাঝে মাঝে কথাটা মনে পড়েই কি অদ্ভুত আনন্দ ও প্রেরণা পেয়েচি!

বাইরের অন্ধকার আকাশটার দিকে চেয়ে ফিরে দাঁড়ালাম। কি অদ্ভুত যে মনে হচ্ছিল! ঘন ঘন বিদ্যুৎ চম্কাচ্ছে, কোন মহাশক্তির বিরাত কন্দুকক্রীড়া যেন এই বিশ্বব্রহ্মাণ্ড ও তার প্রাণীদলের উত্থান পতনে—যুগ যুগান্তর ধরে

প্রাণীদল তাদের অতি সত্যিকার হাসি-অশ্রু স্মৃতি-স্মৃতি ধরে, কোথায় ভেসে চলে গিয়েচে—ওপরে সব সময় লক্ষ বৎসর ধরে এই মহাশক্তিটা তার বিদ্যুৎ, চৌম্বকশক্তি, জানা অজানা কত শক্তি নিয়ে কোন্ কাজ করছেন তা বুঝতেও পারিচি নে আমরা। মোটে তো পঁয়ত্রিশ বছর এই ব্যাপার দেখ্‌চি—তাও না, জ্ঞান হয়েচে আজ ছাব্বিশ সাতাশ বছর। লক্ষ বৎসরের তুলনায় সাতাশ বছর কতটুকু? ...সত্যিই এমন সব জীব আছেন, যাদের তুলনায় এই পঁয়ত্রিশ বছরের আমি—আমার সৃষ্ট বালক অপূর্ণ মতই অবোধ, অসহায়, কৃপা ও করুণার পাত্র—নিতান্ত শিশু। কি জানি, কি বুঝি? ...কত আবোল তাবোল ভাবি, কোনোটাই হয়তো সত্যি নয় তার।

সত্যি কি অপূর্ণ বৈকাল! ..আজ অনেকদিন পরে দেশে ফিরেচি। এই দশ বারো দিন রুষ্টির জন্তে আর সুবিধা কর্তে পারিনি। আজ একেবারে মেঘ-নিম্মুক্ত, অদ্ভুত বৈকালটা। কাল মিছুর বাড়ী নিমন্ত্রণে গিয়েছিলাম, জ্যেৎস্না-রাত্রে পদ্ম-ফোটা লণ্ডার বিলের ধার দিয়ে বাড়ী ফিরি—ফির্তে দেবী হয়ে গেল। আজ তাই দুপুরে খুব ঘুমিয়েছি। উঠে দেখি বেলা গিয়েচে। সত্যি, এ অপূর্ণ দেশ এ ধরণের অল্পভূতি, গহন-গভীর, উদাস, বিষাদমাখা, আমি কোথাও কখনো দেখেচি মনে হয় না—এ সত্যিই Land of Lotus Eaters এত ছায়া, এত পাখীর গান, এত ডাঁসা খেজুরের স্তম্ভ, এত অতীত স্মৃতি—বেদনা-মধুর ও করুণ, আর কোথায় পেয়েচি কবে? ...শরীর অবশ হয়ে যায়, মন অবশ হয়ে যায় অল্পভূতির গভীরতায়, প্রাচুর্যে।

এইমাত্র আমাদের ভিটাটাতে বেড়াতে গিয়েছিলাম—এক টুকরা রেশমী সবুজ চুড়ির টুকরা চোখে পড়ল—কার? হয়তো মনির। মনে হোল মায়ের স্মৃতি ভিটার সঙ্গে যেন মাখা। মা এই বৈকালে ঘাট থেকে পা ধুয়ে ফর্সা কাপড় পরে এসে আমাদের খাবার দিচ্ছেন—এই ছবিই বার বার মনে আসে। আজ সব জঙ্গল, নিবিড় বনভূমি হয়ে পড়ে আছে! মায়ের সেই সজ্জনে গাছটা আছে, সেই কড়াটা—আশ্চর্য্য, পাঁচীলের সেই কুলুঙ্গি দুটো চমৎকার আছে, এখনও নতুন।

ভেবেছিলাম এখনি কুঠীর মাঠে যাবো। গিয়ে কি করবো? অল্পভূতি কি এখানেই কিছু কম যে, আবার সেখানে যাবো? একদিনে কত সঞ্চয় করি, মনে স্থান দিই কোথায়! ...

বকুলগাছে পাখী ডাক্চে—বৌ-কথা-ক, বৌ-কথা-ক—, অমূল্য জামগাছে উঠে জাম পাড়্ছিল—বুড়ী পিসিমা বলে, সে চারটা জাম দিয়ে গেল, তাই এখন খাবো। আজ আবার গোপাল নগরের দলের যাত্রা হবে, এখন স্নান করে এসে যাত্রা শুরুতে যাবো।

বেলা খুব পড়ে গিয়েছে—ছায়া ধূসর হয়ে এসেচে। এমন বিকাল কোথাও দেখিনি। আজ আবার ত্রয়োদশী তিথি—মেঘশূণ্ড সুনীল আকাশে খুব জ্যোৎস্না উঠবে।

আদাড়ি বিল্বিলে থেকে জল নিয়ে বাড়ী ফিরচে হরিকাকাদের বাড়ীর ওদিকের মুড়ি পথটায়।

সন্ধ্যার ঠিক আগে বাল্যে কিসের শব্দটা বেরুতো, সেই শব্দটা বেরুচ্ছে। মায়ের কথাই আবার মনে হয়।

অনেক রাত্রে বায়োস্কোপ দেখে ফিরলাম—ঝম্ঝম্ বৃষ্টি, মাঝে মাঝে বিদ্যুৎ চম্কাচ্ছে, মেঘাঙ্ককার আকাশ, রাস্তায় জল জমে গিয়েচে—তার মধ্যে বাসস্থানা কেমন চলে এল! যেন এরোপ্লেনে উড়ে সমুদ্রের ওপর দিয়ে যাচ্ছি।

বাইরের বারান্দাতে অনেকক্ষণ দাঁড়িয়ে রৈলাম—একটা Vision দেখলাম—এক দেবতা যেন এইরকম অঙ্ককার আকাশপথে, তুষারবর্ষা-হিমশূণ্ডে এক হাজার আলোক-বর্ষে চলেচেন অনবরত—দূর থেকে স্তূরে তাঁর গতি। কোথায় যাবেন স্থিরতা নেই—চলেচেন, চলেচেন অনবরত চলেচেন, হাজার বছর কেটে গেল। বিরাম বিশ্রাম নাই—Greatness of space. Undaunted travels of গ্রহদেব।

সেদিন পাঁচুগোপালের সঙ্গে ভগবতীপ্রসন্ন সেনের বাড়ী গিয়েছিলাম। ছেলেবেলাকার সে স্থানটা হয়তো আর কখনও দেখতুম না—কিন্তু আবার সেই ‘পরশুরামের মাতৃহত্যা’ যাত্রাটা হয়েছিল, সেটা আবার দেখলাম—যে ঘরে বসে বাবার সঙ্গে নিমন্ত্রণ খেয়েছিলাম—ভগবতীবাবু যে রোগীকে ব্যবস্থা-পত্র দিয়েছিলেন কতকাল আগে আমার নয় বছরের শৈশবে—লেখো ‘রত্নগর্ভ’ বলে, সেই কথাটা মনে পড়ল এতকাল পরে।

সত্যিই জীবনটা অপূর্ণ শিল্প—কি বলে প্রকাশ করি এর গভীর অপ্রত্যাশিত সৌন্দর্য, এর নবীনত্ব, এর চারু কমনীয়তা—আবার সেই পথটা দিয়ে

ফিরে এলাম, যে পথে বাবার সঙ্গে গঙ্গাস্নানে যেতুম।...বিজয়রত্ন সেনের সেই বাড়ীটা আজ আটাশ বছর পরে আবার দেখলাম।

আজ সকালে উঠে স্নান সেরে রামরাজাতলা গিয়েছিলুম ননীর সঙ্গে দেখা কর্তে। স্থানটা আমার ভাল লাগেনি আদৌ। পল্লীর শ্রী-সৌন্দর্য নেই, অথচ শহরের মহনীয়তাও নেই—শহরের মধ্যে দীনতা নেই, কুশ্রীতা কম, যেদিকে চাই, বড় বড় সৌধ, বিশাল আকাশ—আর ওখানে পল্লীর অপূর্ব বনস্নিবেশ নেই, Space নেই—আছে খোলা ড্রেন, দরিদ্র মিউনিসিপ্যালিটির তেলের আলো আর গুলকচুর বর্ষাপ্রবৃদ্ধ ঘেঁসার্ঘেসি। ননীর সঙ্গে অনেক কথা হোল। ছেলেটির মধ্যে সত্যিই কিছু ছিল কিন্তু গেঁষো হয়ে খুলতে পাছেনা। ওকে কলকাতায় এনে ভাল সমাজে পরিচিত করে দেবো।

বিকলে বাসায় ফিরলাম। কি সুন্দর আকাশ!...বৃষ্টি নেই অনেকদিন, অথচ মেঘের পাহাড় নানা স্থানে আকাশের। কেমন যে মনে হচ্ছিল, তা কি করে বলি।...বেলা পাঁচটাতে রবিবাসর ছিল প্রবাসী আপিসে। হেমেনের গানের কথা ছিল, প্রথমে অনেকক্ষণ সে এলনা। আমি, সজনী, অজিত সকলেই ব্যগ্রভাবে তার প্রতীক্ষায় ছিলাম। রবিবাসরে যাবার পথে রাধাকান্তদের মাষ্টার স্মশীলবাবুর সঙ্গে দেখা।

স্মশীলবাবু বিভূতির কথা উল্লেখ করে অনেক দুঃখ করলেন। সত্যিই ছেলেটা খারাপ হয়ে যাচ্ছে সবাই বলে। অক্ষয়বাবুর নাকি মধ্যে একদিন ফিট হয়েছিল গাড়ীতে—অতিরিক্ত মদ্যপানের ফল। ওদের সম্পত্তিটা অভিশপ্ত—সংযম ও উদারতার অভাবে এবং কতকটা কুশিক্ষা ও দাস্তিকতার ফলেও ওদের সব নষ্ট হয়ে যেতে বসেচে।

এই সব ভাবছি এমন সময় হেমন এল, গান আরম্ভ হোল। শৈলজা বলছিল তাকে কে কে blackmail করেছে। সাহিত্যক্ষেত্রে এমন দলাদলি সত্যিই দুঃখের বিষয়। নীহারবাবু বলে, ওর কে একজন দাদা 'পথের পাঁচালী' সম্বন্ধে বলেচেন, অমন বই আর হবে না। সজনী 'অপরাজিত' নিতে চাইলে। খুব খাওয়াদাওয়া ও আড্ডা হোল। হেমন সত্যিই বলে বাঙ্গালীর নিষ্ঠা ও সাধনার অভাব—সস্তা হাততালি ও নাম কিন্বার প্রলোভনে আমরা যেতে বসেচি।

হেমন ও আমি নানা পুরানো কথা বলতে বলতে 'শেয়ালদ' পর্য্যন্ত

এলাম—ওকে পার্ক সার্কাসের ট্রামে উঠিয়ে দিয়ে বল্লুম, পূজোর ছুটিতে লক্ষ্মীতে আবার দেখা হবে।

সত্যিই বড় ভালবাসি হেমনকে।

চাঁদ ওঠেনি কিন্তু আকাশে খুব মেঘও নেই। খুব হাওয়া।

রাত দশটা—বাসার বারান্দায় বসে লিখ্‌চি। দুয়ের সেই মাকাল-লতা দোলানো ভিটের কথা মনে পড়্‌চে—বর্ষাকালে খুব জঙ্গল বেড়েচে। আজ বৈকালটা কি অপূর্ব হয়েছিল সেখানে...কেবল সেই কথা ভাবি। সেখান থেকে প্রথম জীবন শুরু করেছিলাম—কত পথে চলেচি, কত আলাপী বন্ধুর হাত ধরে—কিন্তু সে জঙ্গলে-ভরা ভিটেটা কি ভুলেচি!...

ননীকে একদিন সত্যিকার বাংলার রূপ দেখাবে।

তারপর সারা রাত আর ঘুম হোল না। এত অপূর্ব জ্যোৎস্নাও কল্কাতায় আর কখনো দেখিনি যেন—বর্ষাধৌত নির্মল আকাশে সে কি পরিপূর্ণ জ্যোৎস্নার খেলা। সারারাতের মধ্যে আমি ঘুমুতে পারলাম না—গুন্‌গুন্‌ করে গাচ্ছিলাম—

“প্রলয় নাচন নাচলে যখন আপন ভুলে,  
হে নটরাজ, জটার বাঁধন পড়ল খুলে”

—কেমন একটা আনন্দ ও উত্তেজনা এল—সারারাতের মধ্যে চোখ বুজল না মোটে।

সে দিন নীরদ বাবু ও স্মীল বাবুর সঙ্গে মোটরে বহুকাল পরে যশোর গিয়েছিলাম—আবার স্কুলটা দেখলাম,—আবার চাঁচড়া দেখলাম। শীতের সন্ধ্যায় চাঁচড়া দশমহাবিচার মন্দির দেখতে দেখতে কি অদ্ভুত ভাব যে মনে জাগ্‌ছিল—চারি ধারের ঘন সবুজ বেত ঝোপ, পুরোনো মজা দীঘি—মহলের পর মহল নির্জন, সঙ্গীহীন, ধূসর সাক্ষ্য ছায়ায় শ্রীহীন অথচ গভীর রহস্যময় পাথর-পুরীর মত দেখাচ্ছিল। পেছনের ঘাট-বাঁধানো প্রকাণ্ড দীঘিটাই বা কি অদ্ভুত! ..রাজা রামচন্দ্র খাঁয়ের চাল ধোয়া পুকুরই বা দেখলাম কতকাল পরে। একটা সুন্দর প্লট মাথায় এসেচে।.. এই ভাঙ্গা পুরী, বনেদী ঘরের দারিদ্র্য, জীবনের ছুঁখ কষ্ট—Back-ground-এ সব সময়ই পুরাতন দিনের আড়ম্বর ও ঐশ্বর্য—সহস্র tradition—এই সব নিয়ে।

সাধনার কথা বল্‌ছিলাম কাল কৃষ্ণধন বাবুর সঙ্গে। সাধনা চাই। আমি

টুইশানি ছেড়ে দেবো। অপরাজিত তো শেষ হয়েছে—এইবার ছাপা আরম্ভ হবে—কিন্তু এই সময় সাধনা চাই।

- (১) ভাল ভাল উপন্যাসকার ও ছোট গল্প লেখকদের পুস্তক পাঠ।
- (২) ইতিহাস, Biology ও Astronomy সম্বন্ধে আরও বই পড়া।
- (৩) Philosophy সম্বন্ধে আধুনিক চিন্তাবীরদের বই পড়া।
- (৪) Sir Thomas Browne ও Anatole France এর বই আরও ভাল করে পড়া।

(৫) চিন্তা, ভ্রমণ, গল্প ও আড্ডা—ভাল সম্প্রদায়ে।

(৬) পল্লীতে যাওয়া ও Quaint ধরণের লোকের সঙ্গে আলাপ।

সাধনা ভিন্ন উচ্চ Outlook কি করে develop করে? খানিকটা মাত্র আমার করেছে—আরও চাই—আরও অনেক চাই।

১৯২৫ সালের, কি ১৯৩২ সালের আমি আর বর্তমান আমি কি এক? অনেক বেড়েছি—সেটা বেশ বুঝতে পারি—এই দুঃখ, খাটুনি, কম মাইনে, ছেলে-পড়ানোর মধ্যে দিয়েও বেড়ে উঠছি। মানুষ কখন কি ভাবে কোন্ অবস্থার মধ্যে দিয়ে বেড়ে ওঠে—তা কেউ জানে না।

ক'টা দিনই বেশ কাটল। সেদিন হাওড়ায় রায় সাহেব সুরেশ সেনের ওখানে একটা পার্টি ছিল। স্মৃশীল বাবু আমাকে এখান থেকে তুলে নিয়ে গেলেন—রমেশবাবু, নীরদবাবু সবাই সেখানে। তারপর জ্যোৎস্না-রাত্রে গঙ্গার উপর দিয়ে ফেরা গেল। শনিবারে সকালে সকালে কাজ মিটতো, সাহেব এক গোলমাল পাকিয়ে দিলে—বল্লে, তোমার নাম সিনেট থেকে যায় নি। সিণ্ডিকেটের সেদিনই মিটিং—ছুটির পরে ফণিবাবু ও আমি দুজনে মিলে স্মৃশীতিবাবুর কাছে গেলাম। বাড়ীতে দেখা না পেয়ে ইউনিভার্সিটি—সেখানে দেখা হোল। তারপর আমরা কলেজ স্কোয়ারে অনেকক্ষণ বসে গল্প করলাম। সেখান থেকে ইন্সটিটিউটে রাগিণী দেবীর নৃত্যকলা সম্বন্ধে বক্তৃতা শুনতে গেলাম। ফণিবাবু আমাকে Y. M. C. A.-র সামনে ট্রামে উঠিয়ে দিয়ে গেল। আমি X. Libraryতে যাবো। সেখানে সজনীবাবুর সঙ্গে দেখা হওয়ার প্রয়োজন। যাওয়ার সময় তাকে সেখানে না দেখে সোজা শনিবারের চিঠি আফিসে চলে গেলাম। সেখানে নেই, আবার এলাম ফিরে আজ নাকি হরতাল—কেউ আসেনি। ওখান থেকে বাস-এ চেপে



শ্যামাপ্রসাদ বাবুর কাছে ভবানীপুরে। শ্যামাপ্রসাদ বাবুর সঙ্গে দেখা করেই মুরলীবাবুর বাড়ী। তার পরে অনেক রাত্রে ট্রামে বাসা।

পরদিন ছুটির পরে স্ননীতিবাবুর সঙ্গে engagement. সকালে সজনীর ওখানে গেলাম। লুচি ও চা সজনীর স্ত্রী যত্ন করে খাওয়ালেন। সেখান থেকে দুজনে শনিবারের চিঠির আফিস—আমি খানিকক্ষণ প্রফ্ দেখে স্কুলে এলাম ও ছুটির পরে ইউনিভার্সিটিতে গেলাম। প্রথমে এসিষ্ট্যান্ট কন্ট্রোলারের আফিসে কেউ নেই—পরে দেখি সাহেব রেজিষ্ট্রারের ঘরের সামনে দাঁড়িয়ে আছে। আমিও দাঁড়িয়ে অপেক্ষা করলাম, একটু পরেই সাহেব বেরিয়ে এল। অনেকক্ষণ দুজনে গল্প করা গেল। তার পর হেডমাস্টার, ওয়ার্ডস ওয়ার্থ সাহেব, মিঃ বটস্‌লি, একে একে সবাই এলেন। পাঁচটার পরে আমি ওখান থেকে ফিরে সোজা শনিবারের চিঠির আফিসে। গোপাল হালদারের সঙ্গে Spiritualism নিয়ে সেখানে ঘোর তর্ক। স্ননীতিবাবু এলেন—গল্পগুজবের পরে আমি, স্ননীতিবাবু ও প্রমথবাবু তিনজনে গল্প কর্তে কর্তে বেরনো গেল।

স্ননীতিবাবু ‘পথের পাঁচালী’ ইংরাজিতে অনুবাদ করবেন এমন ইচ্ছা প্রকাশ করলেন। প্রমথবাবু ইটালিয়ানের প্রোফেসর ইউনিভার্সিটিতে, তিনি আমার সঙ্গে আমার বাড়ী এলেন। আমার বইখানা ইটালিয়ানে অনুবাদ সম্বন্ধে অনেক কথা হোল। ইটালিতে আমায় পাঠানো সম্বন্ধে বললেন। তিনজন ভদ্রলোক এসে দেখি বাসায় বসে আছেন—তাঁরা কালকের একটা পার্টিতে নিমন্ত্রণ কর্তে এসেছেন।

সকালে উঠে স্কুলে গেলাম ও শনিবার সকালে ছুটির পরেই বাসায় এলাম। অনেকক্ষণ ঘুমুবার চেষ্টা করা গেল। আন্দাজ চারটার সময় উঠে হ্যারিসন রোড্ দিয়ে যাচ্ছি—শীতল পেছন থেকে ডাকলে ও একখানা পত্র দিলে। একটা সভা আছে ওদের বাড়ী—আমি সভাপতি। প্রথমে গেলাম হেঁটে শনিবারের চিঠির আফিসে—সেখানে Copy দিয়ে সোজা হাঁটতে হাঁটতে (খুকীকে যে পথ দিয়ে হাঁটিয়ে নিয়ে গেছলাম সেই পথটা ধরে) বিডন্ স্কয়ার। সেখানে একটা বেঞ্চির উপর বসে কত কথা ভাবলাম। মায়ের পোতা সেই সজ্‌নে গাছটার কথা এত যে মনে হয় কেন? মনে হোল, যে জীবনটায় আর কখনো ফিরবো না—যা শেষ হয়ে

গিয়েচে ওই সজ্জনে গাছটা এখনও কার ফিরবার আসায় সেই দিনগুলির মত পাতা ছাড়চে, ফুল ফোটাচ্ছে—ডাঁটা ফলাচ্ছে—কে এসে ভোগ করবে ? সন্ধ্যার ধূসর আকাশ—ছ’ চারটা তারা—‘জনতার মাঝে জনগণ পতি’ গানটাও আবার মনে এল—আকাশের তারাদের দিকে চাইলেই ওই অপূর্ব ভাবটা হয়।

তারপর উঠে ওদের বাড়ী গেলাম। মন্থদের বাড়ী সভা হোল। আমায় কল্লে সেক্রেটারী। সভা ভঙ্গের পরে বিভূতি গলা জড়িয়ে ধরে বুলে, এখানে রাত্রে খেয়ে যাবেন। তারপরে লাল ঘরে অনেকক্ষণ আড্ডা হোল। পড়বার ঘরে তারপরে বিভূতি কাছে বসে খাওয়ালে। পুরোণো দিনের গল্প হোল, সব চেয়ে কথা উঠল—‘পুত্রলিকা’ ‘পুত্রলিকা’ সে কথা হোল। তারপর রিক্সা করে মাঘী পূর্ণিমার জ্যোৎস্না-রাত্রে পুরাণো দিনের মত বাসায় ফিরলাম—সেই প্রতাপ ঘোষের বাড়ীর সামনে দিয়ে, খানাটার পাশ দিয়ে। একটা কথা লিখতে ভুলে গিয়েছি, আজ বিকালে প্রবাসী আপিসে ও Sir P. C. Ray-এর সঙ্গেও দেখা করেছিলাম।

রবিবারে প্রসাদ এল। বেশ মাথায় বড় হয়েচে—সেই ছোট্ট প্রসাদ আর নেই। তাকে দেখে এমন স্নেহ একটা হোল! আমার নাম উঠলেই এখনও সকলে কাঁদে—চাঁপাপুকুরের বড় মাসীমা কাঁদেন, এই সব কথাও বুলে। একটা চাকুরীর কথা বুলে। তার পর আমার নাম এখন প্রায়ই সকলে করেন সে কথাও বুলে। তার পর সে চলে গেল।

আমি খেয়ে ঘুমিয়ে পড়েছি নীরদবাবু এসে ডাক্চেন। দুজনে দম্‌দমা গেলাম—স্বশীলবাবু শান্তিকে পড়াচ্ছিলেন—দুজনেই বাইরে এলেন। গল্পগুজব হোল—মাঠে বসে চা খাওয়া গেল। আমরা পাঁচটার সময়ে বেরিয়ে শরদিন্দু বাবু ও করুণা বাবুর পার্টিতে এলাম। নরেন দেব, অচিন্ত্য, প্রবোধ সাম্মাল, রমেশ বসু—সবই এল। খুব খাওয়া দাওয়া হোল। প্রচুর খাওয়া! নরেন দেব সন্দেশ খেতে খেতে মুখ লাল করে ফেলে অবশেষে যখন আরও খেতে অস্বস্তি হলেন—মরিয়া হয়ে বুলেন সন্দেশটা ভালো নয়। আমরা বেরিয়ে শেয়ালদা ষ্টেশনে এসে স্বশীল বাবুকে ভুলে দিয়ে নীরদ বাবুর গাড়ীতে নিউ মার্কেটে গেলাম। কথা রৈল বৃহস্পতিবারে ‘অপরাজিত’ পড়া হবে দম্‌দমার বাগান বাড়ীতে। Wide World কিনে রাতে বাসায় ফিরলাম।

কিন্তু আজই মনটা কেমন উড়ু উড়ু, মায়ের সেই সজ্জে গাছটা,—ভাঙা হাঁড়ি কুড়ীর কথা আজ সারাটা দিন মনে হয়েছে—বিশেষ করে এই জ্যোৎস্না-রাত্রে ।

এবার সরস্বতী পূজা একটু দেবীতে । কিন্তু ছুটি পাওয়া গেল বেশী । সপ্তাহব্যাপী ছুটি । ‘অপরাজিত’ প্রায় শেষ হয়ে আসচে—ভাবলাম একবার কেণ্ডটা যাবো এসময়ে । নীরদবাবুও রাজী । গত মঙ্গলবার আমি ও নীরদবাবু মোটরে গেলাম দম্‌দমা । সুশীলবাবু যেতে পারবেন না, অতএব আমরা সেখানে খাওয়া দাওয়া সেরে দক্ষিণেশ্বর যাবো বলে বেরিয়ে পড়ি । সুশীলবাবুর স্ত্রীও ‘অপরাজিত’ শুন্‌বেন বলে দক্ষিণেশ্বর যাবার জন্তে প্রস্তুত হলেন । সবাই বেরিয়ে পড়া গেল কিন্তু দক্ষিণেশ্বর যাওয়া হোল না । যশোর রোডের পরে একটা নিভৃত বাঁশবনের ছায়ায় বিছানা পেতে বসে আমরা ‘অপরাজিত’ পড়লাম—তারপর ফিরে এসে চা খেয়ে আড্ডা দেওয়া গেল । রাত্রে রমেশবাবুর ওখানে নেমস্তন্ন ছিল—সেখানে প্রবোধ সান্ন্যালের সঙ্গে দেখা ।

বুধবার দিনটা কাজ করলাম । বৃহস্পতিবার সকালে বনগ্রামের ট্রেনে চাপলাম—বন্ধুদের বাসায় পৌঁছে দেখি তরু নেই । হেড্‌পণ্ডিতকে নিয়ে গিয়ে স্কুলে অঞ্জলি দিলাম । দেবেনের বাসায় গেলাম তারপর ফিরে এসে তরুর সঙ্গে গল্প গুজব করে চালুকী রওনা ।

কি অদ্ভুত আমের বৌলের সৌরভ, কি শিমূলফুলের শোভা । বাতাবী লেবুফুলের গন্ধ । কাল পয়লা ফাল্গুন, এমন বসন্তশোভা আমাদের দেশে অনেককাল দেখিনি । চালুকী পৌঁছে খাবার খেয়ে খুকী, ভাঁদো সবশুদ্ধ উত্তরমাঠে বেড়াতে গেলাম—রস খাওয়া গেল—অনেকটা বেড়ালাম । তারপর ওদের বাড়ী পৌঁছে দিয়ে আমি আবার গেলাম উত্তর মাঠে—তখন চারিধার কি নির্জন !

পরদিন সকালে উঠে বারাকপুরে গেলাম । সারা পথে কেমন দক্ষিণ হাওয়া—কি অপূর্ব আমের বউলের গন্ধ । খুকীও সঙ্গে গেল । সকাল সকাল ফিরে স্নান করলাম । তারপর বৈকালে বেরুতে যাবো, বৃষ্টি এল—একটু বসলাম । আবার যাবো—রামপদ এল । তাকে একটু জল খাইয়ে ছুজনে একসঙ্গে বার হওয়া গেল । কি অপূর্ব শান্তির মধ্য দিয়ে এসে পৌঁছলাম । আমি পটপটি তলায় ঘাটের এপারে এসে দাঁড়ালাম—ওপারের রাঙা-রোদভরা মাঠের দৃশ্যটা কি যে অপূর্ব ! তারপর মাঠের পথ বেয়ে

আমাদের বাড়ীর পিছনের পথে আস্টি, বেলা পড়ে এসেচে—কি বাঁশের শুকনা খোসা ও ঝরা বাঁশ পাতার স্ফূরণ!...কতকাল আগের শৈশবের কথা মনে করিয়ে দেয় যে।

রামপদর কাছে বসে একটু তামাক খেয়ে ও গল্পগুজব করে শ্যামাচরণ দাদার বাড়ী এলাম। সেখানে অপেক্ষা করলাম। জ্যোৎস্না উঠলে চালুকৌ চলে এলাম। ছেলেপিলেরা এল গল্প শুন্বে বলে। বন্ধু অনেকক্ষণ ছিল।

আজ সকালে উঠে চলে এলাম।

কাল বিকালে স্মৃশীলবাবুদের বাড়ী গেলাম। কি সুন্দর বসন্ত এবার এখানে! বৃষ্টি নেই। দেশে গিয়েছিলাম—সর্বত্র আমের বউলের গন্ধ। আজ সকালে সজনীর বাড়ী গেলাম—স্নান সেরে। বেজায় কুয়াসা। সজনীর স্ত্রী চা ও লুচি খাওয়ালেন। বড় ভাল মেয়েটি।

‘অপরাজিত’-র শেষ লেখা আজ প্রেসে দিয়ে এসেছি। কিছু করবার নেই। হাত ও মন একেবারে খালি। স্কুল থেকে ফিরে নিউ মার্কেটে গিয়ে “Wide World” খুঁজে পেলাম না। হাঁটতে হাঁটতে কলেজ স্ট্রীটে এসে কাপড় কিনে এই ফিরুচি।

অপরাজিতর শেষটা ভাল করে দেখবার জন্তে তিনদিন ছুটি নিয়েছিলাম। একটা জিনিষ লক্ষ্য করলাম—ছুটি ভাল লাগে না। স্কুলটাই ভাল লাগে। বেশ ছেলেপুলে নিয়ে থাকা—অমিয়, দেবব্রত, বিমলেন্দু সত্যব্রত এদের সঙ্গে বেশ লাগে। ওরা সবাই শিশু—নীচু ক্লাশের ছেলে। আমাকে মাষ্টার বলে ভয় তত করে না, যতটা আপনার লোকের মত ভালবাসে। সব বিষয়ে সাহায্য চায়, troubles খুলে বলে, বেশ লাগে। ওদের নিয়ে সময়টা যে কোথা দিয়ে কেটে যায়, টেরই পাই না। নিষ্ক্রিয়, Death-in-Life ধরণের existenceএর চেয়ে এরকম স্কুল মাষ্টারীও শতগুণে শ্রেয়।

আজ একটা স্মরণীয় দিন। আজ সকালে উঠে সজনী দাসের বাড়ীতে চলে গেলাম, না খেয়েই। সে এ কয়দিনই অবশ্য যাচ্ছি। কিন্তু আজ গেলাম ‘অপরাজিত’-র শেষ ফর্মা প্রফ্ দেখবার জন্তে। ওখান থেকে স্কুলে। সেখানে দেবব্রতদের পরীক্ষা নিলাম। তারপর ইউনিভার্সিটির সামনে স্মৃশীলদার সঙ্গে দেখা। অনেকক্ষণ দাঁড়িয়ে রইলাম। আমাদের

স্কুলের ছেলেদের সঙ্গে দেখা হোল—সমীর বলে ভালো লিখেচে। শৈলেন বাবুর সঙ্গেও দেখা হোল। তারপর এক কাপ চা খেয়ে আবার গেলাম সজনী দাসের ওখানে। প্রথমবাবু ও সজনী বসে। শেষ ফর্মাটা প্রেসে ছাপতে দিয়েচি। তারপরে কি করে ‘পরের পাঁচালী’ প্রথম মাথায় এল, সে গল্প করলাম।

আজ তাই মনে হচ্ছে, সত্যই স্বর্ণীয় দিনটা। ১৯২৪ সালের পূজার সময়টা থেকে এপর্যন্ত প্রায় সব সময়ই এই বই-এর কথাই ভেবেছি। ১৯২৬, সাল থেকে শুরু করে ১৯৩২এর ১০ই মার্চ পর্যন্ত এমন একটা দিনও যায়নি, যখন আমি এ বইখানির কথা না ভেবেচি—বিভিন্ন চরিত্র, বিভিন্ন ঘটনা, বিভিন্ন মনোভাব নোট করেচি, মনে রেখেচি—কত কি করেচি। ইসমাইলপুরের জঙ্গলে এমন কত শীতের গভীর অন্ধকার রাত্রি, ভাগলপুরের বড় বাসায় এমন কত আমার বউলের গন্ধ-ভরা ফাগুন ছুপুর, কত চৈত্র বৈশাখের নিমফুলের গন্ধ-মেশানো অলস অপরাহ্ন, বড়বাসার ছাদে কত পূর্ণিমার জ্যোৎস্না রাত্রি অপু, দুর্গা, পটু, সর্বজয়া হরিহর, রাণুদি এদের চিন্তায় কাটিয়েচি। এরা সকলেই কল্পনাসৃষ্ট প্রাণী। অনেকে ভাবেন আমার জীবনের সঙ্গে বুঝি বই দু’খানির খুব যোগ আছে—চরিত্রগুলি বোধ হয় জীবন থেকে নেওয়া। অবশ্য কতকটা যে আমার জীবনের সংযোগ আছে ঘটনাগুলির সঙ্গে, এবিষয়ে ভুল নেই—কিন্তু সে যোগ খুব ঘনিষ্ঠ নয়—ভাষা ভাষা ধরণের। চরিত্রগুলি সবই কাল্পনিক। সর্বজয়ার একটা অস্পষ্ট ভিত্তি আছে—আমার মা। কিন্তু যারা আমার মাকে জানে, তারাই জানে সর্বজয়ার সবখানি আমার মা নন।

আজ রাত অনেক। এদের সকলের উদ্দেশ্যে বইখানি উৎসৃষ্ট করলাম। যদি সাহিত্যের বাজারে আন্তরিকতার কোনো মূল্য থাকে, তবে আমার ইসমাইলপুরে, ভাগলপুরে বড়বাসার ছাদে আমার বহু বিনিদ্র রজনী-যাপনের ইতিহাস একথার সাক্ষ্য দেবে যে, বই দু’খানি লিখতে আন্তরিকতার অভাব আমার ছিল না বা চিন্তার আলস্য আমি দেখাইনি।

আজ সত্যিই কষ্ট হচ্ছে। অপু, কাজল, দুর্গা লীলা—এরা এই সুদীর্ঘ পাঁচ বৎসরে আমার আপনার লোক হয়ে পড়েছিল। আজ ওবেলাও প্রফ্ দেখেচি, অদলবদল করেচি—কিন্তু এবেলা থেকে তাদের সকলকেই সত্য-সত্যি বিদায় দিলাম। আজ রাত্রে যে কতখানি নিঃসঙ্গ ও একাকী বোধ

করচি, তার সন্ধান তিনিই জানেন, যিনি কখনো এমনি দীর্ঘ পাঁচ বৎসর ধরে গুটিকতক চরিত্র সম্বন্ধে সর্কদা ভেবেচেন।—তাদের স্মৃৎদুঃখ, তাদের আশা নিরাশা, তাদের ভবিষ্যত সম্বন্ধে দুৰুদুৰু বক্ষে চিন্তা করেচেন।

অপুকে জন্ম থেকে ৩৪ বৎসর বয়স পর্য্যন্ত আমি কলমের ডগায় সৃষ্টি করেচি। তাকে ছাড়তে সত্যিকার বেদনা অনুভব করচি—তবে সেছিল অনেকখানিই আমার নিজের সঙ্গে জড়ানো, সেইজন্তে বেশী কষ্ট হ্চে বিদায় দিতে কাজলকে, লীলাকে, দুর্গাকে, রাণুদিকে—এরা সত্যসত্যই কল্পনাসৃষ্ট প্রাণী। কোনোদিকে এদের কোনো ভিত্তি নেই এক আমার কল্পনা ছাড়া।

যদি দু'পাঁচজনেরও এতটুকু ভাল লাগে বই দুখানা—তবে আমার পাঁচ বৎসরের পরিশ্রম সার্থক বিবেচনা করবো।

সত্যিই মনে পড়ে ইসলামপুর থেকে সাবোরে আস্চি ঘোড়ায় ভাবতে ভাবতে—নোট কর্তে কর্তে। কার্তিক অগুন জাল্লে সাবোরে ষ্টেশনে। সে সব জিনিস আজ শেষ হোলো? যখন 'পথের পাঁচালী' ছাপা হয়েছিল, তখনও 'অপরাজিত' ছিল—বেশীটাই বাকী ছিল কিন্তু আজ আর কিছু নেই।

রাত্রি অন্ধকার। চাঁদ ডুবে গিয়েচে। শহরের গোলমাল থেমেচে। আমি লিখতে লিখতে বহু দূরের অন্ধকার আকাশের জল্জলে নক্ষত্রদের দিকে চেয়ে দেখ্চি—জীবনদেবতার কি ইঙ্গিত, যেন আগুনের আখরে আকাশের অন্ধকার পটে লেখা।

বিদায়, বন্ধুদল,—বিদায়।

আজ সকালে মহিমাবাবু এসে অনেকক্ষণ বসেছিল। তারপর স্কুল থেকে গেলাম ইউনিভার্সিটিতে Examiners' Meeting-এ। বেরিয়ে আমি ও সুনীতি বাবু দুজনে গেলাম লিবার্টি অফিসে। টম্‌সন সাহেব সেদিন এলবার্ট হলের বক্তৃতায় 'পথের পাঁচালী'র উল্লেখ করেচে—নীহার রায়ের মুখে শুনে একখানা কাগজ আনিয়ে নিলাম। তারপর বাসে উঠে সজনীর বাড়ী। সেখান থেকে ফিরে Sample কাগজখানা দেখা এইমাত্র শেষ করলাম। স্কুলে দেবব্রত খাতা দেখাতে কাছ ঘেঁসে দাঁড়িয়েছে

ওবেলা—তাকে বললাম তুই আমার ছেলে তো? সে বললে একটু সলজ্জ হেসে—হাঁ। ও কখনো একথা বলেনি এর আগে।

তাই আজ আনন্দে মনটা পূর্ণ আছে সারাদিন।

আজ রাত্রে ‘অপরাজিত’ বইএর দ্বিতীয় খণ্ডটা সজনীর কাছ থেকে আনলাম। আজ সকালেই বই বার হয়েছে। অনেক রাত পর্যন্ত বসে থেকে চা খেয়ে ও গল্প গুজব করে চলে এলাম।

দ্বিজরাজ জানা মারা গিয়েচে বলে সকালে ছুটি হোল। বেরিয়ে আমি যতীনবাবু ও ক্ষেত্রবাবু ওয়াছেল মোল্লার দোকানে ও নিউ মার্কেটে বেড়ালাম। সেখান থেকে ইউনিভার্সিটিতে গেলাম কাগজের খোঁজে। কাগজ পেলাম না। বীরেনবাবুও ছিল। বেরিয়ে বাসায় এসে একটু ঘুমুনো গেল।

এখন রাত। সিঁদুরে মেঘ হয়েছে। মনটা কেমন একটা বিষাদে পরিপূর্ণ—মনটা শূন্য হয়ে গিয়েচে—অপু, দুর্গা, সর্ব্বজয়া, কাজল, লীলা, পটু, বিলি--এরা সব আজ মনের বাইরে চলে গিয়েচে কতকালের সহচর সহচরী সব—সেই ইসমাইলপুরে এমন সব চৈত্র অপরাহ্নে Wide World পড়া দিনগুলো থেকে ওরা আমার মনের মধ্যে ছিল—কাল একেবারে চলে গিয়েচে।

ওদের বিরহ অতি দুঃসহ হয়ে উঠ্চে।

এর আগে ক’দিন মনটা ছিল নিরানন্দ। কেবল গৌরীপুরের মাঠে যেদিন Picnic কর্তে যাই আমরা—সেদিনটাতে আনন্দ পেয়েছিলাম। সেই আধ-জ্যোৎস্না আধ-আঁধার রাত্রে তালবনের ধারে পুকুরপাড়ে বসে কত কি গল্প—কতকাল ওসব কথা মনে থাকবে।

কাল রাত্রে সাহিত্য-সেবক-সমিতিতে সভাপতি ছিলাম। অচিন্ত্য একটা গল্প পড়লে—গল্পটা মন্দ হয়নি। সেখান থেকে বেরিয়ে অনাথ-ভাণ্ডারের থিয়েটার দেখতে যাবো কথা ছিল, কিন্তু অবনীবাবু, স্কুমার ও শৈলেন বাবুর সঙ্গে জমে গিয়ে রাত এগারোটা পর্যন্ত হৃষিকেশ লাহাদের বাড়ীর সামনের পার্কটাতে আড্ডা দিলাম। সেখান থেকে বার হয়ে বাসায় ফিরলাম অনেক রাতে।

আজ বেলা চারটার ট্রেনে শ্রীরামপুরে গেলাম। সেখানে ‘আনন্দ-পরিষদের’ অধিবেশনে সভাপতিত্ব কর্তে হবে। ছেলেরা ওখান থেকে এসেছিল। অবনীবাবুকেও সঙ্গে নেবো বলে ডাকতে গেলাম, পেলাম না। ঝাম্ ঝাম্ করচে ছুপুরের রোদ। কিন্তু একটু পরে বেশ মেঘ করে এল। শ্রীরামপুরে শ্রীলীলারানী গঙ্গোপাধ্যায়ের বাড়ীতে নিয়ে গেল। লীলারানী দেবী লেখিকা, ‘কল্লোল’ ও ‘উপাসনা’য় লেখেন। ওপারের বারান্দাতে তিনি বরফ দিয়ে সরবৎ তৈরী করে খাওয়ালেন ও জলখাবার দিলেন। তাঁর সঙ্গে সাহিত্য সম্পর্কে আলোচনা করলাম। এঁদের বাড়ীর কাছেই খুকীর শিশুর বাড়ী। একবার সাক্ষাৎ করবার ইচ্ছা ছিল। লোকও পাঠালাম—কিন্তু লোক ফিরে এসে বললে কারুর সঙ্গে দেখা হোল না।

সভায় যখন আস্টি—ওদের বাড়ীটা দেখলাম—ভাঙা দোতলা বাড়ী—একটা কয়লার গোলার পাশ দিয়ে পথ। সভার কার্য শেষে আবার ভূরিভোজনের ব্যবস্থা। সমবেত ভদ্রলোকেরা আমাকে একটা বড়লোকের বাড়ীর দোতলায় হলে নিয়ে গেলেন—সেখানেই একটা বড় শ্বেত পাথরের টেবিলে নানারকম ফলমূল, মিষ্টান্ন, সরবৎ সাজানো। এত খাই কি কোরে? এই তো শ্রীলীলারানী দেবীর ওখান থেকে খেয়ে আস্টি। কে সেকথা শোনে? আনাতোল ফ্রাঁসের Procurator of Judea গল্পটা খেতে খেতে ওঁদের কাছে কল্পম—রসের বৈচিত্র্য ও quaintness হিসেবে।

ওরা ট্রেনে তুলে দিয়ে গেল। ট্রেনে একটা লোকের সঙ্গে আলাপ হোল—বাড়ী জিরেট বলাগড়, বিড়ি খাওয়ালে, অনেক গল্প গুজব করলে। হাওড়া স্টেশন থেকে হেঁটে বাসায় এলাম। পথে পানিতরের বামনদাস দত্তের সঙ্গে দেখা। আজ পয়লা মে! একটা স্মরণীয় দিন। আজকার সভার জন্মে বা এসব আদরের জন্মে নয়—আজ ১৩ বৎসর হতে সেই ১লা মে’তে—কিন্তু সেকথা আমিই জানি, আর কেউ জানে না। জান্বার কথাও নয়। বোল্বেও না কাউকেও।

বেশ হাওয়া, বাসায় এসে বারান্দায় বিছানা পেতে শুয়ে রৈলাম।

আজ মনে একটা অপূর্ণ আনন্দ পেলাম। অনেক কাল পরে। মনে পড়ে গেল বাল্যে ছুপুরে আহাৰ সেয়ে এই সব দিনে বাড়ীর পেছনে বাঁশবনে মুখ ধুয়ে আস্তাম। বাঁশবনে গিয়ে আঁচালে তবে মনে একটা আনন্দ আসতো—কত তুচ্ছ জিনিষ কিন্তু একদিন ও থেকে কি গভীর



আনন্দই পেয়েছি!...সেই ভিটে, সেই গ্রাম আজও তেমনি আছে—আমিই কেবল বদলে গিয়েছি। আজ রবিবার ফণিকাকারা তাড়াতাড়ি করচে এত রাতে হরি রায়ের বাড়ীতে তাস খেলতে যাবে বলে—ঝিটকীপোতায় বাঁওড়ে বড় ঝই মাছের বাচ্ হচ্চে বলে—হাটে আজ মাছ সস্তা হয়েছে বলে—আমিও যদি গ্রামে থাকতুম—আমিও ও থেকে আনন্দ পেতুম ওদেরই মতন—কিন্তু আমি বদলে গিয়েছি একেবারেই। Sophisticated হয়ে পড়েছি, hampered হচ্ছি। দৃষ্টির স্বচ্ছতা নষ্ট হয় নি বলে এখনও এ সব বুঝতে পারি।

অগণ্য আকাশের তারায় তারায় কত দেবলোক, কত পৃথিবী, কত জগৎ—কত অগণিত প্রাণীকুল, কত দেবশিশু—আনন্দের কি মহান, অসীম ভাণ্ডার! দুঃখও যত বৃহৎ তাদের—আনন্দও তত বৃহৎ। এই ভেবেই, চৈতন্যের এ প্রসারতা শুধু আমার আজ রাতে।

আজ সকালে উঠতে দেরী হয়ে গিয়েছিল, কারণ কাল অনেক রাতে দম্‌দম্ থেকে ফিরেছি। সেখানেই রাতে খেলাম, আগামী রবিবারের Outing এর নক্সা করলাম, তারপর আমি আর নীরদবাবু মোটরে ফিরি। আজ এইমাত্র সাহেবের ওখান থেকে আস্‌চি। সাহেব একটু দমে গিয়েচে—আমি ফণিবাবুর সঙ্গে ওটা গিটিয়ে ফেলতে বল্লুম।

কন্‌ভেন্ট রোড্‌টা অঙ্ককার, এখানে ওখানে যুঁই ও মালতীর সুগন্ধ, আজ আকাশ বেশ পরিষ্কার, নক্ষত্রে ভরা। ভগবানের কাছে প্রার্থনা কর্লুম, সাহেবের হাঙ্গামাটা যেন মিটে যায়।

একটা কথা মনে হচ্ছে। মানুষের মনের ব্যাপকতা যত বাড়বে ততই সে পূর্ণ মনুষ্যত্বকে লাভ করবে। এমন সব মানুষ জীবনে কতই দেখলাম তাদের মনের সতর্কতা, চৈতন্যের ব্যাপকতা বড়ই কম। এত কম যে আহাৰ বিহার ও অর্থোপার্জনের বাইরে যে আর কিছু আছে, তা তারা ভাবতে পারে না। জ্ঞান বল, বিজ্ঞান বল, আর্ট বল, সাহিত্য বল—এ সবের কোনো মূল্য নেই তাদের কাছে। এমন কি স্নেহ, প্রেম, কল্পনা বন্ধুত্ব, এ সবও তাদের অজ্ঞাত—loyalty-কে তারা ভীকতা ভাবে, স্নেহকে দুর্বলতা ভাবে। ফণিবাবু একজন এই ধরনের মানুষ। এ সব লোকের নির্কুঙ্কিতা আমি বরদাস্ত কর্তে পারিনে একেবারেই। মূৰ্খতারও একটা সীমা আছে, এদের তাও নেই।

সে ষাক্। এই চৈতন্যের ব্যাপকতার কথা বলছিলাম। এই মুক্ত প্রকৃতি, সবুজ ঘাসে মোড়া ঢালু নদীতীর, কাশবন, শিমূলবন, পাখীর ডাক—নীল পর্বতমালা, অকূল সমুদ্র, অজানা মহাদেশ—এই হাসিমুখ বালক বালিকা, সুন্দরী তরুণী, স্নেহময়ী পত্নী, উদার বন্ধু, অসহায় দরিদ্রদল,—এই বিরাট মানব জাতির অদ্ভুত ইতিহাস, উত্থানপতন, রাজনীতির ও সমাজনীতির বিবর্তন, এই বিরাট নক্ষত্রজগৎ, গ্রহ, উপগ্রহ, নৌহারিকা, ধূমকেতু, উল্কা—জানা অজানা জাগতিক শক্তি,—এই X-ray, বিদ্যুৎ, Invisible rays, highly penetrating radiation,—ওই মৃত্যুপারের দেশ, মৃত্যুপারের বিরাট জীবন—এই রহস্যে স্পন্দমান, অসীম, অদ্ভুত জীবনরহস্য—এই সৌন্দর্য্য, এই বিরাটতা, এই কল্পনার মহনীয়তা,—এসবে যারা মুগ্ধ না হয়, গরু মহিষের মত ঘাস দানা পেলেই সন্তুষ্ট থাকে, যারা এই রহস্যময় অসীমতার সম্বন্ধে অজ্ঞ, নিদ্রিত ও উদাসীন রৈল—সে হতভাগ্যগণ শাস্ত ভিখারী—তাদের দৈন্ত কে দূর কর্তে পারবে ?

মানুষের মত যত উদার হবে, যত সে নিজের চৈতন্যকে বিশ্বের সবদিকে প্রসারিত করে দিতে পারবে, অগ্নির চেয়ে অগ্নি, মহানের চেয়েও মহান বিশ্ববস্তুর প্রতি আত্মবুদ্ধিকে যত জাগ্রত করে তুলতে পারবে—সে শুধু নিজের উপকার করবে না, নিজের মধ্যে দিয়ে সে শতাব্দীর সঞ্চিত অন্ধকারজাল ও জড়তাকে প্রতিভার ও দিব্যদৃষ্টির আলোকে প্রসারিত করে দিয়ে যাবে। সেই সত্য—সত্য নিত্যকালের মশালটি।

সেদিন চারু বিশ্বাসের বাড়ীতে অনেক রাত পর্যন্ত মিটিং হোল। রাত দশটার পরে সেখান থেকে রওনা হয়ে আসতে গিয়ে লাউডন স্ট্রিটের মোড়ে একটা টায়ার গেল ফুটে। মোলালীর মোড়ে আবার মহরমের বেজায় ভিড়। অনেক কষ্টে রাত্রে বাড়ী পৌঁছলাম। ভোরে স্নান সেরে বসে আছি নীরদবাবু গাড়ী নিয়ে এলেন। চা পান করে দম্‌দম্‌ থেকে বেরুনো গেল। বনগাঁর পথে এ গাড়ীরও একখানা টায়ার গেল। বনগাঁয়ে পৌঁছে বাজার করে বেলেডাঙ্গা পৌঁছুতে বেলা নয়টা। বটতলায় গিয়ে কাঠ কুড়িয়ে সবাই মিলে রেঁধে খেলাম। শ্যামাচরণ দাদাদের বাড়ী এলাম—সেখান থেকে নৌকা করে নকুতুলের ঘাট পর্যন্ত বেড়ালুম—সবাইপুরের ঘাটে স্নান কর্লাম। তারপরে সেদিন রাত্রে দম্‌দমাতে ফিরে খেয়ে আবার এলুম বাসাতে।

এবার বাড়ী গিয়ে বড় গোলমাল। কদিন বেশ কেটেছিল, শ্রামাচরণ দাদার স্ত্রীর স্নেহ বড় উপভোগ করেছি—বৌদি বড় ভাল মেয়ে—আমার শ্রদ্ধা হয়েছে। বর্ষা-বাদলার দিনে পুঁটীদিদিদের বাড়ী গরু বাছুরের সঙ্গে একঘরে বাস করে মনটা খিঁচে উঠেছিল। ওখানে এবার তুফন্ ঠাকরুণ মারা গেলেন। আসবার আগের দিন তাঁর শ্রাদ্ধ ষ্ঠ্যাল। রোজ বিকেলে বকুলতলায় বসতুম। জগা ছড়া বলতো—

“অশন বসন রণে সদা মানি পরাজয়,  
ছনয়নে বারিধারা গঙ্গা যমুনা বয়—  
কথায় কথায় তুমি যেতে বল যমালয়,”—ইত্যাদি

ছেলেমানুষের মুখে বেশ লাগতো।

কিছুদিন কলিকাতা গিয়ে রইলাম। একদিন নীহার রায়ের ওখানে গেলাম, সেখানে তার অনেক বন্ধুবান্ধব বসে আছে, ‘অপরাজিত’ সম্বন্ধে অনেক কথাবার্তা হোল। নীহার বললে—‘অপরাজিত’ একটা Great Book, আমি এঁদের সেই কথাই বলছিলাম, আপনি আসবার আগে। ধূর্জটীবাবুর বাড়ীতে একদিন ‘অপরাজিত’ নিয়ে আলোচনা হোল আমার সঙ্গে। ভদ্রলোক অনেক জায়গা দাগ দিয়ে পড়েচেন, মার্জিনে নোট লিখে। তারপর নীরদের বাড়ীতে চা-পার্টি উপলক্ষে সুনীতিবাবু ও রঙীন্ হালদারের সঙ্গে সে সম্বন্ধে অনেক কথা হোল।

রবিবারে গেছলাম, আবার পরের রবিবারে ফিরি। সেদিন রাণাঘাটে নেমে কি ভয়ানক বর্ষা। গোপালনগরে নামলাম অবিশ্রান্ত বৃষ্টির মধ্যে দিয়ে। অতি কষ্টে গাড়ী যোগাড় করে ফিরলাম। হাটবার, স্মশীলবাবু একটা মোট পাঠিয়েছিলেন শ্রামাচরণ দাদাদের জন্তে—সেটা তাঁদের দিলাম।

কাল খুব গুমট হয়েছিল। বৈকালে জেলি, সরলা এরা পড়তে এল—বকুলতলায় চেয়ার পেতে বসে খুকুর সঙ্গে খুব গল্প কর্তুম। রিম্বিম্ বর্ষার মধ্যে মেঘভরা আকাশের তলা দিয়ে কুঠীর মাঠে বেড়াতে গেলাম। ওপারে বর্ষাস্রোত বয়, গাছপালা, সবুজ তৃণভূমি—বৃষ্টিতে চারিধার ধোঁয়া—ধোঁয়া—তারপর গেলাম ওপাড়ার ঘাটে। জল গরম—নেমে স্নান কর্তে কর্তে চারিদিকে চেয়ে সে কি আনন্দ পেলাম—মাথার উপর উড়ন্ত সজল মেঘরাশি, জলের রং কাকের চোখের মত, কি সুন্দর কদম গাছটার রূপ—মনে হোল ভাগলপুরের সেই অপূর্ব সবুজ কাশবনের চর—সুদূরপ্রসারী প্রান্তরের সে

সুন্দর প্রাণ-মাতানো স্মৃতিটা—সেও এমনি বর্ষা-সন্ধ্যা, এমনি মেঘেভরা আকাশ—হাতীর পিঠে চড়ে আমীনের সঙ্গে সেই বেড়ানোটা। আমি জলে সাঁতার দিলাম। মনে হোল যেন আমি পৃথিবীর কেউ নই—আমি দেবতা—এই মুহূর্তে পাখা ছেড়ে এই মেঘ-ভরা আকাশ চিরে ওপারে বহুদূরে কোথায় উড়ে যাবো!

এমন আনন্দ সত্যিই অনেকদিন পাইনি।

এখনও সোঁদালি ফুল আছে—কিন্তু এবার অতিরিক্ত বর্ষায় অনেক অনিষ্ট করেছে—অনেক ফুলই ঝরে পড়ে গিয়েছে। সোঁদালিফুল এত ভালবাসি যে ঘাটে নাইবার সময় ঘাটের ধারে যে গাছগুলো আছে, সেদিকের ফুলের ঝাড়গুলোর দিকে চেয়ে থাকি—নইলে যেন প্রাণের আনন্দ সম্পূর্ণ হয় না। হু এক ঝাড় যা আছে, তাদেরও চেহারা বড় শ্রীহীন। কি করি, ওদের নিয়েই যা একটু আনন্দ পাই!...

আগের দিন জগন্নাথকে সঙ্গে নিয়ে বেলভাঙ্গার মাঠে গিয়েছিলাম। এ দিন বৃষ্টি ছিল না, সুন্দর মাঠ, ভৃগাবৃত সোঁদালিফুল এখনও গাছে গাছে খুব। দুটা রাখাল ছেলের সঙ্গে কতক্ষণ বসে গল্প করলাম, মাঠে ছুটাছুটা করে বেড়ালাম, নদীজলে সন্ধ্যায় নাইতে নেমে সাঁতার দিলাম খুব। মোড়টা ফিরতে কুঠীর পথে একটা বোপের মধ্যে একটা ডালে কি ফুল ফুটে আছে—বাল্যজীবনের কথা মনে করিয়ে দেয়—এক সময়ে এরাই ছিল সহচর, এদের সব চিনি।

রোজ খেয়ে উঠে মুখ ধোবার সময় খুড়ীমদের বাড়ীর পিছনে বাঁশতলার দিকে যাই। ঐ সময়টা বহু পুরাতন দিনের কথা মনে পড়ে যেন—পুরাতন বাল্য-দিনগুলি প্রতিদিন ঐ সময়টাতে ফিরে আসে।

এখনও গ্রীষ্মের ছুটা এবার শেষ হয়নি। পরশু পর্যন্ত আছে। কিন্তু খুলবার সময় হয়েছে। মনটা বড় খারাপ হয়ে আসছে। কত কথা যে মনে আসছে—কত গ্রীষ্মের ছুটা এ রকম করে কাটলো। অথচ দেশে তো আমার কেউ নেই—যখন ছিল সে ছিল আলাদা কথা।

এবার জ্যৈষ্ঠ মাসটা বড় বর্ষা। যখন বাঁশতলী গাছে আম পেকে টুকটুক করছে, তখন যুগল কাকাদের চারা বাগানে আম পাকছে—তখন বর্ষার আকাশ এমন ঘন মেঘাচ্ছন্ন, যেন শ্রাবণ মাস কি আষাঢ় মাস। যে সময়ে কলেজে পড়বার সময়ে আমি বেলভাঙ্গার পথের বটতলার শান্ত আশ্রয় ছেড়ে কল্কাতার

নিরাশ্রয়তার মধ্যে চলে আসতুম। খুব কষ্ট হ'ত। এবারে কিন্তু কত দিন পর্য্যন্ত আমি রইলাম! কি সুন্দর বর্ষাদৃশ্য এবার দেখলাম ইছামতীর চরে, ইছামতীর কালো জলের ওপরে! কি বড় বড় মেঘের ছায়া!... ঘাটের পথে খেজুর গাছটায় খেজুর এখনও বোধ হয় খুঁজলে দু'একটা পাওয়া যাবে।

ওদের নিয়ে রোজ পাঠশালা কর্তুম, খুকু sentence লিখতো, জগা ছড়া বলতো :—

এঁতল বেঁতল তামার তেঁতল

ধর্তো বেঁতল ধরো না—

কি মানে এর, ওই জানে—অথচ কি উৎসাহেই আবৃত্তি কর্তো!...শিবু ও সুরো ধনুক-বাণ নিয়ে যাত্রা কর্তে আসতো, খুকু কত রাত পর্য্যন্ত বসে আমার কাছে গল্প শুনতো,—জ্যোৎস্না উঠে যেতো তবুও সে বাড়ী যেতে চাইতো না। এক একদিন আবার দুপুরে এসে বলতো, গল্প বলুন। আসবার দিন বকুলতলায় বসে ওকে খাতা বেঁধে দিলাম, sentence কর্তে দিয়ে বলে এলাম এসে আবার দেখবো।

“মায়ের ভাঙা কড়াখানা উল্টে পড়ে গিয়েচে, ভিটেটাতে বড় বেশী জঙ্গল হয়েছে”—অপু যেমন বইতে লিখেচে।

কুঠীর মাঠে গিয়ে এক একদিন গাম্ছা পেতে শুয়ে থাকতুম খুব হাওয়া, বড় চমৎকার লাগতো। কিন্তু যখন ইছামতীর জলে নাইতে নামতুম সকালে ও বিকেলে—সেই সময়ই সকলের চেয়ে লাগতো ভালো। ও-পাড়ার ঘাটের সামনে সবুজ ঢালু ঘাস-ভরা মাঠ ও আকাবাঁকা শিমূল গাছটা যে কি অপূর্ব সৌন্দর্য্য ফুটিয়ে তুলতো চোখের সম্মুখে তা কাকে বলি, কে-ই বা বুঝবে? যখন আসি তখনও বৌ-কথা-ক ছিল, তখনও পাপিয়া, কোকিল ডাকতো, অথচ তখন তো আষাঢ় মাস পড়েই গিয়েছিল।

এবার এ-বাড়ী ও-বাড়ী এত নিমন্ত্রণ সবাই করে খাইয়েছে—কেন জানি না, অগ্ণবার এত নিমন্ত্রণ তো করে না।

দেবব্রতকে কত কাল দেখিনি—তার মুখ ভুলেই গিয়েচি—এতকাল পরে এইবার দেখবো।

সে দিন বনগাঁয়ে গেছলাম—সকালে খুকীর সঙ্গে পাকা রাস্তার সাঁকোয় কত খেলা কর্তুম। খুকী কত ফল তুললে, পাতা তুললে, আমিও কত ফল পেড়ে নিয়ে এসেছিলাম; খুকী রাঁধলে। খুকীর সঙ্গে ছেলেমানুষী খেলা

খেলে ভারী আনন্দ পাই।\* খুকী কিন্তু পড়াশুনো করে না এই, ওর দোষ।  
খুকু এর মত নয়, খুকু খুব বুদ্ধিমতী, পড়াশুনোয় খুব ঝাঁক।

বনগাঁয়ে সেদিন বোটের পুলে বিশ্বনাথ, দেবেন, সরোজ সবাই বসে গল্প  
কচ্ছিল, আমি যেতে অনেকক্ষণ বসে গল্প হোল, বিশ্বনাথ নিজের বাসায়  
নিয়ে গিয়ে খুব খাওয়ালে। রাত্রে এই দিন বন্ধুর বাসায় খাওয়ার পরে  
জ্যেৎস্নায় বেড়াতে বেড়াতে বনগাঁ স্কুলের ফটকে ঠেস্ দেওয়ানো বেক্টিটার  
ওপর গিয়ে বসলাম। কত কথা মনে আসে! চব্বিশ বছর আগে একজন  
বারো বছরের ক্ষুদ্র বালক একা বাড়ী থেকে ভক্তি হতে এসে ওই জায়গাটাতে  
লাজুক ভাবে চুপ করে বসে ছিল—কতকাল আগে! সেদিনে আর আজকার  
মধ্যে কত তফাৎ তাই ভাবি। হেড্‌মাষ্টার মশায়ের ঘরের সামনে বেড়িয়ে  
এলাম—বোর্ডিং-এর সব ঘরের সামনে বেড়ালাম। কিন্তু পর পর সেদিনের  
কথাটা মনে আস্ছিল—একটা ছোট ছেলে বর্ষায় জলা ও আষাঢ়-শ্রাবণের  
আউশ ধানের ক্ষেত ভেঙে এক-গা কাদা মেখে চাদর গায়ে, মায়ের কাছ  
থেকে ভক্তি হওয়ার সামান্য টাকা ও দুটী পয়সা জলখাবারের জন্তে বেঁধে  
এনে লাজুক মুখে চুপ করে ওই স্কুলের পৈঠার উপর বসে আছে—এমন  
মুখচোরা যে, কাউকে বলতে পার্চে না ভক্তি কোন্ ঘরে হয়, বা কাকে  
বলতে হবে?

সেই ছোট ছেলেটা চব্বিশ বছর আগেকার আমি—কিন্তু সে এত দূরের  
ছবি, যে আজ যেন তার ওপর অলক্ষিতে স্নেহ আসে।

ওঃ, এবার যেন ছুটীটা খুব দীর্ঘ মনে হচ্ছে, সেই কবেকার কথা স্মৃশীল  
বাবুর স্ত্রী বটতলায় ভাত রেঁধে আমাদের পরিবেশন করে খাইয়েছিলেন,  
আমরা কাঠ কুড়িয়েছিলাম, যুগল এসে দাঁড়িয়ে কথা কয়েছিল—সে কত  
দিনের কথা। তার পর গোপালনগরের বারোয়ারী, তুফন্ ঠাকুরণের  
বৃষোৎসর্গ শ্রাদ্ধ, সে সবও কতকালের কথা। বড় চারার আম কেনা, মাঠের  
চারায় আম কেনা, সে সবও আজকার কথা নয়। আঁচানোর সময়ে  
খুড়ীমাদের বাড়ীর পিছনে গাছপালা ও বাঁশবনের দৃশ্টি এত অদ্ভুত যেন  
একেবারে শৈশবে নিয়ে যায় এক মুহূর্তে।

\* খুকু এবং খুকী এক নয়,—খুকু থাকে বারাকপুরে, আর খুকী বনগাঁয়ে

জীবনের রূপ ও সৌন্দর্য্যে ডুবে গেলাম। হে ভগবান্! এর তুলনা দিতে পারিনে।

পঞ্চানন চক্রবর্তীর সঙ্গে আলাপ হোল, ইউনিভার্সিটির একটি brilliant ছেলে, রেবতীবাবুর বন্ধু। পথে আস্তে আস্তে অবনী ও শৈলেনবাবুর সঙ্গে দেখা। তারা মনোজের বাড়ী কাঁঠাল-খাবার নিমন্ত্রণ রক্ষা কর্তে চলেচে। বৃষ্টি আসচে দেখে আমি দৌড় দিলাম।

বাসায় এসে ঠিক কল্লূম এই ঘরটা আমি একলা নেবো। এ বৎসরটা খুব পড়বো, লিখবো, চিন্তা করবো। Prescott's Peru, Shackleton's Voyages ও Historiography-র ভাল বই এবার পড়তে হবে—যদিও Prescott আমার পড়া আছে, তবু আর একবার পড়বো। চিন্তায় যে নিৰ্জ্জনতা চাই, তা ঘরে একা না থাকলে হবে না। Crystallography সম্বন্ধে কিছু পড়তে হবে।

এ কয় মাস এই খাতাখানা হারিয়ে গেছিল। তাই মাস পাঁচেক ধরে এতে কিছু লেখা হয়নি। কিন্তু আশ্চর্য্যের বিষয় এই যে, খাতাখানা ছিল আমার বড় বাক্সটাতে, সে বাক্সটা কত বার খুঁজেচি খাতাখানার জন্তে, তবু সন্ধান পাইনি। আজ পালিতদের তারাপদ বাবু এলেন সন্ধ্যার সময়ে। তাঁদের সে ঠিকুজী-কুঞ্জীখানা আমার কাছে অনেক দিন পড়ে আছে, তাই ফিরিয়ে নিতে এলেন। বাক্স খুলে ঠিকুজীখানা খুঁজতে খুঁজতে এ খাতাখানাও বার হয়ে পড়ল।

ইতিমধ্যে—এই পাঁচ মাসের মধ্যে—আমার জীবনের অদ্ভুত পরিবর্তন হয়ে গেছে। সব দিক থেকে পরিবর্তন। জ্ঞান মারা গিয়েচে, গুর সংসার পড়েচে আমার ঘাড়ে, জীবন ছিল দায়িত্বহীন, অবাধ—এখন আমি পুরোদস্তুর ছাপোষা গেরস্ত মানুষ। বনগাঁয়ে বাসা করে গুদের সব সেখানে এনে রেখেচি। সেটা যখন আমার কর্তব্য, তখন তা আমায় কর্তেই হবে, স্বার্থপর হতে পারবো না কোনোদিন।

আরও পরিবর্তন হয়েছে। ক্লারিজ সাহেব চলে গিয়েচে, দেবব্রত চলে গিয়েচে। কোথায় গিয়েচে, বা দেবব্রতের কি হয়েছে তা আমি লিখবো না। কিন্তু আমার মনে যে ব্যথা এনেচে এতে—ভেবে দেখবারও অবকাশ পাইনে সব সময়। এক একবার গভীর রাত্রে মনে পড়ে, ঘুম আসে না চুপ করে

থাকি—অন্যমনস্ক হবার চেষ্টা করি—সে ব্যথা বড় সাংঘাতিক—যাক্, ওকথা আর লিখে কি হবে !

সেদিন শিবরাত্রি গেল। এই শিবরাত্রির সঙ্গে আমি সেদিন বসে বসে হিসেব করে দেখছিলাম যে, জীবনের কত সুখদুঃখের কাহিনীই না জড়িত রয়েছে ! মধ্যে একদিন এসেছিল বনগাঁয়ের হরবিলাস—নৃপেন রায়ের নতুন কাগজের জন্মে, (তার নাম আমি আজই করে এসেছি ‘উদয়ন’)—তাকে বল্লুম—তোমাদের বাসাটা আমায় দেবে ? আমি গভীর রাত্রে বসে বসে ভাবছিলাম, তা যদি হয়, ওরা যদি বাসাটা ছেড়ে দেয়—তা হ’লে সেখানে কি করে বাস করবো ? কত কথাই না মনে পড়বে ! মনে পড়বে আমি যখন বালক, কিছুই বুঝিনে—বনগাঁয় হেডমাষ্টার মশায়ের বেতের বিভীষিকায় দিনরাত কাঁটা হয়ে থাকি—সেই সব দিনের কথা। সেই এক শিবরাত্রি—কিন্তু না তার আগেও শিবরাত্রির কথা আমার মনের মধ্যে জাগ্রত আছে। ছেলেবেলায় হালিসহর থেকে সেই যে এসেছিলাম—ছোট মামা প্রভাতী গান কর্তৃক বৈষ্ণবদের সুরে—আমি শীতে কাপ্তে কাপ্তে নদী থেকে নেয়ে আসতুম—জীবনের সেই প্রথম শিবরাত্রি যার কথা মনে আছে। তারপর অবিশিষ্ট বনগাঁয়ের ঐ শিবরাত্রি। ওঁরা এসে বাইরের ঘর থেকে আমায় ডেকে নিয়ে গেলেন মস্ত পড়াতে—বেশ মনে আছে। তাই ভেবেছিলাম এতকাল পরে—জীবনের এত অন্তত পরিবর্তনের পরে আবার হরবিলাসদের বাসায় থাকবো কেমন করে ?

ছোট খুকী সম্প্রতি মারা গেছে। ও কেন এসেছিল তাই জানি না। আট মাস বেঁচেছিল—কিন্তু এত দুঃখ পেয়ে গেল এই অল্পদিনের মধ্যে তা আর কাকে বলি ? ও আপন মনে হাসতো—কিন্তু সবাই বলতো “আহা কি হাসেন, আর হাসতে হবে না, কে তোমার হাসি দেখে ?”—ওর অপরাধ—ও জন্মাবার পর ওর বাবা মারা গেল। সত্যিই ওর হাসি কেউ চাইত না। ওর বাবা তো মারা গেল ; ওর মারও সফটাপন্ন অসুখ হোল—ওকে কেউ দেখতো না—ওর খুড়ীমা বললে—টাকা পাই তো ওকে মাইয়ের দুধ দি। ওকে নারকোল তলায় চট পেতে শুইয়ে রাখতো উঠানে—আমার কষ্ট হোত—কিন্তু আমি কি করবো ? আমি তো আর স্তম্ভদুঃখ দিতে পারিনে ? ওর রিকোর্টস হোল। দিন দিন শীর্ণ হয়ে গেল—তবুও মাঝে মাঝে বনগাঁয়ের বাসায়



বাইরের দালানে শুয়ে সেই অকারণ অর্থহীন হাসি হাসতো—সেদিনও তেমনি হাসতে দেখে এসেছি—ও শনিবারে যখন বাড়ী থেকে আসি। Unwanted Smile! কিন্তু সে হাসি কোথায় অদৃশ্য হয়ে গিয়েচে গত মঙ্গলবার থেকে—- খয়রামারির মাঠে ওর বালিশটা পড়ে আছে সেদিন দেখেছি—এ ছাড়া আর কোনো চিহ্ন কোথাও রেখে যায়নি ও। Poor little Mite! কিন্তু আমি বলি ও হাসি শাস্ত,—এই বসন্তে বনে বনে ঘেঁটুফুলের দলে ফুটেচে, ফুলে ফুলে কত কাল ধরে ফুটে আসচে—কালের মধ্যে দিয়ে ওর জীবনধারা অপ্রতিহত, প্রতিদ্বন্দ্বিহীন ও নিত্য—খুকীর হাসিও তেমনি।

পার্ক পার্কাস থেকে ট্রামে আসতে আসতে তারাভরা নৈশ আকাশের দিকে চেয়ে চেয়ে আমার মনে এসত্য জেগেচে—এই ঘূর্ণ্যমান, বিশাল নাক্ষত্রিক জগৎ, এই সৃষ্টিমুখী নৌহারিকার প্রজলন্ত বাষ্পপুঞ্জের রাশি—এই অনাদ্যন্ত মহাকাল—এরা যেমন নিত্য, যতটুকু নিত্য, যে অর্থে নিত্য, তার চেয়ে কোনো অংশে কম নিত্য নয় আমার অবোধ, অসহায়, রোগশীর্ণ খুকীর দন্তহীন কচিমুখের অনাদৃত, অপ্রার্থিত, অর্থহীন, অকারণ হাসিটুকু। বরং আমি বলছি তা আরও বড়—এই বিশ্বের কোথাও যেন এমন একটা বিপুল ও সুপ্রতিষ্ঠা অধ্যাত্মনীতি আছে, উদীয়মান সবিতার রক্তরাগের মত তা অন্ধকারের মধ্যে আলোর সঞ্চার করে, জড়ের মধ্যে প্রাণের স্পন্দন জাগায়, সকল সৃষ্টিকে অর্থযুক্ত করে—এইজন্ম অর্থযুক্ত করে যে, যে গৌরবে সৃষ্টির সৌন্দর্য্য রূপ পেয়েচে, মহিমময় হয়েছে—সেই বর্ণ সবিতার দান, আদিম অন্ধকারে অবগুষ্ঠিতা বস্তুঙ্করার মুখের আবরণ অপসারিত করেছেন সবিতা তাঁর আলোর অঙ্গুলির স্পর্শে—তাকে সার্থক করেছেন, জাগ্রত করেছেন, মাটির মূর্তিতে প্রাণপ্রতিষ্ঠা তাঁরই তেজোময় মস্ত্রে।

খুকীর হাসি সবিতার ওই অমৃতজ্যোতির মত, তা মৃত্যুঞ্জয়ী, তা বিশ্বের জড়পিণ্ডে প্রাণের সঞ্চার করে, বিপুল সৃষ্টিকে অর্থযুক্ত করে, গৌরবময় করে।

তা মিথ্যা নয়, অনিত্য নয়,—তা শাস্ত, তা অমৃত। এবং তা সম্ভব হয়েছে সৃষ্টির ওই অধ্যাত্মনীতি আইনে—ও নীতি অমোঘ—ওর শক্তি ও ওর সত্য অস্তিত্ব অন্তরতম অন্তরে অনুভব কর্তে পারি—কিন্তু ভাষায় বোঝানো যায় না।

\* বেলা পড়ে এসেচে। রাঙা রোদ দূরের পাহাড়ের মাথায়, শালবনে, রাঙামাটির টিলার গায়ে। চারিধার কত নিঃশব্দ—আকাশ কেমন নীল—অনেকদিন এমন মনের আনন্দ পাইনি—কল্কাতার মুমূর্ষু নিস্তেজ মন কাল সারা রাত ও আজ সারাদিনের মাঝে বহু-সৌন্দর্য্য দেখে, প্রথম বসন্তে ফুটন্ত পলাশ বনের ও ধাতুক ফুলের প্রাণবন্ত রূপ দেখে—ইব্‌ স্টেশনের অরণ্য-নদী-পর্বত সমাচ্ছন্ন বিরাট পটভূমির দৃশ্যে একমুহূর্তে তাজা হয়ে উঠল—কি ঘন শাল পলাশের বন—কি সুন্দর জনহীন প্রান্তর, দূরে দূরে নির্জন পর্বতমালা—মন অভিভূত হয়ে পড়ে কিন্তু হৃদয়ের অভ্যন্তরে মাথা সতেজ হয়ে ওঠে। রোদ কি অপূর্ব রাঙা হয়ে এসেচে—স্টেশনের পাশের পথটা দিয়ে সোমড়ার হাট থেকে সাঁওতালী মেয়েরা হাট করে ঝুড়ি মাথায় নিয়ে যাচ্ছে। হাটটায় এইমাত্র আমি, প্রমোদবাবু ও কিরণবাবু বেড়াতে গিয়েছিলাম—বেগুন, রেড়ির বীজ, কচি ইঁচড়, চিংড়ি, কুমড়া, খই, মুড়ি বিক্রি করচে। এক জায়গায় একটা সাঁওতালী যুবতী ধান দিয়ে মুড়কি নিচ্ছে। এই হাটের সামনে একটা প্রাকৃতিক জলাশয়ে আমরা স্নান কর্লুম। ভারী আনন্দ পেয়েছি আজ—ভাগলপুর ছেড়ে আসবার পূর্বে এত আনন্দ সত্যই অনেককাল পাইনি।

রোদের রাঙা রং অতি অপূর্ব!

ডাকবাংলা থেকে লোক জিজ্ঞেস কর্তে এসেচে আমরা রাত্রে কি খাবো।

† সকালে আমরা রওনা হলাম। পথে কি সুন্দর একটা পাহাড়ী ঝরণা। সির সির করে পাহাড়ী নদী বয়ে চলেচে। কতকগুলি লোক একটা কাঠের পুলের ওপর খড় বিছিয়ে দিচ্ছে। তারা বলে পাটোয়ারীর ছেলে এপথে চলে গিয়েচে। পাহাড়ী করবীর দল জলের ধারে ফুটে রয়েছে। শান্ত শাল পলাশের বনের ছায়া। এখানে সবাই উড়িয়া বুলি বল্চে। এমন ভাল লাগে!

নীল আকাশের তলে অফুরন্ত বাঁশের জঙ্গল। শাল পলাশের বন রোদ ক্রমে হলে হয়ে আস্চে। ত্রিশোলা থেকে গভীর অরণ্যের মধ্যে দিয়ে ৭৮ মাইল পথ হেঁটে দুপুরে বিক্রমখোলে পৌঁছলাম। বিক্রমখোলের

গায়ে প্রাগৈতিহাসিক যুগের পাথরে উৎকীর্ণ লিপি আবিষ্কৃত হয়েছে—তাই দেখবার জন্ম আমরা এখানে এসেছি। লেখাটা ভারী চমৎকার জায়গায়—একটা Limestone-crag-এর নীচে ছায়াভরা জায়গায় প্রাকৃতিক ছোট একটা গুহা মত—তারই গায়ে লেখাটা। চারিধারের বন যেমন গভীর তেমনি সুন্দর—পথের মধ্যে জঙ্গলে কত ধরণের গাছ। আমলকী ও হরিতকীর বন—আমরা আমলকী ফল কুড়িয়ে খেতে খেতে এলাম। গ্রিগোলা গাঁয়ের পাটোয়ারী আমাদের জন্মে মুড়কী ও দুধ নিয়ে এল। উড়িয়ার এই গভীর জঙ্গলে সেই প্রাগৈতিহাসিক যুগের শিলালিপি ভারতবর্ষের ঐতিহাসিক বিশেষজ্ঞদের দৃষ্টি আকৃষ্ট করেছে।

জায়গাটা অতীব গভীর অরণ্যময়—কি অপূর্ব নীল আকাশ অরণ্যের মাথায়—কি অপূর্ব নিস্তরুতা...পাহাড়ের crag, তার ছায়ায় আমরা কতক্ষণ বসে রইলাম—ছেড়ে যেতে আর ইচ্ছে করে না—ইচ্ছে হয় না যে আর বেলপাহাড়ে ফিরি। আবার গাড়ীতে উঠি। আবার কল্কাতায় যাই।

গ্রিগোলা নামে একটা গাঁ পাহাড়ের পাদদেশে—এইখান দিয়ে বিক্রমখোল যেতে হয়। আমরা বেলা দশটার সময় এখানে পৌঁছলাম। একটু পরেই পাটোয়ারী গাড়ী করে এল। গাঁয়ের ‘গাঁউঠিয়া’ অর্থাৎ গ্রাম-প্রধানের নাম বিশ্বাধর—সে তাড়াতাড়ি আমাদের জন্মে দুধ ও মুড়কী নিয়ে এল খাবার জন্মে। একটু বিশ্রাম করে আমরা বিক্রমখোল রওনা হলাম—দেখাশুনো করে ফিরে আবার গাঁয়েই এলাম। ওবেলাকার নাচের দল নাচ দেখালে। আমরা একটা ফটো নিলাম। আমাদের কোনো অদৃষ্টপূর্ব জীব ভেবে এখানকার লোকেরা ঝুঁকে পড়েচে—দলে দলে এসে আমাদের চারিপাশে দাঁড়িয়েচে। প্রমোদবাবু মুখে সাবান মেখে দাঁড়ি কামাচ্ছেন—এরা অবাক হয়ে চেয়ে আছে—এ দৃশ্য আর কখনও দেখেনি বোধহয়। ফটোগ্রাফ নেবার স্তবিধের জন্মে নাচ হোল পথের ওপর—ঝম্ ঝম্ করচে রোদ—নাচওয়ালীদের মুখের ওপর বড় রোদ্দুর পড়েচে দেখে আমি পরিমল বাবুকে তাড়াতাড়ি snapটা সেরে নিতে বল্লুম।

নাচ গান শেষ হোল। প্রমোদবাবু, পরিমলবাবু ও কিরণ হেঁটে রওনা হলেন বেলপাহাড়ে। আমার পায়ে ফোঁকা পড়েচে বলে হাঁটতে পারা গেল না। গরুর গাড়ীতে গুঁদের জিনিসপত্র নিয়ে আমি ঘণ্টাখানেক পরে রওনা হলাম।

বেলা পড়ে গিয়েচে। বিশ্বাধর অনেকদূর পর্য্যন্ত আমার গাড়ীর সঙ্গে সঙ্গে এল। পথের পাশের আমতলায় সেই নাচের দল বেঁধে খাচ্ছে। সেই দাড়িওয়াল! বুদ্ধটা ভাত খাচ্ছে শালপাতায়। পাশে অদ্ভুত গড়নের কাঁসার বাটীতে কি তরকারী।

গ্রাম পার হলুম। দুধারে শালবন, মাঠ, চারিধারে শিলাখণ্ড ছড়ানো। রোদ-পোড়া মাটির স্বগন্ধ ভাগলপুরের কথা মনে করিয়ে দেয়। ভাগলপুর নয়—ইসমাইলপুরের জঙ্গলের কথা। মুক্ত অরণ্যাণী চারিধারে—নিঃশাস চাপা বন নয়—উচ্চাবচ প্রান্তর ও শালবন, দুধারেই উঁচু পাহাড়—গিরিসান্ন অরণ্যে আবৃত। একটু পরেই ঠাণ্ডা উঠল—নবমীর জ্যোৎস্না। শালবনের রূপ বদলে গেল—পাহাড়শ্রেণী রহস্যময় হয়ে উঠল—কি সুন্দর হাওয়া! কি মাটির স্বগন্ধ! অনেকদিন কলকাতা শহরে আবদ্ধ থাকার পরে এই শালবনের হাওয়া ও বিরাট Space-এর Senseটা যেন আমায় নবজীবন দান করেছে। সুবিধে ছিল ওরা সবাই অনেক আগে চলে গিয়েচে—আমার গাড়ীতে আমি একা। তাই বসে নিরিবিলা ভাববার যথেষ্ট সময় পেয়েছিলাম—ওরা সঙ্গে থাকলে কেবল বক্ বক্ গল্প হোত।

চাদের জ্যোৎস্না আরও উজ্জ্বলতর হোল। কি নির্জন চারিদিক! বাম দিকের পাহাড়শ্রেণীর মাথায় সেই দুটো নক্ষত্র উঠেচে—যা আমি পার্ক সার্কাসে যাবার সময় রোজ সন্ধ্যাবেলা দেখি। চোখ বুজে কল্পনা করবার চেষ্টা কর্লুম কোথায় পার্কসার্কাস, আর কোথায় এই মহিমময় মুক্ত অরণ্যভূমি, পাহাড়শ্রেণী, প্রান্তর, বাঁশবন, ঝর্ণা—উড়িয়ার এই সৌন্দর্য্যময় প্রত্যন্তদেশ।... আমি অবাক হয়ে গেলাম, মুগ্ধ হয়ে গেলাম—ঘণ্টা দুই চলবার পর আমি যেন একেবারে এই অপাখিব জ্যোৎস্নার জগতে, এই অজানা অঞ্চলের ততোধিক অজানা পাহাড় ও অরণ্যাণীর মায়ায় আত্মহারা হয়ে ডুবে গেলাম—এত কথাও মনে আসে এই সব জায়গায়। আমি ভেবে দেখলাম মন এ সব স্থানে এলে অল্প রকম হয়ে যায়। কলকাতায় এ সব চিন্তা মনে আসে না—এখানে এই দু-ঘণ্টার নির্জন ভ্রমণে যা মনে এল। জীবনে এমন একটা দিন আসবে, যখন আমাকে এই রকম নির্জন স্থানে একা বাস কর্তেই হবে, নৈলে আমার মনের গোপন গভীরতম দেশে কি সব কথা আছে আমি নিজেই বুঝতে পারবো না।

ভারতবর্ষের রূপটাও যেন নতুন করে বুঝতে পারলাম। ভেবে

দেখলাম—আর্যাবর্তের সমতলভূমি বাদে ভারতের সবটাই এই ধরণের ভূমি। B. N. R.-ই দেখে না কেন—সেই খড়াপুর থেকে আরম্ভ হয়েছে রাঙামাটি, পাহাড় ও শালবন—আর বরাবর চলেচে এই চারশ' মাইল—এর পরও চলেচে আরও চারশ' মাইল—চারশ' মাইল কেন, আরও আটশ' মাইল বসে পর্যাস্ত। অরণ্যের দৃশ্য সেখানে যেতে আরও গম্ভীর—সহাদ্রির মহিমময় ঘাটশ্রেণীর অপকৃপ দৃশ্যের তুলনা কোথায়? ওদিকে মহীশূর, নীলগিরি—মালাবার উপকূলের ট্রপিক্যাল ফরেস্ট—আর্যাবর্তের সমতলভূমি পার হয়েছে অতুলনীয় হিমালয়, Alpine meadows, ভারতের প্রকৃত রূপই এই—এই রাঙামাটি, পাহাড়, শালবন—এই আসল ভারতবর্ষের রূপ। বাংলার সমতলভূমিতে সারা জীবন কাটিয়ে আমরা ভারতের প্রকৃত রূপটা ধর্মে পারিনে। অবশ্য বাংলার রূপ অল্প রকম, বাংলা কমনীয়, শ্যামল, ছায়াভরা। সেখানে সবই যেন মুছ ও সুকুমার—গাছপালা থেকে নারী পর্যাস্ত। এ সব দেশের মত রক্ষণভাব ওখানে তো নেই!

মাথার ওপরে তারাভরা আকাশ। কি জল্জলে নক্ষত্রগুলো—যেন হীরের টুকরোর মত জল্চে!...বিরাট—বিরাট—প্রকৃতি এখানে শিবমূর্তি ধরেচে। কমনীয় নয়, সূষ্ঠ নয়, কিন্তু উদার, মহিমময়, বিরাট। বিরাট is the term for it.

হঠাৎ খুকীটার কথা মনে পড়ে গেল। ওর সেই অবোধ, অনাদৃত হাসিটুকুর কথা মনে পড়ল। এই বিরাট প্রকৃতি, ওই নক্ষত্রজগত, বিশাল উদার Space-এর মধ্যে ওর স্থান কোথায়? মরে সে কোথায় গেল? তার ক্ষুদ্র জীবনীশক্তি নিয়ে ও কি এদের বিরুদ্ধে দাঁড়াতে পার্ত! Poor mite, what chance had she—a helpless thing?

কিন্তু বনের ওই হৃদে তিলের ফুলের থোকা—প্রথম বসন্তে যা থোকা থোকা ফুটেচে—তা দেখলে মনে আশা জাগে। আমি বলতে পারি—এই বিরাটতার সঙ্গে মঙ্গল মিশে আছে, এই মহিমময় সঙ্ঘায় আত্মার সত্যদৃষ্টি খুলে যায়। বুদ্ধি দিয়ে সে জিনিস বোঝা যায় না, তর্কযুক্তির পথে তা ধরা দেয় না—তা প্রাণের মধ্যে আপনা আপনি ফুটে ওঠে, নির্জ্ঞান ধ্যানের মধ্যে দিয়ে—অপূর্ব আনন্দের মধ্যে দিয়ে। মুখে বলে সে সব বোঝানো কি যায়?

ফিরে দেখি ডাকবাংলোতে ওরা আসেনি। আমি একাই অনেকক্ষণ

বসে রইলাম। সামনে চাঁদ উঠেচে নক্ষত্র জল্চে। অনেকক্ষণ পরে ওরা এল। বন্ধে ষ্টেশনের কাছে একটা হায়েনা মেরেচে। আমি একটা শালপাতার পিকা আনিয়ে খেলাম।

সারারাত্রি আমরা গল্প করে জাগলাম। শেষ রাত্রে আমি কয়েকবার উঠে এসে এসে বাইরে দাঁড়িলাম—চাঁদ দূরে পাহাড়ের মাথায় অস্ত গেল। রাঙা হয়ে গেল চাঁদটা—অদ্ভুত দেখতে হয়েছে!...

অনেক রাত্রে আমরা ষ্টেশনে এলাম। বেজায় শীত। ভোরবেলার দিকে ট্রেনটা এল। রাতে কি কষ্ট—মালের বস্তার ওপর বসে বসে ঢুলছিলাম—পরিমল বাবুকে জায়গাটা ছেড়ে দিলাম।

ভোর হোল কুলুঙ্গা ষ্টেশনে। কি অপূর্ব পর্বতের ও জঙ্গলের দৃশ্য। এমন Wilderness আমি খুব কমই দেখেছি। যে ষ্টেশনে আসি—সেইটাই মনে হয় আগেকার চেয়ে ভাল। নোটবুকে বসে বসে নোট করি, কি কি সেখানে আছে। গৌইলকেরা ষ্টেশনটা বড় সুন্দর লাগল। শাল জঙ্গল, পাহাড়, স্থানটাও অতি নির্জন। বাংলাদেশের কাছে যত আসি ততই সমতল প্রান্তর বেশী। খড়গপুরের ওদিকে কলাইকুণ্ডা জায়গাটা এ হিসাবে বেশ ভাল।

বাংলাদেশে গাড়ী ঢুকল। তখন বেলা একেবারে চলে গেছে। এ আর এক রূপ, অতি কমনীয়, শান্ত শ্রামল। চোখ জুড়িয়ে যায়, মন শান্ত হয় কিন্তু এর মধ্যে বিরাটত্ব নেই, majesty নেই—হৃদয় মন বিস্ফারিত হয় না, কল্পনা উদ্দাম হয়ে উঠে অসীমতার দিকে ছুটে চলে না। এতে মনে তৃপ্তি আসে—ছোটখাটো ঘরোয়া স্মৃতি ছুঁখের কথা ভাবায়, নানা পুরাণো স্মৃতি জাগিয়ে তোলে—মানুষ যা নিয়ে ঘরকন্না কর্তে চায় তার সব উপকরণ জোগায়। হাসি অশ্রু মাখানো লজ্জানতা পল্লীবধূটা যেন—তার সবই মিষ্টি, কমনীয়। কিন্তু মানুষের মন এ ছাড়া আরও কিছু চায়, আরও উদ্দাম, অশান্ত, রুক্ষ, রুদ্ধ ভাব চায়। বাংলাদেশে তা যেন ঠিক মেলে না। হিমালয়ের কথা বাদ দি—সেটা বাংলার নিজস্ব একচেটে জিনিস নয়—আর তার সঙ্গে সত্যিকার বাংলার সম্বন্ধই বা কি? পদ্মা?...সেও অপূর্ব, সন্দেহ নেই—কিন্তু সে আদরে পালিতা ধনীবধূ, একগুঁয়ে, তেজস্বিনী, শক্তিশালিনী, যা খুশি করে, কেউ আটকাতে পারে না—সবাই ভয় করে চলে—খামখেয়ালী—রূপবতী—তবে মিষ্টি নয়—high-bred রূপ ও চালচলন। ঘরকন্না পাতিয়ে নিয়ে থাকবার পক্ষে তত উপযোগী নয়।

কল্কাতা ফিরে পরদিনই নীরদবাবুর বাড়ীতে চায়ের নিমন্ত্রণ হোল সঙ্কায়। আমার আবার একটু দেরী হয়ে গেল। স্মৃশীলবাবু মাঝের দিন আমার বাসায় এসেছিলেন—বঙ্গশ্রী আপিসে আমায় Phone করেছিলেন—যাবার সময় পার্কসার্কাস থেকে গুর বাসা হয়ে গেলাম। সতীশের সঙ্গে একটা আফিমের দোকানে আজ আবার দেখা হোল। ক’দিন ধরেই উড়িষ্যা ও মানভূমের সেই স্বপ্নরাজ্য মনে পড়চে—বিশেষ করে মনে পড়চে আসানবলী ও টাটানগরের মধ্যবর্তী সেই বনটা—যেখানে বড় বড় পাথরের টাই-এর মধ্যে শালের জঙ্গল—পত্রহীন দীর্ঘ গাছগুলিতে হলুদে কি ফুল ফুটে আছে—কেবলই ভাব্চি ওইখানে যদি একটা বাংলো বেঁধে বাস করা যায়—ওই নির্জন মাঠ বন, অরণ্যাগীর মধ্যে।

অপরাজ্কে ও জ্যোৎস্নাময়ী রাত্রিতে তাদের রূপ ভাব্লেও মন অবশ হয়ে যায়।

সকালে উঠে দীনেশ সেনের বাড়ীতে এক বোঝা পরীক্ষার কাগজ পেশ করে এলুম! সারা পথে মুচুকুন্দ টাপার এক অদ্ভুত গন্ধ! বিজয় মল্লিকের বাগানে একটা গাছে কেমন থোকা থোকা কাঁচা সোনার রং-এর ফুল ধরেচে। বড় লোভ হোল—ট্রাম থেকে নেমে বাগানের ফটকের কাছে গিয়ে দারোয়ানকে বল্লাম—ঐ গাছতলাটায় একবার যেতে পারি? সে বল্লে—নেহি। সংক্ষেপে বল্লে;—আমায় সে মানুষ বোলেই মনে কল্পে’না। আবার বল্লাম—হু একটা ফুল নিয়ে আস্তে পারিনে? তলায় তো কত পড়ে আছে। সে এবার অত্যন্ত Contemptuous ভাবে আমার দিকে চেয়ে পুনরায় সংক্ষেপে বল্লে—নেহি।

ভালো, নেহি তো নেহি—গড়ের মাঠে খিদিরপুর রোডের ধারে অনেক মুচুকুন্দ ফুলের গাছ আছে, ট্রামে আসবার সময় দেখে এসেচি, সেখান থেকে কুড়িয়ে নেবো এখন।

তারপর এলাম নীরদবাবুর বাড়ী। সেখানে খানিকটা গল্পগুজ্ব করে গেলাম শ্যামাপ্রসাদ বাবুর বাড়ী। পাশের বৈঠকখানায় রমাপ্রসাদ বাবু আছেন দেখ্লাম—শ্যামাপ্রসাদ বাবুও তাঁর লাইব্রেরী ঘরে কি কাজ কর্ছিলেন। সেখানে খানিকটা থাক্বার পরে বাসায় ফিরলাম।

বৈকাল বেলা। আজ রামনবমী। কতদিনের কথা মনে পড়ে। বৈকালে বসে বসে তাই ভাব্ছিলাম—বেলা পড়ে এসেচে—কত পাপিয়ার ডাকভরা

এই সময়ের সেই পুরাতন দুপুরগুলো।...বাঁশের শুকনা পাতার কথা কেন এত মনে হয়, তা বুঝতে পারিনে। স্মৃত্যুকে কাল যখন পত্র লিখলুম—তখনও বাঁশবনের কথা ও শুকনো পাতার রাশির কথাই মনে এল। পাপিয়ার গানের কথা বিশেষ করে মনে আছে। এই সব দিনের অতীত দুপুরগুলোর সঙ্গে পাপিয়ার গান জড়ানো আছে, আর জড়ানো আছে অদ্ভুত ধরণের wild আনন্দ!...

বেলা পড়ে এসেছে। গৌসাইপাড়ার নারকোলতলায় আজও তেমনি মেলা বসেছে, অতীত দিনের মত। বাদা ময়রা মুড়কী ও কদ্দমা বিক্রী করছে, গোপালনগর থেকে হয়তো যুগল ও হাজরা ময়রা তাদের তেলে-ভাজা জিবে গজা ও জিলিপীর দোকান নিয়ে এসেছে।

বাবার সেই শ্লোকটা—অনেক কালের সেই আমবনের ছায়ায় উচ্চারিত শ্লোকটা আজও আমার মনে আছে। পুরাণো খাতাখানা আজও আছে, নষ্ট হয়নি।

সকালবেলা। নেড়াদের ছাদে বসে লিখছি। গ্রীষ্মের ছুটিতে গ্রামে এসেছি।

বাস্তুবিকই গ্রামের লোকের সংকীর্ণতা এত বেশী—মনকে বড় পীড়া দেয়। এদের মন চারিধার থেকে শৃঙ্খলিত—খুলবার অবকাশ নেই। আবালবৃদ্ধ-বণিতার এই দশা দেখছি। এদের আচার শুষ্ক ও সৌন্দর্য্যবর্জিত—স্বাস্থ্যনীতির সঙ্গে এদের কোনো সম্পর্ক নেই।

কাল বিকেলে নদীর ধারে গিয়ে অনেকক্ষণ একলা বসে ছিলাম। বাংলা দেশের, বিশেষ করে আমাদের অঞ্চলের প্রকৃতির এই যে সৌন্দর্য্য—এ অল্প ধরণের। কিছুদিন আগে আমি উড়িষ্যায় গিয়ে সেখানকার বন পাহাড়ের সৌন্দর্য্যের কথা যা লিখেছিলাম—এখানে বসে মনে বিচার করে দেখে আমি বুঝলাম তার অনেক কথা আমি ভুল লিখেছিলাম। বাংলার সৌন্দর্য্য more tropical—এখানে অল্প একটু স্থানের মধ্যে যত বিভিন্ন শ্রেণীর গাছপালা ও লতা আছে—ওসব দিকে তা নেই। এখানে বৈচিত্র্য বেশী। নীল আকাশ ওখানেও খোলে—মনে অগ্ররকম ভাব আনে, তা মহনীয়, বিরাট—এ কথা ঠিকই। কিন্তু বাংলার আকাশ—বিশেষ করে পল্লী অঞ্চলের কি গ্রাম্য নদীর উপরকার যে আকাশ—তার সৌন্দর্য্য মনে অপূর্ব্ব শিল্পরসের সৃষ্টি করে—মনে



বৈচিত্র্য আনে। হয়তো বিরাটতা নেই, ঠিকই—কিন্তু Poetry of Life এতে যেন বেশী। বাঁশগাছে ও শিমূলগাছে এ দেশের, বিশেষ করে আমাদের এই অঞ্চলের, সৌন্দর্য্যকে এক অভিনব রূপ দিয়েছে। জ্যেষ্ঠ মাসে এর সঙ্গে গ্রামে জোটে কচি উলুবন ও আউশ ধানের ক্ষেত। এত সবুজের সমাবেশ আর কোথাও দেখিনি—a feast of green—তবে গ্রামের মধ্যে মুক্ত আকাশ বড় একটা দেখা যায় না,—ওই একটা দোষ। বড় চাপা। কিন্তু মাঠে, নদীর ধারে—মুক্তরূপা প্রকৃতি যেমন লীলাময়ী তেমনি রূপসী। উদার প্রান্তর, উদার আকাশ—নানা বর্ণের মেঘের মেলা অস্তদিগন্তে, সন্ধ্যার কিছু পূর্বে মেঘ-চাপা গোখুলির আলোয় গাছে, পালায়, শিমূল গাছের মাথায়, নদীজলে, উলুখড়ের মাঠে কি যে শোভা!...

একথা জোর করে বলতে পারি বিক্রমখালের পাহাড় ও বনের ওপারে যে আকাশ দেখেছিলাম—মাধবপুরের চরের ওপারের বৈকালের আকাশ তার চেয়ে মনে অনেক বেশী বিচিত্র ভাবের সৃষ্টি করে।

এইমাত্র নাগপুর শহরের চতুর্দিকবর্তী মালভূমিতে মোটরে বেড়িয়ে ফিরে এলাম। একথা ঠিকই যে বাংলায় রূপ যতই সুন্দর হোক, বিরাটতায় ও গভীর মহিমায় এসব দেশের কাছে তা লাগে না। উড়িষ্কার বন পাহাড়ের সৌন্দর্য্যের চেয়েও এর সৌন্দর্য্য বিরাট ও majestic। বাংলা দেশের রূপ নিতান্তই নিরীহ পল্লীবধুর মত লাভণ্যময়ী, লাজুক টিপপরা ছোট মুখটী। কিন্তু এদেশের highland—এর রূপ গর্বদৃশ্য সুন্দরী রাজরাণীর মত।

“Pure Logical thinking can give us no knowledge whatever of the world of experience. The knowledge of Reality begins with experience and terminates with it. Reason gives the structure to the system and the data of experience and their mental relations are to correspond exactly with the consequences in the theory.”

Einstein,

Herbert Spencer Lecture, Oxford, 1933.

Lucian's Satires,

Celsas (178 A.D.) writes :—

“Christians are like a council of frogs in a marsh. Their teachers are mainly weavers and cobblers, who have no power over men of education and taste. The qualification for conversion are ignorance, and childish timidity. Like all quacks they gather a crowd of slaves, children, women and idlers.”

Seneca—Economy,

“He is born to serve but few, who thinks only the people of his own age. Many thousands of years, many generations of men are yet to come: look to these, though from some cause silence has been imposed on all of your own day; then will come those who may judge without offence and without favour.”

[ আমি ‘অপরাজিত’-র এক স্থানে অবিকল এই ভাবই ব্যক্ত করেছি। অনেক পূর্বেই করেছি—তখন তো আমি সেনেকার এ উক্তি গুলি পড়িনি—কিন্তু কি চমৎকার মিল আছে! ]

অনেকদিন লিখিনি, মনেও ছিল না। হঠাৎ আজ মনে হোল তাই সামান্য এতটুকু লিখে রাখলাম। আজকার তারিখটা অন্ততঃ খাতায় থাকুক।

আজ বৈকালে নাগপুর এসে পৌঁছেছি। এবার পূজোয় এখানেই আসবো ঠিক করে রেখেছিলাম। আজ সারাদিন গাড়ীর ঝাঁকুনিতে বড় কষ্ট হয়েছে। গত মাসকয়েক আগে যে বেল পাহাড়ে এসেছিলাম সে স্টেশনটা আজ রাতে—শেষ রাতে বেরিয়ে চলে গেছে, দেখতে পাইনি। বিলাসপুর পর্যন্ত তো বেশ এলাম। বিলাসপুর স্টেশনে আমরা চা খেলাম। বিলাসপুর ছাড়িয়ে নাগপুর পর্যন্ত প্রায় একই একঘেয়ে দৃশ্য—সীমাহীন সমতলভূমি এক চক্রবালরেখা থেকে অল্প চক্রবালে পর্যন্ত বিস্তৃত। দৃশ্য বড় একঘেয়ে, প্রায়ই

ধানের ক্ষেত ও জলাভূমি—মাঝে মাঝে ছোট ছোট শালবন। রাঙামাটিও সব জায়গায় নেই। বেলপাহাড়ের মত পাহাড় ও জঙ্গল এ পথে কোথাও নেই—এক ডোঙ্গরগড় ছাড়া। ডোঙ্গরগড় ছাড়িয়ে তিন চারটা স্টেশন পর্যন্ত দৃশ্য ঠিক আমি যা চাই তাই। উভয় পাশে ঘন অরণ্য, শাল, খয়ের ও বগুবাঁশ, মাঝে মাঝে পাহাড়ী নদী, পর্বতমালা। উড়িষ্কার বনের চেয়েও এ বন অধিকতর গভীর কিন্তু এইটুকু যা, তারপর আবার সেই একঘেয়ে সমতলভূমি—নাগপুর পর্যন্ত। বাংলাদেশে এত অনন্তপ্রসারী দিক্ চক্রবালদেশের কল্পনাও করতে পারা যায় না।

এই সব স্থান জ্যোৎস্নারাত্রে ও অল্পরাত্রে যে অদ্ভুত দেখতে হবে তা বুঝতে পারলাম—তবু মনে হোল বনভূমির বৈচিত্র্য ও সৌন্দর্য যা বাংলাদেশে আছে, তা এ সব অঞ্চলে নেই। বাংলার সে কমনীয় আপন ভোলানো রূপ এদের কৈ? এখানকার যা রূপ তা বড় বেশী রুক্ষ। অবশ্য ডোঙ্গরগড় স্টেশন ছাড়িয়েই যে পাহাড় পড়ে—এমন অনাবৃত শিলাস্তূপ, অত গম্ভীর-দর্শন উন্নতভূমি বাংলার কোথাও নেই একথা ঠিক—কিন্তু বাংলায় যা আছে, এখানকার লোকে তা কল্পনাও করতে পারবে না।

বৈকালে নাগপুরে কোতোয়াল সাহেবের বাংলোয় এসে উঠলাম। তারপর চা খেয়ে আমি ও প্রমোদ বাবু বেড়াতে বেরলাম। শহরের উত্তর পশ্চিম প্রান্তে একটা বড় পাহাড় আছে, শালবনে আবৃত, নীচে দিয়ে মোটরের পথ আছে। দুজনে সেখানে একটা শিলাখণ্ডের ওপর গিয়ে বসলাম। হাওয়া কি সুন্দর। দুজন ভদ্রলোক পথে বেড়াচ্ছিলেন, তাঁদের চেহারা দেখে আমার মারহাট্টী সেনানায়ক ভাস্কর পণ্ডিতের কথা মনে পড়লো।

সন্ধ্যাতারা উঠেচে। পাহাড়ের বনভূমি অন্ধকার হয়ে এল। দূরে বনের মাথার দিকে চেয়ে দেখলাম—ওদিকে সাতশো মাইল প্রান্তর, অরণ্য, নদী পার হয়ে তবে বারাকপুর। হাটবার, আজ রবিবার, সন্ধ্যা হয়েছে, কাঁচিকাটার পুল দিয়ে গনেশ মুচি হাট করে ফিরচে আর বলতে বলতে যাচ্ছে—হাটে বেগুন আজ খুব সস্তা।

—এত জায়গা থাকতে ও জায়গার কথা আমার এত মনে হয় কেন?

আর মনে পড়ে আমাদের পোড়ো ভিটের পশ্চিম ধারের সেই কি অজানা গাছগুলো, যার সঙ্গে বাল্য থেকে আমার কত পরিচয়—ওগুলোর কথা মনে কল্পনা করলেই আবার আমার বারো বছরের মুগ্ধ শৈশব ঘন ফিরে আসে।

কাল বৈকালে এখানকার মহারাজ বাগ ও মিউজিয়াম দেখলাম। মিউজিয়মে অনেক পুরাণো শিলাখণ্ড আছে—কয়েকটি খৃষ্টীয় তৃতীয় ও চতুর্থ শতাব্দীর। বিলাসপুর জেলায় একটা ডাকাতির কাছে পাওয়া কতকগুলো তীর দেখলাম, ভারী কৌতুহলপ্রদ জিনিস বটে। একটা জীবন্ত অজগর সাপ দেখা গেল। মহারাজবাগে একটা বড় সিংহ আছে, কিন্তু সে সব যতই ভাল লাগুক, সে সব নিয়ে আজ লিখবো না। আজ যা নিয়ে লিখতে বসেছি, তা হচ্ছে আজকার বিকেলের মোটর ভ্রমণটা।

নাগপুর শহরের চারিদিকে যে এমন অদ্ভুত ধরণের প্রাকৃতিক সৌন্দর্য-বিশিষ্ট স্থান আছে, সে সব কথা আমি কখনও জানতুম না। কেউ বলেও নি। শহরের উত্তর দিকে পাহাড়ের ওপরকার রাস্তা দিয়ে আজ আমরা মোটর নিয়ে গিয়েছিলাম। ষোড়শপুরী ছাত্রটি আমাদের নিতে এসেছিল। সে যে কি অপূর্ব সৌন্দর্য, তা লিখে প্রকাশ কর্তে পারি নে। সন্ধ্যা হয়ে আসচে, অস্তদিগন্ত রঙে রঙে রঙীন। বহুদূরে, দূরে, উচ্চ মালভূমির সূদূর প্রান্ত সান্ধ্যছায়াচ্ছন্ন, দিক্চক্রবালরেখা নীল শৈলমালায় সীমাবদ্ধ, সামনে, পিছনে, ডাইনে, বাঁয়ে যেদিকে চাই, ধূ ধূ বৃক্ষহীন, অস্তহীন উচ্চাবচ মালভূমি, শৈলমালা, শিলাখণ্ড,—ছ'চারটা শালপলাশের গাছ। মাথার উপর অপূর্ব নীল আকাশ, ঈষৎ ছায়াভরা কারণ সন্ধ্যা হয়ে আসচে—পিছনের পাহাড়টি ক্রমে গাড়ীর বেগে খুব দূরে গিয়ে পড়ছে, তার ওপরকার বৃক্ষশ্রেণী ক্রমশঃ অস্পষ্ট হয়ে আসচে—সামনের শৈলমালা ফুটে উঠছে—ক্রমে অনেক দূরে মিতাবল্ডির পাহাড় ও বেতার টেলিগ্রাফের মাস্তুল দেখা যাচ্ছে। তার নীচে চারিদিকের মালভূমি ও পাহাড়ে ঘেরা একটা খাঁজের মধ্যে নাগপুর শহরটা। এমন একটা মহিমময় দৃশ্যের কল্পনা আমি জীবনে কোনোদিনই কর্তে পারি নি—বাংলাদেশ এর কাছে লাগে না—এর সৌন্দর্য যে ধরণের অল্পভূতি ও পুলক মনে জাগায়, বাংলাদেশের মত ভূমিসংস্থান যে সব দেশে, সে সব দেশের অধিবাসীদের পক্ষে তা মনে কল্পনা করাও শক্ত। উড়িষ্যার দৃশ্যও এর কাছে ছোট বলে মনে হয়—সেখানে জঙ্গল আছে, বুনো বাঁশের ঝাড় আছে বটে কিন্তু এ ধরণের অবর্ণনীয় স্মহান, বিরাট, রুক্ষ সৌন্দর্য সেখানকারও নয়। তখন আমি এসব দেখিনি কাজেই উড়িষ্যাকেই ভেবে-ছিলাম এই প্রাকৃতিক সৌন্দর্যের চরমতম সৃষ্টি। আমি বনশ্রী খুব ভালবাসি, বন না থাকলে আমার চোখে সে সৌন্দর্য সৌন্দর্যই নয়—কিন্তু বন না

থাকলেও যে এমন অপূৰ্ণ রূপ খুলতে পারে, এমন Superb অনুভূতি মনে জাগাতে পারে তা আমার ধারণাও ছিল না।

সন্ধ্যা প্রায় হয়ে এসেছে। এখানে পাহাড়ের ওপর দুটো বড় হ্রদ আছে, একটার নাম আশ্বাজেরী আর একটার নাম কি বলে যোধপুরী ছাত্রটি ঠিক বুঝতে পারলাম না। দুটোই বড় সুন্দর—অবিশি আশ্বাজেরী হ্রদটা অনেক বড় ও সুন্দরতর। হ্রদের সামনে কল্কাতার ঢাকুরে লেককে লজ্জায় মুখ লুকাতে হয়। এর গম্ভীর মহিমার কাছে ঢাকুরিয়া লেক বাল্মিকীর কাছে ভারতচন্দ্র রায়। এর কি তুলনা দেবো? স্নান জ্যেৎস্না উঠল। যোধপুরী ছাত্রটি লোক ভাল, কিন্তু তার দোষ সে অনবরত বক্চে। প্রমোদবাবু তার নাম রেখেচেন ‘মূলো’—সে চূপ করে থাকলে আমরা আরও অনেক বেশী উপভোগ কর্তে পারতুম।

আসবার পথটাও বড় চমৎকার—পথ ক্রমে নেমে নীচে যাচ্ছে—দুধারে সেই বকম immensity। মনে হোল আজ পূজার মহাষ্টমী—দূর বাংলা-দেশের পল্লীতে পল্লীতে এখন এই সন্ধ্যায় মহাষ্টমীর আরতি সম্পন্ন হয়ে গেছে, প্রাচীন পূজার দালানে নতুন জামাকাপড় পরে ছেলেমেয়েরা মুড়ি মুড়কী, নারকোলের নাড়ু কৌচড়ে ভরে নিয়ে খেতে খেতে প্রতিমা দেখ্চে। বারাকপুরের কথা, তার ছায়াঘেরা বাঁশবনের কথাও এ সন্ধ্যায় আজ আবার মনে এল। সজ্নে গাছটার কথাও—সেই সজ্নে গাছটা।

মহাষ্টমীতে আজ ক্র্যাডক্-টাউনে প্রবাসী বাঙ্গালীদের দুর্গোৎসব দেখ্তে গিয়েছিলাম। নাগপুরে বাঙ্গালী এত বেশী তা ভাবিনি। ওরা প্রসাদ খাবার অনুরোধ করলে—কিন্তু নীরদবাবুকে রুগ্ন অবস্থায় বাসায় রেখে আমরা কি করে বেশীক্ষণ থাকি?

মারাঠী মেয়েরা রঙীন শাড়ী পরে সাইকেলে চেপে ঠাকুর দেখ্তে যাচ্ছে। আমরা মহারাজ বাগের মধ্যের রাস্তা দিয়ে এগ্রিকালচারাল কলেজের গাড়ী-বারান্দার নীচে দিয়ে ভিক্টোরিয়া রোডে এসে পৌঁছলুম। রাত সাড়ে সাতটা, জ্যেৎস্না মেঘে ঢেকে ফেলেছে।

সেদিন বনগাঁয়ে ছকু পাড়ুইর নৌকাতে সাতভয়েতলা বেড়াতে গিয়েছিলাম—এবার বর্ষায় ইছামতী কূলে কূলে ভরে গিয়েছে—দুধারের মাঠ ছাপিয়ে জল উঠেছে—তারই ধারের বেতবন, অগাণ্ড আগাছার জঙ্গল বড় ভাল লেগেছিল। অত সবুজ, কালো রংয়ের ঘন সবুজ,—বাংলা ছাড়া আর

কোথাও দেখা যাবে না, বনের অত বৈচিত্র্য ও রূপ কোথাও নেই—নীল আকাশের তলায় মাঠ, নদী, বনঝোপ বেশ সুন্দর লেগেছিল সেদিন। কিন্তু আজ মনে হোল সে যত সুন্দর হোক, তার বিরাটতা নেই—তা pretty বটে, majestic নয়।

চারিধারে জঙ্গলাবৃত—গাছপালার মধ্যে হ্রদটা। হ্রদের বাংলাতে বসে লিখ্চি। প্রমোদবাবু বল্চেন, সূর্য্য ঢলে পড়েচে শীগ্গির লেখা শেষ করুন। এখান থেকে আমরা এখন রামটেক্ যাবো। কি গভীর জঙ্গলটাতে এইমাত্র বেড়িয়ে এলাম—বুনো শিউলি, কেঁদ, আবলুস, সাঁইবাবলা সব গাছের বন। সামনে যতদূর চোখ যায় নীল পর্ব্বতমালা বেষ্টিত বিরাট হ্রদটা। এমন দৃশ্য জীবনে খুব কমই দেখেছি। পাহাড়ে যখন মোটরটা উঠ্লে—তখনকার দৃশ্য বর্ণনা করবার নয়। সময় নেই হাতে, তাই তাড়াতাড়ি যা তা লিখ্চি। সূর্য্য ঢলে পড়েচে—এখনও এখান থেকে পাঁচ মাইল দূরবর্তী রামটেক্ দেখতে যাবো। প্রমোদবাবু তাগাদা দিচ্ছেন। বনশিউলি গাছের সঙ্গে বনতুলসী গাছও আছে—কিন্তু তা পাহাড়ের বাইরের ঢালুতে। একটা সুন্দর গন্ধ বেরুচ্ছে। মোটরওয়ালার কোথায় গিয়েচে—হর্ণ দিচ্ছি—এখনও খোঁজ পাইনি। পাহাড়ের গায়ে ছায়া পড়ে এসেচে। দূরের পাহাড় নীল হতে নীলতর হচ্ছে। এখানে হ্রদের সাজানো বাঁধানো সিঁড়ি ভেঙে জল সংগ্রহ করা অত্যন্ত কষ্টকর। বাংলায় চৌকীদারের কাছ থেকে জল চেয়ে দুজনে খেলাম।

ক্রমে সন্ধ্যা হয় হয়। ড্রাইভারটা কোথায় ছিল—হর্ণ দিতে দিতে এল। প্রমোদবাবু ছড়ি ফেলে এসেচেন—হ্রদের ঘাটে নেমে আনতে গেলেন। ফিরে বল্লে—ছায়া আরও নিবিড়তর হয়েছে বনের মধ্যে। অপরাহ্নের ছায়ায় বন আরও সুন্দর দেখাচ্ছে। ওখান থেকে মোটর ছেড়ে শৈলমালাবৃত সুন্দর পথে রামটেক্ এলাম। রামটেকে যখন এসেছি, তখন বেলা আর নেই, সূর্য্য অস্ত গেছে। অপরাহ্নের ছায়ায় রামটেকের সুবৃহৎ উপত্যকা ও ছায়াচ্ছন্ন অরণ্যাবৃত শাস্ত অধিত্যকাভূমির দৃশ্য আমাদের কাছে এতই অপ্রত্যাশিত ভাবে সুন্দর মনে হোল যে, আমি মনে মনে বিস্মিত হয়ে গেলাম—এই সুন্দর গিরিসান্নদেশ এখনি জ্যোৎস্নায় শুভ্র হয়ে উঠ্বে, এই নিৰ্জনতা, সেই প্রাচীন দিনের স্মৃতি—এসব মিলে এখনি একে কি অপরূপ রূপই দেবে—কিন্তু আমরা এখানে পৌঁছুতে দেবী করে ফেলেছি, বেশীক্ষণ এই ছায়াভরা ধূসর সান্নাশোভা উপভোগ কর্তে তো পারবো না? পথ

খুব চওড়া পাথরে বাঁধানো—কিন্তু উঠেই চলেচি, সিঁড়ি আর শেষ হয় না। প্রথমে একটা দরজা, সেটা এমন ভাবে তৈরী যে দেখলে প্রাচীন আমলের দুর্গদ্বার বলে ভ্রম হয়। তারপর আর একটা দরজা, তারপর আর একটা—সর্বশেষে মন্দির। মন্দিরে প্রবেশ করে বহিরাঙ্গণের প্রাচীরের ওপরকার একটা চবুতারা় আমরা বসলাম। নীচেই বাঁ ধারে কিনসী হ্রদ, পূবে পূর্ণচন্দ্র উঠ্চে, চারিধারে থৈ থৈ করচে বিরাট space, পশ্চিম আকাশ এখনও একটু রঙীন। মন্দিরে আরতির সময়ে এখানে নহবৎ বাজে, এক ছোকরা বাইরে পাঁচল ঠেস্ দিয়ে বসে সানাই বাজাতে শুরু করলে। আমি একটা সিগারেট ধরালাম।

একটু পরে জ্যোৎস্না আরও ফুটল। আমাদের আর উঠতে ইচ্ছে করে না, প্রমোদবাবু তো শুয়েই পড়েচেন। দূরে পাহাড়ের নীচে আশারা গ্রামের পুকুরটাতে জ্যোৎস্না পড়ে চিক্ চিক্ করচে। মন্দির দেখতে গেলাম। খুব ভারী ভারী গড়নের পাথরের চৌকাঠ, দরজার ফ্রেম—সেকলে ভারী দরজা, পেতলের পাত দিয়ে মোড়া, মোটা গুল্ বসানো। মন্দিরের ছুপাশে ছোট ছোট ঘর, পরিচারক ও পূজারীরা বাস করে। তাদের ছেলেমেয়েরা খেলাধুলো করচে, মেয়েরা রান্নাবাড়া করচে। রামসীতার মন্দিরের দরজার পাশে অনেকগুলি সেকলে বন্দুক ও তলোয়ার আছে। একজনকে বল্লুম—এত বন্দুক কার? সে বল্লে—ভৌস্লে সরকারকা। ১৭৮৩ সালে রঘুজী ভৌস্লা এই বর্তমান মন্দির তৈরী করেন। আশারা সরোবরের পাশে ভৌস্লাদের বিশ্রামাবাসের ধ্বংসাবশেষ আছে, আস্বার সময় দেখি এসেচি। মন্দিরের পিছনের একটা চবুতারা় দাঁড়িয়ে উঠে নীচে রামটেক্ গ্রামের দৃশ্য দেখ্লাম—বড় সুন্দর দেখায়। রামটেক্ ঠিক গ্রাম নয়, একটা ছোট গোছের টাউন।

মন্দির প্রদক্ষিণের পর পাহাড় ও জঙ্গলের পথে আমরা নেমে এলাম। জ্যোৎস্নার আলোছায়ায় বনময় সানুদেশ ও পাষণ বাঁধানো পথটা কি অদ্ভুত হয়েছে। এখানে বসে কোনো ভাল বই পড়বার কি চিন্তা করবার উপযুক্ত স্থান। এর চারিধারেই অপ্রত্যাশিত সৌন্দর্যময় গলিঘুঁজি, উচ্চাবচ ভূমি, ছায়াভরা বনাস্ত দেশ। আমার পক্ষে তো একেবারে স্বর্গ। ঠিক এই ধরণের স্থানের সন্ধানই আমি মনে মনে করেছি অনেকদিন ধরে। চন্দ্রনাথ পাহাড়ের থেকে এর সৌন্দর্য অনেক বেশী, যদিও চন্দ্রনাথের মত এ পাহাড় অতটা উঁচু নয়। আশারা গ্রামটা আমার বড় ভাল লাগ্ল—চারিধারে একেবারে

পাহাড়ে ঘেরা, অনেকগুলি ছোট ছোট দোকান, গোলার ঘর, একটা সরাইও আছে। ইচ্ছে হলে এখানে এসে থাকাও যায়। আমরা খুব তাড়াতাড়ি নামতে পারলাম না, যদিও প্রতিমুহূর্তে ভয় হচ্ছিল, মোটর ড্রাইভার হয়তো কি মনে করবে। বেচারী সারাদিন কিছু খায়নি। আমরা গ্রামটা দেখবার ইচ্ছে ছিল, কিন্তু তার সময় ছিল না, তাড়াতাড়ি মোটর ছেড়ে সেই পাহাড়ের মধ্য দিয়ে, কাটা পথটা ঘুরে রামটেক্ টাউনের মধ্যে ঢুকল। পাহাড়ের ঢালুতে বহু আতাবৃক্ষ অজস্র, এখানে বলে সীতাফল—নাগপুর শহবে যত আতাওয়ালী আতা ফিরি করে—তার সব আতাই ফলে সিউনি ও রামটেক্ পাহাড়ে।

রাত বোধ হয় ৭টা কি ৭।১টা। মন্দিরের ওপরে চবুতারায় বসে দূরে নাগপুরের বৈজ্ঞানিক আলোকমালা দেখেছিলাম ঠিক সন্ধ্যায়—তাই নিয়ে প্রমোদবাবুর সঙ্গে তর্ক হোল, আমি বল্লুম—ও কাম্টির আলো—প্রমোদ বাবু বল্লেন—না, নাগপুরের।

কিন্‌সী হৃদের বাংলাতে খাবার খেয়েছিলাম কিন্তু চা খাইনি। রামটেক্‌র মধ্যে ঢুকে একটা চায়ের দোকানে আমরা গাড়ীতে বসে চা খেলাম। খুব জ্যোৎস্না উঠেচে—রামটেক্‌র পাহাড়ের ওপর সাদা মন্দিরটা জ্যোৎস্নায় বড় চমৎকার দেখাচ্ছে—চা খেতে খেতে চেয়ে চেয়ে দেখতে লাগলাম। আজ কোজাগরী পূর্ণিমা, এতক্ষণ বারাকপুরে 'আমার গাঁয়ে বাড়ীতে বাড়ীতে শাঁক বাজচে। লক্ষ্মীপূজোর লুচিভাজার গন্ধ বার হচ্ছে বাঁশবনের পথে—এতদূর থেকে সেসব কথা যেন স্বপ্নের মত লাগে। রামটেক্‌র পথ দিয়ে মোটর ছুটল। কিন্‌সী হৃদ থেকে মোটরে আসবার সময়ে যেমন আনন্দ পেয়েছিলাম, তেমনি আনন্দ পেলাম। সামনে তখন ছিল আঁকাবাঁকা, উঁচুনীচু পার্শ্বত্যা প্রদেশের কঙ্করময় পথ, ডাইনে ছায়াবৃত অরণ্যভরা শৈলমালা—এখন ঠিক তেমনি পথ দিয়ে মোটর তীরের বেগে ছুটে চলেচে—প্রমোদবাবু বল্লেন a glorious drive.

রামটেক্‌ স্টেশনে নাগপুরের ট্রেনখানা দাঁড়িয়ে রয়েছে, স্মতরাং বোঝা গেল এখনও সাড়ে আটটা বাজেনি। একটু গিয়ে প্রমোদবাবু মাইল ষ্টোনে পড়লেন—নাগপুর ২৮ মাইল, মান্‌সার ২ মাইল। দেখতে দেখতে ডাইনে মান্‌সারের বিরাট ম্যান্‌জানিজের পাহাড় পড়ল—জ্যোৎস্নার আলোতে স্ফুটক অনাবৃতকায় পাহাড়গুলো যেমনি নির্জন, তেমনি বিশাল ও বিরাট



মনে হচ্ছিল। মনে ভাবছিলাম ওই নির্জন শৈলশিখরে, এই ঘন বনের মধোর পথ দিয়ে গিয়ে ফুটফুটে জ্যোৎস্নায় তাঁবু খাটিয়ে যারা রাত্রিযাপন করে একা একা, তাদের জীবনের অপূর্ব অল্পভূতির কথা। আরও ভাবছিলাম এই জ্যোৎস্নায় বহুদূরের বাংলাদেশের এক ছোট্ট নদীর ধারের গ্রামের একটা দোতারা বাড়ীর কথা। ভাবলাম অনেকদিন হয়ে গেছে বটে, কিন্তু সে এখন আরও কাছে কাছে থাকে—যখন খুশি সেখানে যেতে পারে—হয়তো আজ এই জ্যোৎস্নারাত্রে আমার কাছে কাছেই আছে। মানুসারে যেখানে নাগপুর জব্বলপুর রোড থেকে রামটেকের পথটা বেকে এল—সেখানে একটা P.W.D. বাংলা আছে, সামনে একটা পদ্মফুলে ভরা জলাশয়। স্থানটা অতি মনোরম। দুপুরে আজ এই ম্যাঙ্গানিজ গুলি আমরা দেখে গিয়েছিলাম—বিরাট পর্বতের ওপর মোটর উঠিয়ে নিয়ে গেল।—অনাবৃতদেহ পর্বতপঞ্জর বৌদ্রে চক্চক্ করচে, খাড়া কেটে ধাতুপ্রস্তুত বার করে নিয়েচে—সামনে schist ও granite—নীচের স্তর-গুলোতে কালো ম্যাঙ্গানিজ। একজন ওদেশী কেরানী আমাদের সব দেখালে, সঙ্গে দু টুকরো ম্যাঙ্গানিজ দিলে কাগজচাপা করবার জন্তে। তারই মুখে শুনলাম এই ম্যাঙ্গানিজ স্তর এখন থেকে ২৫২৬ মাইল দূরে ভাণ্ডারা পর্যন্ত চলে গিয়েছে—মাঝে মাঝে সমতল জমি, আবার পাহাড় ঠেলে ঠেলে উঠেচে। নাগপুর-জব্বলপুর রোডে অনেক পাহাড় পড়ে জব্বলপুরে যেতে। সিউনির দিকেও পাহাড় ও জঙ্গল মন্দ নয়। কিন্তু সর্কাপেক্ষা সুন্দর দৃশ্য নাগপুর-অমরাবতী রোডে। নাগপুর শহর থেকে ২৫ মাইল দূরবর্তী বাজারগাঁও গ্রাম থেকে কান্হোলি ও বোরি নদীর উপত্যকাভূমি ধরে যদি বরাবর সোজা উত্তর-পশ্চিম দিকে যাওয়া যায়, তা হলে শৈলমালা, মালভূমি ও অরণ্যে ঘেরা এক অপূর্ব প্রাকৃতিক দৃশ্যের সম্মুখীন হতে হবে।

মানুসার ছেড়ে আমরা নাগপুর-জব্বলপুর রোডে পড়লাম। দুধারে দূরপ্রসারী সমতলভূমি জ্যোৎস্নায় ধু ধু করচে—আকাশে দু দশটা নক্ষত্র—দূরে নিকটে বৃক্ষশ্রেণী। এখনও নাগপুর ২৫ মাইল। সারাদিন পাহাড়ে ঠাণ্ডানা মা পরিশ্রমের পর, ছ ছ ঠাণ্ডা বাতাস বেশ আরামপ্রদ বলে মনে হচ্ছে। ক্রমে কামটি এসে পড়লাম। পথে কান্হান্ নদীর সেতুর ওপর এসে মোটরের এঞ্জিন কি বিগড়ে গেল। আমরা জ্যোৎস্নাপ্রাণিত নদীবক্ষের

দিকে চেয়ে আর একটা সিগারেট ধরালাম। পেছনে রামটেক প্যাসেঞ্জার ট্রেনখানা কানহান্ ষ্টেশনে দাঁড়িয়ে আছে—আমার ইচ্ছে ছিল ট্রেনে মোটরে একটা রেস্ হয়—কিন্তু তা আর হোল না, ট্রেন ছাড়বার আগেই মোটরের এঞ্জিন ঠিক হয়ে গেল। কাম্টিতে এঞ্জিন আবার বিগ্ ডালো একবার কিন্তু অল্পক্ষণের মধ্যেই ঠিক হোল। তারপর আমরা নাগপুর এসে পড়লাম—দূর থেকে ইন্দোরের আলো দেখা যাচ্ছে।

কিন্তু কিন্সী হ্রদের তীরের গিরিসাপুর জঙ্গল আমি এখনও ভুলিনি। শরতের নীল আকাশের তলায় সেই নিবিড় ছায়ানিকেতন আরণ্য প্রদেশটা আমার মনে একটা ছাপ দিয়ে গেছে। আহা ঐ বনের শিউলী গাছগুলোতে যদি ফুল ফুটতো, আরও যদি দু চার ধরণের বনফুল দেখতে পেতুম—তবে আনন্দ আরো নিবিড় হোত—কিন্তু এম্নি কত দেখেচি, তার তুলনা নেই। বুনো বাঁশের ছোট ছোট ঝাড়গুলিব কি শ্রামল শোভা। পূজোর ছুটি ফুরিয়ে যাবে, আবার কল্কাতার লোকারণ্যের মধ্যে ফিরে যাবো, আবার দশটা পাঁচটা স্কুলে ছুটবো, আবার অপকৃষ্ট ‘ক্যালকাটা কেবিনে’ বসে চা ও ডিমের মামলেট খাবো—তখন এই বিশাল পার্ৱত্যকায় সরোবর, এই শরতের রৌদ্র-ছায়াভরা কটুতিক্ত গন্ধ ওঠা ঘন অরণ্যগী, এই জ্যোৎস্নাপ্লাবিত নির্জন গিরিসানু—এই আশ্বরা, কিন্সী, রামটেকের মন্দির-দুর্গ—এসব বহুকাল আগে দেখা স্বপ্নের মত অস্পষ্ট হয়ে মনের কোণে উঁকি মারবে।

একটা কথা না লিখে পারচি নে। আমি তো যা দেখি, তাই আমার ভাল লাগে—বিশেষ করে যদি সেখানে বন থাকে। কিন্তু তবুও লিখ্চি আমি এপর্যন্ত যত পাহাড় ও অরণ্য দেখেচি—চন্দ্রনাথ, ত্রিকুট, কাট্নি অঞ্চলের পাহাড়—ডিগ্-রিয়া ও নন্দন পাহাড়ের উল্লেখ করাই এখানে হাশ্বকর, তবুও উল্লেখ করচি এইজন্তে যে এই ডায়েরীতেই কয়েক বছর আগে আমি নন্দন পাহাড়ের স্মৃতি কবে খুব উদ্দামপূর্ণ বর্ণনা লিখেচি—এসব পাহাড় কিন্সী ও রামটেকের কাছে গ্লান হয়ে যায় সৌন্দর্য ও বিশালতায়।

কাল নাগপুর থেকে চলে যাবো। আজ রাত্রে নির্জন বাংলায় বারান্দাতে বসে জ্যোৎস্নাভরা কম্পাউণ্ডের দিকে চেয়ে শরৎচন্দ্র শাস্ত্রীর ‘দক্ষিণাপথ ভ্রমণ’ পড়চি। সেই পুরোনো বইখানা সিদ্ধেশ্বর বাবুদের আপিসে কাজ করবার সময় টেবিলের ডুয়ারে যেখানা লুকোনো থাকত। কাজের ফাঁকে ফাঁকে চট্ করে একবার বার করে নিয়ে পাহাড়, জঙ্গল, দূরদেশের বর্ণনা

পড়ে ক্লাস্ত ও রুদ্ধশ্বাস চেতনাকে চাঙ্গা করে নিতুম। এখনও মনে পড়চে সেই ছোট টেবিলটা তার ড্রয়ারটা, ডাইনে কাঠের পার্টিসনটা সেই রোকড় খতিয়ানের স্তূপ, ফাইলের বোঝা।

কাল বৈকালে একা বেড়াতে বার হয়েছিলাম, কারণ কাল সকালের বধে মেলে প্রমোদবাবু হাওড়া ফিরলেন। আমি তাঁকে তুলে দিতে গিয়েছিলাম। একজন হিন্দুস্থানী ভদ্রলোকের সঙ্গে ট্রেনে আলাপ হোল, তাঁর বাড়ী খড়গপুর তিনি মতিকাকাকে চেনেন। বল্লুম, মতিকাকার কাছে আমার নাম বলবেন।

তারপর বৈকালে একা বার হলাম। South Tiger Gap Road দিয়ে পাহাড়ের ওপর উঠে একটা মুক্ত জায়গায় শাঁকোর ওপর বসলাম। সামনে ধূ ধূ প্রান্তর, দূরে দূরে শৈলশ্রেণী—বাঁয়ে সাতপুরা, ডাইনে রামটেকের পাহাড় ও মানসারের ম্যান্ডানিজের পাহাড় অস্পষ্ট দেখা যাচ্ছে। একটু পরে সূর্য্য ডুবে গেল, পশ্চিম দিগন্তে কত কি রঙ ফুটল। আমার কেবলই মনে আসতে লাগল ঐ শ্লোকটা—‘প্রস্থিতা দূরপস্থানং’... শ্লোকের টুকরাটার নতুন মানে এখানে বসেই যেন খুঁজে পেলাম। ভাবলাম আমার উত্তর পূর্ব কোণে, আরও অনেক পেছনে কাশী ও বিষ্ণ্যাচল, মৃঙ্গাপুর ও চূণার পড়ে আছে—পশ্চিম ঘেঁসে প্রাচীন অবন্তী জনপদ—পূর্বে প্রাচীন দক্ষিণ কোশল, সামনের ঐ নীল শৈলমালা—যার অস্পষ্ট সীমারেখা গোধূলির শাস্ত ছায়ায় অস্পষ্ট দেখা যাচ্ছে—ঐ হোল মহাভারতের কিংবা নৈষধ চরিতের সেই ঋক্ষবাণ্ পর্বত। এই যেখানে বসে আছি, এখান থেকে পঞ্চাশ মাইলের মধ্যে অমরাবতীর কাছে পদ্মপুর বলে গ্রামে কবি ভবভূতির জন্মস্থান। এ সব প্রাচীন দিনের স্মৃতি জড়ানো প্রান্তর, অরণ্য, শৈলমালা, দিগন্তহীন মালভূমির গন্তীর মহিমা, এই রকম সঙ্কায় নির্জনে বসলেই মনকে একেবারে অভিভূত করে দেয়।

পূর্বে চেয়ে দেখি হঠাৎ কখন পূর্ণচন্দ্র উঠে গেছে। তারপর জ্যোৎস্না শোভিত Tiger Gap Road-এর বনের ধার দিয়ে শহরে ফিরে এলাম। শরতের রাত্রে হাওয়া বহু শিউলির স্বাসে ভারাক্রান্ত ও মধুর। Lawrence Road-এর মোড়ে এসে পথ হারিয়ে ফেলেছিলাম—তিনজন বাঙ্গালী ছোকরার সঙ্গে দেখা—তারা আমায় বাংলোর কাছে পৌঁছে দিয়ে গেল।

আমি ওখান থেকে চলে গেলাম সীতাবলুড়ির বাজারে ঘড়ির দোকানে। সেখানে রেডিওতে কল্কাতা Short wave ধরেচে, বাংলা গান বাজ্চে—

একটু পরে রেডিও স্টেশনের বিষ্ণু শর্মা সুপরিচিত গলায় কি একটা গানের ঘোষণা করলে। মনে মনে ভেবে দেখলাম কত পাহাড় জঙ্গল পার হয়ে ৭৫০ মাইলে ব্যবধান ঘুচিয়ে বিষ্ণু শর্মার গলা এখানে এসে পৌঁছুলো—যে মুহূর্তে সে গাষ্টির প্রেসের সেই রাঙা বনাত মোড়া ঘরটায় বসে একথা বলে, সেই মুহূর্তেই! রেডিওর অন্ততত্ত্ব এভাবে কখনো অনুভব করি নি—কল্কাতায় বসে শুন্লে ওর গভীর বিশ্বয়ের দিকটা বড় একটা মনে আসে না।

তারপর টাঙা নিয়ে নেরুলকরের ওখানে গেলাম। ডাক্তার বেরিয়ে গিয়েচে—বসে বসে ‘The Story of the Mount Everest’ বইখানা পড়লাম—রাত দশটা বাজে, এখনও ডাক্তার এল না। আমি একটা চিঠিতে লিখে এলাম, কাল সকালে দুবেকে সঙ্গে নিয়ে যেন নেরুলকার আমাদের ওখানে আসে। তারপর একটা টাঙা নিয়ে জ্যোৎস্নাপ্লাবিত স্টেশন দিয়ে ফিরলাম।

সকালে সীতাবলুড়ির ঘড়ির দোকানে ঘড়ি সারাতে গেলাম—ওখান থেকে গেলাম ডাঃ নেরুলকরের ওখানে ও স্টেশনে বার্থ রিজার্ভ করতে। দুপুরে মিউজিয়ামে গিয়ে গোড় জাতির অস্ত্রশস্ত্র, বালাঘাট পার্বত্যদেশের খনিজ প্রস্তুত, fossil, জব্বলপুরের অধুনালুপ্ত অতিকায় হস্তী, নর্মদার উত্তরে অরণ্যের অধুনালুপ্ত সিংহ, বনবিড়াল, ছিন্দুওয়ারা জঙ্গলের বাইসন বা সৌর—কত কি দেখলাম। খ্রীষ্টীয় অষ্টম শতকের চেন্দীরাণী লোহলের প্রস্তরলিপি ও বৌদ্ধ রাজা সূর্য্য ঘোষের পুত্র রাজপ্রাসাদের ছাদ থেকে পড়ে যাওয়ার ফলে মারা যাওয়াতে ভগবান তথাগতের উদ্দেশে পুত্রের আত্মার সদগতির জন্ম তিনি যে মন্দির নির্মাণ করেন—সে লিপিটিও পড়লাম। আজ খুব বোদ, আকাশ খুব নীল, বাংলোর বারন্দায় বসে লিখ্‌চি। এখনি চা খেতে যাবো।

তারপর আমরা রওনা হলুম। ডাঃ নেরুলকর স্টেশনে এসে আমাদের সঙ্গে দেখা করে গেলেন। ডুগ্ ও ডোঙ্গরগড়ের মধ্যবর্তী বিখ্যাত সালাকেসা ফরেস্ট দেখ্‌বো বলে আমরা রাত ১১টা পর্য্যন্ত জেগে বসে রইলাম। নাগপুর ছাড়িয়ে ছোট ছোট শালের জঙ্গল অনেক দেখা গেল—জ্যোৎস্না রাত্রে প্রকাণ্ড অরণ্যটার রূপ আমার মনে এমন এক গভীর অনুভূতি জাগালে—সে রাত্রে ঘুম আমার আর এল না—ডোঙ্গরগড় স্টেশনে গাড়ী এসে পড়ল, রাত তিনটে বেজে গেল, ঘুমবার ইচ্ছেও হোল না—জানালা থেকে চোখ সরিয়ে নিতে মন আর সরে না।

নাগপুর থেকে ফিরেই দেশে গিয়েছিলাম। ইচ্ছামতী দিয়ে নোকোতে বিকেলের দিকে গ্রামের ঘাটে পৌঁছলাম—বাল্যে একটা কি ছেলেদের কাগজে একটা কবিতা পড়েছিলাম—

ঘাটের বাটে লাগলো যবে আমার ছোট তরী,  
ঘনিয়ে আসে ধরায় তখন শীতের বিভাবরী।

এতকাল পরে সেই দুটা চরণই বার বার মনে আসতে লাগল। মাধবপুরের মাঠে সূর্য্য অস্ত গেল, চালতেপোতার বাঁকের সবুজ ঝোপঝাপ দেখলাম—এবার কিন্তু চোখে লাগল না তেমন। কেন এমন হোল কি জানি ?

অবশ্য একথা ঠিক, এমন ঘন সবুজ ও নিবিড় বনসম্পদ C. P. অঞ্চলের নেই—সে হিসেবে বাংলাদেশের তুলনা হয় না ওসব দেশের সঙ্গে; কিন্তু ভূমিসংস্থান বিষয়ে বাংলা অতি দীন। জলকাদা, ডোবা, জলা, ugly জঙ্গল,—এ বড় বেশী। লোকেও ভূমিশ্রী বন্ধিত করতে জানে না, নষ্ট করতে পারে। নানা কারণে বর্ষাকালে বাংলাদেশ আদৌ ভাল লাগে না। আবার খুব ঘন বর্ষায় খুব ভাল লাগে—যেমন শ্রাবণ ভাদ্র মাসের অবিশ্রান্ত বর্ষণের দিনগুলিতে, যখন জলে থৈ থৈ করে চারিধার। শেষ শরতের এসব বর্ষায় সৌন্দর্য্য নেই, কিন্তু অস্ববিধে ও শ্রীহীনতা যথেষ্ট। গাছেপালায় মনকে বড় চাপা দিয়ে রাখে।

এবার কল্কাতা বড় ভাল লাগ্চে।

কাল সাহেবের সঙ্গে ঘুরে বেড়িয়েছি সারাদিন। সকালে বিশ্বনাথের মোটরে গোপালনগর গিয়েছিলাম—তারপর লাঙ্গলচষার প্রতিযোগিতা হোল, ছেলেদের দৌড় হোল—তারপর বিকেলে বেলেডাঙ্গা গেলাম। সেখানে একটা ডাব খাওয়া গেল। স্কুলে যুগল শিক্ষক এল।

দেশ, খয়রামারির মাঠ এত ভাল লাগ্চে এবার! কাল হারাণ চাকলাদার মহাশয়ের ছেলের কৃষিক্ষেত্র দেখতে গিয়েছিলাম—মাঠের মধ্যে ফুলের চাষ করেছে—বেশ দেখাচ্ছে। একটা ঘাঁড়া গাছের কুঞ্জবন বড় সুন্দর। এবার জ্যোৎস্না খুব চমৎকার—শীতও বেশ। রোজ খয়রামারির মাঠে বেড়াই। আজ একা যাবো। একলা না গেলে কিছু হয় না।

রাজনগরের বটতলায় রোজ বেড়াতে যাই। সামনে অপরূপ রঙে রঙীন সূর্য্য অস্ত যায় দিগন্তের ওপারে, নিঃশব্দ, নিস্তব্ধ চারিদিক—মাটির সূত্রাণ স্মরণ করিয়ে দেয় ইসমাইলপুরের জনহীন চড়ায় এমন সব শীতের সন্ধ্যা, কত সূদীর্ঘ অন্ধকার রাত্রি, কত কৃষ্ণ নিশীথিনীর শেষ যামের ভাঙা চাঁদের জনমানবহীন বনের পেছনে অস্ত যাওয়া, কত নীল পাহাড় ঘেরা দিক্চক্রবাল, বিষম শীতের রাত্রে ঘনোরী তেওয়ারীর মুখে অদ্ভুত গল্প শোনা অগ্নিকুণ্ডের চারিধারে বসে বসে।

সে সব দিন আজকাল কতদূরের হয়ে গেছে।

আজ নববর্ষের প্রথম দিনটাতে সকালে নীরদবাবুদের সঙ্গে বহুকাল পরে বেলুড় গিয়েছিলাম। পেছনের ছাদটাতে বসে আবার পুরোধো দিনের মত কত গল্প করলাম। পেছনের ছাদটা, বেলুড়ের বাড়ীর চারিপাশের বাগান এত ভাল লাগল। ভেবেছিলাম এখানে আর আসা হবে না। সেই বেলুড়ে আবার যখন আসা হোল,—বিশেষ কালে সেই শীতকালেই, যে শীতকালের রাত্রির সঙ্গে বেলুড়ে যাপিত কত রাত্রির মধুর স্মৃতির যোগ রয়েছে—তখন জীবনের অসীম সম্ভাব্যতার উপলব্ধি করে মুগ্ধ না হয়ে পারলাম না। সবাই মিলে আমরা চড়ুইভাতি করে খেলাম নীচের রান্নাঘরটাতে। পৈপের ডাল হাতে রন্ধুরে পিঠ দিয়ে বসলাম মালীর ঘরের সামনে, নীচের ছাদটায় ফল্‌সা গাছের ডালের সেই অপূর্ব অবনমন দেখলাম, যা ওই ফল্‌সা গাছটারই নিজস্ব, অগ্র গাছের এ সৌন্দর্য্যভঙ্গী দেখিনি কখনো—বাগানের পাঁচীলের ওদিকে পাটের কলে নিবারণ মিস্ত্রীর সেই গোলপাতার ঘরখানা, শীতের দিনে গাঁদাফুল-ফোটা নিকানো ছুপাশে তক্তকে উঠোন,—সব যেন পুরাতন, পরিচিত বন্ধুর মত আমাদের প্রাণে তাদের স্নেহস্পর্শ পাঠিয়ে দিলে। বড় ভাল লাগল আজ বেলুড়।

সন্ধ্যার আগেই মোটরে চলে এলাম কল্‌কাতায়। কাল গিয়েছে পূর্ণিমা আজ প্রতিপদের চাঁদ রাত সাড়ে সাতটার পরে উঠল। ধোঁয়া নেই, এই যা সৌভাগ্য।

অনেকদিন পরে আজ আম্‌ড়াতলার গলির মুখে গিয়ে পড়েছিলাম—এতদিন চিনিনি—আজ চিনেচি।

এবার ইষ্টারের ছুটিটা কাটাতে এলুম এখানে। সেবার এসে নীলবর্ণার

যে উপত্যকা দেখে গিয়েছিলাম—আবার জ্যোৎস্না রাতে নিমফুল ও শাল-মঞ্জরীর ঘন সুবাসের মধ্যে সে সব স্থান দেখলাম। রাণীবাণীর পথে পাহাড়ে উঠে গৌড় জাতির গ্রামে আবার বেড়িয়ে এলাম। আজ বেড়িয়ে এলাম সকালে কাকড়গাছি ঘাট। সারা পথের ছুধারে বন, তবে এখন শাল ও মহুয়া গাছ প্রায় নিষ্পত্র—তলায় সাদা সাদা মহুয়া ফুল টুপ্, টাপ্, ঝরে পড়চে। রাখামাইন্স ছাড়িয়ে খানিকটা গেলে বন বেশ ঘন, বড় বড় ছায়াতরুও আছে। কাকড়গাছি ঘাটটা বড় চমৎকার,—একটা জায়গার চারিধারেই পাহাড়ের শ্রেণী। ছোট একটা ঝরণা আছে—তবে এখন ঝরণাতে জল খুবই কম। ওদিকে বনগাছের শোভা এদিকের চেয়ে সুন্দর। অপরাহ্নে বা জ্যোৎস্নারাত্রে যে এসব স্থানের শোভা অপূর্ক হবে সেটা বুঝতে পারা খুব কঠিন নয়। নীরদ বাবুরা গরুর গাড়ীতে এলেন—আমি দেখলাম ওর চেয়ে হেঁটে আসা অনেক বেশী আরামের। বাংলোর সামনে ছোট বাঁধটাতে স্নান করে এলাম। জল বেশ ভাল। খুব সম্ভব আজই রাতে কল্কাতাতে ফিরবো।

কাল রাখামাইন্স থেকে বৈকালে হেঁটে আমরা তিনজন চলে এলাম শালবনের মধ্যে দিয়ে অস্তসূর্যের আলোয় রাঙানো সুবর্ণরেখা পার হয়ে। আজ সকালে গালুড়ির বাংলোর পিছনে সেই শিলাখণ্ডে বসে লিখি। কাল রাতের চাঁদটা যে কখন কালারঝোর পাহাড় শ্রেণীর পিছন দিয়ে উঠল তা মোটেই টের পাইনি—শ্রেশন থেকে এসে দেখি চাঁদ উঠে গিয়েচে। কিন্তু অনেক রাতে শ্রেশনের পথের ছোট ডুংরিটার সাদা সাদা কোয়ার্টজ্ পাথরের চাঁই গুলো, ছোট বট গাছটা অদ্ভুত দেখাচ্ছিল। আজ সকালে গুইরাম গাড়েয়ানের সঙ্গে দেখা, সে বলল ঠিকরী ও ধারাগিরির পথের জঙ্গলে খুব বন, বাঘের ভয়ও আছে। এবার আর যাওয়া হোল না, পূজোর সময় যাবো।

এবার জীবনটা খুব গতিশীল হয়ে উঠেচে। এই তো গত শনিবারে রামনবমী, দোলের দিনও বারাকপুরে ছিলাম। দেখলাম আমাদের বাড়ীর পিছনে বাঁশ বনে কিরকম শুকনো পাতার রাশ পড়েচে, নদীর ধারে চটকাতলা খালের উঁচু পাড়ে কিরকম ঘুঁটুফুল ফুটেচে, রঘুদাসীদের বাড়ীতে ওরা আবার এসেচে পথে রঘুদাসীর সঙ্গে দেখা। তার পরে খয়রামারির মাঠে

সেই বেদেদের তাঁবুর ছোট গর্তটা, সেখানে সেদিনও আকন্দ ফুলের শোভা দেখতে গিয়েচি—রাজনগরের বটতলাটা সন্ধ্যাবেলায় একা বেড়িয়ে এসেচি আর ভেবেচি এসব জায়গা কত নিরাপদ, কত নিরীহ—হঠাৎ এক সপ্তাহের মধ্যে গালুড়ির বাংলোর পিছনে বনে লিখ্‌চি—রাণীবাণী, নেংড়া সব দেখা হয়েই গেছে। রাখমাইনসে ছুরাক্তি যাপন করে এলাম।

কিন্তু একটা দেখলাম ব্যাপার। এসব স্থানে সঙ্গী নিয়ে আসতে নেই। একা থাকলে নিজের মন নিয়ে থাকা যায়। তখন নানা অদ্ভুত চিন্তা, অদ্ভুত ভাব এসে মনে জোটে। কিন্তু সঙ্গীরা থাকলে তাদের মন আমাকে চালিত করে—আমার মন তখন আর সাড়া দেয় না, কেমন গভীর অতল তলে লাজুক তার মুখ লুকিয়ে থাকে। কাজেই সঙ্গীদের চিন্তা তখন হয় আমার চিন্তা—সঙ্গীদের ভাব তখন হয় আমার ভাব, আমার নিজস্ব জিনিস সেখানে কিছু থাকে না। কাল স্ববর্ণরেখার পারের সূর্যাস্তের দৃশ্যটা, কিংবা গভীর রাতের জ্যোৎস্নায় মহলিয়ার প্রাস্তরের ও নেকড়েডুংরী পাহাড়ের সে অবাস্তব সৌন্দর্য্য, একা থাকলে এসব দৃশ্যে আমার মন কত অদ্ভুত কথা বলতো—কিন্তু কাল শুধু আড্ডা দেওয়া এবং চা খাওয়াই হোল—মন চাপা পড়ে রইল বটে, অর্থহীন প্রলাপ বকুনির তলায়, সম্মিলিত সিগারেট ধূমের কুয়াসার আড়ালে।

তাই বল্‌চি এসব স্থানে আসতে হয় একা। লোক নিয়ে আসতে নেই।

আজই এখান থেকে যাবো। এখনি বলরাম সায়েরের ঘাটে নেয়ে আসবো—অনেকদিন পরে ওতে বড় আনন্দ পাবো। দূরে কালাঝোর পাহাড়, চারি ধারে তালের সারি, স্বচ্ছ শীতল জল—দীঘিটা আমার এত ভাল লাগে।

শালবনে নতুন কচি পাতা গজিয়েচে। দূরে কোথায় কোকিল ডাক্‌চে কালাঝোর পাহাড়ের দিকে। এত ভাল লাগ্‌চে সকালটা!

খুড়োদের ছাদে বসে লিখ্‌চি। গ্রীষ্মাবকাশে বাড়ী এসেচি। এবার গালুড়িতে অনেকদিন থেকে আমার যেন নতুন চোখ খুলেচে, গাছপালার বৈচিত্র্য ও প্রাচুর্য্য এবার বেশী করে চোখে পড়চে। সমস্ত প্রাণটা যেন একটা পার্ক—আমার বাড়ীতে কোনো গাছ থাকুক আর নাই থাকুক, সারা গ্রাম এমন কি কুঠীর মাঠ, ইছামতীর দুই তীর, শ্রামল বাঁশবন—এসবই আমার। আমি দেখি, আমার ভাল লাগে—আমার না তো কার ?



প্রায়ই বিকেলে কুঠীর মাঠে বেড়াতে যাই, এবার একটা নতুন পথ খুলেচে মাঠের মধ্যে দিয়ে, সেটা আরও অপূর্ব। এমন সবুজ মাঠ, উলুফুল ফুটেচে চারি ধারে, শিমূল গাছ হাত বঁকিয়ে আছে, দূর বনাস্ত শীর্ষে বিরটিকায় Lyre পাখীর পুচ্ছের মত বাঁশবনের মাথা ছুঁচে, এমন শ্রামলতা, এমন শ্রী—এ আমাদের এই দেশটা ছাড়া আর কোথাও নেই। দুপুরে আজ বেজায় গরম, কাল রাতে ভাল ঘুম হয়নি বলে অত গরমেও খুব ঘুমুলাম।

উঠে দেখি মেঘ করেছে। উত্তর পশ্চিম কোণে ঘন নীল-কৃষ্ণ কাল-বৈশাখীর মেঘ,—তারপর উঠল বেজায় ঝড়। আমি আর ঘরে থাকতে পারলাম না, একখানা গাম্ছা নিয়ে তখনি নদীর ঘাটে চলে গেলাম। পথে জেলি বলে শীগ্গির নেকো তলায় যান্, ভয়ানক আম পড়চে। কিন্তু আজ আর আম কুড়োবার দিকে আমার খেয়াল নেই। আমি নদীর ধারে কালবৈশাখীর লীলা দেখতে চাই। নদীজলে নাম্বার আগেই বৃষ্টি এল। বড় বড় ফোঁটায় বৃষ্টি পড়তে লাগল—জলে নেমে দেখি জল গরম, যেন ফুটেচে। এপার ওপার সাঁতার দিতে লাগলাম, কালো জলে ঢেউ উঠেচে, মুখে নাকে মাথায় ঢেউ ভেঙে পড়চে, ওপারের চরের ওপর বিছাৎ চম্কাচ্ছে, বগ্নেবুড়ো গাছ ঝড়ে উন্টে উন্টে যাচ্ছে, বৃষ্টির ধোঁয়ায় চারিধার অন্ধকার হয়ে গেল, নদীজলের অপূর্ব স্ফূরণ বেরুচ্ছে, দূর দূর সমুদ্রের কথা মনে হচ্ছে। এমনি কত বাটিকাময় অপরাহ্ন ও নীরন্ধ অন্ধকারময়ী রাত্রির কথা—প্রকৃতির মধ্যে এমনি মিশে হাত ধরাধরি করে চলা—ঐ শ্রামল ডালপালা ওঠা শিমূল গাছ, সাঁইবাব্রলা গাছ—এই তো আমি চাই। এদের সঙ্গে জীবন উপভোগ করবো—ঐ ঝোড়ো-মেঘে আমার ভগবানের উপাসনা, ঐ তীক্ষ্ণ নীল বিছাতে, এই কালো নদীজলের ঢেউয়ে, ঝড়ের গন্ধে, বাতাসের গন্ধে, বৃষ্টি-ভেজা মাটির গন্ধে, চরের ঘাসের কাঁচা গন্ধে।

কাল কুঠীর মাঠে বসে এই সব কথা ভাবছিলাম। তারপর নদীজলে নাইতে নেমে কেমন একটা ভক্তির ভাব মনে এল। সমস্ত দেহ মন যেন আপনা আপনি ছুইয়ে পড়তে চাইল। এ ধরণের ভক্তি একটা বড় bliss, জীবনে হঠাৎ আসে না। যখন আসে, তখন বিরটি রূপেই আসে, আনন্দের বগ্না নিয়ে আসে প্রাপের তীরে। এ Realisation যেমন দুর্লভ, তেমনি অপূর্ব।

আমি ভগবানকে উপলব্ধি করতে চাই। এই তাঁর লক্ষ বিরাট রূপের মধ্য দিয়ে।

এবার মোটে বৃষ্টি নেই—পথঘাট এখনও শুকনো খটখটে, অগুবার এমন সময় খানা ভোবা জলে ভরে যায়, কুঠীর মাঠের রাস্তায় কাদা হয়। তবে এবার সোঁদালি ফুল যেন কমে আস্চে, বেল ফুলের গন্ধেরও তেমন জোর নেই।

কাল বিকেলে পাঁচী এসেচে। সে, আমি, খুকু, রাগু, মায় ন'দি ক'জনে কাল বসে কালিদাসের মেঘদূত ও কুমার-সম্ভবের চর্চা করেচি। বিকেলে আমি কুঠীর মাঠে বেড়াতে গেলাম। ঘাটে স্নান করতে এসে দেখি ওরা সবাই ঘাটে—খুকু ও রাগু সাতার দিয়ে গিয়েচে প্রায় বাঁধালের কাছে। আমি স্নান সেরে উঠে আস্চি, কালো তখন গেল শিমূল তলাটার কাছে। আমি বল্লুম, তোর মা ঘাটে তোকে ডাক্চে। সে 'যাই' বলে একটা বিকট চীৎকার ক'রে চলে গেল। একটু পরে দেখি খুকু আমায় ডাক্চে—বাঁশবন প্রায় অন্ধকার হয়ে এসেচে—ও ঘাট থেকে আসবার সময় বোধ হয় অন্ধকার দেখে ভয় পেয়েচে। আমি দাঁড়িয়ে ওকে সঙ্গ করে নিয়ে এলুম।

আজ ওবেলা স্নানের সময় মনে কি যে এক অপূর্ব ভাব এসেছিল! প্রতিদিনের জীবন এই মুক্তরূপা প্রকৃতির মধ্যে সার্থক হয় এখানে—এই সব ভাবে ও চিন্তার ঐশ্বর্যে।

আজ অনেক কাল পরে ন'দির কাছ থেকে গৌরীর হাতের লেখা একখানা গানের খাতা পেয়েচি। এতদিন কোথায় এখানা পড়ে ছিল, বা কি ক'রে ন'দির হাতে এল—তার কোনো খবর এরা দিতে পারলে না। Appropriately enough, খাতায় প্রথম গানটিই হ্চে—

ঐ নীল উজ্জল তারাটি

করুণ, অরুণ তরুণ কিরণ অমিয় মাখানো হাসিটি

বহুদূর জগতে গিয়েছে গো চলি প্রণয়বৃন্ত ছিঁড়িয়া

ভালবাসা সব ভুলে গেছে ……

চৌদ্ধ পনেরো বছর আগের এম্নি ধারা কত উজ্জল রৌদ্রালোকিত প্রভাত, বর্ষায় কত মেঘমেঘুর সঙ্ক্যার কথা মনে আনে। …

যাক। কাল আকাশে হঠাৎ বৃশ্চিক নক্ষত্র দেখেচি—একে প্রথম চিনি বেল পাহাড়ের ষ্টেশনে—পরিমল আমাকে চিনিয়ে দেয়—আমি ওটা চিনতাম না। কাল দেখি শ্রামাচরণ দাদাদের বাঁশ ঝাড়ের মাথার ওপর বিরাট ওর

অগ্নিপুচ্ছটা বেঁকে আছে। আকাশের ওদিকটা আলো হয়ে উঠেচে.. খুকুকে বল্লুম,—ঐ ঝাখ্, বৃশ্চিক নক্ষত্র—

তাকে চিনিয়ে দিলুম। রাগু জিগোস্ করলে—তবে তার বয়েস যদিও খুকুর চেয়ে অনেক বেশি, সে অত বুদ্ধিমতী নয়—পনেরো মিনিট কঠিন পরিশ্রমের পরে তাকে বোঝাতে পারলুম কোনটাকে আমি বৃশ্চিক রাশি বলতে চাচ্ছি।

এদিকে সপ্তর্ষিমণ্ডল ঢলে পড়চে ক্রমেই মেজো খুড়ীমাদের রান্নাঘরের ওপরে। রাত অনেক হোল, ওরা তবুও তাস খেলবেই। বেগতিক দেখে বল্লুম, আলোতে তেল নেই। নইলে ঘুম হবার যো নেই, ওদের খেলার গোলমালে।

লঠন নিবিয়ে শুয়ে পড়লুম, রাত তখন বারোটোর কম নয়।

বিকেলে কালো আর আমি মোল্লাহাটির পথে বেড়াতে গেলাম। আজ দুপুরে যখন এপাড়ার ঘাট থেকে ওপাড়ার ঘাটে সাঁতার দিয়ে যাই, তখনই খুব মেঘ করেছিল—একটু পরে সেই যে বৃষ্টি এল, আর রোদ ওঠেনি। মেঘ ভরা বিকেলে শ্যামল মাঠ ও দূরের বাঁশ বন, বড় বড় বটগাছ, এক রকম কি গাছ আছে, মখমলের মত নরম সবুজ পাতা ডালপালা ছড়িয়ে দিয়ে ঝোপের সৃষ্টি করে—এসবের মধ্যে দিয়ে যেতে যেতে মোল্লাহাটি ও পাঁচপোতা বামুনডাকার পথের মোড়ে গিয়ে একখানা ছই-চাপা গরুর গাড়ীর সঙ্গে দেখা হোল। তাদের গাড়োয়ান জিগোস্ করলে, বাবুর কাছে কি বিড়ি আছে ?

—না, নেই। বিড়ি খাইনে—

—আপনারা কোথায় যাবেন ?

—কোথাও যাবো না, এই পথে একটু বেড়াচ্ছি।

ফিরবার পথে মনে হোল কল্কাতায় থাকবার সময় যখন গাছপালার জন্তে মনটা হাঁপায়, তখন যে কোনো একটু ছবি, একটা বনের ফটোগ্রাফ দেখে মনে হয় ওঃ কি বনই এদেশে! প্রায়ই বিদেশের ফটো—আফ্রিকার, কি দক্ষিণ আমেরিকার—কিন্তু তখন ভুলে যাই যে আমাদের গ্রামের চারিপাশে সত্যিকার বন জঙ্গল আছে অতি অপূর্ব ধরণের—যখন বিলিতি Grand Evening Annual দেখি তখন ভুলে যাই কত ধরণের অদ্ভুত গাছ আছে আমাদের বনে জঙ্গলে—যা বাগানে, পার্কে নিয়ে রোপণ করলে অতি সুদৃশ্য কুঞ্জবন

সৃষ্টি করে—যেমন ঘাঁড়া, কুঁচলতা, ঐ নাম-না-জানা গাছটা—এরা যে কোন বিখ্যাত পার্কের সৌন্দর্য্য ও গৌরব বৃদ্ধি করতে পারে।

সেদিন যখন আমি, রাণু, খুড়ীমা, ন'দি নদীতে বিকেলে স্নান করছি তখন একটা অদ্ভুত ধরণের সিঁদুরে মেঘ করলে—ওপারের খড়ের মাঠের উলুবনের মাথা, শিমূল গাছের ডগা, যেন অবাস্তব, অদ্ভুত দেখাল, যেন মনে হচ্ছিল ওখান থেকেই নীল আকাশটার শুরু।

কিন্তু কাল সন্ধ্যায় একা নদীতে নেমে যে অপূর্ব অনুভূতি হয়েছিল তা বোধহয় জীবনে আর কোনো দিন হয়নি। মাথায় তার একটা তারা উঠেচে—দূরে কোথায় একটা ডাঙ্ক পাখী অবিশ্রান্ত ডাক্চে। মাধবপুরের চরের দিকে ভায়োলেট রঙের মেঘ করেছে—শান্ত, স্তব্ধ নদীজলে তার অস্পষ্ট প্রতিবিম্ব।

মানুষ চায় এই প্রকৃতির পটভূমির সন্ধান। এতদিন যেন আমার Emerson-এর মতের সঙ্গে খুব মিল ছিল—সেদিনও বঙ্গশ্রী অফিসে কত তর্ক করেছি, আজ একটু মনে সন্দেহ জেগেচে। মানুষ এই সৃষ্টিকে মধুরতর করেছে। ওই দূর আকাশের নক্ষত্রটি—ওর মধ্যেও স্নেহ, প্রেম, যদি না থাকে, তবে ওর সার্থকতা কিছুই নয়। হৃদয়ের ধর্ম সব ধর্মের চেয়ে বড়।

আজ সকাল থেকে বর্ষা নেমেচে। ঝিম্ ঝিম্ বাদলা, আকাশ অন্ধকার। আজ এই মেঘমেতুর সকালে একবার নদীর ধারে বেড়িয়ে আসতে ইচ্ছে করচে—বাঁওড়ের ধারের বেলে মাটির পথ বেয়ে একেবারে কুঁদীপুরের বাঁওড় বায়ে রেখে মোল্লাহাটির খেয়া পার হয়ে, যেতে ইচ্ছে হচ্চে পিসিমার বাড়ী পার্শ্বিমলে বাগান গাঁ। কাল স্মন্দরপুর পর্য্যন্ত বেড়াতে গিয়েছিলুম বৈকালে—ও পথের প্রাচীন বট গাছের সারির দৃশ্য আমি আবাল্য দেখে আস্চি, কিন্তু ও পুরোণো হোল না—যত দেখি ততই নতুন। গাছে গাছে খেজুর পেকেচে, কেয়োঝাঙ্গা গাছের তলায় ব্যাঙের ছাতা গজিয়েচে এই বর্ষায়। আরাম-ডাঙার মাঠে মরগাঙের ওপারে, সবুজ আউশ ধানের ক্ষেত এবং গ্রাম সীমায় বাঁশ বনের সারি মেঘ মেতুর আকাশের পটভূমিতে দেখতে হয়েছে যেন কোন বড় শিল্পীর হাতে আঁকা ল্যাণ্ডস্কেপ্। ক্ষেত্র কলু ওদিক থেকে ফিরচে, হাতে ভাঙা লঠন একটা। বল্লে মোল্লাহাটির হাটে পটল কিন্তে গিয়েছিল।

—পটল না কিনেই ফিরলে যে ?

—কি করবো বাবু, ছ'পয়সা সের দর। একটা পয়সাও লাভ থাক্চে না।

গোপালনগরের হাটেও ওই দর। এবার তাতে আবার পটল জন্মায় নি। যে দুঃস্বপ্ন পড়েচে বাবু!

কলকাতাটা যেন ভুলে গিয়েচি। যেন চিরকাল এই বটের সারি, বাঁগড়, স্মন্দরপুর, সখীচরণের মুদীখানার দোকানে কাটাচি জীবনটা। এদের শাস্ত সঙ্গ আমার জীবনে আনন্দ এনেচে উগ্র ছুরাশার মত্ততা ঘুচিয়ে। সে ছুরাশাটা কি? নাই বা লিখলাম সেটা।

আজ বিকেলে সারা ঈশান কোণ জুড়ে কালবৈশাখীর মেঘ করল এবং ভয়ানক ঝড় উঠল। হাজরী জেলেনী, জগবন্ধু, কালো, জেলি ওরা আম কুড়ুতে গেল বাগানে—কারণ এখনও আম যথেষ্ট আছে, বিহুকে গাছে, চারা বাগানে, মাঠের চারায়।

তারপর ঘন বর্ষা নামলো—আমি আর কালো বৃষ্টির মধ্যে বেয়িয়ে পড়লাম বর্ষান্নাত গাছপালা, বটের সারি, উলুর মাঠের মধ্য দিয়ে বেলোডাঙাতে। সেখান থেকে যখন ফিরি, বর্ষা আরও বেশি, বিদ্যুতের এক একটা শিখা দিক থেকে দিগন্তব্যাপী—আকাশে কালো কালো মেঘ উড়ে চলেচে—আমার মনে হোল আমিও যেন ওদের সঙ্গে চলেচি মহাব্যোম পার হয়ে চিন্তাতীত কোন্ স্তর বিশ্ব—আকাশ মহাকাশে আমার সে গতি—পৃথিবীর সমস্ত বন্ধন, স্তম্ভঃধ্বংস ঘরগৃহস্থালীর বন্ধনমুক্ত আমার আত্মা, সে পায়ের তলায় সারা পৃথিবীর মোহ মাড়িয়ে চলেচে—মহাব্যোমের অঙ্ককার, শূণ্য, মেঘ, ইথার, সমুদ্র ভেদ করে মুক্ত-পক্ষ গতিতে অমিত তেজে চলেচে—দিকপাল বৈশ্রবণের বিশ্ববিজ্ঞানকারী পৌরুষেয় বীর্যে।

নদীতে স্নান করতে নেমে সাতার দিয়ে বৃষ্টি মাথায় চলে গেলুম ওপারে মাধবপুরের চরের ওপর বর্ষা দেখতে—পশ্চিম দিকে পিঙ্গল বর্ণের মেঘ হয়েছে, ওপারের বাঁশবন হাওয়ায় তুলচে—তারপর আমরা আবার এপারে এলাম—ঠিক সন্ধ্যার সময় বাড়ী এলাম।

আজকার সন্ধ্যাটি ঠিক বর্ষাসন্ধ্যা—কিন্তু কেমন যেন নিঃসঙ্গ মনে হচ্ছে। যেন আর কেউ থাকলে ভাল হোত—কত থাকলেই তো ভাল হোত—সব সময় হয় কৈ?

আমার মনে এই যে অনুভূতি—এ অনেক কাল পরে আবার হোল। আমি কত নিঃসঙ্গ নির্জন জীবন যাপন করেচি কতকাল ধরে, লোকালয় থেকে

কতদূরে। কিন্তু ১৯২৩—২৬ সালের পরে ঠিক এ ধরণের বেদনা মাথানো নিঃসঙ্গতার অল্পভূতি আর কখনো হয়নি। আমি এই মনের অবস্থা জানি, চিনি একে—এ আমার পুরাতন ও পরিচিত মনোভাব, কিন্তু ১৯২৬ সালের পরে ভুলে গিয়েছিলাম একে—আবার সেই ফিরে এল।

কাল আবার খুব আনন্দ পেয়েছি। মনের ও ভাবটা কাল আর ছিল না। বিকেলে আমরা কাঁচিকাটার স্কুলের পথে অনেকদূর পর্যন্ত বেড়াতে গেলাম। নীল মেঘে সারা আকাশ জুড়ে ছিল—কাল স্নান করে ফিরবার পথে শিমুল গাছটার ওদিকে আউশ ধানের ক্ষেতের ওপরকার নীল আকাশ দেখে আমি মুগ্ধ হয়ে গিয়েছিলাম—অম্নি মনের ভাব বিকেলেও হয়েছিল। আরামডাঙার ওপারে সেই খাব্রাপোতার দিকের আকাশে একটা নীল পিঙ্গল বর্ণ-শ্রী, সূর্য্য বোধহয় অস্ত যাচ্ছিল, আমরা কিন্তু পেয়ারা গাছটা খুঁজে পাচ্ছিলাম না—আমি আর কালো কত খুঁজলাম, আরামডাঙার পথে মরগাঙের ধারে সেই পেয়ারা গাছটা যে কোথায় গেল!

সন্ধ্যার কিছু আগে কুঠীর মাঠে একটা ঝোপেঘেরা নতুন জায়গার আবিষ্কার করা গেল—এদিকটায় কখনো আসিনি—এমন নিভৃত স্থানটা, খুব আনন্দে নদীতে সাঁতার দিলাম।

এবার বারাকপুরে চমৎকার ছুটিটা কাটল। সমস্ত ছুটিটাই তো এখানে রয়েছি। আর বছর এখানে ১০।১২ দিন মাত্র ছিলাম—বনগাঁয়ে ছিলাম বেশীদিন। এবার এখান থেকে কোথাও যাইনি। এখান থেকে যেতে মনও নেই। কল্কতার জীবনটা যেন ভুলে যেতে বসেছি।

কাল বিকেলে ঘন কালো মেঘ করে বৃষ্টি এল। আমি আর কালো বৃষ্টিমাথায় বেলেডাকার পুল পর্যন্ত বেড়াতে গেলাম। ঝোপঝাপ ভিজে কেমন হয়ে গিয়েচে—গাছপালার গুঁড়ির রং কালো—ডালপাত থেকে জল ঝরে পড়ার শব্দ। তারপরে নদীর জলে স্নান করতে নামলাম—সাঁতার দিয়ে বাঁধাল পর্যন্ত গেলাম। সাঁতার দিয়ে এত আনন্দ পাইনি কোনোদিন এবারকার গরমের ছুটির আগে। কুঠীর মাঠের একটা নিভৃত স্থানে চুপ করে খানিকক্ষণ দাঁড়িয়ে রইলাম—মাথার ওপর কালো মেঘ উড়ে যাচ্ছে—দিক থেকে দিগন্তব্যাপী বিহ্যতের শিখা—শুধু চারিদিকে বৃষ্টির শব্দ;—গাছে পাতায়, ডালপালায়, ঝোড়ে হাওয়া বইচে—নির্জন প্রান্তরের মধ্যে

একা দাঁড়িয়ে থাকার সে অল্পভূতির তুলনা হয় না। তার প্রকাশের ভাষাও নেই—যা খুব ঘনিষ্ঠ, খুব আপন, তাকে কি আর প্রকাশ করা যায় ?

আজ বিকেলে বহুদিন পরে ভারী সুন্দর রাঙা রোদ উঠল। বাঁধালের কাছে নাইতে নেমে মাঝ জলে গিয়ে ওপারের একটা সাঁইবাবলা গাছের ওপর রোদের খেলা দেখছিলাম—কি অদ্ভুত ধরণের ইন্দ্রনীল রং-এর আকাশ, আর কি অপূর্ব সোনার রং রোদের। সকলের চেয়ে সেই সাঁই-বাবলা গাছের বাঁকা ডালাপালা ও ক্ষুদে ক্ষুদে সবুজ পাতার ওপর সোনার রংয়ের রোদের খেলা।...তারই পাশে ওপারের কদম্বগাছটাতে বড় বড় কুঁড়ি দেখা দিয়েছে...শ্রাবণের প্রথমেই ফুলপুষ্পসন্তারে নতশাখ-নীপতরুটী বর্ষাদিনের প্রতীক স্বরূপ ওই সবুজ উলুখড়ের মাঠে স্বমহিমায় বিরাজ করবে—বর্ষার ঢল নেমে ইচ্ছামতী বেড়ে ওর মূল পর্য্যন্ত উঠবে, ঝরা কেশররাজি ঘোলাজলের খরশ্রোতে ভেসে চলে যাবে... উলুবন আরও বাড়বে...আমি তখন থাকবো কলকাতায়, সে দৃশ্য দেখতে আসবো না।

কাল সকালে এখান থেকে যাবো, আজই এখানে থাকার শেষ দিন এ বছরের মত। এবার ছুটিটা কাটল বেশ—কি প্রকৃতির দিক থেকে, কি মানুষের দিক থেকে, অদ্ভুত ভাবে ছুটিটা উপভোগ করা গেল এবার। কলকাতায় থাকলে আমার যে আফ্রিকা দেখবার ইচ্ছে হয়, পাহাড় জঙ্গল দেখবার ইচ্ছে হয়—এখানে দীর্ঘদিন কাটালে কিন্তু আর কোথাও যেতে ইচ্ছে করে না। গাছপালায়, নীল আকাশে, নদীর কালোজলে সাঁতার দিতে দিতে দুপাশের বাঁশবন, সাঁইবাবলার সারি চেয়ে চেয়ে দেখা, সবুজ উলুর মাঠের দৃশ্য, পাখীর অবিশ্রান্ত ডাক—এখানে মনের সব ক্ষুধা মিটিয়ে দেয়। বসে লিখ্‌চি, রাগু এসে বল্লে—দাদা এক কাপ চা খাবেন কি ? সে ওদের রান্না ঘর থেকে চা নিয়ে এসেচে বয়ে। আর কাল থেকে অনবরত বল্চে—দাদা চলে যাবেন না কাল, আর একদিন থাকুন, আপনি চলে গেলে পাড়া আঁধার হয়ে যাবে।

কাল সমস্ত দিনের মধ্যে অন্ততঃ তিন চার বার একথা বলেচে—অথচ ওর ওপর কি অবিচার করেচি এবার—ওকে নিয়ে তাস খেলিনি একটা দিনও—ও খেলতে চাইলেও খেলিনি। ভাল করে কথাও বলিনি।

বল্লে—জন্মাষ্টমীর ছুটিতে আসবেন তো ?

আমি বললাম—যদিই বা আসি, তোর সঙ্গে আর তো দেখা হবে না।

তুই তার আগেই ত চলে যাবি।

এদেব কথা ভেবে কল্কতায় প্রথম প্রথম কষ্ট হবে।

পূজার ছুটিতে বাড়ী এসেচি। রাখামাইন্স গিয়েছিলাম। সেখানে একদিন একা মেঘাঙ্ককার বিকালবেলাতে সার্টকিটার অরণ্যময় জঙ্গলের মধ্যে দিয়ে বেড়িয়ে এসেছিলাম। এই পথে একা যেতে ওদেশের লোকেও বড় একটা সাহস করে না—যখন একটা ছোট পাহাড়ী ঝর্ণায় নেমে রবীন্দ্রনাথের চিঠির একটা অংশ সেখানে রেখে দিচ্ছি, কাল নীরদবাবুদের বিশ্বাস করাবার জ্ঞে, তখন সেখানে কুলুকুলু ঝর্ণার শব্দটা মেঘশীতল বৈকালের ছায়ায় কি সুন্দর লাগছিল! পাহাড়ের saddleটা যখন পার হচ্ছি তখন ঝমঝম করে বৃষ্টি নামল, হাজার হাজার বনস্পতির পাতা থেকে পাতায় ঝরঝর করে বৃষ্টি পড়ছিল। দূরের কালাঝোর পাহাড় মেঘের ছায়ায় নীল হয়ে উঠেচে—ধোঁয়া ধোঁয়া মেঘগুলো জড়িয়ে জড়িয়ে খেলা করচে। কালিদাসের ‘সামুখান আত্রকুট’ কথাটা বার বার মনে পড়ছিল—একা সেই মহুয়াতলায় শিলাখণ্ডে বসে।

একদিন রাখামাইন্স-এর বাংলোর পিছনে বনতুলসীর জঙ্গলে ভরা পাহাড়টার মাথায় অস্তগামী সূর্যের আলোতে বসেছিলাম। ওদিকে রাঙা রোদমাথানো সিদ্ধেশ্বর ডুংরি মাথাটা দেখা যাচ্ছে, এদিকে পাহাড়ের Ledge থেকে দূরে গালুড়ির চারুবাবুর বাংলো দেখা যাচ্ছে—সেদিন কি আনন্দ যে মনে এল—তার বর্ণনা ভাষায় দেওয়া যায় না। সেদিন আবার বিজয়া দশমী—নীল ঝর্ণার ধারে একটা শিলাখণ্ডে একা বসে রইলাম সন্ধ্যাবেলাতে, ক্রমে জ্যোৎস্না উঠল, মহুয়াতলার ঘাট দিয়ে পাহাড়ের দিক দিয়ে ঘুরে আসতে আসতে কুসুমবনীতে উড়িয়া মূদীর দোকানে গেলাম সিগারেট কিনতে। আশ্চর্যের বিষয় এইখানে হঠাৎ নীরদবাবুর সঙ্গে দেখা হোল। তিনি ও তাঁর স্ত্রী Shanger সাহেবের বাংলো থেকে চা খেয়ে ঐ পথে মেঘ-ঢাকা অস্পষ্ট জ্যোৎস্নাতে বেড়াতে বেরিয়েছিলেন—বিজয়ার কোলাকুলি সেই দোকানেই সম্পন্ন হোল। ভাবলাম আজ আমাদের দেশে বাঁওড়ের ধারে বিজয়া দশমীর মেলা বসেচে।



তার পর দিন আমরা গালুডিতে গেলাম ডোঙাতে স্ববর্ণরেখা পার হয়ে— চারুবাবুদের বাংলোতে গিয়ে স্বরেনবাবু, আমি নেকড়েডুংরি পাহাড়ে গিয়ে উঠে বসলাম। চা খেয়ে আশাদের বাড়ী গিয়ে গান শুনলাম আশার— সেখানে বিজয়ার মিষ্টিমুখ না করিয়ে ছাড়লে না। ফিরবার পথে স্ববর্ণরেখাতে ডোঙা পাওয়া গেল না—অপূর্ব জ্যোৎস্নারাত্রী স্ববর্ণরেখা রেলের পুল দিয়ে চন্দ্ররেখা গ্রামের মধ্যে দিয়ে অনেক রাত্রে ফিরলাম রাখামাইনুসের বাংলোতে। নদী পার হবার সময়ে সেই ছবিটা—সেই নদীর ওপরে জ্যোৎস্নাভরা আকাশে একটীমাত্র নক্ষত্র দেখা যাচ্ছে, নীচে শিলাস্তুত স্ববর্ণরেখা, পশ্চিম তীরে ঘন শাল জঙ্গল, দূরে শ্রাম্পুর থানার ক্ষীণ আলো, লাইনের বামদিকের গাছগুলো আধ জ্যোৎস্নায় আধ অন্ধকারে দেখা যাচ্ছে না, কিন্তু ফুটন্ত ছাতিম ফুলের ঘন স্নগন্ধ; বাংলোতে ফিরে এসে দেখি—প্রমোদবাবু এসে বসে আছেন।

পরদিন আমরা সবাই মিলে সাটকিটার জঙ্গলের পথে গেলাম—তারপর দিন গালুডি থেকে চারুবাবু, স্বরেনবাবু ও মেয়েরা এলেন। চারনম্বর খাদানের নীচের জঙ্গলের মধ্যে পিকনিক হোল। বুল্ল, আশা, আমি, চারুবাবু, স্বরেনবাবু ও ভিক্টোরিয়া দত্ত বলে একটা মেয়ে সিদ্ধেশ্বর ডুংরি আরোহন করলাম। একেবারে সিদ্ধেশ্বরের মাথায়। একটা অল্পমধুর বনফলের কাঁচা ডাল ভেঙে নিয়ে পাহাড়ে উঠলাম—তৃষ্ণা নিবারণের জন্যে।

সেদিন আমি স্টেশনের বাহিরে কি একটা গাছের ছায়ায় পাথরের ওপর বসে রইলাম যেমন সেদিন সকালে আমি ও প্রমোদবাবু পিয়ালতলার ছায়ায় প্রকাণ্ড শিলাখণ্ডে শুয়ে বটগাছটার দিকে চেয়ে প্রভাতী আলোতে অজানা কত কি পাখীর গান শুনছিলাম। . . .

বেলা পড়ে এসেচে...বারাকপুরে বসে এইসব কথা লিখতে লিখতে মন আবার ছুটে চলে যাচ্ছে সেই সব দেশে। শীতের বেলা এত তাড়াতাড়ি রোদ রাঙা হয়ে গাছের মাথায় উঠে গেল! বকুলগাছের মাথায়, বাঁশগাছের মাথায় উঠে গিয়েচে রোদ একেবারে।

সেই সুন্দর লতাপাতার গন্ধটা এবার ভরপুর পাচ্ছি—ঠিক এই সময়ে ওটা পাওয়া যায়। কাল এখানে চড়ক তলায় কৃষ্ণযাত্রা হোল, জ্যোৎস্নারাত্রী গাছেপালায় শিশির টুপটাপ ঝরে পড়চে—আমি চালতে তলার পথে একা শুধু বেড়িয়ে বেড়াতে লাগলাম। কি রূপ দেখলাম কাল জ্যোৎস্নাভরা রহস্যময়ী হেমন্ত রাত্রির! কাল নদীর ধারে বিকেলেও অনেকক্ষণ বসেছিলাম।

কাল বিকেলে কুঠীর মাঠে বেড়াতে গিয়ে পাটলবর্ণের মেঘস্তুপের দিকে চোখ রেখে একটা জলার ধারে বসলাম—গাছপালার কি রূপ! সেই যে গন্ধটা এই সময় ছাড়া অল্প সময় পাওয়া যায় না—সেই গন্ধ দিন রাত সকাল সন্ধ্যা আমাদের যেন অভিভূত করে রেখেচে।

আজ ক'দিন বর্ষা পড়েচে—বসে বসে আর কোনো কাজ নেই, খুকুদের সঙ্গে গল্প করছি, কাল সারাদিনই এইভাবে কেটেচে, তবুও কাল নদীতে এপাড়ার ঘাট থেকে ওপাড়ার ঘাটে সাঁতার দিলাম, একটু ব্যায়ামের জন্তে। আজ সকালে নদীর ঘাটে ভোরবেলা গিয়ে মেঘমেঘুর আকাশের শোভায় আনন্দ পেলাম। এই শিমূল গাছগুলো আমাদের এদেশের নদীচরের প্রধান সম্পদ! এগুলো আর সাঁই বাবলা না থাকলে ইচ্ছামতীর তটশোভা অনেক পরিমাণে ক্ষুণ্ণ হোত।

আজ সকালে নদীর ঘাটে গিয়ে চারিদিকের আকাশে চেয়ে চেয়ে দেখলাম মেঘ অনেকটা কেটেছে—আকাশের নীচে একটু একটু আলো দেখা যাচ্ছে—বোধহয় ওবেলা আকাশ পরিষ্কার হয়ে যাবে। মনটা তপ্ত নির্মল আকাশ ও প্রচুর সূর্যালোকের জন্তে হাঁপাচ্ছে—কাকাদের শিউলি গাছটার দিকে চেয়ে দেখছি গাছপালার স্বাভাবিক প্রভাতী রং ফিরে এসেচে—সে ঘসা কাচের মত রং নেই আকাশের।...কিন্তু একটু পরেই ঘন মেঘে সব ঢেকে দিলে।

আমি আবিষ্কার করেছি আমাদের দেশের প্রথম হেমস্তের সেই অপূর্ব সুগন্ধটা প্রস্ফুটিত মরুচে-লতার ফুলের গন্ধ। হঠাৎ কাল বিকেলে আমি এটা আবিষ্কার করেছি। কুঠীর মাঠে আজ স্নানের পূর্বে বেড়াতে গিয়ে বনে বনে খানিকটা বেড়ালাম, লক্ষ্য করে দেখলাম এই সময়ে কত কি বনের লতাপাতায় ফুল ফোটে। মরুচে-লতা তো পুষ্পিত হয়েছেই, তা ছাড়া মাখম-সিমের গোলাপী ফুলের দল ঘনসবুজ পাতার আড়ালে দেখা যাচ্ছে, কেবোঝাঁকার লতায় ক্ষুদে ক্ষুদে ফুল ফুটেচে, ফুল বলে মনে হয় না, মনে হয় যেন হৃদে পুষ্পরেণু,—কি ভুবভূরে মিষ্টি গন্ধ, ডালের গায়ে পর্য্যন্ত ফুল ফুটেচে। ছাতিম ফুলের এই সময়, কুঠীর মাঠের জঙ্গলে একটা নবীন সপ্তপর্ণ তরুর দেখা মিলল, কিন্তু ফুল হয়নি তাতে। মেটে আলু তুলবার বড় বড় গর্ত বনের মধ্যে, এক জায়গায় একটা খুব বড় কেবোঝাঁকার ঝোপকে কেটে ফেলেচে দেখে

আমার রাগ ও দুঃখ দুইই হোল, নিশ্চয় যারা মেটে আলু তুলতে এসেছিল, তাদেরই এই কাজ। সজীব পুষ্পিত গাছ—কারণ এই সময় কেবোবাঁকার ফুল হয়—কেটে ফেলা যে কতদূর হৃদয়হীন বর্করতা, তা আমাদের দেশের লোকের বুঝতে অনেকদিন যাবে। সেবার অমনি যুগল কাকাদের বাড়ীর সামনের কদমগাছটা কালো বিক্রী করে ফেললে তিন টাকায়, জ্বালানি কাঠের জন্তে। এমন কি কেউ কোথাও শুনেচে? কদমগাছ, যা গ্রামের একটা সম্পদ, যে পুষ্পিত নীপ সকল বৈষ্ণব কবিকুলের আশ্রয় ও উপজীব্য—সামান্য তিনটে টাকার জন্তে সে গাছ কেউ বেচে? শুধু আমাদের দেশেই এ ধরণের ঘটনা সম্ভব হয়, সুন্দরকে দেখবার চোখ থাকলে, ভালবাসবার প্রাণ থাকলে এ সব কি আর হোত ?

কাল বিকেলে অল্পক্ষণের জন্ত সোনালী রাঙা রোদ উঠল—বেলেডাঙার পথে যেখানে একটা বাব্বা গাছের মাথায় একটা বুনো চালকুমড়া হয়ে আছে, ঐখানটাতে বসলুম—কতদিনের মেঘমেঘুর আকাশের পরে আজ রোদ উঠেচে, এ যেন পরম প্রার্থিত ধন !

এক জায়গায় সৌদালি ফুল ফুটে থাকতে দেখলাম মাঠের মধ্যে। কান্তিক মাসে সৌদালি ফুল, কল্পনা করতেই পারা যায় না। কেলেকৌড়ার ফুলও এসময়ে হয়।

কাল মেয়েরা চোদ্দ শাক তুললে, চোদ্দ পিদিম দিলে—খুকুদের বোধন-তলায় বড় একটা প্রদীপ দিয়েছিল, বিলবিলের ধারে, উঠানের শিউলি তলায়। বারাকপুরে চোদ্দ পিদিম দেওয়া দেখিনি কতকাল !

আজ বিকেলে খুকুদের কুঠীর মাঠে বেড়াতে নিয়ে গেলাম। পুরোণো কুঠীর হাউজ্ঘরে ঘোর জঙ্গল হয়ে গিয়েচে—কত কি বনের লতা হয়ে আছে—খুকুর তা দেখে আনন্দ উৎসাহ দেখে কে! একটা লতার মধ্যে কি ভাবে ঢুকে সে খানিকটা ছললে, মাঠে গিয়ে ছুটোছুটি করলে—আমায় কেবল টেঁচিয়ে বলে—দাদা, এটা দেখুন, ওটা দেখুন। তারপর ফিরে এসে ছেলেদের নিয়ে গোপালনগরে গেলাম কালী পূজোর ঠাকুর দেখাতে। হাজারীর ওখানে অনেক রাত হয়ে গেল তাস খেলতে বসে—অনেক রাত্রে বাড়ী ফিরি।

পরদিনও আবার কুঠীর মাঠে যাওয়ার কথা ছিল—ওরা সবাই গেল, কিন্তু মনোরমার ভাই কালো কুঠীর জঙ্গলে হাঁটুটা বেজায় কেটে ফেললে, তার

ফলে সকলেরই বেড়ানো বন্ধ হোল। রাত্রে খুকুকে অনেক গল্প শোনালাম অনেক রাত পর্যন্ত।

আজ সকালে ভ্রাতৃদ্বিতীয়া। রায়বাড়ীর পাঁচী কাঁদচে, ওর দাদা আশু মাসখানেক হোল মারা গিয়েচ, সেই জন্তে। পাড়াগাঁয়ের মেয়ের ধরণে ‘ও ভাই রে, বাড়ী এসো’, বলে চৈচিয়ে কাঁদচে। কিন্তু আমার মনে সত্যিই দুঃখ হোল ওর জন্তে। পাঁচীকে এ গাঁয়ের সব লোকেই ‘দূর, ছাই’ করে, সবাই ঘেমা করে—আজ পাঁচী ওদের সবারই বড় হয়ে গিয়েচে। তবুও তার প্রতি সহানুভূতি নেই কারুর—কান্না শুনে পিসিমা বলচেন, মুখ বেঁকিয়ে—‘আহা! মনে পড়েচে বুঝি ভাইকে!’

নৌকা করে বনগাঁয়ে যাচ্ছি সকালবেলা। চালুকীর ঘাটে এসেচি—এবার এদিকের গড় ভেঙেচে। কেমন নীল রং-এর একটা পাখী বাবলা গাছে বসে শিস দিচ্ছে। নৌকার ছলুনিতে লেখার বড় ব্যাঘাত হচ্ছে। নীল কলমীর ফুল, হল্দ্দে বড় বড় বন ধুঁধুলের ফুল ফটেচে। আর এক রকম কি লতায় কুচো কুচো হল্দ্দে ফুল ফটে চালতেপাতার বাঁকে ঝোপের মাঝে আলো করে রেখেচে—সে যে কি অপূর্ব সুন্দর তা ভাষায় বর্ণনা করা যায় না। এই ফুলের নাম জানি নে, যেন হল্দ্দে নক্ষত্র ফটে আছে—ছোট ছোট ক্ষুদে ক্ষুদে, যেন নববধূর নাকছাবি। কার্ত্তিকের শেষে এই ফুলটা ফোটে জেনে রাখলাম, আবার আস্চে বছর দেখতে আসবো। এতদিন এ ফুল আমার চোখে পড়েনি। হেমন্তে এত বনের ফুলও ফোটে এদেশে! ঝোপের মাথা আলো করে সবুজ পাতালতার মধ্যে তিৎছন্নর ফুল, ক্ষুদে ক্ষুদে ঐ অজানা ফুল, মাঝে মাঝে বড় বড় বনকলমীর ফুল—কি রূপ ফটেচে প্রভাতের। কাশফুল তো আছেই মাঝে মাঝে, নদী তীরের কি অপূর্ব শোভা এখন—তা ছাড়া পুষ্পিত সপ্তপর্ণও মাঝে মাঝে যথেষ্ট।

ঐ অজানা ফুলটা মাঝিকে দিয়ে ঝোপ থেকে পাড়িয়ে আনলাম—দশটা করে ছোট ছোট পাপড়ি—ছটা করে পরাগ কোষ বা গর্ভকেশর প্রত্যেকটাতে। জলে কচুরীপানার ফুল ফটেচে, অনেকটা কাঞ্চন ফুলের রং কিন্তু দেখতে বড় চমৎকার—একটা লম্বা সরস সবুজ ডাঁটায় থোকা থোকা অনেকগুলো ফুল—ঐ সুন্দর ফুলের জন্তেই কচুরীপানা সৃষ্টির মধ্যে অক্ষয় হয়ে থাকবে—ভগবানের কাছে সুন্দরের সার্থকতা অমর—তার

utility-টা গৌণ। মাঝি গল্প করছিল এবার অনেকে ইছামতীতে মুক্তা পেয়েছে ঝিনুক তুলে। এসময়ে বগ্গে বুড়া গাছেও শাল মঞ্জরীর মত দেখতে সবুজ রং-এর ফুল ফুটেচে—আর একপ্রকার জলজ ঘাসের নীল ফুল ফুটেচে—এর রং ঠিক তিসির ফুলের মত নীল। এক একটা ছোট গাছের মাথায় ছোট ঝোপে—ঐ ক্ষুদে ক্ষুদে অজানা ফুল ফুটে আলো করচে।

কাল রাত্রে কি একটা কথা মনে এল—তার শব্দ পরম্পরায় মনে একটা অপূর্ণ অনন্তভূত ভাবের উদয় হোল। শব্দেরও ক্ষমতা আছে। প্রমথবাবু বলেন, নেই, এই নিয়ে প্রমথ চৌধুরীর সঙ্গে একদিন তর্ক করেছিলাম।

আজ সকালে উঠে দেখি আকাশ একেবারে নির্মেষ, নির্মল। দুঃখ হোল এই ভেবে যে আমিও বারাকপুর থেকে এলাম আকাশও গেল পরিষ্কার হয়ে! আজ এই জগ্গে মনটা কেমন খারাপ হয়ে গেল—বারাকপুরে এমন নীল আকাশটা দেখতে পেলাম না! খুকুর গাওয়া সেই সেদিনকার গানটা বার বার মনে আসতে লাগল—

মোর ঘুম ঘোরে এলে মনোহর

নমোনমঃ, নমোনমঃ, নমোনমঃ

কাল কলকাতা থেকে এসেছি। বেশ ভাল লাগল আজ সকালে খয়রামারির মাঠ ও বন। বনে সাদা সাদা সেই কুচো ফুল—শীতকালে অজস্র ফোটে এদেশের বনে জঙ্গলে—নদীয়া ও যশোর জেলার সর্বত্র দেখেছি এসময়ে। কলেজে পড়বার সময় যখন প্রথম প্রথম মামার বাড়ী যেতাম—তখন ভবানীপুরের মাঠের ও দিকের পথ দিয়ে যাবার সময়ে দেখতাম একটা বড় ঝোপে ওই ফুলটা ফুটে থাকত। কোলা এসেছিল আমার সঙ্গে আমার বাসায়—এক সঙ্গে বাস্তু, বিছানা বেঁধে বাসা থেকে রওনা হলাম। অনেকদিন পরে ওকে দেখে মনে বড় আনন্দ পেয়েছি কাল।

বড়দিনের ছুটিতে অনেককাল বারাকপুরে আসিনি—এবার এলাম। শীতের পল্লীপ্রান্তের কি শোভা, তা এতদিন ভুলে ছিলাম। বিকেলে আজ যখন বেলেডাঙ্গা বেড়াতে গেলাম—বনের কোলে সর্বত্র ফুটন্ত ধূরফুলের প্রাচুর্য ও শোভা দেখে মনে হোল, সেদিন মনি বোসের আড্ডায় যারা বলছিল যে, বাংলাদেশের বনে ফুল তেমন নেই, তারা বাংলাদেশ সম্বন্ধে

কতটুকু জানে? ক্রোকাস, মার্গারেট, কি কর্ণফ্লাওয়ার এখানে ফোটে না বটে—কিন্তু যদিকে চোখ তাকাই, সেদিকেই এই যে প্রস্ফুট নীলাভ শুভ্রবর্ণের ধূরফুলের অপূর্ব সমাবেশ—এর সৌন্দর্য্য কম কিসে? কি প্রাচুর্য্য এই ফুলের—ঝোপের নীচেও যে ফুল—সেখান থেকে থাকে থাকে উঠেচে ঝোপের মাথা পর্য্যন্ত আগাগেড়া ভর্তি। এত নীচু ও অত উঁচুতে ও ফুল কি করে গেল তাই ভাবি। ঋতুতে ঋতুতে কত কি ফুল ফোটে আমাদের দেশের বনে ঝোপে, আমার দুঃখ হয় এর সন্ধানও কেউ রাখে না, নাম পর্য্যন্ত জানে না। অথচ সুন্দরকে যারা ভালবাসে—তারা বাংলার নিভৃত মাঠ, বনঝোপের এই অনাদৃত অথচ এই অপূর্ব সুন্দর ফুলকে তারা কখনো ভুলবে না।

বেলেডাঙ্কায় গিয়ে সেকরার দোকানে বসে গল্প করলাম। ছোট্ট খড়ের ঘরে দোকান। বাঁশের বেড়া। ননী সেকরার মেজ ছেলে বিড়ি বাঁধে—তার দোকান ঘরের সামনে একটা নতুন কামার দোকান হয়েছে—সেখানে হাল পোড়াচ্ছে। হালের চারধারে ঘুঁটের সনসনে আগুনে অনেক লোক বসে আগুন পোয়াচ্ছে। দোকানের পেছনের বেড়ায় ধূরফুল ফুটে আছে যদিকে চাই সেদিকেই এই ফুল—এক জায়গায় মাঠের মধ্যে থাকে থাকে কতদূর পর্য্যন্ত উঠেচে এই ফুলের ঝাড়। রাঙা রোদ ও রাঙা সূর্য্যাস্ত শীতকালের নিঃস্ব। এমন অস্ত আকাশের শোভা অত্র সময় দেখা যায় না।

যুগল বোষ্টমের সঙ্গে দেখা ফিরবার পথে—সে বললে তার চলচে না আমি তার (U.T. পড়ববার ব্যবস্থা করে দিতে পারি কিনা।

কাল আবার ক্যাম্প টুলটা নিয়ে কুঠীর মাঠের নিভৃত বনঝোপের ধারে গিয়ে বসলুম। ধূরফুল কি অপূর্ব শোভাতেই ফুটেচে। পাখী এত ভালবাসি কিন্তু কাক ছাড়া কল্কাতাতে আর কোনো পাখী নেই—এখানে কত কি অজস্র পাখীর কলকাকলি, গাছপালা বন ঝোপের কি সীমারেখা, যেন নৃত্যশীল নটরাজ, ওপারের কাশচরে শিমুল গাছটা দেখা যাচ্ছে, নীলাকাশে রৌদ্র ঝলমল করচে। একটা বাব্বালাগাছের ফাঁক দিয়ে চাইলে কোন অজানা দেশের কথা মনে আনে—শীতের অপরাহ্নে বাংলার এই নিভৃত পল্লীপ্রান্তে যে কি সৌন্দর্য্য ভরে থাকে, চোখে না দেখলে সে বোধহয় নিজেই বিশ্বাস করতুম না। আর দেখলাম এক

জায়গায় বসে থাকলে অনেক বেশী আনন্দ পাওয়া যায়। ভাল করে সে জায়গায় রস অনেক বেশী পাওয়া যায়—কোথায় লাগে গালুডি, কোথায় লাগে কাশ্মীর, কোথায় লাগে ইটালি—আমার মনে কতটুকু আনন্দ ও চিন্তা সে জাগাতে পারে এই যদি প্রাকৃতিক দৃশ্যের উৎকর্ষের পরিমাপক হয়—তবে আমি নিঃসন্দেহে বলতে পারি ইচ্ছামতী তাঁরের এই নিভৃত বনঝোপ, ধুরফুল-ফোটা মাঠের, রাঙা বোদখানা শিমুলগাছের, বনপাখীর এই কল কাকলির অপরূপ সৌন্দর্যের তুলনা নেই। যে পরিদৃশ্যমান আকাশের এক-তৃতীয়াংশে দেড় লক্ষ Super Galaxy আছে এখানে বসে বসে ভেবে দেখলুম; সে সব বড় বিশ্বের মধ্যে কি আছে না আছে জানি নে—তবে এখানে যা আছে, সেখানেও তাই আছে বলে মনে হয় What is in microcosm, is also in macrocosm—সে সব দার্শনিক আলোচনা এখন থাকুক. বর্তমানে এই সূর্যহৎ বিশ্বের এককোণে ধুরফুল-ফোটা বনঝোপের পাশে ক্যাম্পটলটা পেতে বসে একটু আনন্দ পাচ্ছি পাই।

অনেক বেলা গেলে কুঠীর মাঠে বেড়াতে গেলাম। একটু আগেই যেতাম, খুব বসে ছিল, বললে একটু দেরী করুন, আরও বেলা যাক। খুব জোর পায়ে হেঁটে পৌঁছে গেলাম বেলেডাঙার সেকরার দোকানে—মধ্যে এই ধুরফুল-ফোটা বিশাল মাঠটা যেন এক দৌড়ে পার হয়ে গেলাম। তারপর ননী সেকরার কত গল্প শুনলাম বসে বসে। তার ন'টা গরু ছিল, আর বছর ফাগুন মাসে একে একে সব ক'টা মরে গেল গাল-গলা ফুলে। দোকানের সামনে একজন লোক বসে হাল পোড়াচ্ছে আর অত্যন্ত খেলো ও বাজে সিগারেট টানচে। আমি বললাম, ও খেয়ো না, ওতে শরীর খারাপ হয়। বললে, আমি খাইনে বাবু, এক পয়সায় সেদিন হাটে কিনলাম ছ'টা—তাই এক একটা খাচ্ছি।

সন্ধ্যার অন্ধকার ঘন হয়েছে—কুঠীর মাঠের সূঁড়ি জঙ্গলের পথটা অন্ধকার হয়ে গিয়েছে, পথ দেখা যায় না। নদীর ধারে এসে দাঁড়ালাম আমাদের ঘাটে—ওপারে একটা নক্ষত্র উঠেছে—সেটার দিকে চেয়ে কত কথা যে মনে পড়ল! ঐ Super Galaxy-দের কথা—বিরাট Space ও নৌহারিকাদের কথা—এই বনফুল ও পাখীদের কথা। কতক্ষণ সেখানে চুপ করে দাঁড়িয়ে রইলাম—এই নক্ষত্রটার সঙ্গে যেন আমার কোন্ অদৃশ্য যোগ-সূত্র রয়েছে—বসে বসে এই শীতের সন্ধ্যায় এই ইচ্ছামতীতে কত কি ঘটেছিল পুরোনো দিনে, সে কথা মনে এল।

গোবীর কথা মনে এল—তারপর অন্ধকার খুব ঘন হয়ে এল। আমি ধীরে

ধীরে উঠে বাঁশবনের পথ দিয়ে বাড়ী চলে এলাম। আজ ছপুর্বে কুঠীর মাঠে বেড়াতে গিয়ে আমার সেই পুরোনো জায়গায় বসলাম—সেই সেখান থেকে কুঠীর দেবদারু গাছটা দেখা যায়—কি অপরূপ শোভা যে হয়েছে সেখানে ফুটন্ত ধূরফুলের, তা না দেখলে শুধু লিখে বোঝানো যাবে না। এই যে আমি লিখছি, আমারই মনে থাকবে না অনেক দিন পরে,—ওই ছবিটা অস্পষ্ট হয়ে যাবে মনের মধ্যে। এরকম হয় আমি জানি—তবুও আজই দেখেছি, তাই নবীন অনুভূতির স্পর্শায় জোর করে বলছি বনফুলের শোভার এ প্রাচুর্য্য আমি দেখিনি। বিহারে নেই, সিংভূমে নেই, নাগপুরে নেই—এই বাংলা দেশের Sub tropical বনজঙ্গল ছাড়া গাছপালার এই ভঙ্গি ও ফুলের এই প্রাচুর্য্য কোথাও সম্ভব নয়। কেন যে লোকে ছুটে যায় বম্বে, দিল্লী, কাশী, দেওঘর তা বলা কঠিন। বাংলা দেশের এই নিভৃত পল্লী প্রান্তের সৌন্দর্য্য তারা কখনো দেখেনি—তাই।

আজ বিকেলে টুনি, কাতু, জগো, বুধো এদের সঙ্গে কুঠীর মাঠে বেড়াতে গিয়ে বনঝোপের ধারে টলটা পেতে পেতে বসলাম। রোদ ক্রমে রাঙা হয়ে গেল—একটা ফুল-ফোটা ঝোপের ধারে কতক্ষণ বসে রইলাম। তারপর একটা নরম কচি ঘাসে-ভরা জলার ধারে মুক্ত সাক্ষ্য হাওয়ায় ছেলেমেয়েদের সঙ্গে ছুটোছুটি খেলা করলুম কতক্ষণ—আমি এই সবই ভালবাসি, সাথে কি কলকাতা বিষ লাগে! এই শীতকালের সন্ধ্যায় এতক্ষণ ধোঁয়ায় সারা কলকাতা শহর ভরে গিয়েচে—আর এখানে কত ডাছক, জলপিপি, দোয়েল, শালিকের আনন্দ কাকলী, কত ফুটন্ত বনফুলের মেলা, কি নির্মল শীতের সন্ধ্যার বাতাস, কি রঙীন অস্তদিগন্তের রূপ, শিরীষ গাছে কাঁচা স্ফুটী বুল্চে, তিত্তিরাজ গাছে কাঁচা ফলের খোলো ছুল্চে, জলার ধারে ধারে নীল কলমী ফুল ফুটেচে। মটর শাক, কচি খেসারি শাকের শ্যাম সৌন্দর্য্য—এই আকাশ, এই মাঠ, বন, এই সন্ধ্যায়-ওঠা প্রথম তারাটী—জীবনে এরা আমার প্রিয়, এদেরই ভালবাসি, এদেরই আবালা আমার অতি পরিচিত সাথী—এদের হারিয়ে ফেলেই তো যত কষ্ট পাই!

বিকেলে আজ বেলডাঙার মরগাঙের আগাড়ে একটা নিরিবিলা জায়গায় এক বোঝা পাকাটির ওপর গিয়ে বসে ওবেলার সেই কথাটা চিন্তা করছিলাম—



ভগবান তাঁর পূজা না পেলে প্রতিহিংসা-পরায়ণ হয়ে ওঠেন না—ওঁর পূজার সঙ্গে ভয়ের কোনো সম্পর্ক নেই—তাঁর যে পূজা, সে শুধু প্রেমের ও ভক্তির, এই পাড়ারগাঁয়ে এদের সে কথা বোঝানো শক্ত। পূজার ঘরে বসে আজ ওবেলা যখন শালগ্রাম পূজা করছিলাম, তখনই আমার মনে হোল, এই ঘরের বন্ধ ও অমুক্তির পরিবেষ্টনীর মধ্যে ভগবান নেই, তাঁকে আজ বিকেলে খুজবো স্নন্দরপুরের কিংবা নতিডাঙ্গার বাঁওড়ের ধারে মাঠে, নীল আকাশের তলায়, অন্তবেলার পাখীদের কলকাকলীদের মধ্যে। তাই ওখানে গিয়ে বসেছিলাম।

বসে বসে কিন্তু আজমাবাদের কথা মনে এল। এই পৌষ মাসে ঠিক এই সময়ে আমি সেখানে যেতুম, ঠিক এই বিকেলে রাঙা বোদের আভা মাখানো তিন টাঙার বনের ভেতর দিয়ে বটেশ্বরনাথ পাড়াডের এপারে যেতুম ঘোড়া ছুটিয়ে বেড়াতে—কলাইক্ষেত থেকে কলাইয়ের বোঝা মাথায় মেয়েরা আসতো, গঙ্গার বুকে বড় বড় পাল তুলে নৌকা চলে যেত মুঙ্গেরের দিকে, ভীমদাসটোলায় আগুনের চারিধারে বসে গামেব লোকে গল্পগুজব করতো। ফিরবার পথে বাঁধের ওপর ওঠবার সময় দেখতুম চারিধারের মাঠ কুয়াসায় ভরে গিয়েচে—সেই ছবিগুলো মনে হল। তার চেয়ে যে আমাদের দেশের ভূমিশ্রী, এই নির্জন শান্তিতে ভরা অপরূপ স্নন্দর পল্লীপ্রান্ত, ওই মরগাঙের শুকনো আগাডের নতুন কচি ঘাসের ওপর চরে বেড়াচ্ছে যে গরুর দল, ওই দূরের বটগাছটা, মাঠের ওপাকের বনফুল ফোটা বনঝোপ, এই ডাছক পাখীর ডাক, গ্রামসীমার বাঁশবন—এসব যে রূপের বিস্তে নিঃস্ব তা নয়, বরং আমার মনে হয় এরা বিহারের সেই বৃক্ষলতাবিরল প্রান্তরের চেয়ে অনেক সমৃদ্ধতর, কিন্তু সেখানে একটা জিনিস ছিল, যা বাংলাদেশের এ অঞ্চলে অন্ততঃ নেই—Space ! Wide open space ! দূরবিসর্পী দিখলয়, দূরত্বের অহুভূতি, একটা অদ্ভুত মুক্তির আনন্দ—এ যেমন পেয়েছিলাম ইসমাইলপুরের দিয়ারাতে ও আজমাবাদে—আর কোথাও তা মিলবে না।

আজ খুব দুপুরে খানিকটা বসে রইল—আমি মাঠে বেড়াতে যাবো বলে গোপালনগরে গেলাম না। মরগাঙের আগাড়ে আজও অনেকক্ষণ গিয়ে বসেছিলাম। বেলেডাঙার পুলের কাছে ফিরবার পথে কি একটা বনফুলের সুগন্ধ বেরুল—খুঁজে বার করে দেখি কাঁটাওয়ালী একটা লতার ফুল।

লতাটা আমি চিনি, নাম জানিনে। ননী সেকরার দোকানের কাছেই ঘোপটা। ননী কাদা দিয়ে রূপো গালাবার মুচি গড়চে। ওদের সঙ্গে খানিকটা গল্প করবার পরে নদীর ধারে এসে খানিকটা দাঁড়ালাম—ওপারে কালপুরুষ উঠেচে, নীল Rigolএর আলো নদীর জলে পড়েচে। নিস্তরঙ্গ সন্ধ্যায় নিঃসঙ্গ একা দাঁড়িয়ে ওপারের তারাটার দিকে চেয়ে থাকবার যে আনন্দ, যে অনুভূতি, তার বর্ণনা দেওয়া যায় না—কারণ অনুভূতির স্বরূপ তাতে বর্ণিত হয় না, অথচ কতকগুলো অর্থহীন কথা দিয়ে বর্ণনা করতে গিয়ে অনুভূতির প্রকৃতি সম্বন্ধে লোকের মনে ভুল ধারণা জন্মিয়ে দেওয়া হয়। এ অব্যক্ত, অবর্ণনীয়।

আজ এই সন্ধ্যাতেই একটা উল্কাপাত দেখলাম—ওপাড়ার ঘাটের মাঝামাঝি আকাশে—প্রথমে দেখা, তার পর নীল ও বেগুনি রং হয়ে গেল জ্বলতে জ্বলতে—জলে ছায়া পড়ল। আমি অমন ধরণের উল্কাপাত দেখিনি।

আজ এখানে বেশ শীত পড়েচে। ছুপুরের আগে ফল ফোটা মাঠে বেড়াতে যাওয়া আমার প্রতিদিনের অভ্যাস। আজ আকাশ কি অদ্ভুত ধরণের নীল! কুঠীর সেই দেবদারু গাছটা, কানাই ডোঙ্গার গাছ, শিরীষ, তিস্তিরাজ কি সুন্দর যে দেখাচ্ছে নীল আকাশের পটভূমিতে! মাঝে মাঝে দু'একটা চিল উড়েচে বহুদূরের নীল আকাশের পথে। এসব ছবি মনে করে রাখবার জিনিস। কি আনন্দ দেয়, কত অননুভূত ভাব ও অনুভূতির সঙ্গে পরিচিত করে এরা। প্রকৃতির একটা বৈশিষ্ট্য এই যে, নির্জজন স্থানে প্রকৃতির এই রূপ মনে নতুন ধরণের অনুভূতি ও চিন্তা এনে দেয়। এ আমি জীবনে কতবার দেখলাম—তার প্রমাণ পাই প্রতি সন্ধ্যায় আজকাল কুঠীর মাঠ থেকে ফিরবার পথে, নিভৃত সন্ধ্যায় আমাদের ঘাটে দাঁড়িয়ে ওপারের চরের আকাশে প্রথম-ওঠা ছ'চারটা নক্ষত্রের দিকে যখন চেয়ে থাকি তখনই বুঝতে পারি। যে দেবলোকের সংবাদ তখন আমার মনের নিভৃত কন্দরে ঐ রিগেল বা অণু অজানা নক্ষত্র বহন করে আনে সে গহন গভীর উদাত্ত বাণী অমৃতের মত মনকে বৈচিত্র্যময় করে, সাধারণ পৃথিবীর কত উর্ধ্ব লোকের আয়তনে মনকে উঠিয়ে নিয়ে যায় একমুহূর্তে। এ একটা বড় সত্য। বড় বড় সাধক, কবি, দার্শনিক, স্বরশ্রী, চিত্রকর, শিল্পী—যাদের চিন্তা আর ভাব নিয়ে কারবার, এসত্যটা তাঁদের অজ্ঞাত নয়।

এজন্তেই এমার্সন বলেছেন, “Every literary man should embrace Solitude as a bride”। এ সম্বন্ধে বিখ্যাত ঔপন্যাসিক হিউ ওয়ালপোল গত জুলাই মাসের Adelphi কাগজে বড় চমৎকার একটা প্রবন্ধ লিখেছেন। নিরীকাসিত দাস্তে বলেছিলেন, ‘কি গ্রাহ্য করি আমি, যতক্ষণ আমার মাথার ওপর আছে নীল আকাশ আর অগণ্য তারকা লোক’। জার্মান মিষ্টিক এক্‌হার্ট কখনো লোকের ভিড়ে বা শহরের মধ্যে থাকতে ভালবাসতেন না— তাঁর “Our heart’s brotherhood” গাথাগুলির মধ্যে অনেক বার উল্লেখ আছে এ কথা।

ও কথা যাক। আমি নিজের একটা ভুল আবিষ্কার করেছি, যাকে এতদিন বলে এসেছি ধূরফুল, তার আসল নাম হোল এডাক্সির ফুল। ধূরফুল লতার ফুল, বিলবিলেতে ছিল, সাদা বড় বড় ফুল ফুটত—পুঁটিদিদি বলছিল। আজকাল আর দেখা যায় না। শ্রামলতা, ভোমরালতার ফুলও এসময় ফোটে। আগে নাকি আমাদের পাড়ার ঘাটে শ্রামলতার ফুল ফুটে বৈকেলের বাতাসকে মধুর অলস গন্ধে ভরিয়ে দিত—আজকাল সে লতাও নেই, সে ফুলও নেই।

কাল সন্ধ্যার পরে অন্ধকারে কুঠীর মাঠে বেড়াতে বেড়াতে রঙীন অস্ত-আকাশের দিকে চেয়ে অন্ধকার আকাশের পটভূমিতে কত বিচিত্র ধরণের গাছপালার সীমারেখা দেখলাম—এদের এখানে যা রূপ, তা এক যদি ভারতবর্ষের মধ্যে মালাবার উপকূলে আছে, এবং আসাম এবং হিমালয়ের নিম্ন অঞ্চলের অধিত্যকায় থাকে—আর কোথাও সম্ভব বলে মনে হয় না।

ছোট এডাক্সির ফুল সকলের ওপরে টেক্কা দিয়েছে। কাল যখন মাঠের মধ্য দিয়ে বেলেডাক্সার গোয়ালপাড়ায় গেলাম—উঁচুনীচু মাটী ও ডাঙা পাশে রেখে, ফুলফোটা বড় বড় বনঝোপের নীচে দিয়ে—কত কি পাখী বেড়াচ্ছে ঝোপের নীচে শুকনো পাতার রাশির ওপরে। কাঁটা-ওয়ালী সেই সবুজ লতাটায় থোকা থোকা ফুল ফুটেছে—খুকু বলে, বনতারা। —নামটী ভারী সুন্দর, কিন্তু ঠিক বুঝতে পারা গেল না ও কোন লতার কথা বলছে—আর চারিদিকে অজস্রসম্ভাবে ঢেলে-দেওয়া ছোট এডাক্সির ফুল। বনে ঝোপে, বাবলাগাছের মাথায়, কুলগাছের ডালে, বেড়ার গায়, ডাঙাতে—যেদিকেই চাই সেই দিকে ওই সাদা ফুলের রাশি। আমি বাংলায়ও বনের এমন রূপ আর কখনো দেখি নি। যদি জ্যোৎস্না বাত্রে এই রূপ দেখতে পেতাম!

এ ক’দিন ছিলাম কলকাতায়। ওরিয়েন্টাল সোসাইটির প্রদর্শনীতে এবার নন্দলাল বহুর ছু’খানি বড় সুন্দর ছবি দেখে অত্যন্ত আনন্দ পেয়েছি। খুকু ও জাহ্নবীর মেয়ে খুকী সঙ্গে ছিল—তারাও দেখেছে, তবে নন্দবাবুর ছবির তারা আর কি বুঝবে? ওদের দেখালুম বায়োস্কোপ, জু, সার্কাস—আর এখানে ওখানে নিয়ে বেড়ালুম। একদিন সজনীদাসের বাড়ী, একদিন নীরদের বাড়ী, একদিন নীরদ দাসগুপ্তের ওখানে। দুঃখ হোল যে এখানে এসময়ে সুপ্রভা নেই।

কাল নোকায় বনর্গী থেকে এলাম। কি অদ্ভুত রূপ দেখলাম সন্ধ্যায় নদীর। শীতও খুব। অন্ধকার হয়ে গেল। কলকাতার হেঁচৈ-এর পরে এই শাস্ত সন্ধ্যা, ফুল-ফোটা বন, মাঠ, কালো নিখর নদীজল মনের সমস্ত সংকীর্ণ অবসাদ দূর করে দিয়েছে। চালতেপোতার বাঁকে বনের মাথার প্রথম একটা তারা উঠেছে—কতদূরের দেশের সংবাদ আলোর পাখায় বহন করে আনচে আমাদের এই ক্ষুদ্র, গ্রাম্যানদীর চরে—আমার মনের নিভৃত কোণে।

ঘাটে যখন নামলুম, তখন খুব অন্ধকার হয়ে গিয়েছে। খুকু ও আমি জিনিসপত্র নিয়ে বাঁশবনের অন্ধকারে ভয়ে ভয়ে বাড়ী এলুম, খুকু তো একবার ভয়ে চীংকার করে উঠল কি দেখে। ভয়ের কারণ এই যে এসময়ে আমাদের দেশে বাঘের ভয় হয়।

ছপুরে কুঠীর মাঠে বেড়াতে গিয়ে কুঠীর এদিকে বনের মধ্যে সেই যে টিবিটা আছে, সেখানে খানিকটা বসলুম—তারই পরে একটা নাবাল জমি, আর ওপারে সেই বটগাছটা। আকাশ কি অদ্ভুত নীল! ছোট এড়াঞ্চির ফুল এখনও ঠিক সেই রকমই আছে—ক’দিন আগে যা দেখে গিয়েছি, সে সৌন্দর্য্য এখনও ম্লান হয়নি। প্রায় পনেরো দিন ধরে এর সৌন্দর্য্য সমান ভাবে রয়েছে, এতটুকু ক্ষুণ্ণ হয়নি এ বড় আশ্চর্য্যের কথা। এমন কোনো বনের ফুলের কথা আমার জানা নেই, যা ফুটন্ত অবস্থায় এতদিন থাকে। বালজ্যাকের গল্পটা (Atheists’ Mass) তখনই পড়ে সবে বেড়াতে গিয়েছি। আকাশ যেন আরও নীল দেখাচ্ছিল, বনফুল-ফোটা ঝোপ আরও অপরূপ দেখাচ্ছিল। নাইতে গিয়ে বাঁশতলার ঘাট পর্য্যন্ত সাঁতার দিয়ে এলাম।

বিকলে ক্যাম্প-টুলটা নিয়ে গিয়ে কুঠীর সেই টিবিটাতেই অনেকক্ষণ বসে রইলুম—বোদ রাঙা হয়ে গেল, ওপারের। শিমুলগাছটায় মাথার ওপর

উঠে গেল, তখনও আমি চুপ করে বসেই আছি। ( কি ভয়ানক শীত পড়েছে এবার। এই যে লিখ্টি আঙুল যেন অবশ হয়ে আসছে। ) আমার সামনে পেছনে ফুল-ফোটা সেই ঝোপ বন, পাশেই নদী। এক বার ভাবলুম বেলে-ভাঙ্গায় যাবো, কিন্তু শেষ পর্যন্ত উঠতে পারা গেল না এই সৌন্দর্যভূমি ছেড়ে।

নির্জন সন্ধ্যায় প্রতিদিনের মত নদীতীরে দাঁড়িয়ে পৃথিবীর পারের ছাতিলোকের দিকে চুপ করে চেয়ে দাঁড়িয়ে রইলুম—ওপারের চরের ওপরে উঠেছে কালপুরুষ, তারপর এখানে ওখানে ছড়ানো দু চার দশটা তারা। এই নিভৃত সন্ধ্যার আনন্দ সম্পূর্ণ আধ্যাত্মিক—আমি দেখেছি কুঠীর মাঠের যে আনন্দ তার প্রকৃতি Aesthetic, কিন্তু এই জনহীন নদীতীরে কুঁচঝোপ, বাঁশবন, ওপারের খড়ের মাঠ, এদের সবার ওপরকার ওই ছাতিলোক যে বাণী প্রাণে এনে পৌছে দেয়, তা বিশ্বলোকের এবং অন্তরলোকের যিনি অদৃশ্য অধিদেবতা, তাঁর বাণী—আজকাল যেন তার প্রকৃতি একটু একটু বুঝতে পারি। আর আসলে বুঝতে ওইটুকু পারি বলেই তো তা আমার কাছে বাণী এবং পরম সত্য, নইলে তা মিথ্যে হোত। যা ধরতে পারি নে, বুঝতে পারি নে, আমার কাছে তা ব্যর্থ।

কাল দুপুরে রোদে পিঠ দিয়ে বসে অনেকগুলি ভাল ভাল ফরাসী গল্প পড়লাম। তারপর স্নানের পূর্বে কুঠীর মাঠ বেড়িয়ে এলাম। যে জায়গাটাতে অনেকদিন যাইনি—সেই চারিদিক বনে ঘেরা ধুরফুল ফোটা ঝোপের বেড়া দেওয়া মাঠের মধ্যে বসে রইলাম। শীতের দুপুরে নীল আকাশের রূপ, আর সূর্যাস্তের রূপ—এদের অণু কোনো ঋতুতে দেখা যায় না। শীতকালে ইসমাইলপুর আর আজমাবাদের দিগন্তব্যাপী মাঠের প্রান্তে রাঙা সূর্যাস্ত দেখে ভাবতাম এ বুঝি বিহারের চরের নিজস্ব সম্পত্তি—কিন্তু এবার দেখলাম বাংলাদেশেও অমনি রক্তাভ অস্তদিগন্ত স্বমহিমায় প্রকাশ পায়। আজ বিকেলেও সূর্যাস্তের শোভা দেখবার জন্যে কুঠীর মাঠে গিয়ে একজায়গায় কটা রোদপোড়া ঘাসের ওপর গায়ের আলোয়ানখানা বিছিয়ে অনেকক্ষণ বসে রইলাম। ডাইনে একটা বাবলা গাছের শুকনো মগ্‌ডালে অনেক পাখী এসে বসে যেন নামজাদা চীনে চিত্রকরের একটা ছবি তৈরী করেছে। সামনের বনঝোপে, কুঠীর শিরীষ গাছে রোদ ক্রমে রাঙা হয়ে এল, নীল আকাশের কি রূপ! বারাকপুরে আর হয়তো কখনো আসবো না—কুঠীর

মাঠ আর দেখবো কি না কি জানি? আজকার এই অপরাহ্ন যেন চিরদিন মনে থাকে—এর সুখ, আনন্দ ও এর দুঃখ। মাঠ থেকে উঠে গেলাম গঙ্গাচরণের দোকানে—সেখানে সবাই বসে দেশবিদেশের গল্প করচে। অশ্বিনী যাত্রা দলের বাজিয়ে, এখানেই ঘর বেঁধে বাস করে। তার বাড়ী পূর্ণ গৌসাই বলে একটা লোক এসেছিল—সে এখানে এসে গল্প করে গিয়েচে যে, সে বিলেত ঘুরে এসেচে। প্রমাণস্বরূপ বলেচে কোথায় নাকি প্রকাণ্ড পিতলের মূর্তি সে দেখেচে—এ দ্বীপে একখানা পা, আর একটা দ্বীপে আর একখানা পা—তার তলা দিয়ে সে জাহাজে ক’রে গিয়েচে। এ একটা অকাটা প্রমাণ অবিশিষ্ট যে সে লোকটা বিলেত গিয়েছিল!

আজই যাবার কথা ছিল কিন্তু খুকু বললে আজ থাকুন। গত শনিবারে খুকুদের বাড়ী বারাকপুরে গিয়েছিলাম। ও দাড়িয়ে রইল পৈঠেতে আমার সময়। সকালে গৌসাই বাড়ীর পাঠশালা Examine করতে গেলাম। বোষ্টম বুড়ীর বাড়ীর সামনে বড় বটগাছের তলায় যুগল বসে কথা বলচে একজন বৃদ্ধ মুসলমানের সঙ্গে। বৃদ্ধ বলচে, ‘আমাদের দিন পার হয়ে গিয়েচে, বেলা চারটে, এখন ছোট ছোট ছেলেমেয়েদের পথ দেখাও, পথ দেখাও।’ কথাটা আমার বড় ভাল লাগল। দুপুরে আটির ধারে মাঠে যেমন রোজ বেড়াতে যাই, আজও গেলাম। দুপুরের আকাশ যেমন নীল, অপরূপ নীল—এমন কিন্তু অল্প কোনো সময়ে পাইনি। দুপুরের পরে খুকু এসে অনেকক্ষণ ছিল। তাই দুপুরে কিছু লেখা হয়ে উঠল না। বিকেলে আমি গিয়ে কুঠীর মাঠে একটা নিভৃত স্থানে গায়ের আলোয়ানখানা ঘাসের ওপর বিছিয়ে তার ওপর চুপ করে বসে রইলাম। এতে যে আমি কি আনন্দ পাই! একটা অহুভূতি হোল আজ, ঠিক সেই সময় রাঙা রোদ ভরা আকাশের নীচের গাছপালায় ঝাঁক ঝাঁক শীর্ষদেশ লক্ষ্য করতে করতে।

সকালে উঠে নৌকোতে আবার বনগাঁয়ে যাচ্ছি। জলের ধারে ধারে মাছরাঙা পাখী বসে আছে নলবনে। কাঁটাকুমুরে লতায় থোকা থোকা সুগন্ধ ফুল ধরেচে। তবে ফুলের শোভা নেই, গন্ধই যা আছে।

বড়দিনের ছুটি শেষ হোল। আবার কলকাতায় ফিরতে হবে। কে জানে, কবে আবার দেশে ফিরতে পারব!











